

## 目录

【卷一百八十一】 .....	2
【卷一百八十二】 .....	18
【卷一百八十三】 .....	54
【卷一百八十四】 .....	88
【卷一百八十五】 .....	148
【卷一百八十六】 .....	195
【卷一百八十七】 .....	253
【卷一百八十八】 .....	285
【卷一百八十九】 .....	335
【卷一百九十】 .....	351
【卷一百九十一】 .....	374
【卷一百九十二】 .....	407
【卷一百九十三】 .....	436
【卷一百九十四】 .....	450
【卷一百九十五】 .....	465
【卷一百九十六】 .....	482
【卷一百九十七】 .....	501
【卷一百九十八】 .....	529
【卷一百九十九】 .....	545
【卷二百】 .....	567

## 【卷一百八十一】

谢光绮

谢光绮，字方山，宛平籍江阴人。广西候补道。有《蓬吟草》。

零陵至祁阳道中

湘江清见底，尽日好风吹。水派看三合，山形望九疑。小诗题石壁，大字拓崖碑。不分浯溪胜，舂陵独有之。

陈文起

陈文起，字振霞，会稽人。诸生，历官云南知府。

书所见

榻旁鼾睡容难信，画里登临旧有情。立马吴山前事在，神州回望泪纵横。

汪述祖

汪述祖，字仁卿，宜兴人，官浙江知县。

呈彝青大兄

众口称坡颖，文章弟愧兄。知今才辨晰，论古笔峥嵘。家学渊源在，亲年喜惧并。庭闱同眷恋，馀事奋科名。

胡庭麟

胡庭麟，字子振，冀州人。诸生。有《涵吾一室诗集》。

和王介甫阴山画虎图用元韵

边城风劲严冬及，厚坤冻裂鸢啸急。猛虎乘时肆吞噬，攫人不得作人立。瞋目眈眈两杯凸，利爪怒搏石深入。踈身妥尾舌甜，腥风上厉星辰湿。君侯作画笔如刀，物丑纤巨胸中包。世间描摹祇类狗，始识君侯家法高。君侯计虑穷毛发，才横更欲挹戎羯。身郁奇能不见收，想当下笔目眦裂。余自喜遭时泰然，异类慄慄伏穷边。井里乐恺无苛政，学堂高大恣嬉眠，不忆将军射猎年。

魏履初

魏履初，字用五，南宫人。诸生。

### 拟黄山谷书磨崖碑后用元韵

金石歌咏传浯溪，鸿文雕镂书之碑。雨淋日炙字不灭，悬崖石古藤盘丝。明皇无语贵妃笑，国忠作相胡作儿。大驾南巡百官走，宫庙已墟乌欲栖。太子即位继大统，杀贼誓众臣能为。独立一呼泉獍窜，疾雷百里驰王师。天将昌唐李郭出，宇宙吴吐虹蜺挥。受俘策马献天子，宗社重擎安不危。上皇归来嗣皇喜，中兴载咏常武诗。臣结稽首颂圣武，丰碑斗字镌其词。穿凿洪濛走风雨，日月焜耀相追随。我今对此不能去，隔林遥听鸣禽悲。

### 蒋兰畬

蒋兰畬，字香农，滦州人。有《寿云堂诗集》。

### 通州道中

五里人家十里村，微茫烟树欲黄昏。潇潇秋雨槐花路，独策疲驴上蓟门。

### 登碣石

绝顶无人到，天风浩浩间。一杯小沧海，万点伏群山。白云昏连塞，黄云晓出关。蓬莱落西极，终古未能还。

### 完颜守典

完颜守典，字彝斋，满洲旗人，杭州驻防。诸生。有《逸园集》。

### 余杭道中

夕阳红渡水迢迢，西望余杭路尚遥。借问前途向何处，隔溪人指女儿桥。

### 李百盈

李百盈，字丰玉，号荷浦，城武人。贡生。有《荷浦诗钞》。

### 春暮晚眺

天低平楚夕阳明，少女风微扑面生。满径黄花迷蝶影，一塘新水壮蛙声。投巢鸦乱犹盘阵，驱犊人来已罢耕。归路微茫浑不辨，林梢一抹暮烟平。

### 陈国顺

陈国顺，原名树田，字砚农，西平人。有《金水吟草》。

### 落叶

昨夜丰钟报晓霜，风前脱却翠云裳。行踪未敢忘沟壑，根幹还期作栋梁。奉使苏卿羁绝域，迁官白傅谪浔阳。黄沙路远须珍重，枝上曾经栖凤凰。

一曲骊歌别故关，天涯流落几时还。鸿寻旧爪迷前渡，马踏寒声过远山。白板小桥残照下，红墙萧寺暮云间。飘零易触金闺恨，折损芙蓉镜里颜。

瞿应绍

瞿应绍，字子冶，上海人。诸生。有《月壶题画诗》。

画梅

才把梅花写，离亭玉笛寒。一枝君看取，别后寄应难。

江南镫市照花红，春酒梅花一笛风。此去应消驴背雪，看山一路到云中。

画竹

小院露霏微，新篁掩短扉。横琴相对坐，烟翠湿秋衣。

萧萧飒飒半林秋，欲写风枝笔暂留。何处一声声唧唧，暗虫窥月上墙头。

云衣欲卸碧天长，清影高寒半出墙。偷取月筛成粉本，山人画谱满回廊。

吴景延

吴景延，字让卿，江苏华亭人。诸生。

婉变草堂怀古

一径入昆麓，烟树郁苍苍。黄耳冢已没，白驹泉亦荒。仿佛碧云深，当年读书堂。知几惜不早，贾祸在文章。徒令婉变影，高台变凄凉。荒丘莽丛樾，古屋剩枯篁。俯仰馀太息，一声鹤唳长。

郑鸿

郑鸿，字伯臣，曲阜人。诸生。有《怀雅堂诗存》。

读渔洋山人诗集感怀云图宾石超群诸先生皆渔洋裔也

记得髫年学赋诗，锦秋湖畔得良师。不知此日东堂下，可有梅花似昔时。

旧事重思各黯然，酒场诗社已成烟。归来自惜忽忽甚，回首风光十七年。

香海风流人已去，尚馀螺壳擅辞华。渊源家学千秋继，不愧诗名在杜家。

司马桥边曾觅句，桓公台下几探春。他年再访花山路，惜少当时旧酒人。

许宝云

许宝云，字晓迟，江苏山阳人。有《足园遗稿》。

无题

金屏寂寂漏迢迢，谁踏玻璃弄玉箫。银烛烧残花影醉，自拈红豆破无聊。

碧城烟雨晓来多，花气生寒夜有波。惆怅玉楼人语悄，月明愁听采菱歌。

罡风黑海渺难填，慧业人生竟枉然。羨煞嫦娥耐岑寂，金蟾银杵自年年。

壶天风暖几黄昏，情重翻嫌梦有痕。十二珠帘春似海，人间何处觅昆仑。

叠韵答周礼三并柬秦剑青丈

水瑟云璈海上来，诗怀特地为君开。未谙卢骆当时体，已负周秦以后才。溟渤何堪侔勺水，岱宗料不薄纤埃。昨宵梦落淮东寺，曲径花田彻夜猜。

陶一鸣

陶一鸣，字伯雄，江宁人。诸生。有《运甓草堂诗钞》。

晚过清凉山

斜阳远照石城西，一带青山鸟乱啼。零落古坟无客过，晚鸦飞上野棠梨。

汪锡涛

汪锡涛，字秋轩，青浦人。诸生。有《秋轩诗稿》。

白燕

翩然宣至是耶非，五色天书近代稀。萧瑟空梁泥渐落，吉祥虚室梦先归。素心谁与盟朱缕，皓首何堪补黑衣。铁豕海庵遗迹在，春来好向故山飞。

报本寺

山门绿树若相迎，一道红墙隔水明。小试龙团禅榻畔，静听铃语答钟声。

许爱堂

许爱堂，字蓉裳，海州人。有《补读斋诗集》。

春日村居

湿云浓雾压村低，暖盎花畦与菜畦。林角软风双燕语，柳阴斜日乱莺啼。荐饥岁转安耕耨，劫火灰消罢鼓鞮。何处人间无乐土，结茅拟近小桥西。

黄文珪

黄文珪，字星庐，江宁籍婺源人。有《酒痴吟草》。

久雨初霁偕云门四兄江楼小饮

江上芦花白，吟情又入秋。连朝閒对雨，八月冷披裘。牛马呼名久，乾坤放眼收。不妨同啸傲，携手一登楼。

黄文瀚

黄文瀚，字师竹，号瘦竹，江宁籍婺源人。有《揖竹词馆诗草》。

晨起

几日潇潇雨，閒庭长绿芜。家贫诗梦稳，春老客情孤。隔院鸣鸠妇，空梁绕燕雏。汲泉烧活火，一盏助清娱。

董威

董威，字剑秋，武进人。有《一沤集》。

登翠微亭

蹊石攀条上，天空豁醉眸。瀑飞双峡雨，云冷一亭秋。老树得幽赏，空山生暮愁。溪清人不見，流水自悠悠。

孟城山怀古

一峰突兀大江横，有客登临感慨生。云出终输归岫好，泉流不比在山清。微官已夺当年节，隐士空留万古名。浑似终南旧蹊径，参军枉自负幽情。

秋草

一抹荒烟锁夕阳，马啼鞭影总苍凉。可怜无限东风力，不敌西风一夜霜。

邵曾鉴

邵曾鉴，字心炯，宝山人。诸生。有《艾庐遗稿》。

夜梦

夜梦绿萝月，高栖碧玉天。白云飞脚底，老鹤卧松巅。直上鹤边路，独寻云外泉。微闻仙珮响，梦落一炉烟。

前芳草曲

碧纱如梦鹦声小，病起罗裙怯寒峭。一面东风卷画帘，春愁满地谁能扫。楚水吴山路几千，靡芜深院夕阳天。天涯何处无芳草，莫怪王孙著意怜。

黄协埧

黄协埧，字式权，号梦畹，上海人。有《鹤窠村人稿》。

题倪云舫山塘听雨卷子

蕉萃江湖鬓减青，客怀生怕雨冥冥。输君画舸寻春夜，独倚篷窗翦烛听。

柔波涨鸭黛浮螺，泛罢觥船倚醉歌。何似新晴骑款段，山塘七里杏花多。

过筠谿吊故友黄瘦竹

筠谿一曲水沄沄，每对苍筤辄忆君。万点落花词客泪，十年宿草故人坟。诗篇零乱飘秋雪，池馆荒凉剩夕曛。惆怅乡村乏椒醑，祇吟楚些吊湘云。

何允孝

何允孝，字仲友，江宁人。诸生。有《醒斋遗集》。

怀孙子

凉秋瘦若此，之子意如何。愿附天边月，伴君应更多。乡心建业水，寒讯洞庭波。容易一年过，西风老薜萝。

和陈雨丈寂寞原韵

此老书篇结夙缘，幽斋蠹简苦回旋。昨宵微雨草初长，几日东风春弄权。广武原中观逐鹿，天津桥上听啼鹃。逍遥世外浑无与，名理清谈玄又玄。

夜坐

儿添炉火女温茶，坐待三更月影斜。静夜耳鸣疑有雨，中年眼翳欲生花。身鳏到处皆如客，亲老无时不恋家。豪气元龙销几许，将寻野叟问桑麻。

蒋国平

蒋国平，字平叔，上元人。有《平叔诗存》。

宫怨

御沟秋水静潺湲，日暮寒鸦自往还。水殿云房明月苦，玉颜低唱念家山。

舟入邓尉宿還元阁

邓尉山中皆奥区，梅花万树色香铺。夜来梦入云深处，七十二峰时有无。

汪渊

汪渊，字时甫，绩溪人。贡生。有《味菜堂诗集》。

春暝

春烟绿濛濛，吹入薜萝径。暝色赴疏钟，花香落清磬。閒房禅诵歇，空谷鸟声定。何处松风来，幽人扶杖听。

虚堂

虚堂读书罢，微吟倚秋树。疏竹瘦扶烟，凉花澹凝露。开帘月延入，披襟风暗度。何处瓶笙喧，惊残梦如雾。

晓泛

晨起理渔榜，言泛西溪渚。水曙鸡乱号，沙寒鹭翹举。鸣榔何处声，欲往寻烟语。不见芦中人，濛濛隔江雨。

富春山楼

绝磴缘岩入，危楼与岫齐。钟声白云外，帆影夕阳西。江远树如没，潮来天欲低。高风不可即，怀古意凄凄。

重阳



帘卷西风鬓欲霜，消魂时节正重阳。愁如绿水吹仍约，人比黄花瘦亦香。五夜悲秋蛩语急，一镫摇梦雨声凉。年年携酒登高会，谁寄茱萸作佩囊。

#### 书秦少游遣妾边朝华诗后

小红纵幸生前嫁，樊素方深别后愁。一样情天恨难补，西风寂寞古藤州。

#### 黄瑞莲

黄瑞莲，字少白，一字啸百，黟县人。有《韩隐庐诗钞》。

#### 武昌怀古

大别山头望九嶷，武昌城下柳垂丝。因风玉笛来何处，跨鹤仙人去几时。狂到祢衡偏爱死，才如崔颢例称诗。偶来凭眺添惆怅，独立沧江总系思。

上游形胜控蛮荆，一线河流接岳衡。水上不闻湘女泣，月中犹有夜乌声。千秋名士皆尘土，一代兴亡枉战争。借问滔滔江汉水，可能淘尽古今情。

#### 閒吟

草色连天没烧痕，数声啼鸟出渔村。山容过雨青连岸，柳色笼烟绿到门。远水独归彭蠡阔，群峰都让小孤尊。江干閒步微吟久，自写新诗侑酒樽。

#### 徐步瀛

徐步瀛，字眉似，号洛卿，平湖人。诸生。有《南径》、《隘巷》两集。

#### 石梁

无计消烦虑，閒行步石梁。云端见新月，水际尚斜阳。客鬓滋秋色，征衣怯夜凉。隔林有归鸟，绕舍自回翔。

#### 夜雨

作客本无梦，况经雨意深。空阶一万滴，滴滴是秋心。落叶他乡树，孤镫旅夜吟。披衣不成寐，夜半起鸣琴。

#### 万方煦

万方煦，字伯舒，一字对樵，浙江山阴人。有《豫斋集》。

#### 题赵集贤桃源图

桃花开落一千年，落英墨泪红斑斑。白雁飞来天地改，人间那复有桃源。云树苍苍烟水暮，花开远近渺何处。地坼天分了不知，一片赵家乾淨土。哀哉王孙泣迷途，渊明记载亦模糊，武陵仙境今则无。莫谓仙境今世无，青溪红树在此图。陇湟兵气秦人吁，傥可往者吾其徂。

#### 寄谢枚如潼关

才得相逢又别游，雨丝烟柳送春愁。侬心不及黄河水，抱定潼关日夜流。

#### 登望河楼

楼势凌城郭，清秋发浩歌。西风吹太华，斜日渡黄河。陕树临关断，秦云入晋多。生平怀利济，凭槛向沧波。

#### 商宝慈

商宝慈，字子莪，嵯县人。诸生，兼袭云骑尉。有《西溪诗存》。

#### 村居即事

村居风味不嫌贫，白板双扉绝点尘。天为洗除华贵气，疏花小石著诗人。

#### 胡睦琴

胡睦琴，字梓材，泰顺人。有《自怡悦斋诗稿》。

#### 拟储光羲田家杂兴次韵

烟村八九家，结屋十馀亩。同井勤春耕，出入恒相友。客至当具餐，朋来辄命酒。日夕牛羊来，閒散鸡豚走。园种青陵瓜，门垂陶潜柳。远岫列窗櫺，白云生户牖。仓庾粟常充，那复虑升斗。借问宦游人，曾知此乐否。

#### 李麟吉

李麟吉，字也云，会稽人。诸生。有《润玉堂诗草》。

#### 从柯桥夜归郡城

天影堕湖水，群星拥棹飞。夜深船过少，市远柝传稀。破浪鸥惊梦，随风萤落衣。谁家人不寐，鐙火出柴扉。

#### 刘绍宽

刘绍宽，字次饶，平阳人。拔贡。有《厚庄诗文钞》。

怀亡友朱次庄杨子闾寄鲍拙中

少年头角记崢嶸，王后卢前世并称。长阪霜蹄千里骏，层霄风翮九秋鹰。江湖垂老悲寥落，樽酒平生几友朋。岁暮相依吾与汝，苍苍古木附寒藤。

鲸山观瀑

清晨上鲸山，言访凰仙寺。山行未及半，泉声淙然至。仰见瀑流悬，十丈乃及地。入寺寻水源，岩崕倚幽邃。下注百尺潭，上出层峦翠。荡漾忽随风，虬姿生百媚。羈勒脱悬崖，决骤如奔骥。如组复如琴，孰驭六龙辔。雾雨尽濛濛，殷雷魄为悸。不谓耳目间，覩此发皇异。忆昔乐城游，悬流近城治。日夕出衙斋，清游极恣肆。选胜到龙湫，空奇绝思议。诡譎罗万状，下笔不能记。梅雨访深潭，曾亦豪情寄。石门扁舟过，登临失交臂。平生未始游，庐山空梦寐。今兹尘外逢，那复意中事。自叹拘墟人，苦为尘俗累。咫尺不相知，能无山灵愧。书此志吾过，感喟未能置。峭壁列森森，待补摩崖字。

酬朱味温

衰年病体今粗健，揽镜深悲发半斑。世事惯看易桑海，故人相忆隔云山。著书各为风尘误，闭户无多岁月閒。何日论文重载酒，徜徉百二十峰间。

戊午重阳寄鲍中勇

七度重阳七寄诗，年年撚断几吟髭。侧身沧海横流地，极目江山摇落时。秋色渐於枫叶觉，霜风欲逼菊花知。吾侪抚节原多感，料尔登临无限思。

蔡燮昌

蔡燮昌，字耀甫，德清人。有《玉尘山房诗集》。

送族弟鸣冈少尉之瑞昌

马脊山何处，苕峣隔万重。地偏人鲜到，天远雁难逢。春草他年梦，浮云此后踪。弟兄有龙骥，所望亢吾宗。

奉新道中

衰草长松一径斜，隔溪云水罨山家。西风影里夕阳白，开遍野田荞麦花。

陆惟灿

陆惟灿，字光甫，嘉兴人。有《碧漪坊人遗草》。

书梦华先生诗集后

桐城去后无诗史，差喜龚君起故关。何意狴黠喧世日，再闻鸾凤啸云间。清微绝俗陶彭泽，哀艳惊人庾子山。此事千秋公夺席，咿唔小子愿追攀。

褚成烈

褚成烈，字蘧生，餘杭人。诸生。有《玩花轩吟草》。

送鹤龄之棗港

客中愁寂寞，大雪送君行。去路云山乱，扁舟琴剑轻。寒风吹别酒，旧雨感离情。惆怅江干望，林烟两岸平。

吴孚恩

吴孚恩，字蜀青，嘉兴人。诸生。有《笛楼诗稿》。

上巳日与八兄偕同社诸君集面城园

池馆何人扫劫灰，春阴又见长莓苔。水杨柳绿风初过，山鹧鸪啼雨欲来。草色拖蓝迷竹径，花枝缀锦照金杯。纵教不是兰亭会，也欲寻诗日往回。

海蛎

蛎搜螺属，出海涯。惟蛎形较瘦，佐饌味殊佳。髻细青回黛，纹纤紫旋渦。嘘涎差异蛞，负壳略同廬。漂滋生易，零星蠕动皆。尾原难自断，头岂忍常埋。雨歇齐缘岛，潮平密瓣。掬应来浣女，拾更有邻娃。披砾筛鱼管，淘沙湿凤鞋。浮屠层仿佛，湘簟粒分排。姜豉祛腥称，椒香点犀谐。漉羹微下酒，拨火迅投{𦉰黠}。輟想铜鎗滑，盛先瑇碗揩。蘸盐疑雪渗，绽縠想风。盎簇江共，盘堆石偕。来尖初试翦，剜肉欲携钗。珠曲针穿蚁，箝交角透蜗。澈牙喷玉屑，触趾响瑶阶。珍笑蛎充错，羞嗤卵作脍。荐新从鬻社，唤卖踏花街。村酿凭增价，禅鐙可破斋。肥输三泖鳊，蠹夺五湖蛙。击钵催吟兴，分笺愜素怀。深惭拈险韵，掇摭扯入诗牌。

王朝清

王朝清，字肖兰，永嘉人。诸生。有《留砚山房遗草》。

春暮忆别

鬢丝禅榻事全非，瘦尽深红绿又肥。人去新愁随草长，春归残梦和花飞。流莺院落东风冷，啼鴂天涯暮雨霏。盼望锦鳞消息断，祇将心事托金徽。

王西溥

王西溥，字益仲，号栖园，仁和人。

### 秋兴

蒹葭露白蓼花红，市散溪桥立晚风。蝙蝠堕檐疑病鸟，蜘蛛补网待秋虫。古人骸骨千年至，造化炉锤万物铜。佛笈仙经披览遍，两閒何地著虚空。桑下分甘遍子孙，老翁性不耐愁烦。高撑瘦骨巡檐鹤，牢锁秋心入笠豚。篋笥之中纨扇弃，君亲而外布衣尊。遥知边塞风尘静，天马西来贡大宛。

### 朱克柔

朱克柔，字强甫，嘉兴人。诸生。有《朱强甫集》。

### 上黄冈胡稚香先生

冬山奇翠剥不落，再拜今见胡先生。天下承平杰士老，鹰雕翻多乡里名。兄亡弟废分产渰，八口并合一而三。有母有母毫更甘，入门一笑风澈肝。万金委托常在腕，袖中萧萧卖田判。咸同上下嬉天狼，出没黄麻百战场。先生时作绿鬓郎，落日横戈每跳踉。欲走从军亲在堂，矧今慈竹严高霜。酒酣纵谈胡益阳，中兴大业网挈纲。呜呼皇天哀民命，三十鰥鱼自贞劲。行年半百未为衰，益阳中丞傥见之。

### 麻城卧疾

一病方知客，思家意陡归。昏明每计杪，潦懊自斟衣。倚枕梦痕碎，侵人药影肥。数行游子泪，未敢寄庭闱。

### 张陶

张陶，字淑园，平阳人。有《淑园诗存》。

辛卯春余与松生於狮麓作别业数椽颜曰宾庐盖取去住无常之意

同来徐孺子，小憩此宾庐。非止避尘市，亦堪供道书。云霞随去住，山水任樵渔。此外一无有，清风吹太虚。

### 甘树椿

甘树椿，字雨亭，潜江人。贡生。有《灵庵先生遗诗》。

### 书怡亭铭拓本后

观音岩畔波初起，银涛直泻天万里。怡亭寂寞山月高，空馀断碣沈江底。大书深刻永泰年，铭者裴虬笔如椽。李莒八分阳冰篆，卿云采绚星珠联。吁嗟乎！世事白衣幻苍狗，陇西词客今何有。武昌江上片石存，遂使姓名长不朽。君不见，嘉祐七年上泉书，苔纹剥蠹沦瓦

缶。

#### 马沧湖感旧

白鹤楼前水满陂，沿隄杨柳碧如丝。中流笳鼓都销歇，祇有荷花似旧时。

#### 江村晚眺

遥天一色郁青苍，数点寒鸦趁夕阳。流水无声莽萧瑟，满林黄叶落秋霜。

#### 胡醇

胡醇，字万六，号雪舫，广济人。诸生。有《听香阁诗草》。

#### 宿青山林精舍

夕阳暝前山，迢递出深谷。引领望青林，纡径凡百曲。石尽泉声小，秋高山气肃。行行得古寺，历历见乔木。月出僧未归，林深鸟先宿。山门不见人，凉露下修竹。

#### 雨后渡江

雨歇风转生，孤舟疾如鹭。濛濛烟霭中，望见汉阳树。霁景汇中流，人声沸古渡。不见晴川楼，疏钟飒何处。

#### 独夜

独宿不成寐，萧萧天北风。孤村萤影外，荒岁犬声中。笔砚生涯拙，兵戈世路穷。鐙花破愁绝，一夜伴人红。

#### 登鲍明远读书台怀古

木落寒崖鹳雀哀，夕阳愁入鲍家台。流空日月堂堂去，拍座烟云故故来。骨肉至情工作别，帝王大度不容才。古今何限穷途泪，万里江山一酒杯。

#### 杨毓秀

杨毓秀，字子坚，东湖人。诸生。有《紫清楼集》。

#### 东湖竹枝词

隔岸西洲画不如，桃花照彻野人居。洲边春涨浓於酒，醉煞花魂化作鱼。荷衣裁作玉槃形，万点荷灯万点青。昔日秦兵今不戒，移将灯影照双星。

#### 迟子润不至

岁除寄我病中书，相约寻春过敝庐。迟尔不来春欲暮，可曾病与岁俱除。雨寒邃谷莺声寂，花落清江水涨初。几日侯芭能载酒，元亭惆怅子云居。

朱应庚

朱应庚，字恢元，号菊坡，湘乡人。诸生。有《菊坡诗稿》。

题吴称三广文石筍山房图

粼粼石筍辟天关，时见空林放白鹇。寂寞幽人三亩宅，玲珑晓日一房山。披图百里成孤往，为客经年尚未还。亦拟入山寻洞壑，秋江风雨暮云间。

望金华山

双龙洞前青徧斓，夜半空林招白鹇。赤松一去不复还，涧中怪石横榛菅。山云堕地秋如水，落日苍茫几千里。浩浩山中高卧人，悠悠道上远游子。破衣赤足一顽仙，门前老桧三千年。白羊倏忽不知处，菖蒲花发月婵娟。荒岩日落秋风早，游情历历东阳道。紫芝如掌尚可餐，何用沧波访三岛。

傅寿萱

傅寿萱，字韞真，号补痴，湖南宁乡人。诸生。有《补痴诗草》。

早秋

自负元龙气，频登百尺楼。万山悬暮雨，一夜报新秋。诗思题襟集，归心杜若洲。那堪遵渚雁，泛泛逐沙鸥。

李光炳

李光炳，字文珊，号晓蓉，湖南桃源人。诸生。有《小芙蓉馆遗稿》。

拟黄鲁直谢黄从善司业寄惠山泉

惠山寒泉冰雪俱，故人惠泉兼惠书。调水符仿坡公法，不愁鱼目混明珠。呼儿烹鼎试云腴，两腋清风生穆如。愿携诗筒兼茗碗，一蓑一笠老江湖。

曾纪元

曾纪元，字麟父，湘潭人。有《思兰堂诗集》。

端午舟中暴雨

风吹十万柳丝摇，断锁蛟龙卷怒涛。山色入船人尽绿，水光穿电雨翻瓢。浪中豪气随云上，醉后诗魂倩月招。此去应连天不远，群仙歌吹正清寥。

廖寿清

廖寿清，字百梅，衡山人。诸生。有《白山集》。

过永兴

试凭高阁上，频看乱谿流。日落孤骖接，天空楚岫幽。兽形盘石怪，雁影入边愁。下界谁吹笛，临风一倚楼。

宋士冕

宋士冕，字频之，湖南桃源人。诸生。有《寸草吟》。

山中杂句

霜痕深染一林殷，岁暮人家各自閒。酒盏熏炉收拾了，邻翁约看雪中山。

黎宗练

黎宗练，字天石，浏阳人。有《澄观集》。

暮春东郊晚眺

云气空濛落照迟，鸣鸠穀穀雨如丝。重来被酒东门路，又是风花扑面时。谿山曲曲掩云岩，谿水粼粼落照衔。好是湘江船未泊，绿杨影里见风帆。

李光汉

李光汉，字契可，岳阳人。有《燕台杂咏》。

曾主政丙戌九月还湘丁亥三月复抵京诗约上巳同游

黄华丛里饯行旂，独系燕台思悄然。秋月衡云归梦绕，春风沂水故人旋。他乡共著游山屐，上巳同乘载酒船。身世百年几閒日，莫辞沈醉杏花天。

邓方

邓方，字方君，一字秋门，广东顺德人。有《小雅楼诗集》。

夜宿山响楼



危楼据绝顶，雨歇烟空濛。檐际缩馀溜，林杪悬长虹。入门僧罢参，袅袅西堂钟。洗药供白佛，{难...}蔬饭青童。谭久溅花雨，坐深吹竹风。时闻百泉响，远出西涧中。群喧转成寂，众象皆为空。夜明山鸟惊，月挂前溪松。澹澹香霭没，微微殿角东。孤吟烛隐绿。短睡鐙留红。愿言谢尘鞅，常此对支公。今宵石床梦，梦过东西峰。

#### 雨后湖亭待月

湖光荡片云，上下照空碧。澹然清波间，一雨洗秋色。空江送残钟，馀霞映石壁。亭亭孤月开，天水如不隔。丛树忽掩映，烟中鸟语夕。招要登古亭，列坐据危石。草根滋露光，满林泫深白。夜半清籁鸣，境喧意弥寂。倚柱思重裘，凭栏岸轻帻。梦醒单床寒，微闻松露滴。

#### 永绥胡十二客九江感寄

一天凉影雁南还，人在匡庐杳霭间。飘外晚云三楚树，马前秋雨六朝山。风波远客眠餐损，兵火荒江战守閒。近得故乡消息否，下游牙纛海门关。

#### 荒村

独树营边芦雁啼，荒村一月水东西。云中不见乌冈影，衰柳秋风十里隄。

#### 林毓麟

林毓麟，字涛如，华阳人。有《澹秋集》。

#### 夜过李咏南村居

柴门深掩静无哗，路入丛阴村径斜。架拥图书高士业，香分蔬酒故人家。檐前蜡炬三更月，水底笙歌两部蛙。坐久不知行路倦，挑鐙还与话桑麻。

#### 赵崧

赵崧，字筱容，遵义人。有《含光石室诗草》。

#### 登惠山作

双阙暮云间，登临意自閒。孤舟晋陵水，落日太湖山。泉响磬声答，天空飞鸟还。梅花已开遍，煮茗对禅关。

九曲亭边水，游鳞荇藻齐。品题传陆羽，呜咽出梁溪。钟梵云中合，神仙洞府迷。游人乐忘返，塔影下山西。

#### 高铭彤

高铭彤，字炜珊，一字彤伯，贵筑人。有《湘榭宦遗稿》。

拟李昌谷天上谣

九扈星冷摇空青，仙溪玉女浣白云。桂露疏疏湿银兔，吴质枕霓叩烟语。湘娥桔芷呼秦凤，红桃辍花息春梦。帝垣烟暖三千里，绿牒金章传帝子。裁霞策日璇阶舞，风应鹅笙答灵鼓。鸿龙抒鳞争驱逐，衍溢天河散银雨。

## 【卷一百八十二】

周绍昌

周绍昌，字霖叔，灵川人。光绪甲午进士，改庶吉士，历官大理院推丞。

和郑斋同年落叶诗

高柯交戛万年枝，无榭荒凉九曲池。满地月痕人去后，一天秋色雁来时。辞根蓬转真无奈，候管葭吹会有期。惆怅御沟流不尽，题残凤纸费才思。

构难群阴惨不舒，起元贞下定何如。天心晦昧成丰蔀，人意推排到剥庐。班马萧萧声始尔，征鸿渺渺目愁余。瑶阶鸚鵡鸣何急，可似长杨奏赋初。

宝玦珊瑚委路隅，延秋门上白头乌。已无刻楮传神削，空有题诗击唾壶。宛转尽歌桃李子，飘飘难著凤凰雏。归巢倦羽栖初定，币树惊飞历乱呼。

飘茵堕溷复沾泥，比似寒花命亦齐。踪迹偶同风聚散，音声莫辨省东西。鸱张远势凌鸦背，狼籍馀痕衬马蹄。百六运穷元会改，病株仍望及春荑。

一角红墙锁绿春，沈沈铃索悄无人。良时容易流年换，斜日徘徊顾景频。曾逐游丝横碍路，生怜弱草上栖尘。恒河沙数量金粟，持向如来问夙因。

谈笑麾戈驻夕曛，朱旗猎猎闪重云。不知团雪凭谁主，先遣凌霜到此君。落笔取材供翦刈，析薪佐爨许支分。淡浓半抹胭脂色，雕饰全输锦绣纹。

篆香烟袅鸭炉温，伏枕黄昏深闭门。归去王孙应有怨，思来公子又何言。差池燕羽空中影，解脱虫丝吐后痕。莫读兰成枯树赋，江潭凄怆那堪论。

蓬瀛久辍列仙班，时见乌朝数往还。销寂潜虬敖嫩水，离离徙冻雀纒千山。流黄度曲填金缕，捣素缄愁寄玉关。不是甘泉烽火近，有人心折大刀环。

弦柱初调锦瑟年，生桑又见海成田。也知一刻难賒夜，其奈群飞竟刺天。五百拣花人早

罢，三千扫雪事虚传。羽林散后宫车出，太乙门东急暮蝉。

菱枝弱不耐风波，每唱清歌唤奈何。汲井辘轳牵玉虎，生街荆棘没铜驼。阳春惠泽忘应久，曷日前盟负已多。夜梦钧天张广乐，五云楼阁郁嵯峨。

閒庭露湿候虫鸣，世态炎凉话不平。别院扫妆簪白柰，新宫高宴锡朱樱。群儿掇拾争矜贵，息壤丁宁订誓盟。桑下本无三宿恋，壶中仙历自长生。

虬户葳蕤永昼扃，上林朱果尚芳馨。谁吹暖律温寒谷，忽涌凉波接洞庭。瞻鹿民狂音不择，翦鶉天醉问无灵。偶从凝碧池头过，急管繁弦忍再听。

李祖年

李祖年，字搢臣，武进人。光绪甲午进士，改庶吉士，授文登知县，历官汾州知府。

甲子正月十九日韦斋用松岑险韵诗见贻步韵作答

我似桃源人，久已忘秦汉。曝檐咬菜根，深禁作烦蒜。感时时一吟，不忌乌台案。鸣鹤久在林，弃薪难供爨。偶作朋樽招，新旧雨各半。狂来恣涂抹，狼籍似画墁。坐中多豪英，诗城作桢幹。斗韵费与金，搏狮气尤悍。干将与莫邪，不知几辟灌。勇夫或再厉，怯者颜已汗。丑效西施顰，精愧稽康锻。敢诘步后尘，聊供君一撙。

是日绮石老人养疴不至倚枕绘王瓜芦菰以志昔日春明游宴之乐为题其后

闻君病起却臃，苦忆园蔬齿颊香。解热不须凭绛雪，拥衾自写养生方。冬畦预养佐春盘，应共唐花一例看。自幸此身非热客，转嫌斯味太清寒。

韦斋得灵璧奇石於沈氏耦园置梦墨亭忭道人赋诗张之余亦继作

剔藓扞萝访旧殷，壶中新驻一房云。玲珑艮岳真形在，戛击鸣球绕指闻。徙宅姬媵依福地，熨阑花药度微熏。仇池合是诗人物，佻巧鸣鸠浪策勋。

陶邵学

陶邵学，字子政，又字子源，番禺人。光绪甲午进士，官内阁中书。有《颐巢类稿》。

鞠坡精舍探梅致跂惠

朝闻百鸟鸣相呼，春风几日来庭除。闭门病客一事无，强起寻花破羈孤。城北十亩开精庐，野塘石磴相萦纡。入门一笑回清矚，青枝红萼千万株。繁英乱蕊密复疏。横斜偃蹇各有态，堕落荒寒谁与娱。我来手把青珊瑚，天风习习吹五铢。罗袂无声侵玉肤，绰约娟仙藐姑，餐霞吸露清而姝。无言独立意有馀，令我绮念无由除。一朝宿痼如亡逋，忆昔看花与子俱。锦茵醉倒还相扶，赋诗彩笔追吴歔。越才蜀隼联襟裾，五年坐惜风烟徂。故人流落天一隅，今来对花意踟蹰。恨无玉斝相斟，安得千里邨君书，扁舟归来沽玉壶。春风唤起花魂苏，莫

遣烟雨堆寒芜。

### 秋夜读苏文忠集

一镫微荧照孤檠，坐倚陈编发高咏。平生颠倒为公诗，冷玉寒泉秀相映。忆昔真仁符道泰，相从京洛风流盛。好士朝逢六一贤，奇才老识宫中圣。岂意宸谟一朝变，天启谗人干国柄。名成高众亦何益，用已得时嗟未竟。世事苍茫难可料，纷华百战犹能胜。至今一字如琼瑰，当时片语伤机穽。流滴蛮荒賒一死，历将艰阨试豪横。歌齐同谷意犹放，表谢韩公语无佞。十年尘劫扫空华，万里江山助清复。磨礲或者天有意，忠谏直为神所敬。百回不厌整襟读，再拜敢持轻语评。诗成月落星斗稀，门外寒虫不堪听。

### 院中多蛇时复入室作驱蛇行

百年灌木荒江宅，币地蓬麻少行迹。门外千崖积石高，中有虺蛇长挂壁。朝来入室惊始见，驱吓儿童愁婉孌。小蛇扑杀三四馀，大蛇奔窜犹睚眦。我今寄食走穷谷，常恐失身为汝狙。人言此物足奸诡，伺影闻声巧莫比。过首容身吾未能，草动风摇尔何喜。妻孥爱我劝我还，我笑不顾心悵然。丈夫一举动寥廓，骑龙刺咒当攀天。纵无三尺追汉祖，笏击犹期孔道辅。扫除奸凶净六合，么麽岂足污碇斧。深山自是多魑魅，道路仍闻足豺狼。手中利剑思一鸣，天上威弧会须怒。蛇乎蛇乎当远去，草间窃活吾羞汝，明日九关诛猘獠。

### 水亭夜望

野气日沈夕，清光照独游。萤专草阁夜，鼃王野棠秋。残月犹明水，疏星欲倚楼。苍茫云壑外，何处隐灵虬。

### 妖鸟篇

有鸟生炎海，飞鸣历中洲。似鵬形不祥，况乃恶声如鸛鹒。朝鸣但耳，暮鸣增人忧。霜凝日落百草死，更闻此鸟鸣啾啾。纵横四野间，历乱呼其俦。嗟汝身虽微，厉欲凌九州。老鹤知时寒，低飞尚垂头。汝独声呀呀，妄语丛愆尤。道傍苍鹰应秋始习，一击不中为尔羞。居然声气彻闾苑，造作百怪无时休。百鸟奔春阳，汝独凛凛催穷秋。成形受气安可化，汝谁有口不自由。周公诛妖鸟，遗教不可求。千年遗孽死不尽，坐令日月惨黶、天地为悲愁。我欲请王母，天网忽下收。东海求凤凰，西山鸾鸞鸣相酬。翛然六合间，众声和且稠。此鸟闻之大恨死，馀者惊窜，一日卷舌尽入喉。

### 孤云

一片孤云出岫微，空中蔼蔼惜馀辉。九原可作吾谁与，万事相看昨已非。家擅雕龙新学贵，市无屠狗故人稀。年来世态堪惊绝，岂独平生叹志违。

### 徐树昌

徐树昌，字寿臣，平湖人。光绪甲午进士。官户部主事。有《对竹居士诗草》。

### 戊戌岁杪感怀

三更欹枕不成梦，爆竹声中春已回。此后年华消鲁酒，从前诗卷付秦灰。云龙北阙看人去，雾豹南山许我来。薄薄田园幸无恙，愁怀聊对烛花开。

### 郭传昌

郭传昌，字子治，侯官人。光绪甲午进士，官工部主事，改博罗知县。有《惜斋诗集》。

### 舟中望罗浮

上不见到惠州，下不见到广州。彼何山哉罗与浮。吾闻罗浮之山，古称第七洞天三十一福地，葛洪於此神仙求。神仙羽化衣亦化，洞中胡蝶盈千头。又闻赵师雄，天寒日暮山中留。淡装素服见彼美化身，果是梅精不二山合离风雨会，四百馀峰奇景难具搜。通人畸士绝罕至，大苏以外空千秋。吾今忝为罗浮长，此福谅自前生修。不然浮沈宦海岁十稔，敢望名山境内为诸侯。山中梅花正透发，可惜忽忽未暇开心眸。忽如山灵招手语，今者不乐逝者休。簿书兀兀事鞅掌，物外那得閒身抽。吾狂掉头固弗信，一官未必如累囚。平生足迹半天下，岂其兹山咫尺慳敖游。但薪从公黽勉政多暇，四方无事民无偷。就难竟著谢公屐，亦宜轻舁占城兜。摩崖大书勒文字，往来毋作名山羞。

### 晨往惠州

卅里趲程兼，晨征为避炎。草花明锦绣，竹露洒帷檐。渡水行沙嘴，穿山见塔尖。人家城阙外，日影乍平檐。

### 归涂雨甚憩茅亭

似为林垌好，天教莫使还。风狂能撼树，云走欲移山。茶话人三两，茅茨屋一间。村翁吾羨汝，看雨得真閒。

### 白沙

林表大旗悬，飘飘拂远天。人家全绕市，官渡各停船。江水依山折，沙隄抱岸圆。罗阳城近见，直下路如弦。

### 小南海

随喜到祇林，何年始布金。西来初地占，东去大江深。山静宜禅悦，云慈见佛心。游人浑不解，合掌拜观音。

### 龙华道院题壁

天气阴晴变，秋生冷暖间。疏星穿竹见，急雨上墙斑。报赛人初散，催租吏未还。小门叉手立，簿领暂宽閒。

### 重九次柏塘

不待约登高，山行仆马劳。拨云寻绝磴，随日下平皋。旅次犬迎吠，邻舂鸡乱号。食新逢岁稔，无意更题糕。

### 发石坝往派尾

日色不下地，山光一稜云。濛濛松顶雾，撼撼蔗田风。客路黄尘里，人家绿树中。村民如见谗，行李几倥忽。

### 放言

山不能摩九天，水不能没九渊。山高水深不见尔，但见浮空波浪随云烟。人生又在云烟波浪里，天地置此胡为焉。我思天地亦游戏，点缀光景耽新鲜。不然黄土抁人可长在，何用劳生息死时推迁。旁人听者谓我颠，子不知我安知颠。安知天地有时尽，安知十有二万年。安知今日是何日，我且颠颠放倒眠。

### 李刚己

李刚己，字刚己，南宫人。光绪甲午进士，官大同知县。有遗集。

### 立秋呈范先生

仰陪夫子下阶吟，呜咽鸣蝉向我瘖。半月偃城动凉色，一风入木作秋音。星云高灿还相媚，雾雨横凄忽见侵。应有列仙在空阔，徘徊不下暝烟深。

### 上范先生兼简子城兄

花香能醉枝头蝶，蝶亦绕枝不忍飞。有鸟啼呼下空阔，向花深处恋晴晖。六街风动沙尘遍，念尔鲜衣归不归。

### 辟疆以诗送别即次原韵答之

湘乡太傅轺雄俦，笔力横挽三千秋。吾师继之道益大，如开沧海朝群流。罗珠网玉不知数，我瓦砾耳犹相收。束发受书今十载，足疲路远无时休。扶摇羊角未能上，飞抢还作榆枋游。天寒岁晚林木死，风烟惨淡交龙虬。凄绝曾张旧游处，白日一跌归冥幽。孤寒八百沦草莽，大帙三万开穷愁。孰料纷拏燕雀际，鸾章凤质惊双眸。吐气刚如断马剑，论文高似元龙楼。诸公谁司荐达事，蘋藻可以为神馐。昨来苦语更牵挽，归期已决焉能留。事变真难巧历算，出处或作山灵羞。侯王将相亦人耳，空有馀责如山丘。

### 思归

汾水秋风雁又归，故园东望梦魂飞。尘冠欲挂仍无日，庭树新增复几围。水远坐输鸥独

往，竹荒不救凤长饥。愁来策马西郊路，一曲劳歌送落晖。

欧阳述

欧阳述，字伯纘，号笠侪，彭泽人。光绪甲午举人，历官江苏候补道。有《浩山诗集》。

送煦庵兄至朱仙归途偶成

归路马蹄熟，夕阳蝉语忙。秋心动寥阔，别恨满青苍。沙起村墟失，天低草树长。孤踪休感喟，青眼有垂杨。

守风杜关塘登岸望月

篷底饭初罢，小步湖风前。夕照入已尽，夜气来无边。四山静同梦，远水寒生烟。渔镫点遥岸，光与疏星连。稍时月东上，樯影皆西偏。清光似怜客，故驻匡庐巅。此际绿杨城，二分人共妍。以我伫望劳，知彼心旌悬。宵景足凄感，况复别恨牵。徘徊永不寐，风露凉垂肩。远渚萤火没，浅莎虫语联。归舟意悄然，石濑流涓涓。

署楼夜起

开帘拂面水风腥，叶堕空林带雨听。半夜鸡声啼似柝，遥天鱼眼大如星。下方营梦人都蚁，沧海随波我亦萍。拟学义熙陶靖节，还愁醉眼有时醒。

水族博物馆

日人新学重格致，馆名博物靡不陈。水族一馆尤诡异，移取龙宫蛟窟来。人尘海滨辟场筑，复室崇垣周护开。洞门人门阴湿但水气，客行水底同蛟人。研怪石四围立，玻璃深嵌光磷磷。壁空贮水复贮气，天光斜射明纤鳞。人鱼戴头走戢戢，文鳐鼓翼飞振振。龟瞪六眸鳗九节，鳄长三丈鲇千斤。鳢红鰾赤鲫金色，鼋白蜃黑螭青文。鲛鰈嶷嶷鱣魮触，虎蛟策策奔。蝦鬣支筇拥剑，蚌壳挂席蚶回轮。山螭结屋若瑶岛，石吐华如锦茵。车渠挥扇螺抱瓮，明馥翻手蛎摇唇。修廔圆各娟妙，觚瑋瑁何轮囷。此外河伯小吏海若臣，元衣督邮青郎君。翠鳞黄甲难具状，奇情诡态尤纷纭。中间一室开瓮牖，内悬巨画画有神。隔镜可望不可即，但见水底璇宫贝阙浮氤氲。天吴螭呼欲出，土肉石华高可扪。紫{艹罍}披拂带芝乳，锦砂灿烂铺金银。珊瑚蟠磴树连理，琪花缀壁英缤纷。深处青红绚光怪，水玉草石无由分。相传北岛有奇士，探幽亲入蓬莱根。归摹所见作斯幅，献之天府藏为珍。颁悬此馆佐参究，万邦观者称叹频。吁嗟人巧夺造化，直从奥府穷涯津。牛渚无烦犀角照，淮南何必蜃脂焚。自教灵怪见白昼，任人狎视无敢嗔。我思禹鼎象魑魅，但图其形逸其身。今人格物务精至，刻划未免伤真醇。我言虽迂理则茂，海{豸}希拜舞如有闻。出门目眩愁直视，霞烘海色初黄昏。

王孝偁

王孝偁，字芑庄，会稽人。光绪甲午举人，官庄河同知。

郊游杂咏

东望扶桑气欲吞，几人思痛蓄烦冤。且除沧海横流感，来试层楼酒一樽。

碧草青磷忆旧无，霎时宿莽化康衢。剧怜夜夜秋坟泣，纪变谁为鬼董狐。

三岛仙人绛色襦，绿阴深处屐声粗。分明飞阁通波地，添续东瀛仕女图。

钱旭东

钱旭东，字震初，号幼溪，庆阳人。光绪甲午举人，官平番教谕。有《瓣香斋诗草》。

春阴

春风翦翦送春寒，残雪初融尚未乾。欲雨不能晴不得，云阴应为养花难。

李謏

李謏，字备六，冀州人。光绪甲午举人。

松风用黄山谷武昌松风阁韵

僧房一簇荒村前，古壁苍黑经百年。老僧沽酒觞群贤，俄尔耳边声沸天。浑如峻岭飞百泉。跳涧赴壑争潺湲。又疑广乐张仙筵，嗽嘈万管喧千弦。不则双峡束长川，激崖咽石波怒旋。出视绿阴低屋椽，惊飙激柯摇碧烟，巢鸟惊怖宵不眠。嗟我僻壤长系挛，惟见杨绿桃李妍。今到此间颇适然，岩壑风景眉前悬。愿归我庐携青毡，长伴老僧饭斋饘。奚事布袜青行缠，颠蹶千里寻林泉。

两松阶旁各魁然，昔时所植今百年。伟幹矗空柯倒悬，浓阴蔽日云压椽。依树稳坐苔为毡，长风送响惊鹤眠。枝飏叶摇颀绿烟，洪涛郁怒翻长川。戛金击石鸣丝弦，嗽嘈繁声凑华筵。十年茅屋长拘挛，倦趾有如修绠缠。未曾健步遨林泉，今睹此景雄且妍。愿寻万本栽庭前，壤培泉沃场师贤。远阴幕地高撑天，空中时作溪潺湲。探胜赏奇饥忘饘，日携琴酒长盘旋。

许受衡

许受衡，字玗楼，龙南人。光绪乙未进士，刑部主事，历官大理院少卿。

丁酉元旦口占

瞥眼光阴卅六年，春风送我到幽燕。宦途冷淡身如寄，客思迷离梦未圆。北地莺花嫌太晚，南朝烟柳忆从前。料如念远书应达，每为循环一惘然。

送杨昀谷比部理刑热河



鄂博依南极，朝廷重北门。镇边资富范，决狱访申辕。驿路秋心肃，官仪汉室尊。旗亭漫回首，车马正云屯。

吴纬炳

吴纬炳，字经才，钱塘人。光绪乙未进士，改庶吉士，授编修，历官御史。

题铜官感旧图

开府精诚首誓师，髯参才调善扶危。一从鸡犬皆仙后，重话龙蛇起陆时。冯异名高尊大树，仲文意尽惜枯枝。相公造命传疑信，李广难封叹数奇。

胡思敬

胡思敬，字漱唐，号退庐，江西新昌人。光绪乙未进士，改庶吉士，历官广东道监察御史。有《退庐集》。

送江杏村还莆田

江郎鬓发垂垂白，一伏青蒲便挂冠。大道黄尘驰羽盖，长门秋雨赋齐纨。酒边骂坐须如磔，梦里朝天涕亦寒。欲补谏书成野史，墨池馀滓起波澜。

归卧柴桑种秫田，东华回首泪潸然。九乌未落惊弓堕，一鹗孤飞愧瓦全。遗献待寻晞发集，朗吟遥盼浣花笺。他时幸践还山约，迟汝同烹第六泉。

江亭小集

辇下文章日寥寂，孤亭兀坐一轩眉。春阴醺醺寻茶梦，宿草茫茫入酒悲。欲障浊尘风又起，乍聆清唳日将移。眼中百雉岩峩甚，曾陷危城听鼓鼙。

清明出郭访袁忠愍墓

行行路何纡，黯黯春将暮。老鸦衔纸钱，挂在梧桐树。十亩荒园径丈碑，云是胜朝都督墓。都督来，敌胆怖。手挽强弓身短袴，八千健儿塞下募，召封平台中使趣，宠以貂裘劳以醑。一朝谣诼起，五城塞黄雾。大道横尸不敢收，妻孥尽室投边戍。渚阳铁骑坚如山，设间陷君君勿悟。峩峩龙井关，谁实纵之度。慷慨勤王师，千里来相赴。自坏长城快敌讎，九州一错真难铸。地下孤魂不可招，闕宫疑有神呵护。珠娘窈窕来上坟，沽酒脱裙香满路。乱世生才疑不祥，蛾眉愈好人愈妒。君不见辽师一溃关门开，经略烦冤向谁诉。头颅裹血行九边，尚坐汪杨代行赂。

寄秦按察滇中

词客南迁雁未来，百年怀抱向谁开。遥瞻爨玩行师地，颇惜承明著作才。三策平边官豸节，一言聳听失乌台。水曹诗事谁能说，回首觚棱有百哀。

## 别谢文节公祠

鬼星犯座斗柄移，海风吹折枯桑枝。翻山倒海地轴裂，六鳌并力屨难支。丈夫屹立未可惧，剥复相代会有时。吾乡宋末有二老，不以节见谁则知。谢公无官亦无禄，并无一旅随奔驰。敌军开门受降表，大江南北无立锥。聘书到门以死拒，窃愿上比古伯夷。仲尼尊周守臣分，宜於革命多恕词。《三百篇》终录《商颂》，未敢滥及《采薇》诗。首阳饿死志未白，不遇公等当告谁。太公蒙面诛妲己，应立微子而臣之。马前数语寓史法，左右敢以兵甲施。大义凛凛在万世，公急起与相扶持。当公变名学卖卜，混迹岂屑同子皮。麻衣大哭建阳市，一琴一砚常相随。砚则毁矣琴则碎，铜驼卧棘秋生悲。幽燕古俗尚奇节，庙食於此金曰宜。我欲从公卜死所，公其鉴我示我龟。骊驹在户不忍别，愿荐兰芷招湘累。悯忠相去不咫尺，恨未一读《曹娥碑》。

## 湖上迟魏大未至见寄

万种伤心事，伤心祇在心。解人惟见汝，避禄早归林。但倚书为命，宁愁突不黔。他年徵野史，应向鲁溪寻。

细数南州彦，谁居第一流。吾侪姑自勉，硕果听天留。未息巴人讼，方怀漆室忧。足音终寂寂，垂涕望高丘。

## 晦若临别贻笺有侥幸不死冀得再见之辞因赋长句奉慰

昔贤忧乱惟祈死，身死犹存耿耿心。今日天将留硕果，吾侪祸不到东林。信陵醇酒馀孤愤，杜甫麻鞋託苦吟。他日南归作流寓，昆山犹可託知音。

## 康有为

康有为，原名祖诒，字长素，一字广厦，号更生，南海人。光绪乙未进士，官工部主事。有《万木草堂丛书》。

君士但丁有遗殿户牖尚存屹然高十丈其制摩色金盘甚丽多其遗制吾曾购得之

君士但丁帝，雄姿不可方。丹青有遗殿，户牖半颓墙。三国归灵统，东都辟裔皇。金盘摩色丽，摩抚起苍凉。

那釐利在锡兰山颠六千尺开大原有湖多花不暑风景佳绝当为南洋诸岛最胜处

楞伽绝顶六千尺，罨画明湖翠壁开。繁柳繁花漏园路，不寒不暑好楼台。

锡兰再访佛迹数处其塔殿最庄严者皆千年物非佛迹也自晏那拉积布拉外楞伽真迹近在欧林布二十里者迦利膩圆塔颇大周廊二百柱天已暮然鐙掷花佛前塔前有菩提树僧摘叶相赠

圆塔嵯峨迦利膩，周廊绕遍摘菩提。此是楞伽说心处，道场悄悄佛鐙凄。

耶路萨冷观犹太人哭所罗门城壁男妇百数日午凭城泪下如糜诚万国所无也惟有教有识故感人深远吾念故国辄为怆然赋凡百一韵

崇壁严屹屹，围山上摩天。巨石大盈丈，莹滑工何妍。筑者所罗门，於今三千年。城下聚男妇，号哭声咽阗。日午有数人，曲卷肩骈连。凭壁立而啼，涕泪涌如泉。惨气上九霄，悲声下九渊。始疑沿具文，拭泪知诚悬。电气互转载，真哀发中宣。一人向隅泣，不乐满堂缘。借问犹太亡，事远难哀怜。万国有兴废，遗民同衔冤。譬如父母丧，痛深限年旬。岂有远古朝，临哭旦夕酸。罗马后起强，第度扬其鞭。虽杀五十万，流血染城闉。当时严上帝，清庙金碧鲜。我来瞻遗殿，华严犹目前。珍宝移罗马，痛心亦难援。正当吾汉时，渺茫何足云。吾国二千载，亡国破京频。刘石乱中华，洛阳惨风云。侯景围台城，一切文物焚。耶律繁重贵，雅乐遂不闻。暨至宋徽钦，汴京虏君民。岂无思古情，颇感骚人魂。或作怀古诗，亦传哀吊文。未有凭城哭，至诚逮野人。妇孺同洒泪，千载恻遗民。吾迹遍万国，奇骇何感因。答言祖摩西，奉天创业勤。艰苦出埃及，转徙红海滨。帝降西奈山，特眷吾家春。十二以色列，奄有佐顿川。大辟所罗门，两王尤殊勋。拓边大马色，筑庙耶路颠。武功与文德，焜耀红海濶。馀波跃耶回，大地遍遵循。人种我最贵，天孙我最亲。岂意灭亡后，蹂躏最惨辛。罗马与萨逊，蹈藉久纷纭。英暴当中世，俄虐今尚繁。遗种八百万，飘荡大地魂。有家而无国，处处逐辱艰。被虐谁为护，蒙冤谁为伸。传言上帝爱，我呼彼充瑱。穷途无控诉，凭城号吾先。言罢又再啼，四壁啼益喧。哀哀不忍闻，吾亦为垂涎。亡国人皆恨，惟汝有教贤。他国不知愁，同化久忘筌。汝诚文明民，文明成障愆。区区此遗黎，艰苦抱守坚。虽然犹太教，今犹立世间。吾游墨西哥，文字皆不传。英哲与图器，泯灭咸无存。读学皆班文，性俗忘祖孙。岂比汝犹太，能哭尚知原。哀哀念远祖，仁孝无比援。他日买故国，独立可复完。先咷必后笑，物理固循环。吾哀犹太人，吾回睨中原。四万万灵胄，神明自羲轩。唐虞启大父，禹汤文武联。孔圣寔文王，制作大礼尊。圣哲妙心灵，图器文史篇。后生坐受之，枕藉忘其源。如胎育佳儿，如酿蕴良醇。我形胡自来，我动胡自迁。我识与我神，明觉胡为元。喜怒胡自起，哀乐胡所偏。我咏歌舞蹈，我饮食文言。一一英哲人，化我同周旋。忘之我坐忘，悟之大觉圆。一往情与深，思古吾翩。庄周梦化蝶，吾寔化国魂。若其国竟殇，哀恻不知端。凡亡非我亡，畸士诿古诠。吾未免为人，多情犹为牵。吾为有国故，身家频弃捐。哭弟哀友生，柴市埋冤云。哭墓已不获，先骸掘三坟。十死亡海外，谗侮百险煎。受诏久无功，缠身万苦难。十载逋亡人，拂逆痛心肝。我本澹荡人，方外乐谈玄。胡事预人国，误为不忍缠。今既荷担之，重远难释肩。地狱我甘入，为救生民难。受苦固所甘，忍之复忍焉。久忍终难受，去去将舍旃。浩荡诸天游，欢喜作散仙。天外不能出，大地不能捐。国籍不能去，六凿不能穿。犹是中国人，临睨旧乡园。眇眇涕被席，耿耿伤我神。愿告爱国者，犹太是何人。

袁绪钦

袁绪钦，字叔輿，长沙人。光绪乙未进士，官户部主事。

题铜官感旧图

伊昔道咸交，盗弄潢池甲。咆哮震宇县，剽忽肆攻劫。呼啸过城邑，千里联臂胁。烽鼙惨云外，旌竿见危业。白昼妖氛躔，汹涌势崩压。闾井哀穷嫠，道左泣逃妾。黯澹天尘昏，凄飙骚屑。曾侯初视师，戎幕乱军谍。辕门纵杀气，火焚鹰隼猎。高眠清江滨，立待背鬼捷。

舳舻蔽惊濑，风利呼长鬣。白水指盟誓，黄泥污巾袷。摧锋蹈洪波，忠肝郁劲铁。苾臣天所扶，蛟龙敢吞噬。章公秉大义，援溺振风烈。遂令奋神韬，总千裂双睫。雷霆荡氛雾，繁霜扫丛叶。始稽鲸鲵戮，终见蛟鳄习。东南卒底定，戡暴资控摄。时平历三纪，川国靡舟楫。陂涂久葭苇深，波镜磨新匣。鱼盐饶物利，华屋骈城堞。峨峨冠盖交，珪组盈笥篋。岂忆神武略，屡挥军中箴。元勋今不存，遗徽曜青牒。乘流寻旧垒，浮云灭孤峡。

#### 怀书衡

碧鸡词赋动春明，回首觚棱尚有情。稷下不逢秦博士，洛中平视汉公卿。归舟日暮津门树，别酒天高海上城。今夜西风愁望远，万山重叠乱云横。

#### 李景祥

李景祥，字书云，鄞县人。光绪乙未进士，历官义州知州。有《爱日庐诗钞》。

#### 孤松

向阳花木并含滋，蟠郁空留岁暮姿。小草托根欣得所，风霜独受有谁知。

#### 沈同芳

沈同芳，原名志贤，字幼卿，号越石，一号蠡隐，武进人。光绪甲午进士，改庶吉士，授唐县知县，赐编修衔。

#### 宣统己酉与西林少保同游济南明湖登北极阁感题

朝簪容易野冠难，多少英雄因此閒。一笑扁舟春向晚，明湖应似五湖宽。明诏屡从天上降，谤书未息禁中闻。顾瞻北极无穷意，应有湖龙起暮云。

#### 胡璧城

胡璧城，字夔文，泾县人。光绪丁酉举人，京师大学师范馆毕业，授中书科中书。

#### 赠新安黄朴臣歌

朴臣用笔如用铁，刀槩飒飒秋风哀。千壑万壑落眼底，真气盘郁孤云开。吾家江南有老屋，青山四壁森为排。草树摇落石骨瘦，阴寒逼生莓苔。十年潦倒不归去，仆仆打帽堆黄埃。君家亦在黄山下，云气出入庭阴隈。坐对溪山置笔砚，定知真稿非凡胎。读君此画三叹息，便欲长歌归去来。

#### 淮上怀古

带刀入市久成风，袴褶儿曹气不同。左顾声援通海上，北来形势壮山东。骄兵淝水麇行密，愍将符离败魏公。南宋晚唐多少事，离离都在暮烟中。

一自飞龙出凤阳，山川丰沛故人乡。九门燕市都重奠，十庙鸡鸣草渐荒。漆室凄凉高帝冢，朱门摇落大功坊。到来四镇成何事，落日疏林满建康。

王叔明维扬送别图卷子为伯谦丈赋

岂惟无忌似牢之，雅奉鸥波作本师。朗朗须眉亭上客，寥寥烟水画中诗。风飘别袂黏花雨，帆入春江罨柳丝。持与大痴图本较，富春声价并当时。

钱明训

钱明训，字心垞，号浣碧，嘉善人。光绪丁酉举人，历官天津海关道。

上巳节府公宴和润沅学使韵呈贵阳尚书

清浅蓬莱见已三，摩天凝望隔层岚。扶冯历历辰依北，鞞寄雍雍鼓奏南。渤海关山原壮阔，芳林风月尚清酣。留犁径路衣裳会，岂为听鹂载斗柑。

公堂春酒共呼三，得岁声高乐意含。长愿甘泉集神爵，早闻员峤献冰蚕。寰瀛共仰交邻乐，曹掾同分说士甘。况有上池功德水，尽跻民物进钱聃。

吴昌绶

吴昌绶，字伯宛，一字甘迺，号印臣，晚号松邻，仁和人。光绪丁酉举人，内阁中书。有《松邻遗集》。

莫君楚生以吾家绣谷老人药园诗稿见示用族祖瓿亭翁於京师重获瓶花斋旧藏丁卯集得长律三首韵酬之

副墨分贻秘笈中，寄庐还往近城东。新知投分初倾盖，旧学传家愧绍弓。异代星霜耆宿尽，名山风雨梦魂通。倚花亭子联吟地，把卷低徊读未终。

云烟过眼剧堪怜，东阁曩游感逝川。故物漫搜元氏谱，轻装未返米家船。重经兵火摧残劫，缅想官私簿录年。借与一瓿勤护惜，更从翰墨订深缘。

掇拾丛残慰寂寥，短檠无寐倚寒宵。亡书积岁犹心恋，煮字长年笑腹枵。梦里奇编搜宛委，画中别业负渔樵。结邻幸复追皮陆，诗事同寻临顿桥。

今岁得元初刘京叔归潜志写本自叙著书之时年三十二经涉忧患记忆见闻所居堂曰归潜因以名书仆行年正与相同遭时多故亦有归潜之志遗编触手怅然动怀漫书长句以当跋尾

北庭耆献近销沈，天假才人著作林。离乱年华嗟逝水，丛残文字抵兼金。遗民故国空凭吊，野史荒亭共赏音。浪说归潜归未得，短檠披卷泣红蟫。

吾家墓庐在杭州艮山门外皋亭山麓地有甘墩村亦曰甘迓阮文达官浙时诗尝数偁之旧饶果园春时桃花尤胜贱子幼随羈宦远违乡井昨岁乞岳庐翁篆甘迓居额以榜寓斋顷复属苦羸为作画扇侑以二绝藉当券约

绕郭家山望渺漫，烦君为我写林峦。苦思偕隐无多志，青鬓归来二等官。

寒村曾入阮公诗，丙舍松楸寄梦思。自笑本非肥迓客，十年尘土悔衣缁。

今岁辑录宋元人遗词颇有奇遇诗以纪之

瓣香岁岁礼姜仙，著录真教缔古缘。廿卷花菴搜旧本，一枝梅信拾遗篇。南词怀麓沈冤久，东泽清江剩稿传。生际虞山临桂后，居然眼福胜前贤。

得沅尹吴中书偶成转韵二百八十字寄答并怀大鹤

菊花糕作重九，故人书来笑开口。江湖浩荡羨沅翁，泉石支离怀鹤叟。沅鹤相逢各启颜，长安念我太清孱。新声廉墅尊前泪，旧隐皋亭画里山。家山远隔青霞外，何日扁舟趁花海。绮阁红梅小市桥，卜邻佳约应相待。霜落园林忆听枫，雨馀门径识樵风。吹笙坐月低双髻，踏叶寻秋瘦一筇。幔亭仙眷都无恙，更托微波溯惆怅。越客空令结网丝，吴娃枉自留弓綯。廿载侵寻重惘然，别时衣袂去时筵。记从燕市槐花里，梦到横塘两桨船。风光掩冉成抛掷，每为佳辰忆畴昔。琼浆纵复饮蓝桥，金勒愁看经紫陌。曾倚残春哭袁师，庞家灵照绝娇痴。篝灯戏写嬉飞帖，点笔工讎播诺词。凤城赁舍西华近，独抚危弦属凄引。病榻摊书旅即家，朝衫贯酒官仍隐。谁寄金泥小字缄，归心和雁落江南。凭将木石肠千转，当作秋窗一夜谈。

和艺风见寄原韵

离群一雁堕云边，瞥眼千花过劫前。杯酒生涯浇赵土，鬢华消息梦吴天。漏痕补屋摹新体，流潦妨车拾断篇。愁苦惯经还失笑，吾家先有道元笺。

和艺风上巳新园作韵

林园旷郊野，修途带郛郭。巾车独还往，冠盖谢束缚。须眉入疏古，有睟容渥若。高怀此澹宕，微生愧摇落。请歌招隐篇，吾亦专一壑。

春阳布和，薜萝成清游。长谣夏仲御，乘兴王子猷。问字烛见跋，睹酒花争筹。翩来云中龙，睠彼海上沅。遐景载欣瞩，飞翔怀灵丘。

示茗理

廿年辜负春游兴，因懒成疏亦自嗟。落落几人相伴侣，垂垂双鬓送韶华。冷吟只办扶头酒，断梦难寻称意花。红粉青山怀旧句，所思渺矣各天涯。

赠伯[C064]

京国几回别，风尘万里心。旧游随世杳，新梦入秋深。疏雨清尊共，繁霜元鬓侵。契情烟墨外，点笔助遥吟。

张诗舲先生与潘功甫舍人诗筒以酒和墨作书式之装册属题谨次其韵多用原诗本事

温和老去诗格新，须眉近古肝鬲醇。长瓶大瓮远难致，有酒二斗原不贫。分霑宾友苦未给，闭关独饮全其神。犹馀杯沥润枯管，短笺题赠连墙人。凤池后起特英妙，逍遥客与诗为邻。城南新夏恣幽讨，杂花归路飘车茵。慈仁顾祠盛槃敦，双松画本留胜因。朝衫笑解亦易事，要凭曲蘖回青春。百年文物尽凋谢，衣冠荡作京华尘。酒边散帙一吟讽，如见先生来岸巾。

师郑举瓶社以四月二十七日为松禅先师作九十生辰招同人集江亭感此奉呈

秋风桂影偶婆娑，似水门庭一再过。说罢程文问知旧，朝衣未卸泪痕多。三峰一笑我无缘，樱筍香厨四月天。自是伤春工病累，年年容易误吴船。金爵觚棱往事哀，玉阳史笔亦蒿莱。孤亭落照衔荒堞，垂白门生掩袂来。三十华年使节遥，镜中鸾鬓太无憀。春风词事俄周甲，红泪调铅剩未消。

戊午岁除沅叔集同人为祭书之会赋诗记之

祭诗自慰肝膈苦，祭书非侈储藏多。校讎岁遍六百卷，丹铅郑重逾吟哦。主人政馀特閒雅，家庖仍约朋僚过。胶州老史推祭酒，汾阳诗事勤蒐罗。宋元明本日挂眼，旧游邓董同书魔。后来诸子各英妙，能通流别工订讹。病夫吴船倦残梦，笺题小令重摩挲。归车冲寒兀羸马，冻笔手把空卮呵。侧闻林亭擅幽胜，卿环宝秘殊行窝。明年此夕续高会，倚鐙为补藏园歌。

巩伯樵文待诏袁安卧雪图沈盒先生依原卷录本传於后戏作一诗

洛阳积雪盈丈馀，令君按行未扫除。虑僂尺度眎今弱，辜较不外黍与肤。六花飞荡大银海，何缘凿空寻穷庐。似闻世界最末劫，依然亚夏娇相扶。邵公拥衾太孤寂，或昵枕臂怀中姝。孝廉一梦到公辅，前人快意今人吁。我读黜俞癸巳稿，莠书笑叹儒迂愚。汝南先贤周党笔，何乃徇俗工描摹。恤人寒饿不千世，节概自足矜吾徒。蔚宗刊削具史识，后来注补多繁芜。流传丹青作事实，是非身后将毋诬。衡翁小笔偶写意，北楼仿佛成新图。松枝流淅疏竹折，短篱石径交萦纡。吾门安得长者车，健儿拥篲为前驱。病来未雪已噤㗣，独羨睡态饶丰腴。同时标韵顾与厨，四世五公众所谗。掩关僵卧亦常事，生平恨不逢建初。京华冠盖杂蕉悴，眼中老矣谁响濡。灵飞妙楷珍尚书，窈人似解衣得珠。摩挲一卷消永夜，题罨跑跼惭何如。

有人述南中时论谓洛阳近出魏代元氏志皆吾辈伪造忽蒙盛誉惊喜愈望小诗纪之

无穷碑版出清新，谀墓真堪值万緡。久共毡裘成气习，老夫元是北朝人。

松邻竹侣偶忘形，雅质元谈有典型。幽夜傥逢元处士，新宫为续少霞铭。

借问南来庾子山，文章契谊定相关。目空唐宋成前辈，倒挽狂澜八代还。

景穆诸孙绝可哀，邙山抔土掩蒿莱。荒亭补史吾乡事，日造元家掌故来。

壮夫自擅雕虫技，老学真能辨鹤声。市石察书皆不恶，居然纸贵洛阳城。

或谓诸魏志是志龠与昌绶合作斯文未坠同调有人敢诮齐名庶几分谤再成四绝

风调琅邪迴绝尘，连篇满篋有清文。手裁稿草亲藏去，百衲碑成不易分。

持正狂言乐天，福昌一字博三缣。频来驻马商前例，文价休从我辈廉。

骈体文章沆瀣同，修辞未让昔贤工。羚羊香象言诠外，恨少惊飞蛱蝶风。

即今谁擅书丹手，茹笔先求古法难。能令当前迷色相，流传恶札到人间。

题赵德邻三篆字石刻

景况签书汝颖时，字曰德邻坡易之。不土之里无言诗，公子阳秋以意知。春月婉婉梅边卮，白藕花香幼妇辞。盛年文采相娱嬉，名书元祐党籍碑。后来宦辙营洪驰，监门防御使节持。安定郡王世泽貽，太宗正备藩邸仪。侯鯖犹录莺莺词，聊复集今多阙遗。洛中片石山之，篆题三字倒薤披。何缘流转来京师，徐君得此诧绝奇。谓我同好无■僂，羣居老屋鉏荒茨。寂寥千载遑会迟，传摹何惜双踰麋。飞英振采光陆离，展观四座心神怡。病夫嚙舌日自持，此特健药逾耆。方回旧迹沦剑池，孤拓郑重篋衍随。词人魂魄同寄斯，绵邈遥结无穷思。

为庄思缄题秋窗述旧图

病枕日瞢腾，耿吾念素交。世变入茫昧，忧患恒与遭。出处纵异致，气类无訾訾。衰颜十载还，块独增烦劳。春阳惨不舒，尘起风怒号。抚卷同一喟，泪血纵横抛。

少小食浮誉，愚生本孤根。规范仕学在，缘起文章论。驱饥相劳苦，积疾时过存。骯骯岁月迈，历历言笑温。有身戴履中，永怀师友恩。求益寡所合，黽勉古义敦。

庄王我兄事，各抱真性情。方高郁奇气，怳迫平生。深堂续旅梦，夜语淹秋檠。图此萧寂境，间以竹石清。一翁老苍笔，三友岁寒盟。存歿拟口号，风雨荒鸡鸣。

藏园求佳朮见貽適志龠遣送绿菊病枕裁笺以答嘉惠

层阴积霰昧昏晨，身境长安学饿民。仍拏菊英供醉嗅，还催朮煎镇眠呻。碧山把臂原同调，黄土司脾谅有神。寂寞城西几交旧，岁寒风义各相珍。

慈仁顾祠落成赋呈诸公隐括先生诗意



行滕九陌记曾经，含泪春花赋旧京。往昔炊羹犹古寺，祇今戴盎几狂生。双松磊砢全孤节，四柿凄其吊女贞。落日城南容驻马，一庐近拓小窗明。

#### 曾对颜

曾对颜，字镜芙，号少泉，琼山人。光绪丁酉举人。有《还读我书室诗集》。

#### 信阳何大复先生故里

诗人旧宅剩蒿蓬，坛坫名传七子中。漫向高楼寻白雪，才名终匹李崆峒。断简遗篇意自芳，三生雅契重渔洋。长吟明月风人句，合爇先生一瓣香。

#### 赵金鉴

赵金鉴，字劲修，宜阳人。光绪丁酉拔贡，历官昭通镇总兵。有《瓢沧诗稿》。

#### 少年行

桃花骏马骄且驰，意气京洛游侠儿。醉卧琼楼枕玉臂，绣幕宵护红燕支。一梦斗觉陈云压，边风飒飒卷铁甲。惊起斜睨床头剑，凜然寒光腾玉匣。男儿骨相不封侯，走马射虎南山头。不然东渡辽海开玉帐，草檄破贼边塞上。

#### 即事

束带迓上官，肃节江之湄。吏云有成例，不敢玩忽为。叹息古道湮，气节日靡卑。衣冠何伟岸，折腰向小儿。缅怀古良宰，岂有悦世姿。勤民尽职守，不谄逢迎宜。而我何为者，中道苦栖迟。世局日迫隘，已非黄农时。栖皇奚所求，徒为识者嗤。逝将投绂去，烟雨卧颖箕。傲然睨世间，君知我为谁。

#### 游青城山天师洞次伍广文梅隐韵

暮色苍然入远烟，钟声飞渡大罗天。电收沧海蛇归袖，经读空山虎侍筵。采药峰头随玉女，扶云鹤背下丹仙。诗成掷笔山魔走，又向洪崖笑拍肩。

#### 夜半得卸灌县信起而有作

夜半声剥啄，锦城寄双鲤。云有贤宰来，而我将去此。叹无惠及民，素餐能不耻。释肩计有日，抚衷差自喜。长啸天风发，朔飙卷玉垒。顾复近期年，睠恋千赤子。新官胜我贤，勿为泣涟瀾。琴鹤惭治绩，离怀寄江水。

#### 登灌县城内金龟山

簿暇寻幽上翠屏，高飞塔影出林坳。擎云拳曲虬松赤，碍路叉牙虎石青。万灶炊烟开画界，一湾番舶下渔汀。铁沈千尺锁雷雨，不怕离堆晓气醒。

### 铁眉自讼

倔强且学韩退之，又有乖崖是我师。自信心肝原铸铁，纵逢权贵不摧眉。鹪枝尽可巢孤凤，鼠腐从他吓野鸥。笑问官居何所事，一琴一鹤一囊诗。

### 七旬早行

客路认依稀，轻鞭趁晓晖。人如黄菊瘦，霜压铁骢肥。残梦随云续，晨光带树飞。孤鸿警寒早，凉意满秋衣。

### 军行遇雨

鞭影苍茫一闪开，冲云挟霓走龙媒。行人莫笑征鞍湿，才向银河洗甲回。

### 缅甸歌

金精铜液刃雪色，宝刀铸自缅甸国。赤发野人出塞献，欧冶风胡目未识。百炼钢化绕指柔，胁血曾渍老蛟虬。电影一闪沈云裂，国士手中三尺铁。

### 赵樾村观察由蜀乞养回滇道老鸦滩枉顾话旧诗以赠之

野沸群龙战，云开一鹤还。羨公赋归去，衣彩舞斑斓。仙吏今梅葛，词香古屈班。西窗同翦烛，夜雨话巴山。

瘴雾侵边暗，惊滩撼地危。万方嗟一概，四顾欲安之。剑水君将隐，嵩云我素期。望尘惭不及，日色远山迟。

### 老鸦滩新构屋成移居之

凿岩架碣构新屋，峰角碍日石横簇。溪涛吟风断复续，时有幽云宿疏竹。山人移住清不俗，白昼安閒夜眠足。手把《离骚》且吟读，《山鬼》悄入吹铎绿。千年碧火笑鸛鹏，梦魂时逐蕉中鹿。晓随山猿戏山麓，红映山涧山果熟。浩然长啸天风蹙，从他蜗角斗蛮触。

### 郊游

青青荷叶满横塘，扑面风来蒲苇香。桥折泥深行不得，万山无语立斜阳。

### 寒夜读书

朔飚冻摧百卉枯，有客危坐夜读书。幢幢一编寒铎影，混茫遥接淳古初。蚕僵蜎缩蠃蜷曲，矮檐冰柱戛冷玉。抗声金石歌黄农，春意盎盎煦破屋。足裂手皴不知寒，寸抱炯然千载看。谁欤夷齐谁跼蹐，战胸龙螭莽屈蟠。丈夫生当撑瘦骨，弥天事业轻於发。夜深铎爓万籁寂，狂喝倒回天边月。

### 有述

浩劫自圆缺，嵩阳山间月。照我石上心，三生浣冰雪。无端掉狂雷，小谪住蓬莱。穷愁炼发骨，风惨暮雨哀。雨霁天色诡，帝命移海水。掣鲸溟云飞，屠龙鳌背紫。浪激斗维漂，岳渎簸惊飙。山崩天柱折，阴壑修罗骄。法螺卷归旆，掉臂空四大。溪深野风清，萧然鸣古籁。境閒日长天，桃花洞门前。烧却渔郎棹，晞发作散仙。

### 春寒

溪畔碧桃手自栽，幽居端为避秦来。春寒花与人俱懒，红孕枝头不肯开。

### 同万葆真游华山

胸中太华久盘摩，此日欣同季野过。直上悬崖三万仞，云端立脚看黄河。

### 刘毓盘

刘毓盘，字子庚，江山人。光绪丁酉拔贡，官陕西知县。有《濯绛宦诗》。

### 太湖

寒雁不成字，远山将化烟。大圆生脚底，摇梦入秋天。

### 别友

安能郁郁久居此，抖擞缁尘白纻衫。转捩中流多涉险，东风虽好不张帆。

### 喜晴

梦回闻鹊欢，咄咄曦当昼。缸片云扫开，积气塞天漏。譬诸久病痊，燥湿理相纠。无田不为灾，我独得天厚。此邦最低下，粉饰风俗厚。游民一胡多，弃土每八九。所恐黄淮冲，流离遍衰幼。蠲赈事两难，外舫中已朽。救荒於既荒，铤险絜鹿走。安能饥不食，祸率起於口。惟俭能支贫，转移一反手。使天而雨珠，我得食诸否。

### 茅山

飞花香过山去，老树声作涛喧。终日不闻世事，此间即是桃源。

### 王佩箴

王佩箴，字敬铭，南阳人。光绪丁酉拔贡。有《编苕诗钞》。

### 寄吴兴刘翰怡

昔读独行传，范式陈平子。两人未谋面，相期在生死。今闻嘉业堂，南望翘双趾。谓是古之人，近代宁有此。谈史薄子元，校书嗣中垒。嵇吕思命驾，老彭欣窃比。朋友有神交，何嫌千万里。

残山送夕阳，闪烁少微星。文章报故国，耿耿守遗经。珍此不朽业，名山发古馨。侧闻兰台彦，编纂未杀青。哀哉万布衣，幕僚寄伶仃。何如元裕之，独构野史亭。

校书复何如，秋高风扫箬。伪体重别裁，峰矗木摇落。编摩孝绪录，钩考渔仲略。古者官为师，私人无著作。汉儒重家法，硃硃循绳削。君家五原守，申左疑铸错。世界驰文网，墨庄凤鸣铎。定有古先民，罗拜天禄阁。

李稷勋

李稷勋，字伯燊，一字伯子，号姚琴，秀山人。光绪戊戌进士，改庶吉士，授编修，历官邮传部左参议。有《甓盒诗录》。

赴都

达人无陋虑，志士多烈心。轩车骋高瞩，宁怀空谷音。皇涂遘屯险，天祸杳幽深。四海沸波澜，三光翳若沈。伊川岂无叹，越裳不可吟。回风厉中野，悲响飒神衿。明发念于役，嘉候感鸣禽。寒烟睇春甸，连嶂阻岖嵌。振衣奋远步，施置谢中林。愧乏荆璆美，贞往事在今。

岁晏行赠宋检讨育仁

元郊十月摧芳草，黄埃千里行人稿。沙雁寒惊埃火明，银虬冷报天门晓。天门九闳罗九衢，朱楼连閤黄金铺。明烛高筵玉酥酪，洞房暖火红氍毹。曾冰峨峨白日短，城南宋子今嵇阮。锦裘珂马喧朝贵，独抱兰花惜岁晚。晚岁空山霜雪零，素衣初点六街尘。秋雨荔墙旧书侣，烟花粉署新词臣。吴县尚书今卓犖，日下高名满台阁。孔融曾闻表异才，孙宏今见崇古学。君怀明珠许高价，赋成大礼万人诧。金门未肯损愁心，落木亭皋骋孤驾。我昔横经石室游，秋花漂落稀朋俦。峨眉窈窕问琴阁，龙威恍惚湘绮楼。潇湘三载青波隔，惆怅翻寻上京陌。卧拥红云踏海烟，来看郁郁兴王宅。二月春寒花片片，尹珍宅里初相见。青琐重扃催试题，金盘丰俎申芳荐。人生得失难具论，毛翮摧铄心徒存。尘沙满地愁开眼，朝衫新贵长安门。青槐洒洒铜街雨，坐消白日愁羁旅。单衣皂帽西风寒，对人不忍伤心语。閒来坐我红锦茵，十年同舍论交新。洲上兰蕙忆湘水，壁间丝竹梦江津。江海风高雁声涩，轩辕台上夜吹雪。银钥千门动晓寒，荡子无家空自泣。涕泣悲歌何意气，幽并结客多轻利。弹剑朝为马客吟，脱裘夜醉胡姬市。朝朝夜夜感尘劳，华年轻掷心郁陶。为君凄凉尽此曲，明星暂暂东方高。

赵尧生前辈还蜀过宜昌酒集东山草堂因出示林纾画万松深处卷子索题

三泖之云同一族，千松万松云蜃属。中有幽人独往来，占松一丘云一谷。抱云有似鸡孚卵，养松差比牛舐犊。云自去来松偃蹇，霜柯如铁青成幄。人言松心比丹赤，我爱松根不拳

曲。百年冰霰閒经过，礧礧合称雪王仆。雪王一龛杳天际，岁寒薜荔三间屋。夜驱苍鼠伴蟬蠹，昼鬪茯苓狎麋鹿。偶然蹀躞玉珂尘，兴来尽发中秘录。金马诙嘲臣朔饥，蛭龙哦句髯翁跼。誓鉏邪蒿保霜节，仗下弹文万口读。戊庚以还天地闭，荆棘刺天泥没足。慈仁孤柯泣风雨，盘山万木茁樵牧。年时萧飒百不欢，酒劳梦绕云山麓。林叟天涯澹荡人，为君拂烟写寒绿。化身千百陶然松，翠鬣霜皮纷在目。几疑四山无杂树。时有冷云相追逐。架岩一屋不知年，力屏万器得幽独。江山破碎何遽忽，世事澜翻风转烛。四郊战垒长蓬蒿，江淮落叶凉风肃。赁居难求阳羡田，山贼恣伐永嘉木。况值梁益焦兵火，故园已恐无松菊。独携此卷西陵泊，相逢邀看东山竹。展图三叹心骨悲，兹事弃置等覆餗。中夜敲床索新句，检拾篇章媿归舫。明年松根健夏凉，知君饱噉潏眉菽。乞分寻尺青玉虬，种向棋轩却烦溽。

#### 过杨忠愍故宅

灵风飘怨雨，踟躕城南隅。燕市空芳草，钐山冷碧芜。霜镫钟梵涩，血疏石华枯。摇落永陵树，年年叫野乌。

#### 长沙赠寄禅上人

西风雁满滩，霜意作新寒。瑶瑟空堂寂，湘皋蕙草残。星辰曾昨夜，镫烛此凭栏。世外寻幽隐，相逢一解颜。

寄公今惠远，一卧虎谿深。黄叶堆诗卷，白云栖道心。香龕松树底，梵语奈花阴。我法忘龙象，翛然蛩鹤吟。

#### 访梁洁盦前辈於岁寒堂别后有作

江干踏黄叶，问讯草堂幽。林樾空凄感，风霜正未休。疏花饶晚色，香萼足离忧。寂寞千秋意，相看对茗瓯。

悵悵十年别，萧条四海心。青山独横涕，白日屡沈阴。旧梦新亭集，清歌汉上襟。缄书劝加饭，风雨又秋深。

#### 丙申南归渡洞庭作

天际婵媛帝子灵，君山云白竹烟青。五更凉雨沈秋雁，一叶西风下洞庭。涕泪尊前孤剑泣，悲歌水上大鱼听。年来苦作伤心梦，愁向湘川夜夜醒。

#### 酒集江亭饯送于侍郎晦若前辈出使德国

鶗鴂惊鸣万瓦霜，六街斜月夜茫茫。金尊移榻临花砌，白袷邀车过苇塘。四海李膺名士长，千金陆贾使臣装。条支西去波无极，梦醒觚棱烟水长。

#### 己酉元日感赋

去年今日早朝班，天际旌旒万国欢。长乐鼓钟沈豹尾，鼎湖弓剑渺龙髯。星明玉仗残镫

施，露浥灵旗故殿寒。独有瀛台新草色，东风犹得几回看。

#### 陪高九舍人楷饮姜孝子祠

两年惜别离亭酒，一棹欢逢出峡船。今日何堪问朝事，古祠重与访岩泉。买园种竹君仍健，荷锄移山我自怜。为语六街诸旧识，短檠寒榻尚依然。

#### 赵芷生提学投诗即行次韵答和

朝事惊心累叹欷，君胡掉首向岩扉。朝辞帝女过巫峡，夜唤湘累下秭归。归后江潭几秋树，山中日月尽春晖。彝陵郭畔忽忽语，目极神州涕满衣。

#### 晚泊青草湖

杨柳参差绿未齐，寒烟乱草上空隄。黄陵庙下多丛竹，一夜哀蛩不住啼。

#### 寿富

宗室寿富，字伯萑，郑献亲王九世孙。光绪戊戌进士，改庶吉士。殉难。有《伯萑诗存》。

#### 广化寺红叶歌

青山作表树作里，霜叶满沟不见底。天公有意逞豪华，锦帐横铺四十里。阴者嫩碧阳丹朱，杈枒翡翠交珊瑚。斜阳万点罨霜果，迷离一幅秋光图。春花虽好祇红白，未若秋光备五色。少年文字纵峥嵘，绚烂终需老境得。庸人慕雅兼畏劳，平林游赏矜皮毛。不入深山历艰险，好景岂复能相遭。从来佳景隐荒僻，尤物天公亦爱惜。非关奇险阻游人，不使凡夫浪著屐。城中看山空崔巍，入山愈深山愈佳。始悟人生快意事，都自艰苦之中来。

#### 醉司命

寒空深碧星如沙，轰天爆竹飞银花。黄钱卷风纸马碎，松柏烧烟飏空翠。香醪奠地前致词，请神痛醉神休辞。臣之醉神有深意，恐神奏对多顾忌。灵霄秉笏论人间，好藉香醪壮胆气。秣刍豆，饲神马。糖堆盘，水盈罍。神之去兮白云随，天风飒飒飘灵旂。沈沈更漏寒宵永，儿童鐙下争糖饼。

#### 陶然亭送方雨亭康步崖

绿暗红稀春事阑，江亭携伴强寻欢。壮心未似溪光冷，病骨难禁麦气寒。风景自佳愁里度，山河无恙醉中看。休将小集看容易，别后应思此会难。

#### 送赞臣之山东

暮年伤离别，为无相见期。我非暮年人，胡为心伤悲。所悲方壮年，血气先已衰。形神日憔悴。酬酢多支离。四十已无分，安敢望期颐。纵使幸不死，时局方艰危。前路虽茫茫，

结局已可知。生离是死别，难为分手时。

相见恨太晚，相交意却深。匪惟臭味同，独能知我心。我性本乖谬，是古而非今。雌黄腾口说，当之辄难禁。以此忤时贤，罪恶重邱岑。毁谤日纷腾，惟公鉴其忱。引为忘年交，重之若球琳。岂似形无言，公意同坚金。此友岂易得，奈何怅分襟。誓将报知己，皓日实照临。勉励岁寒节，坐待霜雪侵。

大风卷沧海，蛟螭撼神州。我非百岁人，独怀千古忧。妖氛山岳高，世道江河流。人类闪风烛，王室实缀旒。昂首望青天，掩涕思前修。缔造仗轩昊，经营劳孔周。此道亘古今，万物所共由。一旦自我绝，岂非壮士羞。君今适东鲁，驱车迈山丘。路若经孔林，为我少淹留。哭问墓中人，可知今世不。苍穹若有知，此患何时瘳。苍穹若无知，斯民何罪尤。愿微在天福，速生圣贤俦。起佐我圣皇，布政宣鸿猷。但恐鬼无灵，酣眠不肯休。哀哉人道灭，吾侪其壑沟。

善劝过相规，是谓古交道。临别而赠言，实以期永好。惟公性忠厚，今世如公少。所恨少刚断，见欺於群小。春生而秋杀，天道实皎皎。喜赏怒有刑，王者师大造。愿公懷斯义，佩弦常自矫。凡事贵决断，勿为仁柔挠。君子自当好，好之如珍宝。小人自当恶，恶之如杀草。罚行始知恩，此语非荒渺。雨多伤禾稼，包荒长凶狡。爱莠不忍锄，良田亦难保。时艰贵振作，经营须及早。仁者行严厉，夫何伤急绞。请思故人言，华嵩益分秒。

笛声尽情咽，三叠曲已终。杨花如白雪，飘飘随熏风。分手各无语，热血翻五中。屈指平生交，大半少始终。岂其人凉薄，罪实在我躬。掩涕送公去，伫立心忡忡。疏狂不自悛，此后谁相容。独处人世间，哀哉吾道穷。斜阳忽焉没，流水逝以东。痛哭返蓬户，泪渍襟袖红。

刘景熙

刘景熙，字好愚，一字浩如，赣县人。光绪戊戌进士，官江苏候补道。有《浓溪诗钞》。

黄花巷新居

城市亦山林，林阴一径深。长隄春草碧，古堞暮烟沈。窗北羲皇卧，灋西子美吟。敢云居室善，且寄寂寥心。

树外有青山，当门百雉环。短墙扶竹出，虚牖纳云閒。瓜长藤为壁，萍浮镜有斑。邻家寻老圃，小话夕阳殷。

范轼

范轼，字亦坡，号眉生，黄陂人。光绪戊戌进士，授兵部主事，历官抚州知府。有《秀蕤园集》。

过巢湖赋呈莱山侍郎

两山夹湖湖束腰，一湖数郡吞南条。积水环混失归向，潞四百里何迢迢。人言其中閼幽怪，天阴往往移龙蛟，孤城却在落日外，積垣一线栖丛蒿。到此无风已心悸，况当奇热蒸寒飙。连晨郁怒苦未泄，冯夷弭节严撑敲。朝曦乍露铜钲角，旋倾墨渾云漉漉。琉璃千顷忽破碎，有意似放天吴骄。湖神跳舞山鬼泣，万窍翕辟声悲咷。此时回船移近岸，舟人喧沸收篷篙。却望湖水立嶮兀，霜脊鼓动千钧鳌。太虚倒入浸元气，始讶天柱非坚牢。岂有轩辕张帝乐，烂设组帐吹笙璈。魂翻眼晕坐添叹，性命能几轻鸿毛。且倒浊樽共一醉，何以佐酒褰菱茭。天寒月黑风紧格，微雨淅沥驱洪涛。开帆三日竟偷渡，有如鹰隼离鞬脩。吴儿绕岸笑拍手，喜见使节悬征。紫髯先生信爽健，要搜险快供诗豪。峡江闽海都阅遍，眼前一勺同杯坳。侧闻北汇此故道，谁尸兹说桐城姚。千年万迹茫莫辨，古今笈注徒纷呶。扬州五湖列巨浸，此水坐可分苴茅。洞庭复矣不敢抗，隐与彭蠡相齧齬。涡淝支委藉馀势，专制一面夸雄梟。轩然大波恣跌宕，灌漑山谷江灵朝。若真宇宙无妨隘，更愁横夺浔阳潮。中泓数点石插脚，上有塔柱干云霄。寺门昼闭人影绝，何时仙姥频游遨。当年蛮触斗形胜，后者苻谢前孙曹。藏丹投鞭等狡狴，伏尸百万馀腥臊。山川寥阔不柜管，{廿佳}泽最易滋逋逃。羈人惊心理归楫，壮士遣兴鸣宝刀。即今潢池荡残秽，夜深那复篝狐嗥。国家恩泽浩无外，居民但解称神尧。井闾桑柘渐苏甦，共输租赋安渔樵。晴空一桨打明镜，更呼射鸭招朋僚。人生忧乐互代谢，谁堪百虑穷煎熬。咫尺变幻有天意，好景莫放清秋高。我惭腕弱不能举，诸君大笔歌居巢。

#### 大冶铁山歌

铁山三千六百九，崭岩藏金自古有。夜光睽流萤飞，昼景掀腾老蛟走。鏐鑠鉶钁各异名，千年黝色长崢嶸。当其顽矿閼精气，斗牛上区居民惊。周官职重北人掌，皃氏氏纷徒党。三品定制划龙龟，九鼎穷奸駮魍魎。黄金为上白金中，尔铁亦得齐银铜。牛腹盐官杂汉馘，火罗獾粪开唐蒙。唐坑宋监留遗迹，都局元家罢工役。占城不献西天烽，高昌那致青鍤石。衡岳蜿蜒插天半，天半宝光插云汉。势若万马奔平川，一线悬崖忽中断。大峰小峰争错落，冶城四面疑铲削。江流东去水铮鏦，云开遥见武昌郭。传闻此地富珍储，英英云气时呵嘘。一自当年禁掘鬪，山灵守护緘丹书。地不爱宝汁流浦，铁花铁树露三五。苗旺初惊鳧雁翔，茫寒微讶虹霓吐。四夷宾服新政平，千夫锤凿声丁丁。不待拣沙游丽水，居然插剑望丰城。大府殷勤费讨讲，山民焉敢持鹬蚌。矿师远致碧眼胡，火轮近试黄石港。十里五里官符催，千舫万舫载铁回。大别山头架炉鞴，朝朝暮暮声如雷。鬼斧神工世罕见，要使精金成百炼。为铤为铸待陶鎔，诎祇商民称利便。噫吁嘻，采金铸币始庄山，无金铁亦纾时艰。安得聚将九州一大错，点成金银台阙，磊落常跻攀。

#### 秦岭谒韩文公祠

唐纲秽浊煽腥闻，只手回天未可云。九死蛮荒无后悔，一生元气在斯文。淋漓大笔推原道，衰朽残年恋故君。糝蠹不除千古恨，英灵常峙岭头云。

#### 武关

层关高踞万山中，楚蹶嬴颠角两雄。螺黛插天分向背，鸿沟划地隔西东。春寒不散蜂腰雪，日瘦难禁马首风。太息商於六百里，一朝割弃为和戎。

#### 商山四皓墓



汉祖当年歌《大风》，谁知衽席伏兵戎。萧曹已老从龙业，絳灌惟馀走狗雄。匕鬯不惊神色外，须眉如接笑谈中。商颜依旧人千载，古木残碑说殡宫。

高卧岩扃定几秋，无端物色到留侯。唐家肌肉肥鸚，晋室残脐噬马牛。漫说壶关先入蜀，莫须周勃始安刘。穀山老父传书久，伟业何妨建白头。

#### 樊云门观察新作广后村十老诗二十首索和病后柬谢兼呈笏卿同年

后村南宋诗中佼，十老吟成斗工巧。好句流传七百年，和者虽多能者少。樊山声价吾楚宝，翰墨蜚腾富文藻。一官暇日爱长哦，骋兴恣酣广十老。游戏天倪穷万方，雕镌物态辟群窅。落笔往往杂庄谐，写生跃跃透毫秒。遂令前贤避三舍，有似洞庭吸横潦。淮阴部将贵多多，子云绝技非小小。词牯牛耳大如槃，凡手不敢施獐獏。噫嘻君才凌谢鲍，君治又且冠邦镐。渭南牧民如牧獮，吠犬生鼙驯雉扰。杜母循声愜野谣，吴公美政书上考。诂惟宰郡若烹鲜，矧更锄疆如捕蚤。回翔枢幕釐五戎，元辅侧席争屣倒。朝廷新诏辟四门，市骏千金苦未早。淮阳漫许卧汲黯，江左定当起王导。绣衣直指东方朔，黄麻知诰北门草。寇公晚入政事堂，敬輿昨拟兴元诏。六龙回驭在斯须，八柱擎天忻再造。整顿乾坤改旧观，收拾雷雨复清晓。点窜《三都》《两京》篇，润色明堂王会稿。要将螽戴圭璋，不屑虫鱼鬻梨枣。念吾南风久不竞，江陵已歿江夏杳。扶危莫倾及今兹，勉旃发愤摅怀抱。龙蟠大泽郁霆雹，虎歛中原奋牙爪。鹰隼惨澹侧愁胡，凤览从容俯众鸟。经济於君何有乎，隳詠径可立谈了。刮摩垢膩返虚明，嘘噏元气苏偏槁。从此银甲洗天河，一切腥膻共被澡。能事固宜有不让，奚翅百钧穿鲁縞。嗟予晚遇未闻道，郎舍浮沈驾在皂。时揽明镜照衰颜，几辈天衢骋骅骝。南皮门下旧年少，晨星散落参与昴。黄河东走泻沧溟，西岳峻峙踰云表。铸成奇采吐光芒，荡出雄篇任挥扫。邯鄲步拙那移情，嫫盐效颦徒取恼。巡檐把卷阖且开，倚壁偷声酉到卯。愧无寸莛撞鸿钟，斫树收庞笑公眇。四方相与逐云龙，或倚寒郊欺瘦岛。太冲落落吾党豪，定有锦囊似君好。

#### 杨花曲

红日映窗春雨微，阶前款款杨花飞。流莺千树坐相语，江北江南春不归。五陵年少媚春好，朱颜掷向明镜老。金缕歌残玉树空，柘枝舞罢罗帏悄。飘云卷雨不自量，长安女儿踏春阳。兰膏坠发轻蜂蝶，石鲸飞泉送酒香。绿烟金穗暗相逐，白蘋红藻翠鳞覆。莫向东风还荡摇，一生好傍龙池宿。

#### 武昌寒谿访陶桓公手植桂用少陵古柏行韵

团团月照西山石，下有古桂高千尺。参天黛色欺老松，拔地苍柯傲贞柏。幽崖晚绽金粟香，密迳朝涵玉露白。长留人世阅兴亡，历尽沧桑谁护惜。陶公昔日镇江东，澄清江表生英风。坐踞胡床发啸咏，行携仙友娱晴空。晓波近挹樊口水，疏林俯瞰吴王宫。直与鸞峰现法界，疑蹊蟾窟非人功。吁嗟人往名已重，太息偏安谋不用。百回运甕费辛勤，两翼冲霄谁纵送。春华枉自集粤蜂，秋实何曾餒丹凤。祇馀过客任攀条，遗植於今说隆栋。

#### 黄寿衮

黄寿袞，字补臣，浙江山阴人。光绪戊戌进士，改庶吉士，授检讨，历官河南候补知府。有《夷门草》、《莫宦草》。

### 七夕

山居旅宦惊重七，薄雨新晴月上微。人病秋来偏冷早，天低河隐欲星稀。亲朋骨肉官为寄，牛女恩情梦也非。百岁良宵浑似此，挑镫洗足坐忘机。

### 秋夜遇雨无月有怀林赞虞侍郎率占留别

忧时病逆旅，况乃秋雨中。寒镫对孤帐，蓦然思令公。神采特高发，黄鹤翔云空。俯视尽尘垢，啾啾争草虫。嫉俗与爱国，枘凿难两容。救民出水火，老臣有愚忠。今宵虽无月，圆明会相逢。秋雨阻行客，明朝趁晴风。此去频北望，马首愿早东。

### 遣兴

老屋三间水作邻，豆花香里寄閒身。枝巅鸟立全忘险，萍底鱼游乐避人。随意观书僮贯检，无心得句客言神。有时小步庄溪外，十里塘苗雨后新。

### 刘富槐

刘富槐，字农伯，桐乡人。光绪壬寅举人，官内阁中书。有《瓊园诗录》。

### 白果铺

幽景娱心目，秋怀水一方。乱峰鸦背雨，红叶马蹄霜。招隐新茅屋，寻诗古锦囊。蛮山自堪爱，未觉客程忙。

### 彭水道中见红叶

青松泣露丹枫笑，锦样峦冈荡客愁。遥忆故人当此日，壶尊爰史两山游。

### 读金桢门总宪观剧绝句

世间何者为非戏，鲍郭纷纷斗同异。曼衍鱼龙一瞬间，犁耆幻术人惊睇。忆从戊戌来京师，舞场日涉评妍媸。从知北调盛弦索，昆弋非复承平时。重来已度昆明劫，秦声幽咽闻鸛鴂。流涕谁为万宝常，商弦促数宫弦跬。定风波与念家山，帝所钧天去不还。容易金仙辞汉阙，湘娥哀怨落人间。治情忽便趋蛾绿，静婉腰支念奴曲。还佛争承天女花，审音一变高唐俗。抚时回想百年前，杂剧犹多正始传。鞠部迁流人代改，遗闻谁与话开天。先生身世当全盛，丁歌甲舞声容竞。朝回却作梨园游，点缀俳優发嘲咏。嗟余羁寄如浮沤，每听急拍生牢愁。传奇愧乏东塘笔，题句犹堪作务头。

### 崇效寺木假山歌

枯根郁律盘蛟蛇，之而怒茁森槎枒。老僧题作假山看，地肺雕镂人惊嗟。城南古寺久未到，双楸入梦攒黄花。竭来重憩楸阴下，鼠姑烂熳团朝霞。烟峦突兀起庭侧，藤萝冒挂如龙拏。云是楸根初出地，闾郁厚土千年遐。或是刘总手植树，阅世三十如风沙。何年老榦化神物，残榧留镇梵王家。虫穿蚁齧蚀不尽，夜放光气惊麀麋。巉岩别透岂人力，幼與丘壑无等差。庐山真面豁云霓，仇池一路通褒斜。名流对此发啸咏，目想云门存若邪。雨零忽讶落悬瀑，昼静时复闻频伽。帝京两遭兵火劫，古物毁夺馀痂痂。旃檀一炬佛灭度，金源土瘠填礧。兹根晚出有天幸，壁经却免秦人煨。富媪蕴珍不使朽，乘时启蛰烦锹把。精气绝特宁久晦，枯枿岂必输英华。当今贾胡市瑰异，臭腐往往神奇夸。负趋有力我却虑，破壁或恐飞衙衙。敕告应真杖锡慎守卫，毋使罗浮一夕流向东海涯。

#### 寄东初丈

游钓童时迹可寻，停云想叹欲弥襟。哀时庾信空文藻，近市梁鸿有远心。投老未忘沟壑志，固穷自爱玉金音。相期头白归来日，古调同弹石室琴。

#### 彭绍宗

彭绍宗，字印根，一字栎隐，湘阴人。光绪癸卯进士，官度支部主事。

#### 折檻行

阴霾六幕昏如织，沈沈不醒日无色。神珠辟雾犀辟尘，冥搜海岳苦难得。雄虺腾云掉九首，豺斤豺斤乳虎愁生翼。白昼纵横狎罔两，帝关欲叩羌敢测。砉然一击晶宇开，震爚精光荡环蚀。瑶花恣春浑烂熳，天魔旋舞迷终极。瀛壶火齐木难多，宝气翻空烧成墨。毛举爬搔等閒事，电掣霆飞乃惊殛。盖高属耳真聪叟，鉴诉虬臣剖胸臆。华盖周遭拱卫森，四顾台衡离差忒。昨闻王良鞭骑驷，今见中台朗司直。吁嗟丘貉百年身，钟漏纷纭亦云惑。愿弹柱后惠文冠，袞补都规仲山职。

#### 偶成

主圣臣斯直，朝阳见一鸣。渊冲虚海纳，戇挚惧天倾。绝绮蛟鲛贝，销春杜曲莺。光芒逼星象，轂觫始魂惊。

立法先亲贵，危言倚诤臣。匪躬忧独切，信道谅弥伸。湛剑留犀檻，欧刀迟玉津。正嗟如晦久，不已曙将晨。

肺腑关休戚，然眉忘剥肤。希求不龟药，空网大秦珠。逆颔偏婴怒，移山未愈愚。精诚动昭鉴，瘖拑应惭吁。

谏议邦之重，酬知国士尊。烧车才僇仆，折檻匪褫藩。世变今滋异，神寒可具论。台垣真补阙，妄拟撤严樊。

#### 黄文开

黄文开，字孝觉，南海人。光绪癸卯举人，官陆军部郎中。

送黄仲弢学士提学湖北先发日本

星轺东指辇相望，喔喔天鸡促曙光。万里中原隔消息，九洲稗海本荒唐。诗书未厄秦皇火，袴褶新更回纥装。忽忆大唐贞观事，八千巾卷贡明堂。

西风重食武昌鱼，夹道争迎谕德车。列郡山川天堑险，渡江人物浪淘馀。伯牙台迥秋花晚，太白楼空夜月初。高会南皮问今昔，未应闲散老尚书。

宾洛游梁学道迟，长安也见曳裾时。愧同侯霸称都讲，赢得孙卿是老师。西北浮云虚俯仰，东南搔首几踟蹰。悠悠江汉休相忆，各有千秋与后期。

陈士廉

陈士廉，原名士芑，字翼牟，湘乡人。光绪癸卯举人，官邮传部主事。

春日杂诗

被发翩然下大荒，黄尘四塞日生芒。人间历尽无量劫，亿万千年心不殇。

痛哭陈书累万言，兰呻蕙叹诉烦冤。君王爱老臣年少，合託湘流吊屈原。

偶控茅龙谒紫微，汉家故事已全非。羊头烂贱通侯贵，愿借天钱十万归。

璇机玉杼日纷纷，争向天孙乞锦雯。新络冰丝千万缕，可能持赠沈休文。

七宝庄严妙道参，敕书初拜紫囊函。淮王何意私鸡犬，得附青云自不凡。

浊世翩翩署雁衔，珠冠玉佩两当衫。而今始识优旃乐，舞罢回渡奏阮咸。

施景舜

施景舜，字虞琴，睢州人。光绪癸卯举人。有《松心堂诗钞》。

思家

蟋蟀鸣四壁，落叶掩紫扉。空房生暮愁，王孙归不归。晨起望南天，悠然一雁飞。

秋日卧病

秋云漠漠压天低，秋风秋雨苦凄凄。病人枕上不成寐，落叶空庭络纬啼。

陈毅

陈毅，字诒重，号郇庐，湘乡人。光绪甲辰进士，历官邮传部参议。有《郇庐诗文集》。

#### 题铜官感旧图

百战中原血，江山一敝袍。艰难军国计，生死布衣交。道以相知重，功为不赏高。咸同诸将在，专阃各旌旄。

日暮铜官渚，芦花瑟瑟秋。惊心思往事，援手出神州。白水犹残垒，苍生已百忧。抚今看此卷，欲济几同舟。

#### 哭长沙张文达公

济乱无长策，忧疑日万端。民愚重贫弱，文胜转艰难。蜀洛非师说，权衡有学官。祇今遗疏在，语语见心肝。

国计兼身世，梯航遂至今。量官明主术，养士老臣心。谴及恩弥厚，名高谤转深。不胜东首意，流涕答纶音。

初见晴川道，方回使者车。平生知己分，一纸议边书。恻恻亲朋尽，看看意气疏。门前舆马地，春雨长蓬芦。

#### 偶作

宁懒方知愤，终狂不自愚。吾身竟何有，斯意岂能无。夜气枯禅得，秋心健隼孤。际天皆肃杀，独信北风苏。

#### 中元祭后感书

客病存秋祭，精诚豁此襟。儿孙经乱长，诗礼泽吾深。猿鹤谁家子，鸡栖自惮心。终当际明盛，幸活徬思今。

居乱曾闻训，艰难竟及身。祷深思更杂，心苦语多真。脉脉馨香彻，飘飘气志伸。微茫如有触，随地见君亲。

忠孝都资盗，方知信史难。逃名宁得已，吞泪几曾乾。鼠殉终无觉，鹄跼且未安。临筵愧先志，虽暑亦生寒。

乡味兵戈阻，侨居祖祢凭。蓼莪终与废，荐芰亦难能。莫静风前树，差传暗里镫。民生惟菽水，识此足飞腾。

#### 王鸿觥

王鸿觥，字啸龙，又号无离，闽县人。光绪甲辰进士，历官邮传部员外郎。

### 吾心四首寄姊丈郭春榆侍郎

吾心有菩提，不披沙门缁。吾心有坎离，不饵商山芝。跂脚卧南楼，午梦寻皇羲。黄冠亦安適，白云聊自怡。冷笑个中人，逐鲍甘如饴。鹿卢与桔槔，各运机心机。王城岂蜀道，举足忧险巇。童童沧海桑，劫劫长安棋。同类苦相搏，力角场上鸡。同根苦相煎，火燃釜底萁。鹬蚌忿一时，利渔尔胡为。嗟嗟造化儿，颠倒良堪嗤。竖子名竟成，将军数或奇。颜天盗跖寿，侏饱方朔饥。呱呱近饿狼，宁复有孑遗。指点幕上巢，风雨为之危。十灶九不黔，何心食肉糜。西螭东亦瞋，何处乞邻醢。任炫夷威容，真庐皆籛施。譬彼嚼屠门，画饼终贻讥。

问青天，面面回风悲。瞻马吾其东，毒龙蟠在泥。挟策从之西，虎口张如箕。搔首欲唱鹤南飞，大鸟能啄儿。欲题知北游，当路横灵龟。日月天眼睛，玉川曾有诗。何以空明天，暮现千重翳。或者天刘翁，竟被白雀欺。何怪蚩蚩氓，朱颜变为黧。

瓦缝居凤凰，居亦失其宜。钟鼓乐爱居，乐亦匪所思。熊鱼不同嗜，鹄宁同栖。寸木生岑楼，反诮乔松卑。拳毛困盐车，奚异黔驴疲。君子困小知，褒成岂予欺。嗟彼近名人，七饥标殷遗。首阳无薇蕨，何粟餐夷齐。箕畚谋子孙，莫执愚公迷。冬夏食菱栗，毋好厉叔奇。渐米剑头炊，行矣休迟迟。吾心有天地，寄托弦上丝。高歌归去来，一广柴桑辞。

### 愤言

枝辞桔说问蜚蓬，十九枢权表下中。天上蟆肠常蚀月，世间夔足几怜风。贫能知我大夫鲍，热肯因人童子鸿。一棹沧江自来去，看人虎鼠看蛇龙。

### 寄怀丁三叔疋吴二彦复

令威落魄走京师，次尾伤时老贵池。恋恋故人寒至此，茫茫天道古如斯。尊前赋鵬才华减，桥上闻鹃世变知。燕市淞壖一明月，相逢何日慰调饥。

儿时书味忆青镫，生事清於莲社僧。太守晒裈知未免，将军健饭老犹能。女戎忍说唐开宝，党籍长悲汉建兴。眼看江山靴踢倒，葱葱佳气望诸陵。

### 山居杂感

莫为观棋代不平，离离草亦有枯荣。得雌或霸陈芳国，化翼安归舍卫城。门外种篁坚晚节，栏前坠果约秋声。青衫青史成双恨，老泪龙鍾送此生。

井水怀清信不波，秋江一带奈愁何。家贫累重忙牛马，市近声繁闹鸭鹅。漫道旄星销象纬，终期刀雨忏修罗。切肤痛痒谁能省，任汝爬搔总隔靴。

### 新春夜坐寄蘧庵

閒云弄影傍柴扃，心事如轮辗不停。阴树雪留经日白，残梅镫照隔年青。茫茫身世春归

梦，落落朋交曙后星。颠倒可怜堪一笑，坐偏思睡睡偏醒。

车中口占

十旬十走京津道，忙里云山眼倦看。今日坐窗识清旷，万林如醉一雕盘。

汪康年

汪康年，字穰卿，钱塘人。光绪甲辰进士，官内阁中书。

送日本禾原次宫归国

把盏将离日，翻思执手初。酒香当午月，花气袭轻裾。潇洒如君少，疏狂似我无。平常畏言别，今别复何如。

和广雅尚书两湖书院晚集原韵

吾生嗜游眺，登陟履几两。压脑萝葛扪，冒足蒺藜掌。遇淖时灭葭，遭雨即衣穰。隆冬走荆楚，方喜写尘鞅。密雪兆丰稔，宿泽苏皋壤。乘暮踏冰行，旅怀一排荡。将作散工役，呜呜甫作响。忽见折柬招，摄衣历阶上。燔炙苦劝酬，谈谑剧复往。执拂对逸民，焚舟敌真长。峭壁矜突兀，长流争瀟灏。尚书松鹤姿，意度廓深广。围炉坐相对，莹若晶玉晃。未如杨朱蹴，已作田子傖。大言惭覆瓿，小言不满盎。投杯起循廊，且自穷物象。凌坚鱼戢鳞，雪晶鹤失颡。微痕露瓦棱，馀辉映门榜。初月挂东檐，娟娟照疏朗。梅噤待春开，石植要云养。苦恋清逸景，焉能周胜赏。扶阑纵远瞩，欲去意还强。露立意稍怯，寒侵味转爽。归路望江流，绕郭如绳枉。家山不可见，夜梦发遐想。

何震彝

何震彝，字鬯威，一字穆忝，江阴人。光绪甲辰进士，官内阁中书，改道员。有《鞞芬室近诗》。

感述

人言知名士，往往不适用。岂真如画饼，此意尤可痛。诸葛未出户，南阳甘抱瓮。淡泊兼宁静，或为狙豎弄。愿酌鱼水欢，礼遇抑何重。种桑八百株，廉约聊自奉。魏武遗名香，受取作清供。设遭主忧疑，薏苡同构讼。小节原不论，大义当驭众。持此告细儒，相望亦梦梦。

吾性故方峭，蹇直宜自许。有时屈刚肠，宛转为儿女。俯视九流人，虚诞相夸诩。闾茸必见全，何为好健举。临财不审度，恣心任去取。偶遭侪辈轻，豪夺复谁予。吴君重然诺，一剑酌死侣。淮阴报漂母，投金默无语。朋僚肆往还，忘形失尔汝。直谅或可亲，蒐琐难与处。

诵伯严近诗却寄

诗垒摩空悍且坚，不闻垂老减精专。直追雪唱难赓续，静葆冬心肯弃捐。团扇风标閒处识，丹炉火候定中圆。若怜顽钝无高咏，江海羁违敢浪传。

#### 楼阴

楼阴晚望一忻然，夕照微殷落酒边。倒吸山光分积潦，碎分赭影散诸天。林间暗雨晴犹滴，阶次疏花坠更鲜。为语城头霜鬓叟，承蜩抱瓮亦多缘。

#### 春夜

密树驻春色，虚轩生夜凉。主人恣幽讨，携策离层堂。流景一何迅，云物森清苍。疏星入波碎，残雾蒙天长。有怀不少替，晞晞夜未央。重厓月痕匿，空林烟丝香。风景自尔殊，沦此荒遐乡。嘉客罕见存，谁与倾壶觞。

#### 忆伯严南中

汲汲修途频顾影，悠悠息壤且微疑。清言郭象能为累，狂态袁羊未是奇。长铗吹来心止水，尘冠弹出鬓成丝。平生微意趋江海，终有才难泪尽时。

#### 哭丁叔雅

丰顺公子囊无钱，江湖亡命来幽燕。承平雅尚不能改，锦衣玉貌非当年。万人如海且卜居，不好结客仍收书。高馆请回俗士驾，门前长者容停车。壁间悬有唐代琴，自云价值千黄金。朱弦疏越一再鼓，入耳全非时世音。三月来为津上游，投我一牋诗妍修。恐负春明好花事，小憩旋作还京谋。俯仰多故不称意，苦事留连忘归计。厌役精魂与世牵，早轻仕宦甘天弃。昨闻人言捐馆舍，初聆使我殊疑讶。别有龂牙古性情，或者荒伧工诅骂。无隅忽至挥涕谈，曾罗佳侠俱脱骖。诗工能穷且致死，行将归骨天之南。泗州节府园中筵，胡床同踞拥名篇。嘉宾贤主相殂落，我对沧冥一泫然。

#### 日暮

日暮谛思无尽意，万缘攫取入怀来。高名赫赫能为祸，薄俗纷纷几见哀。蕃酒漉唇忘暑喝，佛书遮眼积尘埃。从渠拨置人间事，侧枕酣眠息似雷。

#### 读元遗山集

燕都文士能谐雅，滏水高名一代间。座上从容吟野菊，更无人道赵閒閒。

曾得江湖盘辟乐，风阴野色互霏微。迟招红袖重城出，仆射陂头薄醉归。

希颜投老殢吟身，华屋高资入劫尘。喜见云山能动色，崧丘僵卧太愁人。

横波亭子压飞流，亡国哀弦激素秋。幕府空悲青口帅，擎杯倚剑看神州。



## 严复

严复，初名宗光，字又陵，一字几道，侯官人。文科进士，历官海军一等参谋官。有《滄野堂诗集》。

## 过吕太微

凉月低高树，憊然怀吕安。移鐙过别馆，留客供盘餐。雷雨涤新暑，庭阶生暮寒。遥知草元者，独有子云难。

## 论书

上蔡始变古，中郎亦典型。万毫皆得力，一线独中行。抉石抡猊爪，奔泉溯驥程。君看汜誓后，更为听江声。

用古出新意，颜徐下笔亲。细筋能入骨，多肉正通神。北宋推能手，东坡定后身。如闻跛守骏，妍貌不妨曠。

## 哭林晚翠

相见及长别，都来几昼昏。池荷清道暑，丛桂远招魂。投分欣倾盖，沈冤痛覆盆。不成扶软弱，直是构恩怨。忆昨皇临极，殷忧国命屯。侧身求辅弼，痛哭为黎元。大业方鸿造，奇才各骏奔。明堂收梓，列辟贡珣璠。岂谓资群策，翻成罪莠言。衅诚基近习，祸已及亲尊。愴怳移宫狱，呜呼养士恩。人情方翕訾，天意与偏反。夫子南州彦，当时士论存。一枝翹国秀，三峡倒词源。荐剡能为鶚，雄图欲化鲲。杨谭同御席，江郑尽华轩。卿月辉东壁，郎星列井垣。英奇相榘柱，契合互攀援。重译风皆耸，中兴势已吞。忽惊啼晚鵙，容易刈芳荪。古有身临穴，今无市举幡。血应漂地轴，精定叫天阍。犹有深闺妇，来从积德门。抚弦哀寡鹄，分镜泣孤鸳。加剑思牵犬，争权遇僨豚。空闻矜庶狱，不得见传爰。投畀宁无日，群昏自不论。浮休齐得丧，忧患塞乾坤。上帝高难问，中情久弗援。诗篇同乘机，异代得根原。莫更秦头责，休将朕舌扞。横流看处处，只合老邱樊。

## 古意

情重身难主，凄凉石季伦。明珠三百琲，空换坠楼人。

## 送沈涛园备兵淮扬

忠孝名家沈隐侯，分巡弭节向扬州。楹书庭训皆成宪，锦纛牙旗得上游。一约共传支半壁，三年行见少全牛。未能出钱成邂逅，惟有离情逐水流。

去年六月船南下，直北关山未解园。沧海狂流横莽莽，晨光前路远微微。相看白发盈头出，长恐青山与愿违。垂涕为君通一语，华亭千载鹤孤飞。

尚忆垂髫十五时，一篇《大孝》论能奇。谁言后死无穷感，惭负先生远到期。得志当为天下雨，流年已似手中蓍。春申浦口春无际，独对繁花有所思。

读君诗卷长三叹，他日遗山此代兴。开路骅骝气深稳，倚天冰雪势凌兢。未应处陆长吟湿，尽许同时得服膺。不废教条仍坐啸，悬知独有使君能。

#### 甲辰出都呈同里诸公

中国山川分两戒，南岭奔腾趋左海。东行欲尽未尽时，盘薄嶙峋作奇怪。幔亭拔地九千尺，一朵芙蓉倚天碧。建溪流域播七府，未向邻封分一滴。江山如此人亦然，学步羞称时世贤。旧学沈沈抱根柢，新知往往穷人天。共道文章世所惊，谁信闽人耻为名。入门见嫉古来有，黄钟瓦釜皆雷鸣。忆昔戊巳游京师，朝班邑子牛尾稀。即今多难需才杰，郭张陈沈皆奋飞。孤山处士音琅琅，皂袍演说常登堂。可怜一卷《茶花女》，断尽支那荡子肠。诸君且尽乘时乐，酒浅诗钟恣欢谑。君知国有鹤乘轩，何必惊心燕巢幕。乾坤整顿会有时，报国孤忠天鉴之。但恐河清不相待，法轮欲转嗟吾衰。自惭厚糲豢非才，手版抽将归去来。颇拟卢岑结精舍，倪容桐濑登钓台。长向江湖狎鸥鸟，梦魂夜夜觚棱绕。岂独登临忆侍郎，还应见月思京兆。

#### 怀吕开州

盖代循良宰，吾思吕太微。临财如触热，好善怒羈饥。至孝神应泣，论文瑟已希。墓田今宿草，黄鸟绕林飞。

#### 人才

人才鸚鵡能言日，世事蝸蟬换壳时。如此风潮行未得，老夫掩泪看残棋。

#### 见十二月初七日邸钞作

自笑衰容异壮夫，岁寒日暮且踟蹰。平生献玉常遭刖，此日闻韶本不图。岂有文章资黼黻，敢从前后论王卢。一流将尽犹容汝，青眼高歌见两徒。

#### 弢庵巡抚山西用癸巳江乡赠答韵

我公龙章兼凤姿，民望久属天子毗。中间卅年隐乡里，孝友政外奚为为。闽江上下两听水，图史花竹争纷披。成章更与逮小子，横舍一一分级差。帆风忽蹕万千里，亲见蛟鳄行踞夔。侨流忠爱良未衰，喁喁内向能抚谁。归来报告千万语，读者思卧闻者疑。属闻圣朝恫五典，宣室昨者重受釐。河东由来股肱郡，阴暄待子开清曦。用人行政枋未坠，愿采荃蕙毋蕢施。吁嗟乎，运当阳九想骨鲠，何异伏暑怀冰渐。幸令可治勿卤莽，疾革卢扁犹庸医。

#### 写怀

都来半世客幽燕，老眼今看海变田。失水蛟龙聊复尔，偷仓雀鼠故依然。岂能徐邈随通介，浪说王尊乍佞贤。阅尽白衣转苍狗，冰轮还作旧时圆。

### 寄散原

已回春雁数鲋鱼，目断南云少尺书。可有园林成独往，傥缘花月得相於。江湖无地栖饥凤，朝暮何年了众狙。说与闭门无已道，去年诗句太勤渠。

### 除夕意绪甚恶答陈石遗

乡思如潮不可减，连床何限语諠諠。即今除夕非佳节，莫向桃符署旧衔。天下诗才衡左海，故园胜处负楞岩。买山未是巢由事，江水犹应鉴至誠。

### 寄苏戡

江南一别今三载，书到樱花想未开。李白世人皆欲杀，陶潜吾驾固难回。诗应有子传家学，事去无端感霸才。满眼瞻乌方靡止，可能安稳卧淞隈。

### 以渔洋精华录寄琥唐山春榆侍郎有诗见述率赋奉答

九陌风鸣尘堀堦，南郭隐几今丧我。长安作梦垂十年，梦想阳岐山一迳。文书引睡睡复醒，万事不理任嬾惰。河阳宗伯今词宗，赠我新诗堪已瘳。为言昭代录诗人，疑让新城居上座。士林沾丐三百年，蒋袁杭厉皆细琐。平生结习覩文字，扬榷新诗吾亦颇。文章派别几人存，大抵修辞禁淫讹。李杜光芒万丈长，坡谷九天纷咳唾。如星五纬流四渎，议论欲到吾知叵。请言在昔明中叶，群公模拟或太过。虽然法上几得中，要於风雅未为左。何来东涧恣抨击，一钱不值同骂座。渔洋崛起应新运，如磨独角推一个。譬彼射者得正鹄，稍嫌力薄愁官笥。文人相轻自古然，又被赵纪加切磋。降兹谈艺遍湖海，若个解衣旁薄羸。西昆靡靡江西粗，公安竟陵更么麽。小子何莫学夫诗，敢问师资谁则可。吾云要在士卓识，一任纷拏众口哆。斯文如女有正色，岂事涂泽徒为大。横空盘硬亦非难，欲为排纂在贴妥。取径爱好似未害，他日湘帆随转柁。清新俊逸殆天授，著眼沈郁兼顿挫。双丸头上忽忽过，风轮谁挽蚁旋磨。勿云衰叔少和声，《三百篇》皆发愤作。能收一物寄孤赏，横流亦足娱寒饿。高歌青眼望后生，比似螟蛉祝果羸。忽蒙佳什誉过庭，语重情深谁敢荷。君家自有谢超宗，池上凤毛众所贺。

### 说诗用琥韵

昔者鲁东家，太息《关雎》乱。紫色杂電声，何由辨真滥。文章一小技，旧戒丧志玩。泯泯俗尘中，持是聊是浣。譬彼万斛泉，回湫生微澜。奔雷惊电馀，往往造平淡。每怀古作者，令我出背汗。光景随世开，不必唐宋判。大抵论诗功，天人各分半。诗中常有人，对卷若可唤。捻花示微旨，悟者一笑粲。举俗爱许浑，吾已思熟烂。

### 怀阳岐

不反阳岐廿载强，李垞依旧挂斜阳。鳌头山好浮佳气，碣角风微簇野航。水鸟飞来还径去，黄梅香远最难忘。何从更作莼鲈语，东海如今已种桑。

己未七夕

露轻河淡月弓弯，佳节如今总等閒。投老怕听儿女事，毕生自著點痴间。凄凉旧约留钗钿，仿佛灵风响珮环。云锦已归韩吏部，海槎载石是空还。

避暑鼓山

老病难禁住火城，今朝失喜作山行。千层石磴经阶级，十里松风管送迎。潮落沧江沙出没，云开岩岫月分明。可怜济胜今无具，笠屐轻甘载情。

赠林畏庐

左海畸人林畏庐，早年补柳遍西湖。数茎白发看沈陆，无限青山入画图。尽有高词媲汉始，更搜重译续《虞初》。饶他短后成齐俗，佩玉居然利走趋。

周蕃

周蕃，字昱宣，号笠石，湘乡人。举人。有《碧衡馆集》。

新柳

张绪丰神绝可怜，六朝金粉散寒烟。江南无限青青柳，惟有东风似往年。

东湖行

洞庭始波木叶零，岳阳正对君山青。叠浪浮天天欲湿，长风不唤痴龙醒。依家青草湖边住，呼吸湖光阅朝暮。由来少小狎波涛，烟艇空濛自来去。夫婿轻狂耐远游，无边风月替人愁。空江梦落鱼龙夜，故国心伤鸿雁秋。春流三月涨桃花，送君双桨去天涯。菰芦一夜北风起，那得狂夫忽忆家。秋来春去无消息，依旧明湖蘸晴碧。君迹真浮水上萍，侬心化为山头石。浮萍化石不相当，黄姑织女遥相望。生来不识关山路，依意远随江水长。飘泊生涯何足惜，叶叶轻颿送行客。未乘单舸逐鸱夷，忍抱琵琶诉幽魄。片席遥转磊石山，湘灵仿佛开烟鬟。重瞳翠华委寂寞，至今泪血犹斑斑。缥缈湖云馀古绿，丛筱千年青一束。依今有泪不轻弹，恐染江头万竿竹。一霎天风忽怒号，潜蛟水兕纷腾逃。蛟人弄珠天为泣，长鱼跋浪山齐摇。况复颠狂吹急雨，白波如山未可渡。生憎浦口恶石尤，不阻征人去时路。君意不如湖水湛，君情不如湖水深。湖心深浅有时见，君心深浅愁人心。

周曾锦

周曾锦，字晋琦，江苏通州人。光绪丙午优贡，官浙江县丞。有《藏天室诗》。

金沧江崧阳耆旧集题词

麦秀哀歌唱未终，又看箕域坏狂童。书囊剩有删诗笔，一卷东音当国风。铙歌笳拍慨当慷，乐府新声亦擅场。亡国不关词赋事，莫随众口病齐梁。

### 登军山用徐澹庐韵

平生爱山游，腰脚不遑惜。竭来登车峰，一揽江天碧。山中猿与鹤，大半隶仙籍。老树拱揖人，飞花笑迎客。槛泉一何清，淪茗吸云液。一坐憺忘归，千岩黯将夕。惊风振天末，落日逗云隙。回首望城闉，人间何役役。行当谢尘劳，归隐就泉石。君看冥冥鸿，没影寥天一。

### 渡黄河宿小驿

小驿三间屋，驱车薄暮过。低窗延落月，虚枕纳长河。轮铁消磨尽，囊金耗散多。西邻有豪客，轰饮杂酣歌。

### 朱联沅

朱联沅，字芷青，海盐人。大学堂毕业，举人，学部七品小京官。

### 园夜

划地风埃夕梦沈，弥天哀乐一镫深。华年已负峻嶒骨，皓月微窥玉雪心。了了馀生拚几屐，茫茫尘劫累千寻。元知忧国非吾事，忍泪还搜漆室吟。

### 睡起

稍从寂寞养天真，睡起怡然一欠伸。秘笈偶笺《清异录》，头衔自署太平民。微吟浅醉能中圣，澹月疏筠最可人。照影池波索双笑，此怀惟有白鸥亲。

### 端阳后一日小集法喜龕写上鞞芬

北秀南能证妙因，栖禅法喜是天亲。一龕花雨光明地，著我修罗历劫人。

捉鼻微吟意惘然，红楼镫地晚凉天。覆杯粗说扬州梦，已换沧桑到酒边。

### 李逊

李逊，字仲言，秀山人。译学馆毕业，举人。

### 感事

东北扬烽火，纤儿启衅年。筹边资李牧，奉使重张骞。民命生谁恃，天骄祸未延。朔方言纪载，备乘有新编。

### 闵孙奭

闵孙奭，字元召，江都人。国立北京大学毕业，文学士。

碧云寺晴望

碧云寺外碧云浮，别怨何人拟惠休。双涧争鸣泉不息，众山新沐雨全收。大都景物犹堪纪，乱世功名未可求。郊野西成欣有望，甘瓜朱李欲迎秋。

邀友人寓斋小集有作

閒庭雪后玉梅春，佳日招要孰主宾。十载鸿泥寄燕市，一尊羊酪负吴蓴。相生学佛能无欲，董子吟诗若有神。安得普天休战伐，吾侪长作太平人。

黑龙潭

数家村舍黑龙潭，行药重来路已谙。松影泉声两清绝，买邻我欲结茅庵。

## 【卷一百八十三】

李氏

李氏，孝感人。同县熊祚廷室，大学士、谥文端赐履母。

寒月夜作

宵分蟾影印虚庭，为爱清光倚小亭。惭对青山头已白，闷看黄菊眼还青。烟拖暮靄笼寒柳，风漾幽池蹴细萍。不叹空闺多寂寞，教儿犹喜有遗经。

张氏

张氏，德州人。祯女，顺治壬辰进士、丽水知县田绪宗室，户部侍郎雯母。有《茹荼吟》。

句容署中

一带青山雪径封，白云片片树重重。葛洪井与鲍姑宅，住在华阳第几峰。

自句容归里

流水青山在眼前，归途恰值早春天。官贫一路无车马，觅得江南鸭觜船。

渡黄河有感

一曲中流《瓠子歌》，淮南落日渡黄河。不知底绩司空日，销尽金钱尔许多。

#### 戊申京邸示儿

金马门前玉漏残，经年索米向长安。悲歌莫逐荆高侣，且耐官同易水寒。

#### 示儿

一部《楞严》户昼扃，木鱼竹杖倚围屏。老人自觉修斋好，不为儿曹讲佛经。

#### 送长儿之楚

黄鹤楼前白浪生，江流滚滚鄂王城。恍从鹦鹉洲边过，一吊才人祢正平。

#### 朱中楣

朱中楣，字远山，庐陵人。明宗室议汶女，吉水兵部侍郎李元鼎室，礼部尚书振裕母。有《石园随草》。

#### 雨馀登避暑台

晚妆才罢试齐纨，夏木阴阴落照残。欲向层台窥远堞，偶飞疏雨染重峦。湿云缓度莺声老，凉月还生燕语欢。共挹荷香思茗饮，轻风有意送梅酸。

客秋偶憩西子湖，皆令携幼女过访。发方覆额，遂能诵诗写法帖。楚楚可人，今依然梦想间，并裁小诗似之。

瑟瑟轻罗澹澹妆，柳梢莺语乍调簧。乌云应拂春山小，红蕊初含夜雨香。鸳水毓灵多鲍谢，蝇头妙楷逼钟王。梦回犹记殷勤别，几欲笺诗燕子忙。

#### 穀雨前一日小室閒吟

小苑焚香逗绿纱，摊书随意注南华。春衫未翦寒仍怯，午梦初回日又斜。湖外祇堪眠弱柳，雨前谁复饷新茶。中怀脉脉閒无那，看取游丝缀落花。

#### 秋雨吟

漫斗揶揄金钏冷，暝烟犹缀秋千绠。一声新雁动离思，叫彻云根透纤影。翠钿寒生秋已仲，檐敲碎玉惊残梦。急雨初收问落花，清商暗度栖梧凤。素娥青女意飏飏，何事深闺恨夜长。燕去燕还还复去，閒鸥依旧点横塘。

#### 上巳同外携儿子振裕登滕王阁

水落沙犹曲，风恬浪不漩。繁檣依断渚，孤鹜没遥天。醉柳开新火，啼鹃破晓烟。

登高欣有赋，索价问榆钱。

### 春晚

瑟瑟湘帘袅袅垂，娇莺初啭最高枝。枕棱画得金钗响，为记深宵梦里诗。

### 赠涂年侄女南归

每话家园泪雨潸，蓟门秋老雁初还。惊魂自逐潇湘水，忍见湓城山外山。

时慰愁容强作欢，漫伤亲串半凋残。珠帘暮雨西江月，尽付离人马上弹。

齧雪餐毡苦自持，谁怜弱息委燕支。青青柳色仍如旧，寄与韩郎知不知。

共羨山公古道稀，黄金解尽出重围。丰城剑合珠还浦，故国文姬此日归。

### 和外五日自潞河归津门

地接蓬瀛任所探，扁舟何日泛元潭。椿萱岁越今逾九，兄弟时怜但有三。采药盈筐怀益母，书符结缕佩宜男。移樽共向花前醉，擘藕还因雨后甘。几度幽香深院袅，半湾斜月远林含。层云掩映迷芳树，落照依微度翠岚。鹤草不须烦媚蝶，鸾笙每欲动归骖。千头种橘宁无念，万里浮家未可堪。却羨数雏还茹哺，偶来双鹤助清谈。轻风淡宕消残暑，閒署萧条忆寸柑。戏和新诗君勿笑，为联险韵我何愁。鸳鸯并浴翻荷盖，鹦鹉频餐啄玉函。茗战晚烟炊细沸，蟲征宵鼓劫雄酣。寒冰滴沥声催句，暝鸟回翔语觉喃。刻艾悬庭惊燕户，伊蒲绣佛对禅龕。盐梅空负调羹美，蒲酒聊斟供馈惭。飘泊漫欣曾解带，逍遥惟喜早抽簪。忽雷才拨乡思集，方响慵敲旅梦耽。偕隐宜从翰墨圃，同游直到买山庵。稚儿听说家园好，解望关河问指南。

### 拟古游仙诗

洪井尚留丹，餐霞堪绮席。盈盈若轻举，揽之不可得。宛拟至琼宫，互立仙班侧。倏起江海游，鲛人捧珠出。灿烂起层霄，辉煌炯遥壁。或理凤凰琴，或窥麟虎迹。或诵步虚吟，或促清谈膝。杳霭度韶音，旖旎停云泽。恍惚在天涯，徘徊閒咫尺。忽睹避秦人，忽睹偷桃客。劈藕大如船，分脯还煮石。控鹤欲凌空，悬崖深莫测。窈窕复冥冥，苍苍何郁郁。团露染新红，方壶漂绀碧。月脑晦还圆，星眸炫犹逸。珍重广成言，飞凫酣数息。胜境可能寻，山河咸历历。六著恍然明，乾坤任所適。

### 春日熊雪堂少宰以和黄山谷梅花韵见投同梅君作

几年偕隐同归洛，纷纷世态春冰薄。今古长安似弈棋，惟有投閒是先著。每思登眺帝子楼，风雨靡靡滞城郭。荒园颓倚杏花村，社鼓频传慰恬漠。时吟佳句响琳琅，满纸烟霞真骇愕。续貂髣髴韵难成，欲附青云为寄託。绿波隐隐泛兰舟，红蓼森森羨华萼。隋隄旧院冷秋千，谯国新旗缀珠珞。海棠无力怯春寒，梦破春愁愁满橐。融和天气正芳菲，芸窗课子差足乐。无燕翻飞堕碧空，流莺宛转惊铃索。屈指韶光又一年，閒看花开渐花落。不关春色



苦相催，但恨封姨还肆虐。澹宕轻阴润杂弦，良宵煮茗奴称酪。却为听诗减夜眠，举案呼尊共微酌。寄语猿鹤莫漫猜，而今始践山林约。

### 旅兴

身世苍茫里，烽烟已数千。旅愁春候觉，归梦草堂前。花径迷蝴蝶，家山映杜鹃。枝头闻鸟语，犹自说燕然。

### 春日感怀

青春作伴已还乡，赢得新诗富草堂。苏圃漫添湖水绿，柴桑难问径花黄。荒城处处伤离黍，旧燕飞飞觅画梁。家国可堪寥落甚，怡情何地足沧浪。

### 舟行晚眺

远望清流曲曲通，孤帆幸逐芰荷风。黑云片片归前浦，紫燕纷纷掠短篷。岸柳乍摇新水绿，山花遥带夕阳红。频闻箫鼓知村近，雨过潮平月正中。

### 岁杪答梅君维扬

久阅关乡未忍离，霏霏应值到家时。梅开芳信书凭早，梦绕江干月上迟。彭泽喜裁归去赋，芜城愁和寄来诗。新篇正熟思君赏，独坐深宵且课儿。

### 舟次清源和梅公韵

南归欲觅旧柴门，何意弹冠赴特恩。三径未成重理楫，千山遥忆隔啼猿。香侵蓼国飘红粉，露滴荷房泻绿尊。远岸菁葱连雨足，閒鸥飞泛点秋痕。朝廷有道思良弼，彤管承家愧昔媛。新月含辉云外吐，斜峰倒影浪中翻。偶来坠叶惊诗思，厌听严更搅梦烦。晚泊村宵难喔喔，平原戎猎鹿奔奔。天涯篷转随征雁，泽畔桑深卧野豚。银汉乍回青鹊羽，金风渐返木樨魂。知君自为苍生出，从古惟闻绮皓存。把酒漫同儿女醉，频年忧患不须论。

### 晚秋怀里

落叶惊残梦，秋归人未归。水明天一色，鸦带晚霜飞。

### 舟泊鸠兹

水阔春回接楚湘，学啼娇鸟未调簧。起来卷幔窥红色，一抹青山带夕阳。

### 闻子规

忽听啼鹃柳外飞，声声相唤不如归。人归何似春归易，芳草萋萋送落晖。

### 宗伯年嫂招集沧浪亭观女郎演秣陵春

越调吴歃可并论，梅村翻入莫愁村。兴亡瞬息成今古，谁吊荒陵过白门。

商景徽

商景徽，字嗣音，会稽人。明吏部尚书周祚次女，上虞徐咸清室。有《咏雕堂诗草》。

邯郸才人嫁为厮养卒妇

妾自承恩初，同心绾双结。灿烂若明霞，流霞不能涅。晨眺漳河流，夜卧丛台月。岂知中道乖，蛾眉坐沦没。春风伴赭衣，秋霞改玄发。镜台宝髻疏，罗裳暗香歇。愿作巫山云，朝朝反宫阙。

美女篇

美女东城隅，红颜华灼灼。垂垂十二鬟，一一飞金雀。初日照楼台，春游出宛洛。采桑攀远杨，攀芳捋丛薄。行路何踟蹰，中心谅有讬。不知谁家子，白马黄金络。强言立道傍，翩然互酬酢。本非淇上姝，宁践桑中约。家无薄幸儿，白头负前诺。赠妾双明珠，还君抵飞鹄。日暮行归来，空闺守寂寞。

子夜四时歌

蜡烛照空帷，春宵难达曙。衿衣不著绵，预识中无絮。

弄水恐湔裙，采莲畏伤手。花欹半面妆，愿得花间藕。

栖鸟夜不眠，肃肃翻金井。五更霜月昏，不见双桐影。

五彩织薰笼，炉灰皎如雪。不弃炙残香，为爱心中热。

读毛西河濂中集作

芙蓉露下小池秋，金鸭烟消宿雨收。为读西河新句好，都梁艾蒨满妆楼。

彩笔翩翩映玉台，频将绣帙向风开。可怜杜甫惊人句，不数陈留旷世才。

吊张曼殊

觅得温柔在帝乡，娇花容易萎严霜。丰台自此游人绝，芍药将开尽断肠。

云髻峨峨似洛神，都人争学百环新。凭他学尽新妆巧，不是才郎收泪人。

祁德渊

祁德渊，字弢英，浙江山阴人。明苏松巡抚、谥忠惠、彪佳女，姜廷梧室。有《静好集》。

#### 送黄皆令

西风江上雁初鸣，水落寒塘一棹轻。绕径黄花归故里，满隄红叶送秋声。片帆南浦离愁结，古道河梁别思生。此去长涂霜露肃，何时双鲤报柴荆。

#### 祁德琼

祁德琼，字修嫣。忠惠公女，诸生王鶚叔室。

#### 送别黄皆令

万山寒秋月，一苇寒秋波。美人理远棹，秋色低星河。送君青雀舫，赠君金叵罗。别路不辞远，别酒不辞多。良辰惜分袂，分袂当奈何。虽有千金装，何如《五噫歌》。

#### 和黄皆令游密园

朔气晴开万户烟，寒林落日点红泉。十年往事悲星散，千里交情共月圆。松径犹能邀令客，桃源应信有群仙。攀芳踏尽池塘路，泥印莲花步步妍。

#### 明月

明月当空照，长河万里秋。井梧千叶尽，篱菊一樽幽。雁度云间影，猿啼岭上愁。萧萧玉珮冷，对景怯登楼。

#### 寓山看梅

楼敞云阴薄，伤心花外来。风和新柳出，云尽老梅开。香气迎妆粉，春光照径苔。贪看千片玉，日暮尚徘徊。

#### 夜坐

坐久明镫乱，寒风入彩帟。阑干七十二，何处笛声飞。

#### 采菱和黄皆令

采菱歌逐绿云飞，画舫轻随暮色归。枫叶两隄摇碧水，湖光一带入罗衣。

#### 祁德萑

祁德萑，字湘君。忠惠公女，诸生沈萃祉室，有《寄云草》。

### 古意

惜昔与君别，杨柳丝堪结。芳草积如烟，飞花乱成雪。数载客京华，念君远别家。欲知遥塞雪，但看故园花。芳时处幽独，蜘蛛网金屋。细雨昨夜零，春苔上阶绿。对镜厌孤鸾，凌云怨黄鹄。憔悴玉台人，肠断珠帘曲。为欢须忆故，为衣莫道新。愿持江国月，流照苏门春。

### 题钱舜举鸳鸯

柳丝织烟金缕细，绿波宛转通春意。锦塘一曲静沈沈，下有鸳鸯七十二。交颈双栖睡起迟，烟轻沙暖艳阳时。谁教钱选生香笔，画出多情崔珣诗。

### 送别黄皆令

画阁联吟恰一年，此时分袂两凄然。云间归雁路何处，林里飞花香可怜。远客青山皆别思，仙舟明月已无缘。怀君日后添离梦，寂寞荒村渡晚烟。

### 忆益姊

拈来阁上黄金线，倚遍亭前白玉栏。徒忆空园悬画板，春风一夜杏花残。

### 惜花

花事阑珊又一年，当门岩壑总依然。落红满地休轻扫，也算留春在目前。

### 张德蕙

张德蕙，字楚纁，浙江山阴人。祁理孙室。

### 中秋

秋气中天净，愁人独夜看。停桡江愈阔，却扇月初寒。霜入桐阴薄，风飘桂影残。扣舷情未已，露湿绮罗单。

### 赠湘君

兰房独起迟，无语对罗帏。此意无人解，深闺未嫁时。

### 朱德蓉

朱德蓉，字赵璧，会稽人。诸生祁班孙室。

### 游山

寂寞佳山水，楼台薜荔间。野桥分竹路，高树绕溪湾。径曲留琴语，杯宽破客颜。夕阳钟磬外，犹有暮云閒。

#### 送别黄皆令

青青杨柳枝，飘摇大道傍。大道多悲风，游子瞻故乡。执杯送行客，泪下沾衣裳。忆昔弭远棹，明月浮景光。杯觞极良宴，歌舞开华堂。好鸟得其侣，举翼双翱翔。胶漆两不解，金石安可方。分袂起仓猝，永夜生悲伤。吴山何渺渺，越水何茫茫。芙蓉凭秋波，熠熠吐幽香。采以奉所思，所思难可忘。

#### 上巳

桃花秋水湔春衣，旧日兰亭到亦稀。断岸羽觞晴日暖，远山横笛暮云飞。沙棠舟落江鸥起，玳瑁梁空灞燕归。尚有采蘋思未足，不堪月色上罗帏。

#### 采莲曲

绿叶罗裙一色裁，芙蓉映水两边开。欲将新曲频频唱，恐有鸳鸯飞入来。

#### 咏虞姬

歌罢伤心泪几行，江山旋逐楚声亡。贞心甘向秋霜剑，不欲含情学汉妆。

#### 愁雨

烟雨重重宿鸟惊，惜花愁听落花声。只今闺阁应寥寂，还忆亭台芳草生。

#### 寄修嫣

莫卷珠帘对碧山，山边孤鸟日飞还。如何百里相思路，惟有随人月影閒。

#### 方维仪

方维仪，字仲贤，桐城人。明大理卿大镇次女，诸生姚孙荣室。有《楚江吟》、《归来叹》、《清芬阁集》。

#### 伯姊之粤有赠

昨岁长溪来，今岁粤中去。此别又数年，离情复何语。明发皖江城，山川隔烟雾。皓月临苍波，春风满江树。

#### 秋雨吟

高楼秋雨时，事事异往昔。骨肉东南居，田畴稻不获。树叶色将变，寒虫语幽石。

孤愁多苦心，四顾成萧索。云暗远山峰，独坐苔阶夕。

#### 读苏武传

从军老大还，白发生已久。但有汉忠臣，谁怜苏氏妇。

#### 楚江怀节妇吴妹茂松阁

空林陨叶暮乌啼，云水迢迢隔皖溪。夜发苍梧寒梦远，楚天朗月照楼西。

薄命同罹骨肉哀，天涯书信远难来。愁心不似归鸿影，能逐湘江夜月回。

#### 北窗

绿萝结石壁，垂映清芬堂。孤心在遥夜，当窗皎月光。悲风何处来，吹我薄衣裳。

#### 拟古

八月天高雁南翔，日暮萧条草木黄。与君别后独徬徨，万事寥落悲断肠。依稀河汉星无光，徘徊白露沾衣裳。人生寿考安得常，何为结束怀忧伤。中夜当轩理清商，援琴慷慨不能忘，一心耿耿向空房。

#### 死别离

昔闻生别离，不言死别离。无论生与死，我独身当之。北风吹枯桑，日夜为我悲。上视沧浪天，下无黄口儿。人生不如死，父母泣相持。黄鸟各东西，秋草亦参差。予生何所为，死亦何所辞。白日有如此，我心徒自知。

#### 伤怀

长年依父母，中怀多感伤。奄忽发将变，空室独彷徨。此生何蹇劣，事事安可详。十七丧其夫，十八孤女殇。旧居在东郭，新柳暗河梁。萧条下霜雪，台阁起荒凉。人世何不齐，天命何不常。孤身当自慰，且免摧肝肠。鹪鹩栖一枝，故巢安可忘。

#### 出塞

辞家万里戍，关路隔风烟。赋重无馀饷，边荒不种田。小兵知有死，贪吏尚求钱。倚赖君王福，何时唱凯旋。

#### 独归故阁思母太恭人

故里何须问，干戈扰不休。家贫空作计，赋重转添愁。远树苍山古，荒田白水秋。萧条离膝下，欲望泪先流。

### 旅夜闻寇

蟋蟀吟秋户，凉风起暮山。衰年逢世乱，故国几时还。盗贼侵南甸，军书下北关。生民涂炭尽，积血染刀环。

### 病起

空斋无事晚风前，雨过苔阶草色鲜。远岫云开舒翠髻，新荷池畔叠青钱。衰年转觉多愁日，薄命何须更问天。閒坐小窗初病起，西林皓月几回圆。

### 方维则

方维则，字季准。大铉女，诸生吴绍忠室。有《抚松阁集》。

### 题竹

小院何空寂，相依独此君。雪深愁易折，风急不堪闻。白石移花影，青苔拥籀文。楼头残月上，空翠落纷纷。

### 叶宝林

叶宝林，馀姚人。明按察使宪祖女，同县黄宗羲室。

### 采花蜂

遍采名园万树芳，春风鼓铸满篝粮。徒劳巧酝三冬计，讵料难留百叠房。甘苦不须重借问，难辛回忆倍堪伤。若还解得为谁语，随分安身是道场。

### 许氏

许氏，汉军旗人。镇平将军、湖广提督、谥襄毅徐治都室。

### 马上歌

快马轻刀夜斫营，健儿疾走夜无声。归来金镫齐敲响，不让须眉是此行。

### 徐璨

徐璨，字湘蘋，吴县人。海宁大学士陈之遴室。

### 秋日漫兴

帝苑芳春风吹谐，看花曾遍洛阳街。行吟缓控青丝辔，击节频抽白玉钗。共挽鹿车归旧隐，几浮鱼艇散秋怀。霜风扫尽烟霞况，愁见龙城叶满阶。

### 陇头水

西去穷荒恨，东看故国愁。一心悬两地，双泪落风流。羽檄秋偏急，戎车夜不休。壮夫轻出塞，未到陇山头。

### 徐文琳

徐文琳，吴县人。海宁副贡陈堪永室。

### 过莲池庵访圆明女师

精庐屈曲倚云根，松竹周遮不二门。顿使尘缘都洗涤，懒将世网一评论。山花径绕名难辨，斋磬声沈日又昏。小衲坛前閒指点，赐幡曾沐大君恩。

### 纪映淮

纪映淮，字冒绿，小字阿男，上元人。映鍾女弟，莒州杜李室。有《真冷堂词》。

### 秦淮竹枝词

栖鸦流水点秋光，爱此萧疏树几行。不与行人绾离别，赋成谢女雪飞香。

### 即景

李花一孤村，流水数间屋。夕阳不见人，牯牛麦中宿。

### 桃叶歌

清谿有桃叶，流水载佳人。名以王郎久，花犹古渡新。楫摇秦代月，枝带晋时春。莫谓供凭览，因之可结邻。

### 春日幽居

细竹深阴覆碧纱，石床书帙昼抛斜。半帘细润侵寒雨，一衲孤馨染落花。流水穿林寻野鹤，夕阳归树护栖鸦。春山淡漠无人共，遥倩诗囊贮乱霞。

### 毕著

毕著，字韬文，歙县人。王圣开室。

### 纪事

吾父矢报国，战死於蓟丘。父马为贼乘，父尸为贼收。父讎不能报，有愧秦女休。



乘贼不及防，夜进千貔貅。杀贼血漉漉，手握馘人头。贼众自相杀，尸横满阡沟。父尸與棖归，薄葬荒山陬。相期智勇士，慨然赋同仇。蛾贼一扫净，国家固金瓯。

### 村居

席门閒傍水之涯，夫婿安贫不作家，明日断炊何暇问，且携鸦嘴种梅花。

### 宫婉兰

宫婉兰，泰州人。检讨伟鏐女，如皋冒褻室。有《梅花楼诗集》。

### 元宵喜晤十六侄如冈

汝来恰值传柑节，我老惊看两鬓银。回首弟兄多隔别，相逢子侄独情亲。梅残正好迎新月，柳放何堪又暮春。带水家乡原不远，衰年惟有泪沾巾。

### 海陵留别二嫂卞夫人

数月相依情更深，殷勤棋局记知音。黄花绿酒难为别，万斛愁堆一寸心。

### 冒德娟

冒德娟，字嫵婉，如皋人。褻女，同县石巨开室。有《自怡轩诗集》。

### 暮春

閒步空阶有所思，无端新绿又盈枝。暮春天气人如醉，喜听莺声未老时。

### 晓起

晓来初起对窗纱，日上珠帘弄影斜。风动高枝黄鸟啭，声声啼向碧桃花。

### 秋夜

飘来红叶忽成秋，又见双星两地愁。阶下细虫喧不歇，檐前紫燕语难留。空庭砧杵催长夜，远寺钟鱼逼戍楼。薄醉欲眠犹未得，绮窗遥望月如钩。

### 夏日

芭蕉深绿映疏窗，高柳蝉鸣昼景长。闷卷珠帘看日影，鸳鸯相并立池塘。

### 春闺

风动帘栊春昼长，莺声催起整残妆。独行亭畔拈花朵，不觉罗衣怯晚凉。

钱敬淑

钱敬淑，字师令，江宁人。诸生谈允谦室。

泊浦子口

残年泊征棹，载酒数归程。雪圃芹芽白，江醪竹叶青。夕阳新别路，衰草古离情。隔岸寒山色，凝眸望旧京。

顾若璞

顾若璞，字和知，仁和人。明上林苑丞友白女，同县黄茂梧室，炜母。有《卧月轩稿》。

秋日为两儿修读书船泊断桥作

闻道和熊阿母贤，翻来选胜断桥边。亭亭古树流疏月，漾漾轻裊泛碧烟。且自独居扬子宅，任他遥指米家船。高风还忆浮梅槛，短烛长吟理旧毡。

暮雨

涧草依依浮玉，隄杨拂拂迷烟。江上蒲帆欲没，村中桑女争还。

和夫子西溪落梅

迤迤入西溪，溪深深几曲。断岸挂鱼罾，茅檐覆修竹。翠羽何啁啾，满林香扑簌。晴雪飞残英，坐爱倾蚁绿。鹿门迹未湮，与子同归宿。

捣衣篇

自惜盈盈十五馀，不施粉黛叹幽居。忽惊流浪双头鲤，带得交河一纸书。读书宛转愁不息，征人正在天山北。天山高插碍星流，漫驾红鸾过十洲。君挂雕弓控轻骑，妾闻胡雁怨高楼。满眼光光转眼歇，昨夜红颜换白发。捣衣声断咽霜风，掩袖啼多惨秋月。秋月孤帏漏正长，香奁宝篋耀华堂。鸣珰四面鸳鸯结，罗帐团回锦绣香。鸣珰罗帐芙蓉锦，华烛兰膏明未寝。解将珠镜光如刀，留待君来照鸳枕。饮尽金罍不见君，湘帘怨卧烟氤氲。羽书犹欲征边塞，愿逐巫山一片云。

江上缣丝曲

桃花花繁杨柳垂，纤腰嫩脸香风吹。莺儿调声声正滑，堂上丝车鸣轧轧。少年骑马挟金弹，青冢朱弦纷夹岸。缣丝终日不忍看，寒蛩早晚啼秋幔。

自君之出矣

自君之出矣，不理钗头玉。思君湘水深，啼痕犹在竹。

自君之出矣，鸾镜不曾开。思君如璧月，皎皎照妆台。

自君之出矣，罗幔月娟娟。思君如络纬，辗转一丝牵。

湖中

湖光渺渺冷烟微，江鹭沙凫伫不飞。恰欲抱琴轻别去，芰荷分绿上罗衣。

感怀

不堪愁病强搔头，二十三年感百忧。却也不知方寸内，如何容得许多愁。

阌玉

阌玉，钱塘人。

感吟

西湖春色两隄花，阵阵莺声串柳芽。我本无心植杨柳，阴成都能夜栖鸦。

李美仪

李美仪，鄞县人。邨嗣女。

奉和家大人草堂课耕韵

高畴新雨足，布穀唤春耕。千亩回村绿，三家结舍平。犊肥田豎喜，鸟起草人醒。  
惟有田翁乐，悠然候岁成。

东舍幽栖处，柴门接野田。一春滋草径，三月酿花天。林雀喧晨霁，邻鸡报午烟。  
频年收获好，膝下得欢然。

吴山

吴山，字岳子，当涂人。县丞卞琳室。有《青山集》。

新霁

新霁健草木，林塘肆芬芳。拂石竹阴晚，地幽人亦凉。远天自空静，蝉风吹夕阳。

### 法海寺

闻说隋家帝，於此建宫阙。种色玉钩斜，年年芳草发。代往存形胜，古刹依林樾。轻风吹锦帆，今昔一明月。

### 望钟山

天气清无霞，远山益幽靄。凭楼纵观眺，目与群物会。清风自南来，竹树生微籁。歌禽唱金缕，翠簪飘罗带。时佳景复丽，赏心亦高迈。延伫望鍾陵，眷然怅松桧。似觉古今短，徒谓乾坤大。念昔爽鳩氏，川原鲜常在。

### 集不系园

两峰不出云，十里春阴谱。水上快凫鸥，帘前怨鹦鹉。花寒不放香，月瘦未见补。莫谓近山晴，远烟还是雨。

### 越城歌

越王城边春鸟吟，忽思美人歌舞心。一朝歌舞向吴国，水犀军散剑池深。姑苏台下草连天，鸱夷一艇何茫然。

### 泊舟香口

薄暮到香口，风回即泊舟。一溪分竹进，两岸断江流。落日明残牖，荒烟袭废楼。篱边鸡犬静，寥落使人愁。

### 秦淮舟集同刘李诸夫人分韵

一棹轻随岸柳斜，晚霞落日集名家。六朝风物秦淮水，三月春情穀雨茶。隔树岚光青照眼，护桥烟色白侵沙。万重楼阁阑干绕，处处篱边著好花。

### 中秋

最爱寒光好处圆，今宵何事转凄然。两宫昔日繁华地，百代清秋水月天。鳬雁不关离黍恨，湖山宁受后人怜。聊乘一叶中流放，风露依稀咽管弦。

### 幽居

独寻幽处结孤茅，泉石膏肓疾未消。放鹤启扉欹醉竹，通泉凿石跨飞桥。露香秋老收莲种，花雨春深课药苗。食罢行吟循泽畔，棹歌声引夕阳潮。

### 徙倚

自伤蓬迹远，常羨旅鸿归。昨得家人信，青山满蕨薇。

### 题画

雪意满前山，苍云落寒树。扁舟人不归，想在谿中住。

### 清明

而今何处觅桃源，风雨清明且闭门。春草萋萋归不得，江南多少未招魂。

### 姑苏棹歌

水色连山青欲流，渔人终日掉轻舟。一条古路分吴越，直到钱塘江岸头。

水转枫桥径转幽，人家绿树映高楼。水犀秋满山塘上，一路清香到虎丘。

### 寒食忆逝

去年此日买兰桡，薄暮轻阴转石桥。未到平山明月上，水香深处共闻箫。

三月清明风雨斜，江城花柳带人家。春花落尽悲春去，尚有来春发旧花。

### 广陵杂咏

检点游装问有无，欲呼双鹿驾柴车。一椽傍水留新句，几担移家只旧书。

一榻残书兼旅思，半窗镫火与疏钟。静看六代江南志，坐尽维扬夜雨浓。

新雨足时芳草绿，野棠开处鹁鸪鸣。只今曾阅人多少，感尽江山万古情。

怅望遥天羡鸟归，落云深处暑光微。荒阶渐有虫声出，秋欲来时细雨飞。

### 卞梦珏

卞梦珏，字元文，号篆生，江宁人。刘师峻室。有《绣阁遗稿》。

### 湖楼

一湖幽况送诗篇，画阁初晴暮卷帘。两岸烟岚飞鹤点，数声钟磬醒鸥眠。山从虚镜遗真影，塔向空天立自然。多少白云分片段，悠悠竟与远峰连。

### 去半塘

半塘容膝半年多，一别浑如一梦过。记得山光青似黛，肯忘水色碧於螺。邯郸卢子留萍迹，蝴蝶庄生笑网罗。不是橹声鸡唱候，此身犹自滞南柯。

### 落梅

静夜新雷雨欲滋，无端愁为落梅支。因追灞上初春日，转念孤山二月时。香雪易飘风细细，飞琼难挽柳丝丝。问梅那得情如我，祇恐桃花笑也痴。

### 咏六月小庭落叶

深簷蔚卉未知秋，几叶稜稜似探幽。月檻风窗聊寄傲，石屏萝磴漫稽留。迟归恐值吴江冷，先遯奚惭御水流。依约晓阶迎曙色，古槐高柳鸟声稠。

### 陆观莲

陆观莲，字少君，号雨鬢道人，嘉善人。笈丹生室。有《蒋湖寓园草》。

### 蒋湖寓园对月

青天挂明镜，辉光照我床。展转不能寐，起坐空徬徨。徬徨亦何为，日思我故乡。瓶斋旧隐处，乃在茜水阳。廿年几播迁，渺渺天一方。回思手栽树，橘柚徒含芳。安得生羽翼，摩天一翱翔。

### 宝剑篇赠外

吁咄哉，荆卿剑术既不成，虽有宝剑徒空名。千年黯黯闭秋水，双匣渺渺埋龙精。狐狸夜鸣风雨恶，蛟螭昼舞波涛惊。我持此剑若明月，众星朗朗随其行。又持此剑若白日，群妖退走欃枪平。欃枪平，众星没，送君赠君君莫惑。古来遇合自有时，神物出处当知之。

### 辰山步虚词

郁萧宴罢列仙归，彩凤青鸾各自飞。敕赐珍珠三百斛，满身璎珞绕天衣。

### 念沈氏老姊

昔闻桓山鸟，四海各分飞。念我同生子，四女相因依。辛苦效反哺，力尽心亦微。仲姊久长逝，泪落不可挥。所遗我三人，恋母愿空违。伯也失所天，忍死鞠孤儿。几年近四十，与妇同分离。■一孩女，遣嫁时来归。上堂问祖母，终朝无苦饥。嗟予季与叔，相见时亦稀。抚琴弹此曲，此曲声殊悲。

### 笈默

笈默，字斋季，小字墨姑，嘉善人。丹生女。有《闺隐集》。

### 和母宝剑篇赠兄

床头夜半双龙吼，光掇群妖暗星斗。风雨霹雳一瞬间，木拔沙飞石乱走。古来神物本平常，遭时遇主生晶光。拂拭霜花将解赠，时无烈士空徬徨。空徬徨，莫太息，木兰唧唧当户织。阿兄年少射白额，归来摩挲看太白。

#### 忆震泽西村

忽忽难忘处，西村明月中。荷花低拂露，菱叶静含风。烟火经旬断，音书隔岁通。茅堂知在否，应有白云封。

#### 和母寄父

白发亲闱百里遥，那堪风雨更萧萧。山中对酒愁应减，客里看花冻未消。觅句小时追谢韞，著书他日拟班昭。夜窗弹出思归引，阿母相依慰寂寥。

#### 侯綦宜

侯綦宜，字俪南，嘉定人。岐曾女，龚元侃室。有《宜春阁草》。

#### 病中述还

秋风策策雁来迟，病况缠绵强自支。有药难医贫到骨，无钱可买命如丝。燕台梦隔三千里，槐枕肠回十二时。儿女关情谁判遣，聊凭一纸寄君知。

#### 记原大兄邀看桂

红衣半褪忆莲塘，又报秋香一树黄。不待折来心已醉，年年花下为开觞。

#### 侯怀风

侯怀风，字若英，嘉定人。峒曾女，綦宜从妹。

#### 秋闺

桂华香雾锁回廊，水阁沈沈秋夜长。月转梧桐翻瘦影，风摇菱行蔽清光。子卿自得归乡国，定远何当老朔方。望断衡阳飞骑杳，侧身怀古一沾裳。

#### 感昔

黄河流水响潺潺，当日腥风战血殷。大地尽抛金锁甲，长星乱落玉门关。居延蔓草萦枯骨，太液芙蓉失旧颜。成败百年流电疾，苍梧遗恨不堪攀。

#### 秋怀

秋气惺惺不自持，幽兰小槛暗香披。千原烟雨迷禾黍，一水蒹葭隐鹭鸶。开袞不知

金烬冷，挥弦更杂远鸿悲。班姬纨扇清商发，苏蕙璇玑白昼迟。风翦梧桐黄鹄舞，月窥杨柳绿绦垂。魂惊箜篌萧关道，泪尽琵琶凝碧池。征妇裁衣凭玉尺，美人汲露下冰墀。辘轳不断千家井，何似闺中梦里思。

### 少年行

章台蹀躞紫骝嘶，绣鞅雕鞍翡翠裘。歌舞不知银箭急，日高酣卧在青楼。

### 侯承恩

侯成恩，字孝仪，号思谷。旭女。有《松筠小草》、《盆山诗》。

### 漫兴

立身重意气，黄金何须有。富贵非本愿，山林宿所耦。清肃峻门墙，箴规日谨守。閒或理琴书，健还操井臼。衣须裁称意，食惟期适口。栽菊取晚香，种松因耐久。煎茶委小婢，浇花必自手。乐在可忘忧，事简无取咎。翻覆任世情，是非休深究。

### 记梦

理罢丝桐月色莹，小窗无语黄昏静。银镫挑尽梦初成，飘然似入蓬莱境。苍松古柏若龙盘，瑶草琪花满三径。玉洞玲珑路渐深，青鸾白鹤声相应。娉婷仙子笑来迎，谓予到此游何胜。俄而引至玉楼中，笙歌齐奏方开饮。麟脯琼浆取次供，冰桃雪藕还贻赠。须臾筵散步层峦，举头四望如明镜。峰回路转近林泉，丹桂香清风露冷。尘寰回首隔千重，山水苍茫不可竟。方拟蹑云天上游，邻鸡喔喔旋惊醒。窗前月色尚微微，四壁寒光浸孤影。

### 秋夜

露白银河淡，庭虚皓月融。寒蛩吟破壁，哀雁叫长空。凤阁箫还咽，湘灵曲未终。缘知肠断处，不待五更风。

### 春闺

迩来多病起常迟，懒对青菱理鬓丝。檐铁乍惊幽梦觉，心情惟恐落花知。江天雁断书千里，庭树春深绿满枝。风景恼人禁不得，倚栏聊复试题诗。

### 梅花

冷艳原无异，孤高自不同。罗浮明月夜，香彻梦魂中。

林下谁为伴，冰霜只自知。生成贞洁性，红紫不同时。

### 晓起



淡淡炉烟薄薄霜，晓寒梦断竹匡床。生憎杜宇花间语，唤起新愁上海棠。

倪仁吉

倪仁吉，字心惠，义乌人。诸生吴之葵室。有《凝香阁稿》。

题宫忆图

调入苍梧斑竹枝，潇湘渺渺水云思。听来记得华清夜，疏雨梧桐独坐时。

山居杂咏

照影双飞燕，新来补旧居。芹塘泥最淤，慎莫堕琴书。

红叶恰翻阶，露气晓如沐。山雨忽欲来，新香时断续。

倪宜子

倪宜子，义乌人。

归宁得家姑诗步韵

征鸿过处得瑶笺，不见鸾骖意倍煎。涧畔寻花思旧日，林边听鸟俟他年。烟云变幻山仍在，人事凄凉世已迁，拟诉睽违千万恨，几回捉笔泪潸然。

立秋有感

一叶梧桐大火流，如何令我早知秋。裴姬怀远思裁练，苏子羞归欲敝裘。短簫穠吹来皆别恨，瑶琴弄罢尽离愁。凭兰空盼新鸿至，那有音书付与收。

夏沚

夏沚，字湘友，无锡人。薛既央室。

怀吴蕊仙

癖耽翰墨费吟哦，欲寄愁心到薜萝。江外故人青眼在，山中女伴素书多。天涯镫火谁同调，岁暮冰霜独抱疴。弹指流光容易掷，家园归梦近如何。

吴肫

吴肫，字方恒，一字华生，又字凝真，号冰蟾子，江南华亭人。明承天府通

判吴丕显女孙，同县诸生曹焜室。有《忘忧草》、《风兰集》、《独啸集》、《采石篇》。

### 远眺

秋光潇洒散平湖，水白沙清浴野凫。近渚风多残叶落，远山雨过野云孤。閒将静阁供凭眺，淡取疏烟入画图。夕阳渐低村树隐，银蟾一点漏疏梧。

### 艳曲

金屋暖长春，兰阶人似月。但愿如月圆，不愿如月缺。

赠妾紫金环，遗郎白玉玦。郎恩环不解，妾心玉比洁。

### 采莲曲

弱柳系游，丛花映娇面。郎珮紫纹囊，依从扇底见。

### 曹鉴冰

曹鉴冰，字月娥，号苇坚，金山人。重女，娄县张曰瑚室。有《清闺吟》、《绣馀》、《试砚草》。与祖母吴拙、母李玉燕合编诗稿，曰《三秀集》。

### 莲花

红藕花开夏日长，薰风吹动满湖香。清标自合称君子，却把姿容比六郎。

### 送春

莺歌凄惋燕飞忙，似送东风过柳塘。翠叶有情眉黯淡，粉花无力意悠扬。茫茫塞北关山远，漠漠江南道路长。犹幸睽离非隔岁，相逢拟待腊梅黄。

### 秋日漫兴

柳经秋老不藏鸦，景物因时莫浪嗟。一卷《楚骚》忘午倦，数声齐女咽残霞。荣华心已沾泥絮，冷淡情犹湿雨花。倚遍曲阑难自遣，瓦瓶汲水独煎茶。

摇落何辞两鬓蓬，自开竹牖引凉风。仓皇蚁阵秋苔里，扰攘蜂衙晓雾中。世事久知同梦鹿，人生须信易沙虫。分明静处真仙境，休忆蓬山问路通。

### 柳烟

浓抹千条绿，春残未肯收。杨花轻扑处，漠漠使人愁。

### 花露

春露落花房，花如向晓妆。红珠千万粒，无粒不生光。

竹雨

欲折亭亭节，斜侵苦莫饶。不曾留一点，惟觉韵潇潇。

松风

飘入岩松里，纷纷分外清。纵非陶宰相，听去亦怡情。

送愁次秋山韵

乘人閒处即相缠，紧压双眉太可怜。不是无情送君别，再留惟恐损春妍。

柳

撩烟拂雨画桥边，日送行人剧可怜。更恨西风斜照里，摧残犹带一声蝉。

彭琬

彭琬，字玉映，海盐人。总兵马孟骅室。有《萝月轩集》。

怀王辰若夫人

湖上烟生碧树枝，柴扉昼掩落花时。何当得睹双星貌，空羡擎来道韞诗。曲径茶香留夜月，朱栏鸟下看围棋。三春风雨愁深浅，病骨支离无限思。

彭琰

彭琰，字幼玉。琬妹，朱化鹏室。

怀王辰若夫人

碧草萋迷接柳枝，忽忽良晤夕阳时。纤眉画就春山色，素纸裁成白雪诗。风送花香沾去袂，鸟啼竹径冷残棋。归来静掩閒庭月，欲向清光寄所思。

病春

半帘垂柳夕阳斜，香冷閒窗日便赊。莫道朝来不憔悴，撩人偏恨牡丹花。

九日

鸣蝉无语恋寒枝，正是登高病起时。忙里不知秋色老，青山红树夕阳垂。

佳节徒增寥落心，秋空无雨昼阴阴。年华不似愁依旧，寂寂幽庭听远砧。

彭孙倩

彭孙倩，字爰如，海盐人。侍郎孙通女兄，知县陈龙孙室。有《盘城游草》。

夜闻弦索

寒缸挑尽已三更，何处歌声恼客情。残月纸窗眠不稳，照人离恨太分明。

王慧

王慧，字韞兰，太仓人。学道长源女，诸生朱方来室。有《凝翠楼集》。

山阴道中

出郊忘远近，十里清阴中。川陆互回没，延缘遂无穷。冈峦去殊势，竹树交成丛。安知蒙密处，下有溪流通。石桥路可寻，一转迷西东。烟空人不见，寂寂山花红。

行行转深迥，所得益幽奇。万壑与千岩，今来始见之。纷纷红复碧，相引呈异姿。心目所应接，人各领其私。烟缕出丛薄，山家住茅茨。人世杳然隔，何殊太古时。

夜寐闻鹏有感

微风动帘帟，明月穿窗纸。凄其夜三更，万象寂於水。墙头有栖鹏，长啸惨人耳。闻之心凜冽，百虑纷然起。痛死肠暗摧，念雛发怒指。因忆泉下人，卧病当秋始。血枯夜不眠，神虚听无主。忽闻此鸟鸣，失惊向余语。恐是不祥音，悲哀念儿女。执手魂已消，相看泪如雨。回视壁间鐙，青荧如豆许。哀哉念此境，又易两寒暑。其间翻覆多，变幻难枚举。鬼蜮肆欺凌，孤■濒九死。伶仃诸雏弱，何以御狐鼠。愁攻与恨积，胸膈渐成痞。恐复蹈覆车，谁可托遗累。勉力事刀圭，蓂苓贵无比。糗粝尚艰辛，何力能致此。微生任浮沈，得失凭天矣。

冷泉亭

泉声檐槛外，林壑杳然深。人世热何处，我来清到心。松林藏日色，潭底卧峰阴。一自乐天记，山光寒至今。

秋夜梦同先慈赋诗得天上桃花之句觉后因足之

太华峰头见上真，霞衣绰约是前身。海中若木何尝夜，天上桃花不计春。瞬息去来原是幻，片时欢笑亦相亲。钟声已碎昆明劫，好向毗伽问后因。

邻女因婿无籍沦於塞下闻而有感

曾向邻女共绛纱，裁云咏絮斗芳华。香沾绣帙同分线，春暖妆台互送花。漫说罗敷原有婿，可怜蔡女竟无家。於今辨发垂双耳，紫塞斜阳泣暮笳。

#### 移居茜里旧宅

新塘一水绕街东，旧是桑麻五亩宫。松菊尚存思祖德，蓬蒿不翦见家风。花深鸡犬疏篱外，潮落鱼鰕小市中。却爱堂前双燕子，还寻故垒入帘栊。

#### 禹陵

明德弥苍昊，神功迈大庭。怀襄方尽力，輶轳极劳形。草木开蒙昧，龙蛇涤秽腥。铸金九土贡，志怪八方经。苍水先呈简，防风后至刑。相传弓剑弃，此地隧泉扃。三古遗祠庙，千秋共荐馨。璧牲前代典，碑版列朝铭。深殿从群后，空山走百灵。旧闻云罕驻，今见翠华停。心法传河洛，天章焕日星。殊恩沾后裔，异数出明廷。肃穆瞻新像，登临泊小舲。城垣辞镂琢，户牖炯丹青。莫觅藏书穴，徒看窆石亭。萝长鼯窜迹，松老鹤修翎。众水环襟带，诸峰列嶂屏。桥山同故事，寂寞对秋坰。

#### 宗室县君

宗室县君，安郡王岳乐女孙，固山贝子蕴端女，总督、谥愬勤那苏图子妇。

#### 题自画牡丹

风风雨雨惜春残，为爱名花倚画栏。淡著胭脂浓著墨，一枝图向画中看。

#### 希光

希光，钮祜禄氏，满洲旗人。协办大学士、谥文勤永贵子妇，员外郎伊嵩阿室。

#### 述志

莛萝松柏为婚姻，峥嵘夫婿超凡伦。盈门不须夸百两，入座却喜惊千人。三周御后谐红烛，华屋金堂伴珠玉。春风秋月见情怀，得事秦嘉愿已足。一从清馆理瑶琴，恩礼殷勤契合深。白璧寒冰知妾志，高山流水识君心。如宾如友意方遂，谁知运厄龙蛇岁。得疾三旬尚未痊，驰驱千里随朝贵。病中作客病弥增，书报平安那足凭。去后妾惟心戚戚，归来夫已骨稜稜。倚枕缠绵势愈重，膏肓二竖谁能送。一时和缓总虚声，百剂参苓皆浪用。眼看一局欲全输，百计维图拯我夫。闻说通灵惟割股，此时那惜肌肤苦。白刃如霜忍痛剜，一脔偷持和羹煮。愚孝愚忠一寸忱，皇天后土鉴应真。今日瘢痕在弱体，当时血迹满罗巾。人定胜天竟虚语，精神耿耿浑无补。瑶琴锦瑟叹凄凉，可怜一旦成千古。伤心万事尽彫零，弟妹多人尚弱龄。伯道无儿悲似续，中郎有女痛零丁。妾亦何心立人世，泉壤同归早决计。馀生尚在非贪生，强持妾意从夫意。临危执手语谆谆，嫁娶经营委妾身。泣言身了事未了，惟恃卿存即我存。我夫托我深知我，我不报君乌乎可。一死从夫妾不难，前言不践死何安。九原会有相逢日，迟速须知事一般。向平嫁事今已竟，十载要盟此日应。夜台衔命报夫君，嚼蘖肝肠差可证。

### 新年拜墓

东风惊冷梦，啼鸟暗催人。强起伤新节，驱车感夕尘。泉台应有泪，人世已无春。不尽伤心事，凄凉独怆神。

### 陈书

陈书，号上元弟子，晚号南楼老人，秀水人。尧勋女，同县钱纶元室，太傅、谥文端陈群母。有《复庵诗稿》。

### 题自画秋葵赠邹太夫人

叶出裁青玉，花舒染淡金。不存脂粉态，自有向阳心。

### 盆中小松

数尺来何所，风霜郁断枝。虽非老丘壑，且喜傍书帷。偃蹇逃斤斧，青葱耐岁时。天公如有意，留雪伴寒姿。

### 团扇咏

团扇复团扇，皎兮若满月。明月有盈亏，赤日岂长烈。鹑火倏西流，金风减炎热。弃置莫怨嗟，暂作经年别。

### 题人画水仙

伊人不见渺湘波，一夕寒窗梦涧阿。琴语漫随流水去，仙情只觉在山多。招来春讯生冰雪，抱得冬心谢绮罗。独坐南楼研画学，赵家笔法较如何。

### 吴宗爱

吴宗爱，字绛雪，永康人。教谕驥良女，同县徐明英室。有《六宜楼稿》、《绿华草》。

### 春日怀素闻

别来愁绪起无端，窄袖轻衫怯晓寒。原上草薰春盎盎，心中人隔路漫漫。疏风小圃宜莺粟，细雨新蔬采马兰。想忆无缘教缩地，芳华不共倚阑看。

### 舟泊兰江

久客归心急远旌，黄昏喜见故乡城。帆樯绕郭人音杂，镫火临江夜市明。斜月女墙寒击柝，秋风官渡远鸣钲。归家刚值黄花节，促换轻舟趁水程。

### 斋居杂咏

春雨何缠绵，幽闺听不足。昨夜吐明蟾，清光如可掬。晨起览窗纱，灼灼明朝旭。苔色自苍凉，庭柯净如沐。顿复起浓阴，峭寒风断续。乍雨乍晴天，云霞无定局。关心数残红，循阑行屈曲。一鸟忽飞来，啼破晚烟绿。

### 王驸马园林

画戟凄凉对落晖，园林有愿竟心违。残花带雨依荒砌，老柏参天守故扉。凤去秦楼池苑在，鹤鸣华表市朝非。春来剩有堂前燕，犹向妆台故址飞。

### 秋日园林即景

数日无人到，秋风一味凉。虫声疑雨落，蝶翅学花黄。树老依残砌，藤高出坏墙。危阑聊倦倚，竹外又斜阳。

### 元宵

佳节金吾全不禁，鳌山处处斗鲜妍。笙歌地觉春如海，镫火人忘月在天。醉酒欢声闻比户，抛雅戏乐韶年。归家姊妹馀喧笑，猜谜传来五色笺。

### 楼眺

几天梅雨后，新水正盈隄。閒爱登楼眺，时闻好鸟啼。雄风吹野阔，雌蜺跨山低。只惜光阴速，晴莎入望齐。

闻琵琶忆九岁时从先君之秀水於江上闻此曲今十二年矣

低唱清尊无限情，四弦何处韵凄清。分明暮雨春江上，十二年前倚舫听。

翠香二姊将以次子为余嗣志感

汤饼清欢会九秋，试啼早欲卜英遒。人言似舅夸无忌，我觉生儿羨莫愁。不是悲愉关骨肉，谁能户牖代绸缪。添丁欲向先夫告，好慰苍凉土一抔。

### 黄媛贞

黄媛贞，字皆德，秀水人。知府朱茂时继室。有《云卧斋诗集》。

### 秋窗阅史

幽怀阅古今，叹息因何设。君心昧虚灵，孤臣恨难彻。负却精诚言，向彼炎曲舌。咸若尧舜仁，如何有兴灭。林下秋来风，夙夜吹不竭。

### 春日行

蝶粉蜂黄春习习，无言立在栏干侧。情怀不胜风日香，离别那堪杨柳色。花飞花飞  
飞若何，美人红泪沾香罗。天路苍茫不可涉，水淅淅兮山峨峨。

### 春闺咏

云飞月落天将明，新莺娇啭前窗声。琴书相向两无赖，无端独自愁盈盈。娥娥红粉  
帘栊里，閒花满瓶插香水。流苏轻揭晓光寒，强自添衣情已矣。春风吹人人更愁，红日未满  
栏干头。如何如何梦不在，鹧鸪啼上花间楼。

### 秋夜歌

寒萧萧兮清夜中，栏干十二留西风。西风愁人愁如此，冷蛩声彻罗帏空。閒心更惜  
秋光老，总是深深结怀抱。翠被香馀绣枕单，复起灯前翻旧稿。

### 立秋日梦分得成字

窗前修竹洗来清，且理琴书託此生。凉到半庭分夏去，梦将一字许秋成。凌

虚久接梧桐影，孤坐新惊砧杵声。我意正悲时节易，更教重论月中情。

### 晚望

秋空木叶寒，日落湖云冷。微雨滴梧桐，安知别离恨。

### 黄媛介

黄媛介，字皆令。媛贞妹，杨世功室。有《湖上草》、《如石阁漫草》。

### 湖中秋日

忧危只有客心微，赢得湖光蔽竹扉。囊有千诗聊寄赏，家无四壁亦怀归。青山断处  
饶红叶，黄菊开时少白衣。近水阴晴容易变，忽惊风雨打窗飞。

### 湖上

西子湖头千顷春，风光不属去来人。朝岚夕霭谁收得，半在凭阑半钓纶。

### 李因

李因，字是菴，号龕山女史，晚号今生，会稽人。海宁葛徵奇侧室。有《竹笑轩吟  
稿》。



### 鹭岭山庄寻秋

十丈悬崖挂薜萝，参云峰顶见嵯峨。閒搜怪石秋林晚，独听残钟晓月过。黄叶山前人迹少，白云天际鸟声多。冷泉亭下潺潺水，不许渔舟唱棹歌。

### 长安秋日

高树秋声入梦迟，夜来风雨簟凉时。季鹰自解归来好，纵乏莼鲈也动思。

### 湖上镜阁

髻压双螺春事賒，钓纶来往自浮家。小桥柳色朱阑近，槛外溪光送落花。

### 舟发溧县同家禄勋赋

拂衣去去急，白发半愁中。过客天涯少，行厨楫柁空。禅关山月黑，鱼栅夜镫红。松菊闻无恙，锄书可耐穷。

### 秋江晚泊和豫章李夫人韵

石尤风急泊沙湾，日落寒江鸥鹭閒。秋水空明千里月，荒烟暝锁万重山。樵歌野唱犹行路，僧寺残钟独掩关。潦倒篷窗愁客梦，漫披诗史手重删。

### 春日家禄勋闻命南归感怀作

欲赋《高轩过》，门前到者稀。杨花冲幕入，犹落故人衣。

### 京口道中即事

云暗篷窗昼启迟，绿阴新覆树枝枝。明珠买得浔阳女，一曲琵琶古别离。

### 哭介翁禄勋公

秋声风急闭重关，泪寄潇湘疏竹斑。莫问苍梧多少怨，至今石化望夫山。

### 葛宜

葛宜，字南有，海宁人。诸生朱尔迈室。有《玉窗遗草》。

### 拟古呈家日观

回车驾言远，迢迢適长道。四望郁苍苍，秋风吹百草。上山山高高，涉江江浩浩。万物各有时，应须置身早。

## 古诗

初日当窗牖，盈盈楼上妇。朱颜若桃李，宝钗耀螭首。自言十五馀，同心备箕帚。山川一何辽，别离日已久。春风陌上来，吹我檐前柳。

## 寄日观读书灵鹫

明月夜何皎，独照离人思。忆别若为情，悲歌空自知。春风吹客帐，山馆鸟声迟。百里烽烟隔，何时共赋诗。

## 明月照高楼

明月照高楼，皎皎多光辉。上有荡子妇，凭高独徘徊。徘徊复何如，洒泪沾裳衣。思君不能语，忽忽如调饥。朔风吹庭树，贱妾将何依。愿作高山鸟，飞向君怀栖。君怀不我顾，鸣声悲以凄。四海抑何旷，分飞东复西。

## 凛凛岁云暮

凛凛岁云暮，雪花吹不住。念子去不归，徘徊顿中路。梦里见君还，恍惚携君手。哀乐难具陈，但言别离久。喔喔晨鸡鸣，日出当窗牖。

## 游禺园

驾言禺园游，流水一何长。芙蓉花烂漫，吹气溢金塘。林高残暑退，宿雨动微凉。浮鱼跃曲渚，新燕来雕梁。物理固有讫，人胡独忧伤。

## 长相思

长相思，泪潸潸，芙蓉落尽凋秋兰。深深水，高高山。鸿雁那能度，鲤鱼空复还。对镜不敢照，横琴欲罢弹。

长相思，怅别离。月上梧桐夜色迟。秋风起，白云飞。有客长作客，曰归竟不归。音书久断绝，羽翼长差池。

## 燕歌行

别日苦促会日稀，云山阻隔雁飞飞。怀君永夜漫凄其，憔悴兰房怅别离。妾只含情独掩扉，君留他乡胡不归。欲语不语还低眉，抚琴一弹心伤悲。再弹不觉泪连丝，明月烂烂无光辉。牛女咫尺河间之，斗转参横夜半时。

## 别母

莫听寒鸟叫，夜雨岂堪闻。不尽离堂泪，无端此地分。楼高长寂寂，叶落故纷纷。掩涕非无语，依帏恋白云。

不尽城南路，凄然说送行。深闺一夜别，小女十年情。露下兼秋迥，天高闻雁鸣。离愁空黯黯，寒月为谁明。

#### 和日观止溪杂咏

十亩成高志，三春足胜游。篱深容鹿卧，墙圯任云留。岸柳藏书屋，溪花失钓舟。不须嫌寂寞，吾道合沧洲。

谷口逃名处，何如郑子真。种松曾买地，养竹为投纶。岁月杯中尽，琴书枕上亲。鹿车应共挽，持此谢风尘。

#### 同查氏姊张氏妹游弃家园园一名野鹤林

小筑成高隐，幽寻一叩关。水亭涵白日，草阁卧青山。家弃尊仍在，林深鹤未还。谁言武陵隔，今已出人间。

#### 九日还远

此日金陵客，登高何处台。江寒鸿雁下，霜老菊花开。书札人千里，风尘酒一杯。莫因青草歇，不遣马蹄回。

#### 送日观蜀游

蚕丛天地险，剑阁古今愁。挥手从兹别，难为芳草秋。啼猿三峡树，月挂九江流。不尽凭高目，西风独倚楼。

#### 有怀

别馆人高卧，终朝独自愁。大都征鸟下，只是白云留。夜静寒花落，庭空芳草秋。此心尝百折，日夜水东流。

#### 怀日观留蜀

北风吹万里，岁晚客衣单。可惜吴云隔，长歌蜀道难。鸟啼知阁近，雁影寄书寒。只有天边月，清光两地看。

#### 西山同日观游包氏废园

山深地僻少经过，宛宛柴荆出涧阿。不尽泉声流日月，无端雨色挂藤萝。亭开藜桂留人住，径入苍松舞鹤多。即此投閒应胜绝，鹿门偕隐定如何。

#### 送日观游越

江花江草映江明，孤客孤舟江上行。不断乡心吴苑隔，无边妾梦越潮平。拂衣几卧千岩月，把酒还寻万树莺。傥到镜湖凭远望，绿蘋处处是归程。

#### 湖上

秋晚芙蓉好，人归古渡头。相看不相识，多少钓鱼舟。

#### 九日

黄菊萧疏放，重阳风雨哀。登高何处是，白雁故飞来。

#### 送日观之金陵

送客金陵极望中，江流无恙片帆风。应知歌舞秦淮月，不与高楼梦里同。

#### 芳树

庭前芳树影参差，春暖莺啼争上枝。开落不堪人事改，青松独与岁寒期。

#### 哀江南妇

五月新蒲叶正齐，清江极目远萋萋。何堪多难伤心切，一曲箜篌扬子西。

#### 春感

二月梅花落似雪，三春杨柳乱如丝。那堪花柳添愁思，寄与东风总不知。

寂寞村居水一涯，半间茅屋傍溪斜。亦知昨日复今日，閒数开花与落花。

#### 午日自题

吾年三十复添五，终日卧病当端午。只今且种忘忧草，富贵浮云何足数。

#### 蔡琰

蔡琰，字季玉，汉军旗人。绥远将军毓荣女，尚书、谥文良高其倬室。有《蕴真轩诗草》。

#### 冬夜

耿耿兰缸暗，沈沈夜气清。梦回残漏永，月在半窗明。乡思兼愁思，砧声复雁声。故园归路杳，何日慰离情。

#### 关锁岭

山从绝域势遥分，天限西南自昔闻。烽静戍楼狐上屋，风喧古本鹤惊群。横盘石磴危通马，深锁雄关冷护云。叱驭昇平犹觉险，挥戈谁忆旧将军。

#### 九峰寺有感家大人

萝壁松门一径深，题名犹记旧铺金。苔生尘鼎无香火，经蚀僧厨有蠹蟬。赤手屠鲸千载事，白头归佛一生心。征南部曲今谁是，剩有枯禅守故林。

#### 江西坡

西岭千重簇剑铓，曾麾万骑募羊肠。鬼灯明灭团青血，野冢荒凉啸白杨。梦断层霄空漠漠，事随流水去茫茫。只今剩有残兵卒，指点空山说战场。

#### 辰龙关

一径登危独惘然，重关寂寂锁寒烟。遗民老剩头间雪，战地秋閒郭外田。闻道万人随匹马，曾经六月堕飞鸢。残碑洒尽诸军泪，苔蚀尘封四十年。

#### 重过燕子矶

又系兰桡驻水滨，小亭重上独逡巡。恰看白下还斜照，剩对青山似故人。几杵疏钟江寺晚，半篱寒艳菊花新。凭栏更诵登临句，望里山川尚有神。

#### 江雨晚晴

晚烟漠漠破馀晖，红叶纷纷下翠微。几点断云将雨去，一行寒雁贴江飞。霜明半落新愁鬓，风劲先侵远客衣。翻羡田家无个事，小舟閒泊钓鱼矶。

#### 秋原踏月

露冷烟消碧落空，远山如黛月如弓。蛩吟缓缓隄边路，蝉韵微微树杪风。几点雪花天际白，一痕萤火草间红。中郎不起吾谁与，莫问良材爨下桐。

#### 柴贞仪

柴贞仪，字如光，钱塘人。举人世尧女，诸生黄介眉室。

#### 题烟江叠嶂图

谁将素练染霜毫，幻作空濛万里涛。一片孤帆何处落，千峰雨色暗红皋。

#### 柴静仪

柴静仪，字季，钱塘人。贞仪妹，沈汉嘉室。有《凝香室诗钞》。

#### 与豕妇朱柔则

深闺白日静，熏香垂罗幃。病起罢膏沐，澹若明河秋。自汝入家门，操作苦不休。蘋藻既鲜洁，户牖还绸缪。丈夫志四方，钱刀非所求。惜哉时未遇，林下聊优游。相对理琴瑟，逸响随风流。潜龙慎勿用，牝鸡乃貽羞。寄言闺中子，柔顺其无忧。

#### 冯又令命子中崙见过

贤子传君意，过门慰藉深。长贫无乐岁，多难有禅心。琴酒怜知己，诗歌愧赏音。他年能忆我，相访就云林。

#### 送顾启姬北上

一片桃花水，盈盈送客舟。春来万杨柳，叶叶是谁愁。顾我穷途者，逢君意气投。烟虹时染翰，风月几登楼。只合薰香坐，谁堪鼓枻游。燕台一回首，云白古杭州。

#### 怀子江右

彭蠡风涛怒不休，日斜何处泊行舟。朝来定有思亲泪，流到钱塘古渡头。

#### 朱柔则

朱柔则，字顺成，号道珠，钱塘人。诸生沈用济室。有《嗣音轩诗钞》。

#### 举第五子

四男二女如相引，复举斯儿真可哂。辗转常怀离里亲，欲与邻人仍不忍。读书还拟大吾门，未许痴顽类犬豚。自怜乳哺多辛苦，转忆吾亲罔极恩。

#### 寄远曲

恨少垂杨柳，殷勤系玉鞍。夕阳鸦背暖，春雪马蹄寒。入世逢迎拙，依人去住难。痴儿啼向我，昨夜梦长安。

猎猎风初劲，沈沈雨未阑。因怜儿被薄，转忆客衣单。栖燕将雏苦，征鸿失侣寒。居家与行路，同是一艰难。

辛苦长安客，栖栖叹此行。故乡空自阻，逆旅亦何营。取友防轻薄，持躬问老成。寄言百君子，努力事身名。

闻说燕台路，生涯亦可怜。耻弹门下铗，谁乞广文钱。久客非长策，归耕有薄田。一棺痛慈母，急为卜新阡。

### 别曲

三载饥驱走路歧，一春风雨倍凄其。黄金最是无情物，长使深闺怨别离。

### 河渚观梅约顾女春山

相期河渚玩春华，一棹迎风路未赊。楼外有梅三百树，美人不到不开花。

### 马士琪

马士琪，字韞雪，祥符人。晋城张应垣室。有《烬馀草》。

### 天竺寺

三竺深始佳，妙香静空谷。无量人天供，至此心神肃。在昔闻兵火，兹山未沈陆。若非龙象力，何以感群族。出门望层峦，回向古道场。云日递隐见，岩壑易阴阳。别院通危桥，涧曲声琅琅。万木拥寒阁，千镫照回廊。澄怀此晏坐，摄受言可忘。

### 将进酒

文犀光射琥珀微，客为主寿云懒归。此时举觥胜千日，嚬酒使我花枝肥。天桃未落春已老，驱车疾走扬州道。

### 苦雨

阶前时复见游鱼，不断愁霖密复疏。触处墙倾兼屋漏，有人夜起护残书。

### 叶粉

叶粉，昆山人。许心宸室。有《拥翠轩唱和诗集》。

### 孤雁

一声凄切度河梁，不诉离群也断肠。寂历寒沙眠铍羽，空明霜月照分行。无心避患衔芦荻，肯恋馀生逐稻粱。闻道边庭尚征戍，孤鸣幸勿到辽阳。

### 陆莘行

陆莘行，字纘任，钱塘人。圻女，海宁祝翼斐室。

### 送伯姊之姑苏

自怜娇小不知诗，执手临行强致词。盼杀天涯传锦字，吴江枫落雁归时。

陈何

陈何，萧山人。同县毛奇龄室。

子夜歌

一去已十载，九夏隔千山。双珥依然在，如何不得环。

白露收荷叶，清明种藕枝。君行方岁暮，那有见莲时。

张曼殊

张曼殊，宛平人。萧山毛奇龄侧室。

病中吟

罗帐挂金钩，薰炉香雾收。起来红袖冷，独坐怕梳头。

日色满窗红，鸳鸯睡枕同。披衣将欲起，又怕隔帘风。

无子自叹

春到园林草尽芽，天桃何事不开花。晓来对镜临妆坐，羞见朝阳上碧纱。

题留视图

为送还家去，双螺绾百环。且将妆镜影，留视在人间。

## 【卷一百八十四】

王静淑

王静淑，字玉隐，号隐禅子，浙江山阴人。思任长安，陈树勳室。有《清凉集》、《青藤书屋集》。

初夏偕玉映妹游山

欲觅清幽处，山高恐不深。閒云飞别岫，野鸟定花阴。筍嫩留饥采，茶香待渴吟。深闺无限意，触景破愁心。



### 秋日庵居

空斋渡深夜，高卧一床秋。苔老浑无色，溪清浅欲流。尘随红叶扫，心付懒云收。  
萧瑟闻征雁，空归万籁休。

### 赠邻姬

梅影疏窗瘦，衾裯薄又寒。侍儿不解意，指月上阑干。

### 九日迟玉映妹不至

细雨凄风阻雁行，竹篱茅舍薄罗裳。登楼懒看黄花瘦，山老林红一夜霜。

### 柳

乳燕黄莺三月时，春风拂地柳垂垂。长条不系行人住，犹向江南送别离。

### 王端淑

王端淑，字玉映，别号映然子，浙江山阴人。思任女，诸生丁肇圣室。有《玉映堂集》、《吟红集》。

### 蓬门

骨傲岂随俗，宁攀山鬼邻。舒云聊作帐，集叶戏为茵。凤岭知难效，鹿门且耐贫。  
残篇任意读，不羨骑骎骎。

### 明妃梦回汉宫次浮翠轩吴夫人韵

一自明妆出未央，空留遗恨在昭阳。琵琶曲尽关山泪，环珮声归塞上霜。宿雁残更  
移晓幕，依人落月下空床。旧时纵有三秋怨，不及穹窿此夜长。

### 为龚汝黄题黄皆令画

孤亭秋树色，即是云深处。写此数峰青，倒逐扁舟去。

### 宫怨

长门春锁月溶溶，绣柱金铺翠自封。忽听马啼惊欲曙，多年不候景阳钟。

### 代外赠别毛大可

西泠月落板桥霜，衰柳长隄祇自伤。几日穷愁兼别怨，一帆秋色带斜阳。浮云影逐  
离亭路，归雁声凄碧草塘。学采芙蓉江上去，黯然回首恨茫茫。

### 病中喜新月

促织频催懒，寒衣犹未成。起床忘骨瘦，著履觉身轻，青帝飘飘散，姮娥冉冉情。秋怀无所处，共月结新盟。

### 贫病有感

才已行贫运，偏增新病魔。钲花虚拟结，鹊语几番讹。针指能生睡，诗篇强自哦。寒风吹瘦骨，酌茗亦阳和。

### 代睿子怀玉尺弟

凋残花萼失芳丛，嗟尔天涯我孰同。鸿雁序离悲夜月，鹳鸱诗就泣东风。萦牵梦隔西江杳，沦落音难越水通。景物触怀思切切，何时携手叹飘蓬。

### 邻妇

鸟声初啜堕花春，静女幽妆采落蘋。脸映芙蓉娇且艳，眉修清月淡无尘。一泓秋水留西子，半幅轻绡写洛神。秀色共餐饥可乐，不才忝已在东邻。

### 雨中桃花

寒风微透入凄清，过雨天桃色易倾。莺湿羽衣怜艳冶，苔伤花影谱心旌。飞烟乍掩炉峰失，新草萎残曲径荒。拾得落云天已暮，远林遥听堕春声。

### 吴岩子徵和起句原韵

榻占西湖第一楼，垂帘落影咽云流。含香燕入歌声里，避月花飞点案头。鹭岭青来描锦字，蒹葭碧处系春舟。阮公清啸江生笔，赢得轻烟纸上幽。

长隄梅格渐生香，叠入奚童旧锦囊。离绪征帆寒雁远，移文秀笔淡山光。花含碧玉裁清珮，云映芝眉翦绿裳。解得苑莺调柳色，束红凝目望华章。

### 徐安吉

徐安吉，字子贞，上虞人。王鼎室。

### 杂诗

浮生宁有涯，性灵不可夭。適自理晨妆，遥见东方晓。初风半吹竹，寂寂闻啼鸟。地僻我亦閒，日对南山小。

### 山中咏

老枫俯大谿，数枝浮水面。清风与之俱，吹落秋红片。落日危孤峰，柴门雀喧转。短草动夕阳，寒塘石清浅。

#### 古意

柳色欲轻黄，朱楼人自伤。愁来无洛浦，梦去有高唐。宝镜空悬架，榴裙验取箱。谁书桐叶字，坟草变鸳鸯。

#### 春词

西楼残月子规情，几树梨花照水横。自抱琵琶廊下坐，含愁拨得两三声。

#### 马氏

马氏，字静音，会稽人。

#### 生烜儿志喜

良辰屈指及秋元，喜见明珠耀小轩。今日人皆称似祖，他年汝莫愧为孙。秋风丹桂非无种，福地仙桃信有源。伫看彩衣娱白发，祇祥重与细评论。

#### 徐昭华

徐昭华，字伊璧，上虞人。咸清女，诸生骆加采室。有《徐都讲诗集》。

#### 桃叶渡歌

可怜桃叶渡，落日行人暮。双桨打清波，春风缓送桃叶过。祇今桃叶渡头稀，艇子江头归不归。

#### 因探亲吴门同虞夫人游虎丘

阊门日出晴鸦噪，两桨閒寻虎丘道。宿雾犹含隄上花，流云已渡波间藻。红栏上下傍水行，画船歌吹来倾城。回帆不尽掺挝意，转幔时闻过曲声。斜峙山桥甫能住，香车早趁山塘去。满街栀子未开花，几树垂杨自飞絮。到门知是梵王宫，台榭连云曲径通。棕榈覆叶沾茶碧，漆柱遮油卖杏红。我寻生公旧法席，蹇裳一上生公石。龙剏绝壁尚留池，虎去中林杳无迹。登山四望更无山，但见山藏古寺间。绕地松楸看去密，空庭塔影落来圆。修廊诘曲几回度，又听归鸦噪前路。夕阳一片寺门边，不识真娘在何处。

#### 塞上曲

朔风吹雪满刀环，万里从戎何日还。谁念沙场征战苦，将军今又度阴山。长云衰草雁行平，砂碛征人向月明。思妇不知秋夜冷，寒衣还未寄边城。

顾姒

顾姒，字启姬，钱塘人。诸生鄂曾室。有《静御堂集》、《翠园集》。

毛安芳挽歌

忆昔当春时，寿君惭不文。未几闻君丧，奄忽如流云。流云过眼空悲怨，大火西流时倏变。玉楼金屋网蟭蛸，西风叶落空深院。凄凉宝瑟掩馀音，惨淡菱花冷钗钿。尚忆当年对镜人，镜中鸾死悲娇面。织锦诗成那得闻，墨池寒浸琉璃片。不知何处吊君魂，草白磷青望中见。

题林亚清画

梅花竹叶互交加，濡墨淋漓整复斜。忆得昨宵明月下。横拖疏影上窗纱。

林以宁

林以宁，字亚清，钱塘人。御史钱肇修室。有《墨庄诗钞》、《凤箫楼集》。

忆父禹都

晓登百尺楼，遥望中条山。天际有白云，日夕自往还。去来何寥邈，引领难追攀。谁云生女好，少长违亲颜。岂不眷庭闱，安能事閒关。问寝久疏阔，视膳良以艰。回步循南陔，踟躅泪洑澜。

画竹

新竹出短篱，亭亭如织翠。明月升东轩，竹影宛在地。铜砚磨松煤，濡毫写其意。清幽固可嘉，爱此坚贞志。

柴季索诗赋答

春风吹暖杏花香，试拂鸾笺写断肠。每见远山思黛色，时从落月想容光。别来几度梅如雪，愁绪萦怀鬓欲霜。为报故人休索句，砚田惭我已全荒。

梦游桃花源

理棹石濂口，洞壑极深窅。白日翳层壁，倏然露林杪。初行不见人，仄径碍飞鸟。忽逢林木尽，水竹四环绕。茅屋三两间，鸡声出林表。主人闻客来，揽衣起相劳。筍蕨为我设，粳粱供我饱。白鹤翔天风，游鱼戏清沼。宛若素所历，竭来胡不早。怅惘尘世事，朗彻愜怀抱。高丘谁沈沦，阿阁孰倾倒。魏晋不复知，以下更何道。叹息武陵人，悠悠竟终老。

赠宛琮女史

月中仙人结璘子，银海回风漾空翠。广寒青桂生紫芽，水蟾蚀作鸳鸯字。清光独夜照三吴，采香泾畔多名姝。日射帘旌金鹊尾，春窗睡足红氍毹。蜀纸新裁鸾凤帖，同心重绾菖蒲叶。玉寒手擘荔枝浆，镫红酒晕芙蓉颊。风翦春英碎粉霞，幻作衣间双蛱蝶。绿云{髟妥}髻黄金珰，方空半臂凝脂香。瑶岛承恩夕宴罢，寒星乱落参差光。

#### 独夜吟

蕉心未展桐花老，春社才临燕声小。屋角阴云冻天色，雨脚斜侵砌草织。暮寒压梦梦不成，耳边哀角呜呜鸣。幽房鬼逼兰缸凝，床头玉盞敲红冰。斫桂烧云老不死，夜乌啼杀晓乌起。独茧抽丝结绣襦，侬心未卜郎心似。开帘蜡树烟依微，海燕宾鸿相背飞。孤吟起坐各无赖，昨夜邻家夫婿归。

#### 钱塘观潮

气以三秋肃，江因九折名。海门环凤阙，半曜拱神京。舟楫三都会，鱼盐百货盈。凉飙随舵发，新月傍船行。共指潮生候，争看雾气横。篙师屏息待，渔子放舟迎。海外千山合，江边万谷鸣。蜃楼惊变幻，蛟室忽晶莹。鱼沫翻珠珮，腥涎喷水精。玉山高作垒，雪浪俨如城。似有冯夷鼓，长驱掉尾鲸。前茅从赤鲤，后队亦青旌。自可吞溟渤，何烦洗甲兵。蛟宫图广袤，蚁垤敢争衡。久欲寻天汉，频思访玉清。乘槎常不达，浮海竟无成。近睹三江险，方知六字平。奇观书短韵，尺幅海涛生。

#### 秋蝉

昨夜凉风届节初，园亭景物渐萧疏。高枝坠露堪承饮，深树微云可卜居。秦女支硎秋半急，卫娘小鬟夜来梳。遐情自足传霄汉，不逐金梧下玉除。

#### 秋暮宴集愿圃分韵

早起登临玉露瀼，画楼高处碧云凉。池边野鸟啼寒雨，篱外黄花媚晓妆。斜倚红阑同照影，閒挥绿绮坐焚香。溯洄他日重相访，一片蒹葭秋水长。

#### 寄启姬云閒

柳上浮家小结庐，水轩竹槛称幽居。问人新借簪花帖，教婢閒钞相鹤书。燕子避潮缘砚席，奴沿月上阶除。清闺事事堪题咏，刻玉镂冰恐不如。

#### 渡伊洛合流

历尽山川险，方知行路难。寒风鸣大谷，怪石激流湍。歧路心常怯，穷途泪未乾。波光应笑我，独自上河干。

#### 哭柴季

娉娉壁间画，手泽犹芳鲜。清夜发光芒，睨视不敢前。想见落笔时，气足而神全。非徒貌幽花，自写翠袖翩。每思弃尘务，从君事丹铅。岂期不我顾，倏忽长相捐。一恸云为愁，梁月藏婣娟。

#### 穀雨

镜台流影射窗纱，风到檐前柳脚斜。竹架整书除脉望，春池洗砚乱蘋花。桑浓蚕子犹悬箔，日暖蜂干早放衙。童子佩壶寻涧水，涤瓯明日试新茶。

草草深闺度岁华，生平不解问桑麻。沿篱野豆初牵蔓，绕砌山桃半欲花。细雨渍成杨柳色，暖风催放牡丹芽。村姬结束新螺髻，傍晚比邻唤采茶。

#### 得夫子书

经年别思多，得书才尺幅。为爱意缠绵，挑灯百回读。

#### 初春

百合名香手自焚，雪晴天际尚停云。寒梅才被东风坼，酿得春愁已十分。

#### 毛媿

毛媿，字安芳，钱塘人。先舒女，徐邨室。有《静好集》。

#### 小春

小春人更倦，坐觉微寒侵。衰草已失绿，红梅缀疏林。沈水焚欲尽，薄酒还自斟。筒内韬细笔，壁间静瑶琴。古人於此时，凝神以正襟。谁知深闺里，亦惕坚冰心。

#### 雪

天涯一望茫茫白，积玉堆琼互长陌。兴来何处子猷船，高卧谁家袁安宅。山中千树噪饥鸦，自扫冰鳞自煮茶。不怪满身寒起粟，只愁压折老梅花。

#### 西湖

十锦长塘十里开，遥看春草绿於苔。金鞍狭路争驰骤，画舫晴波自溯洄。日映柳梢莺百啭，风吹花气蝶双来。西湖西子曾相唤，拟酬芳魂酒一杯。

#### 秋夜

漏永银河影渐低，楼头明月又沈西。五更展转不成寐，四壁虫声几样啼。

#### 钱凤纶

钱凤纶，字云仪，钱塘人。进士安侯女，诸生黄式序室。有《古香楼集》。

#### 美人梳头歌

新林一声啼绿鸟，三十六宫春欲晓。床上辘轳牵素绠，秋水溶溶镜光冷。渐看红日卷珠帘，双弯却有眉纤纤。玉凤斜飞弹金蝉，珮环摇摇曳湘烟。下阶独自摘芳蕊，樱桃笑依不结子。

#### 哭伯兄

在昔黄天倾，覆卵无完理。兄不即殉身，感奋良有以。摩挲双匕首，一夕再三起。千钧重一发，恐复忧天只。荏苒岁月间，隐痛入骨髓。未堪讎人胸，抱疾忽焉死。尸床目不瞑，不继非人子。尚有娥亲在，李寿汝莫喜。

#### 冯

冯，字又令，钱塘人。诸生钱廷枚室。有《和鸣集》、《湖灵集》。

#### 关山月

关山月，月如弦，离人对此愁不眠。关山月，月色清，此时相望倍含情。月黯黯兮心亦苦，月溶溶兮泪如雨。明月不关人，幽怀自难抚。君不见故园月影高，衔杯宴赏醉清宵。新歌妙舞兴偏豪，每虞风雨来相挠。云何对月情转切，终夜徘徊心似结。蟾光远近应相同，不忍边城看圆缺。

#### 玉阶怨

夕殿沈沈夜，偏悬明月光。君恩何处空惆怅，隐隐星河漏正长。清露凝兮玉阶静，秋风吹遍罗衣冷。寂寞长门思悄然，含情独对冰帘影。

#### 和夫子九日拟登吴山因雨不果原韵

重九宜晴雨声密，相望窗前秋瑟瑟。未过小圃访黄花，恐负花期被花责。芳辰寂寂遣情难，倦插茱萸感百端。身世浮萍空碌碌，何如秦女早乘鸾。怜予夙怀林下志，幼对溪山愿差遂。年来四壁聊可栖，悠然三径有馀致。潇潇风雨静中听，竹影松枝帘外青。兴到岂知尘内事，烟云间泼墨无停。

#### 和落叶诗原韵

秋林萧瑟近寒塘，树树飘残叶上霜。几阵因风惊蛱蝶，数声和雨醒鸳鸯。閒阶竞落依蛩响，远渚轻飞杂雁行。最爱深宫流锦字，不教红粉怨昭阳。

#### 吴绡

吴绡，字素公，一字片霞，号冰仙，长洲人。常熟许瑶室。有《啸雪庵诗钞》。

#### 啸台

魏晋已如梦，荒台今尚存。龙蛇正交斗，鸾凤已高骞。避俗惟长啸，逢人常不言。始知真隐意，何必入桃源。

#### 咏古

公子翩翩信绝伦，拟将豪举却狂秦。不知宾客成何事，枉煞楼头斩美人。

#### 杨柳枝词

官柳初开一抹眉，武昌城下乍逢时。春来树树烟条绿，欲认何枝是旧枝。

#### 春游百泉

仲月春始和，远郊阡陌静。数里闻水声，豁然入灵境。桃李犹含萼，森肃长楸劲。沦涟映红玉，蘋藻浮青镜。太行亘天末，遥瞻似云靛。溯流寻神源，圆折纷珠迸。喁喁见鱼乐，鳞鬣自適性。善病久罢欢，暂使心目莹。至哉苏门人，今古谁与并。

#### 秋意

相如绿绮秋弦急，霜侵树影寒蛟立。塘水泠泠湘佩清，遥山翠澹巫娥泣。啧啧虫吟四壁空，千金赋得长门宫。含毫思苦朝来渴，病骨生春蜀酒浓。

#### 春晚曲

楝花风起春如醉，海燕劳劳云碎碎。湖头两桨白昼閒，莫愁深下珠帘睡。荀生斑玉柳生绵，陌上人归草似烟。辘轳声促银床冷，玉井飞红堕碧泉。

#### 铜雀伎

霸业山河在，三台不复春。当时望陵处，松柏亦成尘。舞袖閒云薄，红颜野草新。曾闻王子敬，道此最关人。

#### 柳是

柳是，初名隐斐，字如是，小字影怜。常熟钱谦益侧室。

#### 西泠

西泠月照紫兰丛，杨柳丝多待好风。小苑有香皆冉冉，新花无梦不濛濛。金吹油壁



朝来见，玉作灵长夜半逢。一树红梨更惆怅，分明遮向画楼中。

#### 和泛舟诗韵

秋水春衫憺暮愁，船窗笑语近红楼。多情落日依兰棹，无藉轻云傍绿舟。月幌歌阑寻麈尾，风床书乱觅搔头。五湖烟水长如此，愿逐鸱夷泛急流。素瑟清尊迥不愁，桼楼云物似妆楼。夫君本自期安桨，贱妾宁辞学泛舟。烛下乌龙看拂枕，风前鹦鹉唤梳头。可怜明月将三五，度曲吹箫向碧流。

#### 题祁幼文寓山草堂

悬圃凉风物外姿，石楼丹栋总相宜。家通洛浦招云接，人倚湘君放鹤迟。花满晓临珠盖拂，莺啼春入玉衣吹。伊余亦有怀园引，笛里青霞湘桂旗。

#### 春日我闻室作呈外

裁红晕碧泪漫漫，南国春来正薄寒。此去柳花如梦里，向来烟月是愁端。画堂消息何人晓，翠帐容颜独自看。珍重君家兰桂室，东风取次一凭阑。

#### 刘夫人移居金陵赋此奉寄

钓鱼溪畔赁茅茨，负戴风流近可追。雒浹潘安居旧筑，荆州宋玉宅新移。门前一水如临镜，天外云山与画眉。桃叶渡头双桨在，清溪莫过小姑祠。

#### 寒食雨后

红绡蛺蝶事茫茫，不信今宵风吹长。留得春风自憔悴，伤心人起异垂杨。

#### 顾横波

顾横波，原名媚，后以字行，一字眉生，又字智珠，又字眉庄，上元人。合肥龚鼎孳侧室。

#### 咏醉杨妃菊

一枝篱下晚含香，不肯随时作淡妆。自是太真酣宴罢，半偏云髻学轻狂。舞衣初著紫罗裳，别擅风流作艳妆。长夜傲霜悬槛畔，恍疑沈醉倚三郎。

#### 海月楼坐雨

香生帘幕雨丝霏，黄叶为邻暮卷衣。粉院藤萝秋响合，朱栏杨柳月痕稀。寒花晚瘦人相似，石磴凉深雁不飞。自爱中林成小隐，松风一榻闭高扉。

#### 董白

董白，字小宛，号青莲，江宁人。如皋冒襄侧室。

书闷

独坐红窗闷检书，双眉终日未能舒。芳容销减何人觉，空费朝朝油壁车。

绿窗偶成

病眼看花愁思深，幽窗独坐弄瑶琴。黄鹂亦似知人意，柳外时时送好音。

周炤

周炤，字宝镫，江夏人。汉阳李以笃侧室。

拟古

鸳鸯固友禽，鹦鹉亦珍鸟。屏栏与池塘，哀乐各昏晓。鹦鹉语鸳鸯，飞鸣何缭绕。情多恐不祥，怨重将毋扰。我闻太息之，衾裯正微渺。凄然欲向谁，彼姝矜窈窕。

次林文贞韵寄王玉映

夫子南归后，永夜述名媛。生小贮金屋，弱龄弄玉砚。海桑失庐亩，竹素易钗钿。感尔瑶华赠，时时动纨扇。芰荷缀鸳鸯，天真写素绚。咏絮谢女匹，织锦苏娘彦。依是小家女，畏令仙人见。注目倚镜阁，因风寄方便。所恃一片心，的的託澄练。

闻外将归

茶花梅蕊自纷飞，小圃身如坐翠微。不定阴晴天欲倦，何方燕雀晚知归。王孙岁岁怀芳草，侍女朝朝倚绣帏。见说画眉人且近，湘山如黛未应稀。

吴芳华

吴芳华，钱塘人。康氏室。

逆旅题壁

胭粉香残可胜愁，淡黄衫子谢风流。但期死看江南月，不愿生归塞北秋。掩袂自怜鸳梦冷，登鞍谁惜楚腰柔。曹公纵有千金志，红叶何年出御沟。

叶子眉

叶子眉，扬州人。

宜沟店题壁

马足飞尘到鬓边，伤心羞整旧花钿。回头难忆宫中事，衰柳空垂起暮烟。

王素音

王素音，长沙人。

琉璃河馆题壁

愁中得梦失长途，女伴相携听鹧鸪。却是数声吹去角，醒来依旧酒家胡。朝来马上泪沾巾，薄命轻如一缕尘。青冢莫生殊域恨，明妃犹是为和亲。多慧多魔欲问天，此身已判入黄泉。可怜魂魄无归处，应向枝头化杜鹃。

呼祖

呼祖，字文如，江夏人。邱齐云室。有《遥集编》。

闻邱生罢官有寄

有官亦何喜，罢官亦何悲。一官生罢去，是妾嫁君时。

题亭中安石榴

安石根孤托谢庭，合欢枝上日青青。悬知雨露深如许，结子来朝是小星。

林瑛佩

林瑛佩，字悬藜，莆田人。云铭女，拔贡郑郊室。有《林大家诗钞》。

冬至夜

愁多已不堪，况复逢改序。伤心忆旧年，镫下欢相聚。今夕亦如兹，痛母归何处。凄凄不敢啼，恐触严君故。堂前暗断肠，入房泪如雨。

登楼寄夫子

凭栏试一望，山色入楼苍。野寺藏深树，閒云度远冈。雨馀花故落，春尽燕还忙。无限登临思，翻成离别伤。

九日寄父

强对茱萸只自悲，云天万叠望中疑。闺人不识登高路，肠断当年岢峒诗。

乙丑人日感咏桃花

瑶池仙子隐真香，爱向春风浅淡妆。一种天姿人不识，浪传流水引渔郎。

郝湘娥

郝湘娥，保定人。同县窦鸿侧室。

江南采莲曲

采莲乳妇小花香，罗袖新裁半臂长。为羡滩头交颈睡，戏将荷叶罩鸳鸯。

十五吴娃惯弄潮，隔花回首向郎招。来时不用撑船访，门对垂杨靠水桥。

绝命词

一妇何曾事二天，今朝遄死赴黄泉。愿为厉鬼将冤报，岂向人间化杜鹃。

李氏

李氏，长山人，青浦知县滨女，同县赵伯麟室。有《梅月楼草》。

春闺

重门深锁寂无尘，满树花开不见人。独有画梁双燕子，年年相伴过残春。

清明

又是清明雨后天，绿杨深处见秋千。无边芳草王孙路，榆荚飞钱柳堕绵。

寄外

思君客路冒风霜，独上妆楼望帝乡。最是离人肠断处，长隄衰柳挂斜阳。

春望

鸟语绵蛮度短墙，朝霞催起早梳妆。自从不上楼头望，春色飘零到海棠。

胡瑗

胡瑗，海阳人。郑於雅室。

和送别原韵

一别情无限，愁心寄晚风。羡君佳句好，白云和难工。

#### 红梅

几回错认杏花村，染得猩红浅复深。不道山香盈小院，林家当日是知音。

玉骨冰肌染嫩红，依依低映粉墙东。莫教狼藉春泥里，常伴妆台斗晓风。

#### 周淑履

周淑履，莱阳人。侍卫世祐女，胶州高荫林室。有《峡猿草》、《绿窗小咏》。

#### 述怀

轧轧机杼声，漠漠空天雪。操作入中宵，十指皆皴裂。积丝匹难成，不忍中道绝。著此缟素裳，怡然矢同穴。

孤儿髫髻年，欲令就外傅。大者陶性情，次亦理章句。宁云致通显，不敢陨故步。尔父有残书，慰母在寒素。

#### 秋怀

残暑方销歇，西风已渐凉。高柯怜坠叶，疏雨咽寒蛩。入梦新愁积，思家旧恨长。百年应几许，端的为谁忙。

#### 冬日送别表妹

萧萧风雪逼人寒，欲整行装忍泪看。珍重送君无别语，高堂代我问平安。

#### 独坐思诸弟

含愁寂寂掩柴扉，疏柳横窗映绣帏。鸿雁几行声历历，可能一夜向西飞。

#### 毛秀惠

毛秀惠，字山辉，太仓人。诸生王懋室。有《女红馀艺》。

#### 戽水谣

绿杨深沈塘水浅，轳辘车声满疆畝。倒挽河流上陇飞，渴乌衔尾回环转。今夏旱久农心劳，西风刮地黄尘高。原田迸裂龟兆坼，引水灌之如沃焦。男妇足茧更流血，鞭牛日夜牛蹄脱。田中黄秧料难活，村村尽呼力已竭。

#### 钱塘怀古

京洛烟尘弃不收，西湖台阁作金瓯。流连秋色还春色，歌咏杭州胜汴州。自愿苟安增币帛，谁摅孤愤报仇雠。栖霞岭畔将军墓，只有南枝记旧丘。

乙卯秋外赴金陵省试不售诗以慰之

新妆竞扫学轻盈，俗艳由来易日成。谁识天寒倚修竹，亭亭日暮最孤清。重阳风雨滞幽斋，失意人难作遣怀。篱菊已花还觅醉，便须沽酒拔金钗。

胡蒨桃

胡蒨桃，蒙白人。履和女。

题画

四围山色翠交加，竹树蒙茸一径斜。此去仙源知不远，前溪流出野桃花。

窦氏

窦氏，大名人。曰岩三女，陈元城室。有《贞奩阁集》。

赋得爱月夜眠迟

银蟾喜对宵如昼，夜凉寂静三更后。素魄将移花影斜，清光已射窗纱透。斗转银河碧汉流，牡丹带露弄轻柔。薰炉香烬浑忘寐，倚遍栏杆几曲楼。

秋晚

西风吹木叶，万户动寒砧。静院凭栏久，愁心无限深。

立秋

梧飘一叶送秋声，风动凉生暑气清。万户寒砧催木叶，草根深处乱虫鸣。

色他哈

色他哈，满洲旗人。

和白晓月题半山庵壁诗

帐冷衾寒怨阿谁，柳烟花雨总成悲。怕看春草当窗绿，别后珠帘尽日垂。塞外马嘶青海月，闺中人动白头悲。可怜别后庭前柳，一样黄昏带月垂。

孙淑

孙淑，字静谷，常熟人。诸生许灏室，举人进益母。

#### 五日吊古

田文五日生，屈原五日亡。吉凶同此日，理固难推详。原与国休戚，一死分所当。渔父樵自鼓，詹尹龟宜藏。抱石投湘流，心与日月光。文从狡兔计，高枕乐未央。后合魏秦赵，伐齐何披猖。身死薛遂灭，高户仍不祥。文生鸡狗雄，原死蘅茝芳。世人何梦梦，悲屈羨孟尝。我心独不然，临风慨以慷。抚时怀往事，聊进菖蒲觞。

#### 周巽

周巽，字顺吉，浙江山阴人。诸生沈心室。有《须曼阁小草》。

#### 秋夜闻笛

今夕是何夕，忽听苍龙吟。高楼谁独倚，凉夜有清音。窥牖月如水，隔墙风满林。漏长吹乍断，不尽故乡心。

#### 周氏

周氏，宜兴人。同县华亭教谕任登朝室。

#### 过堂伯祖挹斋相国翡翠园

金谷荒凉墓尚存，午桥风月剩琴尊。低徊五十年前事，一树梨花欲断魂。

#### 何氏

何氏，德州人。故城秘象益、诸生象山、乾隆己卯举人训导象贤、庚寅举人象英母。有《历亭吟稿》。

#### 春霖

万井风烟接茂林，春云欲坠掠清岑。萧萧韵响窗前竹，点点声沈石上琴。芳草泛池添绿满，落花浮岸带红深。村田遍处沾时润，喜称农家望岁心。

#### 聂含玉

聂含玉，开原人。

#### 绝命词

菽水宜将日，高堂暮景长。劬劳羞未报，留取待兄行。

闺阁耽书史，其如大义催。见危应受命，含笑入泉台。

韩氏

韩氏，宁武人。

偶兴

数日阑珊懒作妆，为乘清兴弄篇章。吟成只用画眉笔，信手书题字也香。

王飞琼

王飞琼，苍梧人。孟希增室。

默坐

默坐閒吟自笑予，行年六九乐贫居。锦机漫织新花样，墨海尝游小蠹鱼。室有儿孙惟课读，家无儋石亦藏书。人生适意为佳耳，过眼繁华总是虚。

王氏

王氏，绥阳人。张睿室。

绝句

自尤妾命薄如笺，初赋桃夭失所天。未老姑还有讦，纲常不让古人先。

姚履敬

姚履敬，徐州人。江宁诸生余其模室，平越知县璜母。

寄子璜

焚雨蛮烟寄一官，休图温饱自求安。独居无愧时加慎，持法宜平略尚宽。封鲧史传千古美，悬鱼人重一身端。宦囊莫计轻如叶，清白吾家素本寒。

拟唐人边庭四时怨

草满龙沙绿满山，故园夜夜望刀环。汉家雨露无中外，春色遥应度玉关。

日午中天暑气多，三军一似火山过。纵教汗透重重甲，犹唱南薰解愠歌。

边寒画角咽秋霜，辛苦经年戍朔方。回想闺中临别语，只教努力事戎行。



黄云围幕雪如拳，敢望生还渡酒泉。闻道九重怜将帅，貂裘昨日赐军前。

孔丽贞

孔丽贞，字蕴光，曲阜人。博士毓埏女，济南戴文谔室。有《藉兰阁草》。

哭亡夫

亲老妾心悲，哭君无尽期。月圆分镜日，雨滴断肠时。生死魂难聚，幽明路已歧。纵为华表鹤，留语复谁知。

中秋对月

玉宇无尘万籁幽，卷帘一派暮烟浮。飞飞归燕方辞社，寂寂寒蛩已报秋。桂蕊迎风香满袖，桐阴绕座月当楼。世情争似清虚好，不染人间半点愁。

读玉峰书城叶夫人诗因步其韵

卜宅临江志自伸，柴门常闭不知春。汲泉瀹茗全抛俗，绕舍栽蔬未是贫。曲径花铺鹤梦稳，茅斋雨过燕泥新。只怜落落无俦侣，同调难逢我辈人。

孔淑成

孔淑成，字叔凝，曲阜人。博士广鼎女。有《学静轩草》。

侍母点消寒图

堂上传呼停绣襦，慈萱看此掌中珠。鹤眠积雪三三径，猩点消寒九九图。月影清如今夜好，梅花香似去年无。眼前索笑随舅妹，博得欢颜韵不孤。

孔昭蕙

孔昭蕙，字树香，桐乡人。贡生广南女，嘉兴朱万均室，其镇母。有《桐华书屋诗钞》。

中秋玩月

今夜团圞月，清光万里同。恐添慈母思，不敢说山东。

孔传莲

孔传莲，桐乡人。奉化训导毓璜女，宜川县丞冯锦继室，御史浩母。

### 幻梦杂记

忽惊呼啸出堂皇，昏黑中腾引炬光。柱国阎罗原一体，前朝甲第大功坊。

依依奴婢路歧逢，涕泣推扶劝返踪。此处绝无娘姓氏，休教迟及五更钟。

### 孔继坤

孔继坤，字芳洲，桐乡人。嘉兴高士敦室，有《听竹楼偶吟》。

### 送复哉北上

珍重复珍重，别绪何茫茫。临风理素篋，游子整行装。八茧乏吴绵，五紵愧羔羊。春风吹客衣，雨雪霏道傍。出门几回首，一顾一徬徨。男儿多意气，安用恋故乡。黽勉事行役，弗萦儿女肠。何以解我忧，诗酒恣徜徉。何以慰我心，德音频寄将。白头有老母，黄口多儿郎。君职我当代，我言君莫忘。穷冬气萧索，万象寒无光。岂无三春时，灿灿桃李芳。愿君知此意，奋志期飞扬。不见黄鹄举，千里任翱翔。

### 海棠

真妃梦破晓妆新，倦倚东风斗好春。燕子不来天又雨，几回愁绝卷帘人。

几枝点染竹篱新，一笑风前独殿春。秉烛岂愁花睡去，微吟还有未眠人。

### 孔继孟

孔继孟，字德隐，桐乡人。康熙己丑进士、解州知州传忠次女，乌程夏祖勤室。有《桂窗小草》。

### 伤逝

肠断思君子，悲哉逝水流。温文娴礼乐，慷慨熟春秋。长啸刘琨壮，深心贾谊忧。玉楼天帝召，寡鹄恨难休。

### 送春

落花无迹怨春归，寂寂空枝舞蝶稀。惟有呢喃双燕子，殷勤依旧傍檐飞。

### 孔素瑛

孔素瑛，字玉田，桐乡人。诸生毓楷女，知县金尚東室。有《飞霞阁诗集》。

### 杨九娘庙

杨溪九曲水波平，古庙常留孝女名。今日桔槔声不断，花蚊无迹柳风清。

自题画落花蝴蝶便面

春去春来花自惜，花开花落蝶应知。年年绿到王孙草，正是花残蝶老时。

孔继瑛

孔继瑛，字瑶圃，桐乡人。传志女，诸生沈廷光室，河道启震母。

震儿设教永平移家就养途中即事有作

有子悲风木，饥驱到北平。移家聊远道，就食怅馀生。载主亲封篋，栖神宛倚衡。同车频险阻，共命判幽明。渡水潜相唤，登山恐或惊。崎岖轮易折，轂速马难行。揽袖看孙哭，烹茶有妇迎。为言官道近，齐说郡侯清。地绕冈峦势，人多弦诵声。疏花开小院，斜日下高城。聚似萍波泛，来当麦浪晴。黄泉谁问路，白发独添茎。每忆黔娄被，徒怜考叔羹。萧条愁官馆，何日送归旌。

游大明湖

大明湖景似苏隄，也向熏风策杖藜。历下亭环流水曲，会波楼绕远山齐。香飘花浦莲初放，歌入芦洲舫又迷。一抹烟云催夕照，回看月挂柳梢西。

孔兰英

孔兰英，桐乡人。世球女，汪圣清聘室。

自题燕姬出猎图

霜气冷征衣，秋原雉兔肥。燕姬年十五，挟弹势如飞。

秋怀

纷纷木叶舞回廊，自酌香醪破闷尝。远道短书劳怅望，此邻长笛助悲凉。閒愁易乱如衰草，女伴难留似夕阳。独有寒蟾非世态，照人薄醉坐兰房。

颜氏

颜氏，号恤纬老人，曲阜人。光敏女，同县孔兴室。有《恤纬斋诗》。

哭母

我母辞人世，淹忽八阅月。卜时清和初，归窆礼罔阙。雪涕挽灵车，肠断轮不发。寡女啼血尽，麻衣惨白发。但恨地下土，不使肉生骨。皎日入西海，荒林人影没。

遣病

梦回芍药香相续，暖风吹雨梅子熟。阶下石榴驻晚霞，绕池竹映湘帘绿。家贫无力种茯苓，病久应知疏骨肉。草堂泥新绝纤尘，道书携就窗中读。

丁氏

丁氏，诸城人。锤大文室。

别父母绝句

夫死难独生，儿将归黄土。父母鞠育恩，请俟来生补。

许权

许权，字宜嫒，德化人。进士崔谟室。有《问花楼集》。

赠外

君子安厥命，真人息其机。举世笑君贫，君贫不自知。天地两大境，温饱与寒饥。人不寒饥死，定有温饱时。阴阳相倚伏，此理天不亏。痛饮刘伶酒，狂吟李白诗。终日无尘事，春风任所之。

七夕

七月七之夕，家家望女牛。神仙不可见，凉风何飘飘。我疑天孙之巧转近拙，东西断隔难飞越。一年一度一分离，千古银河响幽咽。不须乞巧向天孙，若赐巧多愁欲绝。君不见东家力田妇，耕耘常相随。旦暮共苦乐，白首不分离。又不见西邻有才女，夫婿上玉堂。终年不相见，怅望悲河梁。玉露无声夜清悄，盒中盼断蛛丝绕。不知巧思落谁家，只恐巧多人易老。寄语人间痴儿女，宁为其拙毋为巧。

玩月

一种月团圞，照愁复照欢。欢愁两不著，清影上阑干。

寄外

柳风梅雨路漫漫，身不成飞著翅难。除是今宵同入梦，梦时权作醒时看。

章有湘

章有湘，字玉筐，一字令仪，号橘隐，华亭人。明罗源知县简次女，孙中麟继室。有《澄心堂集》、《望云草》、《再生集》。

### 晚眺

岭峻隐青猿，松高飞白鹤。山云挂树梢，风卷残英落。新蒲已抽芽，细草媚崑壑。景物最伤心，桃李还如昨。谁家少女郎，背立秋千索。貌态衣不胜，欢笑风前乐。春来无所为，斗草争花萼。何事深闺人，终朝常寂寞。

### 秋日寄家姊俞夫人

八月秋风振山谷，黄花初放银塘菊。一枝手折欲赠君，远道茫茫愁极目。间将玉纸写新诗，新诗赋就动远思。萧萧鸿雁随云度，寂寂虬螭拥漏迟。忆昔同在翠微阁，飞文联句夸奇作。那知江海各天涯，青鸟无情双寂寞。苏合房中愁索居，尺素遥传锦鲤鱼。为问江淹五色笔，拟成团扇近何如。

### 晓思

窗外鸡初唱，花间露未乾。欲临明镜照，犹怯翠眉寒。宿鸟翻林树，归鸿振羽翰。不知乡国信，何日报平安。

### 九日雨中有感

每到茱萸节，思亲泪满衣。难禁心耿耿，况对雨霏霏。故国秋莼老，他乡客梦稀。登临怜弟妹，竟作彩云飞。

### 秋怀

露华寒夜滴柴扉，留滞天涯未拟归。吴下云深鸿雁杳，楚江秋老鹧鸪飞。穿针结缕人谁共，咏絮吟风事已违。闻道故园莼菜熟，他乡回首泪霑衣。

### 次玉璜妹来韵

记得西窗翦烛时，鸰原回首忽天涯。梦魂不觉吴山远，愁绪惟应夜月知。画阁焚香春泛泛，绣帘飞燕昼迟迟。相期泖水归宁日，重与殷勤话别离。

### 哭夫子

一自公车去不还，从今信有望夫山。赤绳虚系三生约，红泪惟馀两袖斑。诀绝未亲真恨事，梦魂时傍见欢颜。也知修短原无定，岂料荣枯顷刻间。

千里良缘合倡随，于归不满十年期。最伤薄命分鸳侣，犹幸高名占凤池。故国泥封闻信日，长安春色看花时。无端遽赴修文召，不管空闺怨别离。

日日伤心静掩门，每因春草忆王孙。空闺形影那堪问，满架图书今尚存。十六年前灵谷梦，三千里外杜鹃魂。孤灯厌听梧桐雨，偏送愁声渍泪痕。

父子夫妻总幻因，夜台相见可相亲。无端生死偏摧我，不定功名却误人。遗得文章惊四海，寄来锦字恰三旬。待乘双凤君先去，寂寞兰闺未死身。

几度悲秋秋已阑，回纹裁就向谁看。锦衾人去鸳鸯冷，银蒜帘空翡翠寒。无复音容还故国，空馀旅棹返长安。昨宵梦里分明见，依旧看花倚画栏。

遥忆牛衣相对悲，那堪富贵便分离。姓名始入黄金殿，丽藻终传白雪词。泪洒在原当此日，魂归华表竟何时。孀闺寂寂肠应断，玉镜台空忍画眉。

银汉霜华下井梧，愁心曾耐夜啼乌。月移妆阁侵书幌，风动形容出画图。咫尺相看言笑隔，依稀偏怪梦魂无。含情独对芙蓉帐，一任香销金鹊炉。

挑尽残灯泪满衣，空阶细雨正霏微。愁凝长夜难成寐，梦到相逢不忍归。人去依然同色笑，觉来何处觅庭帏。悲凉此际还家日，枫冷吴江一雁飞。

瘦影临风忆所思，冰心裂碎更谁知。分栖怕睹连枝树，续命空传五色丝。阁下招魂怜有弟，墓前执紼痛无儿。閒来到处搜遗稿，开篋篇篇黄绢辞。

蜀魄啼鹃道路长，鹁鸪无复雨连床。中郎事业书千卷，子敬人琴泪几行。不死丹心终化石，馀生青鬓总成霜。与君不共齐眉案，纸阁芦帘瘞孟光。

#### 闺情

坐对鸳鸯草，行看蛱蝶花。那知春复夏，游子未还家。

至日泊舟江上大风有怀

今节初逢起问程，停桡还喜片帆轻。旅魂欲到亲帏侧，一夜江声梦不成。

家园白牡丹

天风昨夜曳仙裙，缥缈高台一段云。好共海棠春睡足，不将浓艳嫁东君。

章有渭

章有渭，字玉璜。简三女，嘉定侯泓室。有《淑清遗草》。

行园

烂漫花如绣，閒行碧沼边。浴凫还泛泛，无蝶自跼跼。罗袂香风袭，纱窗翠簾连。徘徊看落日，彩雾绚青天。

春感

舞蝶庄生梦，啼鹃蜀帝魂。紫芝逢胜友，芳草想王孙。小阁闻鸡唱，閒庭听鸟喧。晓烟迷麦陇，香雾锁柴门。鱼戏青萍动，风吹碧叶翻。彩毫题玉柱，绿蚁引金尊。乍摘葳蕤草，长依翡翠轩。避秦无绝境，何必问桃源。

#### 舟行即事

晓雾迷离彩鹢轻，掉歌徐动见秋晴。临湍鹭子亭亭立，夹岸蒲花漫漫生。遥指小山遮塔影，忽经深树出钟声。晚凉不觉罗衣薄，自爱澄河片月明。

#### 怀瑞麟姊

一声啼鴂觉春阑，怀旧离魂不自宽。犹忆绣床人病起，殷勤频为嘱加餐。

#### 再怀玉筐

临别殷勤置酒杯，西风挥手画船开。春来苦雨音书滞，几度闻箫忆凤台。

#### 范姝

范姝，字洛仙，如皋人。有《贯月舫集》。

#### 闻蟋蟀有感

秋声听不得，况尔发哀吟。游子他乡泪，深闺此夜心。已怜妆阁静，还虑塞垣深。萧瑟西风紧，行看霜雪侵。

#### 憚冰

憚冰，字清於，阳湖人。诸生鍾隆次女，毛鸿调室。

#### 题自画菊

秋花绕砌锦斓斑，为写秋花独闭关。天欲老时君正少，不妨霜雨铸红颜。

小楼昨夜又西风，篱外霜花绽几丛。閒取丹青为点染，倚阑清兴有谁同。

#### 龚静照

龚静照，字冰轮，号鹃红，无锡人。廷详女，同县陈氏室。有《永愁人集》。

#### 落花和韵

已觉烟消暮雨残，洛阳三月倩谁看。红香暖日流云散，青冢黄昏泣露寒。竞逐钿钗

春未减，暗窥妆镜泪初乾。忽忽何似休归去，回首连天红雨漫。

#### 赠周宝钿

药房新咏气如芬，柳絮名高自不群。握管独吟诗博士，画眉争识女参军。娇藏金屋音犹远，步出香尘意转殷。祇为天涯消息杳，几番愁摺石榴裙。

#### 七夕大雨

天也怜人负此辰，雨沈河影浸云茵。双星两地分南北，乌鹊填桥恐未真。

匝岁离多泪已盈，化为甘雨溢花茵。纵生天上犹天忌，始信人间事有因。

#### 浦映绿

浦映绿，字湘青，无锡人。武进黄永室。

#### 谴鹄

片片花飞点绣帏，强拈裙带试腰围，欺人最是檐前鹄，说道当归又不归。

#### 呼婢

银瓶斜插海棠花，春色朦胧护绛纱。烟袅兽炉香欲烬，隔帘鹦鹉唤琵琶。

#### 牡丹亭

情生情死亦寻常，最是无端杜丽娘。亏杀临川点缀好，阿翁古怪婿荒唐。

#### 谢瑛

谢瑛，字玉英，无锡人。徐可先室。有《寿藤轩集》。

#### 送外北上

握手临行话别时，叮咛肠断泪如丝。从今凭仗三更梦，飞绕君前不暂离。

#### 徐氏

徐氏，长山人。继志女，新城耿鸣世室，庭柏母。

#### 寄子诗

家内平安报尔知，田园岁入有馀资。丝毫不用南中物，好作清官答圣时。



彭氏

彭氏，邓州人。而述女，李鸿儒室。有《长林》、《蝶龕》诸稿。

课农人种桑示诸妇

种桑令欲稀，晨夕风露透。抽条叶以繁，筠笼日相就。茧成得收丝，织纴不敢后。辛苦分所甘，寄语诸少妇。

拜姑墓

携有诸孙在，嬉声想共闻。未能承妇道，徒尔拜姑坟。俎豆心先洁，蘋蘩手自薰。凄然松柏下，洒泪满寒云。

谢张夫人寄兰花香

博山晴结穗云黄，一榻春风入蕙乡。蝶翅初回幽谷梦，只闻花气不闻香。

课儿辈夜读

午过凉生暑气回，半擎镫火竹帘开。窗前莫厌参丸苦，日后甘从此处来。

谢张夫人寄芽茶

半炉松火汲清泉，净洗砂铛手自煎。度得银瓶香欲透，一瓯先供绣幢前。

徐元象

徐元象，字奇孺，广济人。张楚伟室。

送外

送君入楚江，悠悠归路长。一去隔千里，魂梦伴潇湘。

姜桂

姜桂，字芳垂，一字士霜，号古研道人，莱阳人。明行人垓曾女孙，本渭季女，张氏聘室。

题画

暖风晴日值良辰，窗外梅花数点新。更想林泉清淑致，山光树色写初春。

梁颀

梁颀，字秀中，号袖石道人，安丘人。同县韩朋桓室。

山村夜坐

俯仰空庭四字清，浮云扫尽晚烟轻。梨花皓月原同色，风竹流泉不辨声。深谷人閒春亦寂，短墙水近冷先生。却思城市喧阗处，箫鼓楼头听二更。

答何徵室

晚羞明月晓羞花，弱质萍飘泛海涯。万叠云中千里树，不知何处是吾家。

张柔嘉

张柔嘉，侯官人。惠来知县应良女，中书林佶室。

雨夜

支离病榻苦无眠，夜雨镫昏倍惨然。虽有遗书生计薄，泪痕湿尽枕函边。

远漏风回报四更，寒秋闷拥对孤檠。思量家事方愁绝，檐溜何堪递楚声。

程琮

程琮，字飞仙，号转华，一号无涯居士，休宁人。歙县吴祚荣室。

题彭祖张苍像

苦惜年光恋幻身，白头私擅梦边春。几家酬酒凄然问，可有齐眉耦齿人。

集古今宫闱德容兼备者若干人题其上

艳淑如斯例作尘，相逢可即昔时人。愿将彼骨吹成土，持葬儿今屡转身。

释牡丹亭传奇色情难坏意

何自有情因色有，何缘造色为情生。如环情色成千古，艳艳荧荧画不成。

有疾豫别玉勾词客

风流嘉庆古难均，共命同心异别亲。应恨块泥将打破，谁能再塑管夫人。

卧病坐乐轩

日日薰香礼觉王，不任操作不缝裳。谁知鹿苑无生诀，未及龙宫不死方。

疾作梦母氏孙淑人挈儿来兹不复梦矣

为痛宁馨转自伤，相随却恨我无娘。更谁看等千金重，只我佳人断绣肠。

属玉勾生椋外题小眠斋三字

千春万载此沈埋，坐乐轩中只暂挨。岂可便无题额处，相烦亲署小眠斋。

李文慧

李文慧，字亦士，一字端之，永城人。举人乔大元室。有《畹思小寄吟》。

夜泊曲江不寐鼓琴

舟泊曲江口，孤屿澹欲失。遥岸渔火明，烟中棹歌息。当此万籁静，心境两幽寂。焚香拭焦尾，调轸横陈膝。琳琅太古音，旨趣复谁识。欲写我心期，聊以寄所适。一弹江水清，再鼓秋月白。月白与风清，惊起鱼龙出。曲终独徘徊，篷窗风露湿。

即景

昼长帘乍卷，飞絮满妆楼。燕垒红轻缀，莺梭绿半浮。烟云千里梦，风雨一春愁。独倚阑干曲，时时忆旧游。

陈静渊

陈静渊，凤台人。大学士、谥文贞廷敬女孙，郎中豫朋女，贡生卫封沛室。有《悟因楼存草》。

秋兴

近日閒心少，都缘愁病多。案头疏笔砚，窗下废吟哦。露滴阶苔润，风吹塞雁过。悠然清兴远，散步向庭阿。

张贞

张贞，太原人。华士弢室。

远游曲

远游那可了，坐惜红颜老。花开隔岸林，目断江南草。

刘若蕙

刘若蕙，诸城人。诸生许瑶室。有《捧翠集》。

秋夜寄外

一片长安月，清光两地盈。悬知千里客，不尽故乡情。窗竹写秋影，村砧捣夜声。空闺愁不寐，自语对灯檠。

李氏

李氏，字淑莹，洛阳人。

柬外

凭几修书寄便鸿，词笺恨短意无穷。离怀正值深秋月，红叶青灯烟雨中。

霍双

霍双，字贞秋，东光人。

暮春

东山下林影，西阁日光残。脉脉春风里，幽花生暮寒。

寒食

人倚雕阑竹倚衣，女桑遥听子规啼。陌头杨柳休攀折，系住春光不许归。

范贞仪

范贞仪，字一柏，如皋人。同县贡生高纘室。

兰塘曲

放棹向兰塘，共爱芳心浅。折断藕中丝，虽长不及茧。

春日经理绿雪山房

荒馆经时未启扉，眼前烟景与心违。频逢风雨花应瘦，久废删锄草渐肥。小阁香泥巢乳燕，短墙蛛网挂春晖。伯劳底事东飞去，春昼年年未见归。

对镜

匣里青铜久闭藏，暂时相对转心伤。飞蓬欲化三秋草，瘦骨真成百炼钢。香阁梦回山月冷，玉台人去鹤书荒。薛媛欲写丹青寄，天上人间恨渺茫。

谢秀孙

谢秀孙，字秀兰，宁都人。魏禧室。

自翠微山望金精

薄暮秋初风，木叶下庭圃。夫君招我游，盘姗出坡树。山菊垂好花，阴影随行步。几折临高厓，敛足不敢顾。夫君指金精，谓此汝所慕。吴王洞口来，仙女云中举。至今千百年，烟霞生其处。自怜长闺房，荏苒秋草暮。结庐十五载，不识金精路。夜月明空山，时闻钟声度。忆我七八岁，曾一随诸妇。巾车到洞门，嘿然生疑惧。洞中忽有光，云殿凌丹牖。翠竹摇空寒，白日蒙雨雾。仿佛记曲水，海棠缘石户。草色映罗裙，逐伴踏花去。礧水湿弓鞋，逡巡避母怒。忽忽三十年，仍向峰头住。世事几兴衰，家门亦多故。徵兰不可期，弄瓦杳无与。出户泪如丝，入户泪如雨。人生能几何，年光如驰骛。安得辞人间，洒扫侍仙驭。

池上秋海棠

芳草依碧池，佳花点秋石。绿叶与紫茎，何数秋兰色。主人策杖行，三径偶相值。采之置瓶中，颜色照几席。有如浣纱女，斜立石潭侧。幽芳独自怜，忽遇五湖客。沼吴果何人，撚花长太息。

林氏

林氏，新会人。林奇凤季女，襄阳申有功室。有《画荻草》。

霜竹

孤挺三冬日，枝枝映楚湘。萧疏持健节，苍翠带寒霜。月色笼阴薄，风声引韵长。林中还有实，留得凤毛香。

菩提树

智药曾培植，携来西域船。高枝成宝盖，清影散诸天。虞苑流阴远，唐朝得法先。自从卢祖悟，色相总非禅。

大通寺

海暖风和放小舟，满天烟景好追游。青山叠叠浑无影，绿水漫漫静不流。佛祖昔年留妙偈，头陀今日继灵修。菩提自是西来种，今古禅参尚未休。

秋夜独坐

日来秋气满林塘，独坐閒庭过夕阳。飒飒西风鸣晚树，萧萧残叶落东墙。闭门自喜红尘远，顾影偏宜白发长。谁有凌霜真节操，岁寒不使后凋伤。

陈瑞麟

陈瑞麟，字若兰，海盐人。有《绿窗閒咏》。

闺辞

春闺三月养吴蚕，南陌柔桑满竹篮。为避行人回步急，不知髻上堕牙簪。一自檀郎赴玉京，残灯挑尽泪盈盈。黄昏又值芭蕉雨，不管人愁滴到明。

黄幼藻

黄幼藻，字汉荇，莆田人。议女，举人林仰垣室。有《柳絮编》。

孤雁

渺渺高秋外，长空一雁迟。哀鸣关底事，澹远写相思。瘦马征夫泪，回文少妇诗。明年楼上过，莫向夕阳时。

雨中看紫芍药

晨妆乍点自倾城，冉冉香生绣户清。厌说广陵春色暮，胭脂和泪雨中倾。

恨白芍药不开

万种花开斗晓红，含羞无语倚东风。素妆不理因谁倦，一段春藏粉黛中。

登楼望海

遥山层叠海云开，浴鹭飞鸥自去回。春水茫茫天不尽，片帆浮动碧空来。

黄幼繁

黄幼繁，字汉宫。幼藻妹。

咏月

清切空阶月，相依欲二更。寂喧非一致，千秋同此明。萧萧庭中女，俯仰触中情。对此令人远，况乃兼秋声。浅深各有感，今昔宁无惊。秋在孤吟外，愁从何处生。人生有代谢，万物有衰荣。茫茫乾坤里，相积为愁城。欲挽西江水，一洗万古情。虚窗来素影，清泪落寒檠。

李氏

李氏，安阳人。高唐州判黄次女，诸生黄履平室。

季冬淇邑感怀

寥寥书馆客中居，况值穷冬百事疏。薄枕忆家千里外，寒窗兀坐五更初。飘零木叶侵幽径，落寞霜华满敝庐。时系寸心归未得，残灯挑尽独踟躇。

夜闻二子读书

节届清和夜气凉，蟾光皎皎映书堂。吾儿颇奋萤窗志，惜少熊丸教子方。

思亲

秋风拂槛气萧森，兀坐红窗思转深。乌鸟尚然知反哺，吾生却愧不如禽。

杨淑贞

杨淑贞，字端一，金堂人。涪州知府正辅女，六安诸生阎燧室。

闻鸦喧忆亲述怀

一乌树头集，群乌共喧呼。老者似爱怜，雏者如持扶。老雏同依依，孝哉至性俱。物情尚如此，嗟我何其殊。忆我将字日，亲悲泪欲枯。一旦远分离，千里阻程途。荒城鱼雁杳，生我却如无。恨我不为男，背亲来事姑。十五年瞬耳，亲容今何如。亲容日益衰，亲年日加诸。亲容与亲年，追思忽嗟吁。感此物争鸣，诚哉不如乌。三复《蓼莪》诗，叹息欲废书。

病起東井桐汪大姊

翠冷黄添逐病容，修眉怯扫黛螺封。簾痕轻拭流波腻，幔影閒垂曲槛重。五夜烧镫挑豆蔻，三秋览镜减芙蓉。披衣小展裁桐叶，撩乱吟情四壁蛩。

秋夜

纱窗月透影朦胧，丹桂香飘曲院风。满耳蛩声秋唧唧，玉阶寒露冷梧桐。

春日

轻寒款款逼窗纱，日影穿帘燕子斜。底事小园春未减，一枝晴放碧桃花。

曹炯

曹炯，字重光，天津人。有《非非集》。

#### 题爱莲亭

面水一亭在，临风绕芰荷。香消长日暑，色借醉颜酡。隔浦栖文鸟，方桥引素波。徘徊何限意，伫听采莲歌。

#### 游仙

九天天路路迢迢，阆苑奇葩尽吐苞。忆得看时忘日暮，归来新月挂松梢。朝来洞口饭青精，晚侍金仙宴玉京。忆得昨宵松下坐，月明星朗听吹笙。

#### 龙氏

龙氏，昆明人。刘恬聘室。

#### 暮春

却凭何物饯春归，泪洒风前送夕晖。莺舌唤将芳草暮，蜂须撩引落花飞。池塘梦浅随风绕，庭院愁加带雨霏。已觉困人肠欲断，不堪还封柳依依。

#### 韩韞玉

韩韞玉，长洲人。尚书、谥文懿莼季女，知县顾渭熊室。

#### 咏鹤

丹顶元裳白羽轻，芝田旧日得仙名。生来云水原天性，望里蓬壶是去程。代远每过千载寿，露寒常向九皋鸣。不随卫国乘轩队，稳卧松巅梦太清。

#### 钱纫蕙

钱纫蕙，字秋芳，号清荫居士，吴县人。中谐女，许廷鏊室。有《清荫阁集》。

#### 度梨关

迢递逾梨岭，肩輿胜两骖。雄关限闽越，幽境极东南。地暖常多雨，云开忽作岚。乡闾望不极，聊复上尘龕。

#### 野望

偶向东郊望，萧条物候非。云连山一色，木落雁同飞。岁月愁中促，音书天末稀。感时情不极，惆怅返柴扉。



### 新安江行

乘潮渡渔浦，沓嶂夹江湫。下瞰绿波影，能令纤芥分。筏移疑入镜，碓落自春云。  
听尽潺湲水，滩高易夕曛。

### 征怨

万里胡天断鸟飞，年年策马未言归。西风吹急笳声咽，历乱黄沙满铁衣。

### 秋柳

江潭憔悴几枝横，秋雨秋风怆别情。犹拟攀条贻远道，可怜玉笛不成声。

### 陈秀贞

陈秀贞，临桂人。大学士、谥文恭宏谋女，钱塘陆灿室。

### 菊影

分身老圃绘秋容，真相依稀色是空。落日移从霜径里，疏镫送入锦屏中。终将不老  
随宵月，直以无香傲晚风。悟却浮生归去也，白云挥手谢陶公。

### 雪集即事

小鬟轻曳锦帏偏，报说平明雪满天。起掷绣鞋床下卜，远人身上合添绵。

香奁移傍碧窗纱，小鼎焚香自煮茶。高卷疏帘看不足，犯寒亲手掬梨花。

红炉高宴列中堂，子侄传觞共举觞。无奈阿姑教强饮，清樽微试郁金香。

万花飞舞锦成团，晚上红楼作大观。直被天公迷望眼，不知何处是长安。

### 杨素书

杨素书，字韵芬，秀水人。钱塘夏之盛侧室，凤翔、鸾翔母。有《静宜阁诗钞》。

### 论诗法

人生学渊源，各各有所自。沆瀣非一气，成功总难企。我幼本蠢愚，况无明师启。  
义母爱拳拳，略举诗书旨。及长学讴吟，里言抑何鄙。两汉与三唐，梦亦不到此。我后归会稽，  
主人风雅士。亲炙获师承，渐解参奥理。吟红主爱女，夕秀翩翩起。五载共切磋，我当畏友亲。  
昙华萎一朝，慧业竟中止。闺阁嗟霏霏，独吟殊无俚。幸荷主恩深，诱掖频予跂。例将爱女心，  
教我亦如是。且我受薰陶，较女尤倍蓰。小阁上镫初，寒衾梦回里。有意无意间，剖析微难纪。  
真乐两融融，函丈胡能拟。许我诗学成，为我任剗削。我纵钝根钝，识此

还遗彼。辱承训委婉，顽铁亦柔靡。才知传不传，即定学诗始。才媛不乏人，著作存有几。方其侍膝下，尘情澹於水。红闺趁清閒，倡和偕姊弟。迨至赋宜家，琐屑筹盐米。师范日渐疏，旧学日益弛。即使能自立，初终志永矢。夫子或拘挛，家门或颠否。何暇计千秋，飘风扫萍似。度阁冷絮吟，湮没伤比比。谁似我主人，终身遂依倚。拙著曷足论，附骥颺颜耳。邈想同心人，情根总不死。人合固天定，天合亦人俟。缘生因即生，寸心坚由尔。我愿广陶镕，问字各欢喜。安得有情眷，团栾联砚几。

潘孟齐

潘孟齐，番禺人。广州教授梅元女，王隼室。

书怀寄夫子

惭愧兰芝女，还家恨解携。如何伯鸾妇，翻作仲卿妻。星月原同影，鸳鸯不独栖。烛花随泪尽，愁听夜乌啼。

陈克毅

陈克毅，字盈素，海宁人。邦彦女孙，嘉善曹相龙室。有《馀生集》。

偶吟

衰年光景若为欢，划尽烦忧强自宽。鬓已渐凋飘作雪，心经九转炼成丹。原无妄想参风雅，剩有高怀寄岁寒。领略绣窗清净味，课经礼佛且加餐。

徐珠渊

徐珠渊，字善怀，江都人。宣城施闰章侧室。

寄北

风紧牵离别，镫残人未眠。此身无羽翼，安得到君边。

北寄小镜

六月扁舟别故山，劳劳旅况几时閒。伤心不启匣中镜，千里依依伴客颜。

怀北却寄

雨滴梧桐秋不堪，忆君唯共接清谈。老天如识妾心苦，北地风霜尽入南。

春日望北信

九十春归感叹生，黄梅时节乍阴晴。香闺有泪无人见，且倚阑干听鸟声。

张昊

张昊，字玉琴，号槎云，钱塘人。举人义坛女，诸生胡大濬室。有《趋庭咏》、《琴楼合稿》。

秋晚

极目危楼上，天涯晚望中。云凭荒野阔，日落大江空。露冷蛩初响，风寒叶正红。兴来无俗虑，明月在疏桐。

观潮

风急秋江晚，潮声落照前。远疑千练白，高并一山悬。孝感曹娥志，忠留伍相贤。千秋遗恨在，故令怒涛传。

张昂

张昂，字玉霄，钱塘人。昊妹，洪文蔚室。有《承启堂吟稿》。

悼姊槎云

憔悴与心伤，无言祇断肠。泪从今夜尽，别是此番长。沧海浑难问，泉台不可将。芳魂心杳杳，何日更同行。

邵笠

邵笠，字淡庵，泰州人。诸生黄杜若室。

和夫子贷米诗

莫以贫为病，吾侪本寂寥。瓶罍虽久罄，意气不全消。张子仍存舌，陶公肯折腰。有邻难贷米，相对慰清宵。

邓繁祯

邓繁祯，字墨，如皋人。蓝田知县士英女，同县冒禹书室。有《思亲吟》、《静漪阁诗草》。

秋日

隐几人愁坐，夜分暑气消。乍凉霜有信，久旱海无潮。蕉老心空卷，蒲荒鬓共凋。岁时闰后早，秋事已萧条。

吴彩霞

吴彩霞，无锡人。

赠周宝箴

多生定拟蕊珠仙，此日风流更宛然。几见名姬为紫玉，欣逢佳偶即青莲。香心似雪姿尤丽，秀句惊人骨亦妍。最喜麟儿抛枣栗，书声共映绿窗前。

张繫

张繫，字采于，吴县人。诸生吴诏室。有《衡栖集》。

拟古三十韵呈大兄

忆昔承欢年最小，无彩堂前竞梨枣。春花秋月尽嬉游，绡帙牙签学搜讨。彩线閒临绮阁前，阿兄素志留青毡。针传薛指人争羨，笔吐江花名占先。马氏眉峰推共白，左家才藻叨同述。璞碎终怀玉石疑，伯乐未逢甘伏枥。潦落俄惊几度秋，相看霜发忽盈头。敢憎世上炎凉态，莫问人间青白眸。造化茫茫真莫叩，积德始知能裕后。玉树森森绕谢庭，一枝已夺天工秀。杏苑堪夸早著鞭，洛阳年少方翩翩。荣封姓字题黄绢，清要声华著木天。锦堂风月真无及，曲谱新翻奏瑶瑟。翠袖看娇画里人，斑衣笑舞阶前色。我本悲歌感慨流，相逢喜语偏绸缪。欢极每怀怙恃泪，情深须念鹁鸽愁。数奇昔共嗟难遇，此日云泥境殊异。但能教子习书香，岂惮丸熊与削柱。早誉咸称似舅贤，操觚稍解攻芸篇。化鹏弱翅惭无力，愿藉吹嘘送上天。

早春寄女

梅向南枝发，堪思寄陇头。春风吹绣帙，晓日荡帘钩。惜别犹馀泪，谈禅未解愁。何时一尊酒，翦烛话西楼。

舟行不寐有怀两从子舍

遥忆相招日，欣逢鹄驾临。银河犹耿耿，玉漏莫沈沈。暑气潜消簟，凉风渐透林。愧无文乞巧，笑指月穿针。甚矣吾衰老，贤哉尔意深。幽閒修女则，贞静熟闺箴。涤器烹新茗，添香理素琴。卷帘分树荫，移榻就花荫。嗜好皆投璧，论交可断金。含愁佯整袂，嘱别更沾襟。握手当年约，相思此夜心。敲诗鐙屡翦，拨闷酒频斟。兀坐閒欹枕，忘眠倦展衾。村荒多吠犬，山远少栖禽。暮景偏萧索，孤舟倍寂岑。何时双鲤寄，为我达知音。

初夏喜大人到舍

屏迹多年与世违，偶贪花信到柴扉。典衣不惜沽春酿，扫石何妨待月辉。芍药敛妆红欲瘦，芰荷出水碧初肥。相看莫使花枝笑，沈醉休辞酒力微。

戏为外子拨闷

失意休教苦自煎，为君把卷论前贤。儿顽自笑同王霸，婢钝何须学郑玄。涤器当垆情更洽，操春举案志犹坚。久藏赖有床头醞，莫负梧桐月正圆。

#### 依绿轩新霁

积雨初晴景色宜，绿波新涨小庭池。砌花带露含红泪，径柳笼烟敛翠眉。稚子折荷擎碧盖，老农翦竹插疏篱。萧然长昼凭书枕，一榻茶香午梦迟。

#### 柳

御苑千行远接天，碧如轻浪细如烟。只愁春去花如雪，几度临风倍黯然。

#### 汉宫

西风寂寂冷长门，纨扇秋来有泪痕。但得君心同月色，清光何处不沾恩。

#### 顾英

顾英，字若宪，长洲人。印江知县张之頊室。

#### 初夏送夫子北上

杜鹃唤春归，和风吹芳芷。何堪对斯景，把酒送吾子。分手即天涯，惜此须臾晷。别绪如茧丝，柔情似潭水。离怀寄孤鸿，相思托双鲤。征途勉加餐，努力拾青紫。上慰高堂亲，下酬贤伯氏。君行既雅醇，君才复俊美。但保金石心，豪门勿投趾。桃李易凋残，松柏岂朝萎。行矣勿悲嗟，风云自此始。

#### 张令仪

张令仪，字柔嘉，桐城人。文端公英三女，同县姚士封室。有《蠹窗诗集》。

#### 蠹窗对月

徘徊爱良夜，吾庐有佳趣。星稀月转明，冷侵阶前树。疏影自纵横，正对钩帘处。藻荇散庭除，水光还四布。曲槛好寻诗，修廊宜缓步。寒花浮酒盏，落叶添茶具。鹤巢松树颠，静夜如人。高天鸿雁鸣，唳入秋云去。坐久欲忘眠，烦襟感凉露。欲写此时情，谁能展毫素。

#### 乌栖曲

金谷园中百尺桐，慈乌将子巢其中。霜华坠地月如水，艳舞娇歌画烛红。石崇沈醉绿珠醒，银河半倾金翠冷。后夜高楼月自莹，不见珊瑚美人影。

### 秋夜长

严霜倒浸帘栊冷，半壁孤镫寒耿耿。秋老啼残络纬声，月明瘦尽梧桐影。啼乌有意隔纱窗，窗里愁人泪一双。两两饥儿啼下国，迢迢赍尾滞寒江。机中锦字休裁怨，且织征衣还寄远。天涯若问此时愁，一江春水犹嫌浅。

### 采莲曲

消夏湾头露华晓，风动芙渠香袅袅。吴娃红袖映花明，中流争羨鸳鸯好。西施一笑回双眸，芳香满载木兰舟。酒酣玉簟凉如水，西风莫遣吴宫秋。

### 斗草

绿窗晓梦莺啼醒，粉薄螺轻妆不整。瑶琴罢轸玉笙寒，花慵柳困春闺永。东邻女伴偶过从，相邀莫负芳菲景。共向南园斗草嬉，拈芳拾翠搜求尽。称奇觅巧自挑泥，玉尖宁怯苍苔冷。袖中别出谢公须，神采如生光炯炯。低回暗自卜心期，小立花前垂素颈。榆钱输尽拔金钗，人醉东风依露井。乳燕鸣鸠白日长，笑声远隔秋千影。

### 读霍小玉传

兽环锁闼青苔院，豆蔻梢头春一线。柳烟笼日翠颦轻，花雾著人红玉艳。芙蓉绣带宝奁开，风袅钗梁双玉燕。芍药裁成绝妙词，簪花小试琉璃砚。侯门白壁自无瑕，谁教青鸟偷娇面。杨花飞入惹春愁，门外王孙嘶紫骝。错认牧之非薄倖，同心缕带绾风流。画眉窗下调螺子，翡翠兰苕夙愿酬。地老天荒情不变，乌丝素盟足千秋。银筝锦瑟欢初洽，别鹤离鸾沟水头。密誓俄成乌鲋墨，新欢又占凤凰楼。萧娘骨瘦心如铁，宛转缠绵难决绝。羸卧空闺若个怜，鹦鹉窗前频叹息。访求消耗掷金钱，宝钗零落无颜色。长安三月牡丹时，契友相邀数陈说。眦裂髭张忿不平，多情感动黄衫客。鞭马羞过胜业坊，胡雏强控黄金勒。支离病骨倩人扶，晓衾鞋梦芳心接。含情凝睇薄情人，声声诉出啼鹃血。稚齿韶颜饮恨终，一恸重泉沈怨魄。精灵苦妒后来欢，数教所爱生离拆。曷不追取负心郎，贞魂化作紫鸳鸯。红珠露冷莲房老，双宿双飞向野塘。

### 晚春坐春晖亭

结构无多地，邻园藉绿荫。烟霞无俗态，花鸟得同心。雨足閒锄药，茶香静理琴。此中尘事少，颇似住山深。

### 北郭寻秋

野阔风吹袖，茫茫平楚间。秋随人意冷，云共客心閒。鸟坠将残夜，烟生欲暮山。怪他乌柏树，著意染衰颜。

### 小院残春

几树残红瘦不支，绿阴满地燕参差。春归细雨斜风里，客病轻寒薄暖时。斗草帘栊

人寂寂，秋千庭院日迟迟。柳花飘荡东西陌，閒杀青青百尺丝。

#### 焚香

空阶冷雨夜廉纤，宝鸭香消手自添。细霭几丝萦断简，閒云一片护疏帘。人同臭味原离俗，诗沁馀芳觉转恬。茗椀吟笺聊自適，幽窗韵事许谁兼。

#### 早秋夜坐

冰簟凉生暑渐收，雨痕洗出一天秋。微风小院花香合，淡月空阶竹影浮。绕砌乱虫搀客话，谁家孤笛唤人愁。萧萧夜色清如水，坐看星河渐欲流。

#### 秋夜作

云外惊心旅雁，草根和我寒虫。落叶打窗似雨，啼乌绕树惊风。

#### 咏十姊妹花

东风万物荷生成，队队红香照眼明。衰病天涯憔悴客，自怜同气各枯荣。

#### 蠹窗

沈水香中夜漏馀，月痕冷浸一床书。百城未敢夸南面，且乞閒身作壁鱼。

#### 元冥

北户乃瑾，凝阴沍寒。两仪混一，雨雪漫漫。何以御穷，修其旨蓄。草木既胎，蛰虫咸伏。无视无听，以还纯朴。百尔君子，宜谨嗜欲。

五亩园旧畜二鹤忽隕其一孤侶哀鳴都忘飲啄詩以吊之

西风一夜返芝田，仙蜕仪形尚宛然。旧过苍苔犹有迹，重来华表是何年。舞临池畔悲孤影，唳入秋空泣暮烟。何处惹人情最切，严霜落叶五更天。

#### 岁暮有感

空斋尘土锁书签，兀坐无心掩镜奩。酿雪冷云低碍屋，斗风乾叶乱敲帘。人从百虑堆中老，寒向单衫破处严。短景萧条催岁暮，可堪愁病更相兼。

#### 张若

张若，字清婉。文端女孙，工部侍郎廷瑒女。有《绀素阁遗草》。

随三姑母游王相国恬园

何意人间有洞天，雕栏花木锁平泉。莺喉乍啭调新曲，柳眼初舒过禁烟。绿野佳辰容共访，兰亭雅集快随肩。相期不负春明景，红药翻阶续旧缘。

张似谊

张似谊，字鸾宾，桐城人。文和女孙，刑部尚书、谥勤恪若淳女，主事姚文燕室。有《保艾阁诗钞》。

初夏晓窗

啼莺惊晓梦，强起未成妆。览镜惊容瘦，看书喜日长。帘疏风燕舞，径静露花香。不觉流光易，枝头杏子黄。

春日移居有怀夫子十韵

斗室堪容膝，翛然借一枝。安居聊避俗，闭户好吟诗。荆布频年惯，芦帘此日宜。静中延弱体，江上动遥思。薄宦愁谁谅，穷途恨独知。危疆需保障，冷署重栖迟。远道乡心切，深闺别泪垂。离情无寄处，归梦有醒时。岁暮忧怀抱，风霜入鬓丝。小园春色近，花发是归期。

宋素梅

宋素梅，德州人。

迎銮

海晏河清代，尧天舜日时。不辞川路远，肯慰士民思。紫气钦皇辇，黄云护圣骑。迎銮来献颂，万寿浩无涯。

应召作

山左群情切，江南望幸频。九重深保大，五载举时巡。浩荡韶光丽，葱茏物色新。彩云晴有象，瑞霭静无尘。淑气迎仙仗，祥风绕御轮。衢歌击壤遍，共祝万年春。

庄德芬

庄德芬，字端人，吴县人。河南提学道朝生女孙，州同定嘉女，武进董氏蜀室，乾隆己酉进士、浔州知府思嗣母。有《晚翠轩遗稿》。

乙酉夏日言怀示儿

我志在立孤，十载勤怵惕。凌兢雪夜鐙，黽勉灰中荻。穷年抱遗编，孜孜累微勩。何为运海鹏，忽作退风鷁。霜蹄惊一蹶，悲鸣仍伏枥。一蹶奚足忧，养锐期克敌。先哲有高



衢，驰驱任凌轹。朝华与夕秀，芬芳供采摘。纫兰带江蓠，琼枝光的皪。性行既修饰，文章丽翬翟。何难九千仞，翱翔俯云霓。

#### 初夏东轩读书

朱明已莅节，昼刻日以舒。骄阳耀廷桂，绿阴正扶疏。披卷当午凉，豁达开交疏。清风来徐徐，飘然动轻裾。丹黄陈我前，聊以供畋渔。咀华撷芳秀，此乐真蘧蘧。妇人休蚕织，获戾当何如。所嗜已成癖，良医难易诸。

#### 夏日读书示儿

朱夏景物幽，閒居颇萧散。南风扇清凉，北陆轡舒緩。蝉嘶绿树深，蝶化青芜短。疏帘隔朱曦，晴波荡虚馆。烧兰烟结篆，泼茗香浮碗。稠叠红牙签，参差青镂管。经义浩如海，说者穷论纂。且喜左氏夸，并取南华诞。文体逮六朝，音韵昭华琯。坚思铁砚穿，勤欲韦编断。毋使心旌摇，终期腹笥满。圣谟何洋洋，四子梯六经。至道有卷放，妙理无声形。放之又寰宇，卷之治家庭。所贵笃信者，终日常惺惺。渐渍其膏，有若蚁聚腥。十目示明畏，九思戒堕冥。惟苦日车速，驰光不暂停。谁挥鲁阳戈，三舍回曜灵。贤哉车武子，夜深犹聚萤。

#### 杂诗示儿

春风降和气，佳树生庭中。天意亦已厚，所赖尤人工。清泉灌根柢，香露滋芳丛。英华乘时发，枝叶何青葱。美人爱馨香，采撷归房栊。秋兰共纫缀，贵与良玉同。

吾闻燕国公，爨火照书策。范相未遇时，帐中盈烟迹。贵盛相门儿，贫贱无家客。青云与泥涂，勤苦同一辙。志学抱坚心，宁为境所易。诵读知其人，尚友若咫尺。流光驹过隙，分阴抵拱璧。毋令寡母心，戚戚忧乾没。

#### 庚寅秋沅儿下第书寄

去年手中线，为汝缝征衣。江南四千里，孤帆如鸟飞。悠悠寡母心，清梦常怀归。怀归兰陵道，春风复秋草。不辞啮指迟，惟期立身早。裁书附雁鸿，言与药石同。六翻苟不齐，何以凌长风。今年棘闱战，沦落丰城剑。空有气如虹，悬知泪如霰。归来季子颜，羞见山妻面。人事在苦学，天心惟与善。场圃且勿视，良图在三献。

#### 感遇

势位不可忽，人生贵自强。虽非君子言，所见亦已长。困龙蟠浊泥，虬肆何其猖。飘风从西来，雁字离其行。炎凉一转变，畴能保初肠。当时意气佳，直拟田与姜。失路相依托，栖栖徒自伤。

#### 梦亡儿巡

冰镜映回廊，逶迤属洞房。凉波衣欲湿，四壁含清光。碧纱开六扇，不记谁家院。

侍者卷细帋，爱子生相见。惊喜前抱持，容颜似旧时，相呼频不语，婉转惜娇痴。悲怀三四载，不分相逢再。合浦珠重来，平生愿堪慰。蝴蝶逐晓风，苍茫西复东。罗巾近角枕，一片杜鹃红。

### 感旧

辞亲驾言迈，泣别临关口。远道效唱随，齐眉镫下酒。友义借金兰，言激恒得咎。谋身靡所安，归途忽先后。丹心白日昭，青松岁寒茂。人生知尽分，岂敢希不朽。

江陵千树橘，成都八百桑。我来值凋丧，南山田已荒。慷慨进言激，导君君未遑。白日忽已中，夏绿殒其黄。泉台不相随，大义凛若霜。古言立孤难，赤手肩纲常。

### 早起

春庭一夜雨，瑟瑟鸣丛箬。觉来知新晴，枕上闻啼鸟。振衣启疏寮，晓日射林杪。馀霞天际垂，一抹红未了。星星泫露花，粼粼茁芽草。清气爱平旦，百虑未相扰。携书对崇兰，幽香萦纈褱。

### 梦亡儿昌

死别已经时，寝兴怀惨凄。感深召魂梦，恍惚无端倪。伟然盛礼服，垂髫还佩觿。摩挲问旧疾，何处逢良医。欣喜命俦侣，徘徊安枣梨。嘈呖风外钟，胶角墙下鸡。启目失处所，肝肠如刀卑 卬。

### 墙外老树一株枝叶有熊彪顾盼之势

河边老榕树，巘岼古墙外。时当五六月，密叶张青盖。蒙丛罩晚烟，苍翠分朝霭。蘋末青风生，悠然发天籁。时鸟藏其间，群飞羽翺翺。圆吭哢晴阳，绵蛮出翳薈。最喜纳凉时，长空净埃壒。新蟾瞪纤目，馀霞抹红带。屋角望熊彪，此意堪入绘。

### 咏庭中树示儿

昔看芽茁土，枝幹忽轮囷。春鸟安巢稳，秋儿化羽新。扶疏深得地，盘结岂因人。坐见风烟长，清阴盖四邻。

### 过从女妆楼题赠

日映朱楼迥，风来碧户深。丛兰散幽馥，时鸟度清音。衮畔簪花格，屏间刺绣针。坐来香篆结，莲漏正沈沈。

雅服应希谢，幽怀亦慕班。奇花归绣谱，香草上云鬟。意静琴中水，心閒画里山。自今来往熟，日暮不知还。

### 己丑十月廿二日书寄沅儿

孟冬之月天未寒，故乡喜气盈门阑。吾见今日作秦赘，朱丝却藉麟胶完。六礼殊愧阮修薄，且喜门第皆衣冠。蘋蘩付托重贤淑，故事须知追孟桓。鸡鸣昧旦相警戒，令汝九万扶摇转。含香簪笔排鹓鸾，几乎早致青云端。

#### 田家词

江南五月杨梅熟，高田下田梅雨足。割尽黄云麦陇虚，参差出水秧针绿。长养风来稻叶肥，家家乳燕拍帘飞。沿村日暮犍车歇，少妇梳头换葛衣。

#### 听雨曲

屏山掩尽琼窗闭，博山生润凝龙气。谢娥嚙坐怯单绡，梅风吹送悲秋意。树叶声微雨脚稀，栏边淅沥沾苔衣。碧泉引满铛欲沸，青叶下筐蚕正饥。倏忽奔腾一千里，琤琮铁马云中起。曲次檀槽十部催，四弦历乱挥纤指。急溜前檐复后檐，镫花湿影摇重帘。南潮呜咽流水尽，一夜绿萍新涨添。

#### 交城作

碧嶂崢嶸势插天，弹丸城郭簇人烟。刘家冠剑遗丘陇，狐氏英灵肃豆笾。风起尘沙迷去路，雨馀琴筑听飞泉。爻峰佳气常葱郁，古柏苍苍不记年。

桐圭帝子旧封都，参宿光中治一隅。地有古风歌蟋蟀，村当落日啸於菟。高齐旧事渔樵熟，智伯遗踪榛莽芜。南去晋祠流碧水，拟将桂酒荐芳蕪。

#### 月夜渡江

布帆风正递行舡，江阔潮平一练铺。秀色苍苍迷北固，安流渺渺下东吴。坐思谢朓新诗句，行看王蒙好画图。回首瓜州烟树远，广陵关上玉轮孤。

#### 山雪晓行怀吕氏妹

乱峰稠叠玉为尖，残烛光寒照撒盐。千里暗云屯石径，五更疲马怯金衔。危陂冻合行频滑，绝壑风生气倍严。遥忆碧纱扃四扇，鹊炉香爇梦方甜。

#### 毗陵驿晓发

古驿霜风飏去旌，此行非是赋东征。官河北上一千里，客路西驰十五城。浦外寒烟迷雁影，云头野刹递钟声。凭舷满眼皆冰雪，自喜襟怀似此清。

#### 暮春过吕氏妹宅

曲院重来旧药栏，单衫时候楝花残。芳樽劝醉尝鳧臠，碧碗浮香破凤团。自爱琴书成雅集，不劳歌板佐清欢。与君得尽论诗兴，一任红珠泻烛盘。

### 生日

犹是尘中荆布身，徒增马齿说生辰。义方教尚惭三徙，罔极恩难报二人。落笔诗篇当清吹，到窗风月算佳宾。浊醪引罢还游目，桂正秋风竹正春。

### 志恻

拟千寸禄奉慈帏，太息庐江志每违。寂寞黄垆终抱恨，凄凉白发更何依。镫昏孤幌人何在，花落空庭燕独归。抚景心伤眼前事，时时雪涕为君挥。

### 丁丑春日述怀

黄鹄孤飞第四年，谁将愤泪达重泉。莺花岁月供多病，冰雪襟怀只自怜。丹穴未逢悲屡空，青毡犹在慕三迁。清斋半偈消磨障，心在莲花绣佛前。

### 秋夜怀儿女

玉宇无云夜气清，乍凉庭院坐三更。紫兰墙脚虫相语，皓魄枝头鸟自惊。千里音书频北望，一生词赋慕东征。遥知汾水逢南雁，远目应伤陟岵情。

### 辛卯十月感怀

迢遥关塞雁飞迟，闻道青萍又见疑。相马未能逢伯乐，弹琴何处遇钟期。白头织屨怜衰病，紫禁含香恐后时。仰首青云数行泪，从来天道佑孤儿。

### 怨

团扇新词出汉宫，珍珠一斛赋楼东。鹃啼蜀国花枝冷，鹤唳钟山蕙帐空。塞北将军归不得，湘南骚客思无穷。人间更有穷途困，对泣牛衣叹鬓蓬。

### 奉寄家大人

老父高情爱闭关，逍遥诗酒卧南山。烟霞久住红尘外，鸥鸟相寻绿水间。佳卉庭前关锦幔，远峰屏上簇螺鬟。天涯弱息归难得，问寝频劳梦往还。

### 有感

樽前风味忆苏州，橘酿初成泻玉舟。细滑钗茎烹雉尾，匀圆珠颗剥鸡头。一窗疏影梅花月，两鬓生香桂子秋。三十年来乡国梦，每随江水向东流。

### 乙酉仲春家大人来视别后奉寄长句

喜拜严亲鸠杖前，东风菖叶杏花天。苍颜白发观兹世，酒量诗怀似昔年。远道暂来

看弱息，空囊无计奉初筵。漉巾村醴权称寿，出网江鱼算割鲜。驻景愿求千岁药，负暄还御八蚕绵。归梁落燕飞仍急，出谷雏鹑啅乍圆，服训久谙兰可制，酬恩真信海难填。桃溪篷艇朝冲雨，萝径奚囊晓醉烟。彩服追随乐真隐，吾庐遥望白云边。

### 人静

人静空庭月似钩，凄凉怀抱怕清秋。泉门一闭无开日，独任人间万斛愁。

### 梦归

螺樽香冽泛新醅，小阁开帘对早梅。二十年前幽绝处，谢家庭院梦中来。

### 甲戌归毗陵

丙舍荒凉闭野烟，碧苔青草自年年。送君此地君知否，松柏萧萧认旧阡。

### 过青墩将游青山庄为雨所阻

城隅曲水放兰舟，乘兴名园作胜游。咫尺楼台云雾满，一天风雨隔丹丘。

泥滑沟塍水自喧，筇舆扶上渡头船。今朝多少游山兴，都付松烟染画笺。

长天暝色近黄昏，远树低迷认水村。欸乃声中吟未稳，轻桡如箭过青墩。

### 宿金坛怀沅儿

卧听严城报五更，酒醒时节旅人情。水寒风急云阳道，念尔扁舟棹雪行。

### 忆沅儿渡江

江梅江柳弄晴烟，燕子矶头霁色鲜。愿得蒲帆悬十尺，樵风稳送渡江船。

### 晚寒

小雨初晴草未乾，残花如霰落檐端。春衣典尽风还起，四月窗前耐薄寒。

### 送海门弟归里

送尔还登桂楫舟，淡云如水月当头。归心一逐南飞鸟，欲望兰陵是旧游。

尽日论诗人复散，讲堂寥落酒瓢閒。遥知骨肉赓吟处，桂树初花满故山。

### 蒋季锡

蒋季锡，常熟人。大学士、谥文肃廷锡女弟，华亭王图炜室，侍郎兴吾母。有《挹清阁集》。

### 车遥遥

车遥遥，挥驽马。红尘扑面金铃迟，鞭呼恃有驱车者。路旁杨柳藏驿楼，十里五里行不留。蒙山之阳泗水北，石路险涩程途忧。仆夫告瘁往复来，行人多向黄金台。晚月晨星竞驰逐，三万六千双转毂。车遥遥，驽马骄。侬家家近白蘋浦，几时归去乘吴舫。

### 春日书怀寄呈家慈曹太夫人

经春风雨兴阑珊，瞥见庭花暂解颜。十载未归虞仲里，终朝长对陆机山。裁云有句凭他巧，赋雪无才信我顽。最喜板舆无恙在，何当芳径一追攀。

### 侍袁太夫人夜弈

小院梧桐月满时，夜凉无事试敲棋。妇姑原有相传谱，莫怪今宵下子迟。

### 家园新茶寄大儿兴吾

才交穀雨摘旗枪，焙得春茗寄远尝。画省烹时须细品，可能比并婺源香。

### 鍾令嘉

鍾令嘉，字守箴，晚号甘茶老人，馀干人。铅山蒋坚室，士铨母。有《柴车倦游草》。

### 登太行山

绝磴马萧萧，群峰气力骄。苍云横上党，寒色满中条。返辙河如带，扪车迹未遥。龙门划诸水，禹力万年昭。

### 腊日寄铨儿

北地寒威重，怜伊客里身。音书差慰我，贫贱莫骄人。失路皆由命，安时即报亲。师言当服习，莫负诲谆谆。

汝妇能承顺，无时离膝前。居然兼子职，久已得姑怜。生育宜佳气，平安似昔年。传声语夫婿，孤馆减忧煎。

汝妹依丘嫂，幽窗共食眠。穿针才学绣，识字不成篇。闺训粗知听，童心未尽蠲。归期宁解卜，时刻掷金钱。

频年思子泪，前月抱孙才。忆汝孩提似，原他祖德该。啼声劳客试，秀骨或天来。归日应过膝，闻当笑口开。

心情怜下第，约略似前番。官道应攀柳，家庭已树萱。恃才防暗忌，交友戒多言。结习还当扫，新诗莫诉冤。

力学看驹隙，从游汝得师。遥分五秉粟，足供十人炊。汝友皆相念，肥甘数见贻。呼吾如若母，问慰过时时。

仆婢爱菰韭，同锄半亩园。门关饶岁月，居僻远尘喧。夜火机伊轧，家人乐笑言。眼昏今益甚，书帙懒重翻。

梦尔天涯路，肩輿往复频。师方为讲学，客岂是依人。驷马题桥志，双亲属望身。而翁坟上草，今已四回春。

#### 送铨儿赴礼闱

半生常在别离间，又整行衣厚著绵。双眼渐昏针线乱，寸心无著梦魂牵。关河此去风霜远，骨肉何因聚散偏。不用登高望亲舍，泥金须早慰堂前。

#### 题自绣梅花诗图

屈铁孤梅葬古苔，巡檐寒萼冻难开。分明一幅鹅溪绢，绣出诗人小像来。

泪珠成串上残绒，十指寒香敌朔风。蓦地停针魂欲语，梅花如雪照房栊。

身后君无封禅书，回文老去底须摹。他时留与儿孙看，此是安人绣字图。

#### 陆凤池

陆凤池，字秀林，青浦人。知县祖彬女，上海曹一士继室。有《梯仙阁集》。

#### 梯仙阁閒眺

风团花气沿溪暖，暗雨明霞红不断。燕掠汀洲人语稀，画桥烟薄芦芽短。日景瞳眈殿阁攒，箫声缥缈水云宽。游船散去鸟飞绝，向晚山光扑鬓寒。

#### 冬日寄外

烟水迢迢泛木兰，寒风残雪怯衣单。客裘自著江边雨，莫作临行泪点看。

#### 陈氏

陈氏，贵筑人。兵备道法季女，诸生周承元室。

#### 思乡

阆苑蓬山道路长，海天愁思正茫茫。回肠一似桑乾水，万转千盘绕故乡。

曹锡珪

曹锡珪，字采繁，上海人。给事中一士女，知县叶承室。有《拂珠楼集》。

咏愁

曲阑干外小楼头，芳草青青逝水流。明月黄昏人乍别，落花帘幕雨初收。张衡诗就金刀暗，潘岳吟成玉镜秋。最是好风吹不到，五侯亭馆野人舟。

寒食

禁烟时节正东风，蝶舞莺啼恋落红。一寸回肠十年事，都来夜半雨声中。

曹锡淑

曹锡淑，字采苻，上海人。一士女，陆秉笏室，锡熊母。有《晚晴楼诗稿》。

哭表妹赵蕤芸

流水高山记昔年，不堪重结听琴缘。与君同蹋西楼月，今夜冰轮依旧圆。

鐙下课大儿锡熊古诗拈示一绝

夜长鐙火莫贫眠，喜汝繙诗绕膝前。汉魏遗风还近古，休教堕入野狐禅。

曹蔚文

曹蔚文，嘉善人。相龙女，钱塘徐绍堂聘室。

舟中

帆挂清江迥，连天秋水长。烟波千万里，何处是潇湘。

小园晚眺

小园何处堪閒眺，薄暮云峰锁断虹。几点鸦沈残柳日，数声蝉噪晚梧风。

宋景卫

宋景卫，长洲人。诸生程树聘室。



### 正俗歌为陈媛作

礼义廉耻四维立，纲常名教万古植。无愧於口无愧身，无愧於身尤汲汲。妇人再醮知身污，若乃未婚心每惑。一身那可容二心，心失谁云身不失。卓哉陈媛毓名闺，五经先生兰芽茁。习礼明诗幼字林，桃夭未赋所天卒。烈女不肯更二夫，相从地下寻灵匹。见者哀号闻者悲，大吏上言采访实。旌门表墓仁恩荣，文人诗歌盛缙帙。嗟予抱璞称未亡，传闻益觉心凄恻。閒尝读书考《五经》，管窥《易》象参彖翼。男女睽而其志通，已字未娶可推测。坤道含章利永贞，从一而终恒其德。苦节悔亡不节嗟，安节之亨甘节吉。人心道心辨《尚书》，精一微危中允执。动罔不凶德二三，终始惟一臻厥极。忠贞世笃緇家声，无忝尔祖躬自飭。《诗经》三复《柏舟》篇，髣髴两髦我仪特。斯人去也矢靡它，勿匿初心矢靡慝。在室自誓首共姜，圣人取为后世则。郝邹诸儒阐说殷，死同穴而穀异室。柏舟齐女中垒编，乍至城门卫赴急。保母请还置罔闻，竟入持丧襄卫国。凡未適人许嫁矣，《春秋》经传标特笔。僖公九年书伯姬，何休《公羊》洞经术。字而笄之待成人，系属於人养贞一。明与未字之女殊，《原贞》援引曝书集。女而不妇贞为行，盲《左》、《穀梁》弗沿袭。共姬比例圣所褒，尧峰南响说堪忆。许嫁纓为《礼记》文，名以行媒遂相识。两家斋戒告鬼神，台与终身不改革。娶有吉日未成婚，夫死亦如婿吊泣。女服斩衰往夫门，未嫁服同已娶式。妇人不二斩谓何，天不二耳《仪礼》悉。可服可往明可从，爱人以德休姑息。举世昧经谓过中，此旨不明道几熄。人求尽伦安能过，五伦祇恐常不及。由来夫妇比君臣，策名亦有未受职。清风孤竹师夷齐，商朝未禄周耻食。推观子弟事父兄，岂必一一亲颜色。父子继绝或背生，兄弟前后或南北。追思孝友自性成，非缘见面乃尽力。朋从尚友及神交，宁须把臂投胶漆。揆此可知妇与夫，性真相感当循率。殷情何必同衾帟，问名已定羞差忒。当知勉义非溺情，身洁心安理亦得。幼从父母最初言，初命是遵戒私昵。不悖於理曰无违，许嫁之语由亲出。弗亏其体弗辱亲，立志不渝贵在必。夺则随亡不存存，志不可夺命则毕。愧存不若无愧亡，几希人禽谨出入。守贞殉烈易地同，一心不二绝矫饰。卓哉陈媛大节章，浩然正气两间塞。伤悲自署望门寡，门在望矣未许即。既云寡矣难再双，兹言至正非偏刻。鹄甘独宿歌三年，鸛告双飞媒一逼。遂将性命付轻绡，仅留心事传遗墨。视死如归岂博名，舍生取义宁图逸。惟媛家学《五经》明，察於伦理昭作述。天经地义古今垂，永永幽光争皎日。

### 修身尽伦歌示诸娣侄

立天之道阴与阳，立地之道柔与刚。立人之道仁与义，人参天地质纲常。曰人自是兼男女，女岂非人甘自阻。宁惟男子希圣贤，贤媛圣女有徒侣。五官同具官则思，五常同秉常独知。三从应亦悖三物，四德由来张四维。从父从夫及从子，谓从大道莫背此。从兹不辱理无违，步趋德行艺而已。功在宜家德润身，言关名教谨笑顰。容貌端庄非艳丽，礼义廉耻当遵循。正用其情是率性，善养其气是立命。恶欲更有甚死生，偷强祇因殊肆敬。人心道心辨危微，克念罔念分是非。精思弗夺立其大，良知用致审其几。守身慎独惟求是，彼君子女釐女士。无愧於影无愧衾，庶免小人同受誓。太上立德次言功，不朽当共男子同。莫云女子无所事，德功言在人伦中。夫主如君原不异，男忠女节曷有二。系纓结帨心齐坚，处变安常身等致。爱媳爱女等爱儿，义方尤赖母兼师。前遗旁出并抱嗣，一视同仁方尽慈。母邪父邪孝姑舅，嫂妇诸姑信朋友。同堂娣姒女弟兄，妾婢视臣如足手。为女为媳为母妻，平生阅历涂毋迷。自欺自画皆暴弃，徽音在昔宜思齐。穷通寿夭任彼遇，特立毋随流俗误。内则中馈事女红，不愿乎外行我素。虽然苦乐由它人，乐可自寻苦勿瞋。天爵良贵何曾贱，日新富有何忧贫。人生百年那能久，外物奉身竟何有。自来列女至今存，德立名垂真不朽。具备功言洵美才，才华根本德生来。有节无才便是德，有才无德诚堪哀。德为主也才为辅，允矣能文

亦能武。貌非所重随赋形，崇德践形须法古。以书相证克俭勤，何妨识字能诗文。《国风》半属妇人作，传经续史章令闻。诗文阐理鄙雕琢，作字甚敬即是学。德发为才著德容，超出庸凡回卓荦。世羨女佛与女仙，姑尼孰个知真詮。空障净尘惟遏欲，入道岂必谈元禅。圣人不过人伦至，察於人伦大贤示。五官尽职备五常，三才参赞体易始。巽为风兮长女乎，兑为泽兮少女呼。离明中女乾坤照，女亦宜为君子儒。是人岂肯居人后，出见纷华遂尔谬。奉盈一覆水难收，尚其无愧於屋漏。无形之刑每在怀，斯人斯可谓之佳。善信充实乃为美，西方美人庶得侪。慎终保始起迄止，制外养中表符里。防微处处铭盘盂，避嫌刻刻严瓜李。嗟予未嫁称未亡，靡它靡愿师共姜。节大饿小伊川训，广平铁石为心肠。若夫所处无不幸，端宜中正而主静。蒙以养之自幼婴，少成习惯时加省。女子须教本考亭，明白《论语》及《孝经》。推之《女戒》并《家范》，定性好学先人型。夜气凛凛旦昼梏，几希人禽恒勉勩。诸艰历试久炼金，纤尘难染无瑕玉。贞以得一清宁侔，闲邪敬直女德修。仁可成而义可守，天合刚而地合柔。主一无適圣贤志，天地之道物不贰。日月有光崇效天，山川有恒卑法地。

方京

方京，字彩林，番禺人。殿元女，金縢室，祖静母。

薤上露

薤上露，日出晞。朝槿花，日暮萎。微物转瞬间，人生谅如斯。彭祖帝尧民，亦复同所归。服食求神仙，仙成竟何时。守道以待终，令名庶可垂。

送孟调大侄南还

相对疑梦寐，言别百愁生。孤飞易为感，使我心魂惊。聚散人生常，此别难为情。尔我本一树，相期共枯荣。尔今折枝条，芽肄何时萌。沾润我本怀，老髦愿难行。尔今返吴中，闭门守硜硜。勉哉崇令德，努力以扬名。取法不在远，祖父有遗型。周亲我老矣，垂涕重丁宁。

示长媳杨珊珊

十年为妇蓼莪馥，疏水家风乐自如。宛似举场勤苦士，妆成惟对古人书。

杨珊珊

杨珊珊，字珮声，浙江山阴人。宾女，按察使金祖静室。

乡思楼

旅寓金阊春复秋，亲年多病老依刘。嗟予未识乡关路，廿载空登乡思楼。

吴受竹

吴受竹，长兴人，有《万卷楼诗草》。

胡明宫词

琼楼十二浸凉波，枕上秋风敛翠蛾。隔院忽闻天乐近，玉箫吹处月明多。  
云鬟不整玉容愁，再拜重华却蹇修。销尽蛾眉无限妒，世间复有女巢由。  
云在瑶阶月在池，藕花香里写乌丝。深宫只奏南薰曲，不似骊山避暑时。  
水晶帘卷月黄昏，蟋蟀秋声彻禁垣。斗罢每邀天一笑，朝来分赐小雕盆。  
西风瘦影锢长门，一片寒砧欲断魂。闻道贵人曾赐死，始知憔悴是君恩。  
朔风猎猎响寒空，衰草黄云入梦中。料得君王眠毳帐，系腰犹忆玉玲珑。  
幸车深夜出重门，怊怅微吟达至尊。三十六宫寒月白，一篇《红药》独承恩。  
深闭尧门独影哀，玉阶春尽长青苔。无情鹦鹉双栖处，天语香浮漱滟杯。  
重重鱼钥锁黄昏，旧枕珊瑚总泪痕。寄语江南红粉女，莫将玉貌勾君恩。  
碧槛红栏十二重，罗衣绣带尽当风。由来天上无人地，何事隄防问守宫。

杭澄

杭澄，字清之，号筠圃，仁和人。世骏女弟，赵万曝室。有《卧雪轩吟草》。

独坐

久坐不觉暝，罗衣怯晚风。远星随月后，孤屿入云中。归鸟争栖树，浮烟欲蔽空。  
天涯一长望，怀思正无穷。

辛未五十悲吟

十载伤心泪，何曾一日乾。老深无后痛，贫觉立孤难。寂寂墓门草，深深智井栏。  
此身原已死，休作未亡看。

春日寄怀湛堂

晴烟漠漠柳丝丝，肠断春江是别时。千里相思两行泪，三年光景几篇诗。生涯似兔  
初营窟，踪迹如蝉不定枝。却怪天遥久留滞，何年得遂鹿门期。

高氏

高氏，华阳人。大将军威信公、谥襄勤岳鍾琪室。

#### 雨中看芙蓉作

芙蓉花发靚妆新，细雨微风洗瘴尘。有泪却同湘女恨，无言岂作息妨嗔。遥思洛水凌波袜，想见华清出浴人。相对莫愁秋寂寞，一生颜色不伤春。

#### 张佛绣

张佛绣，字抱珠，青浦人。进士梁女，诸生姚惟迈室。有《职思居诗钞》。

#### 秋日杂诗

秋气入我楼，西风报初寒。郊原过微雨，景物肃以閒。澄泓泛遥波，苍翠浮重峦。草荒露华白，林媚枫叶丹。海燕去不息，落木纷江干。荣瘁有代谢，节往独无还。自非达观人，谁能弭忧端。

#### 夏日池上

小亭凉气多，一榻扫烦燠。四面环清流，閒坐豁心目。曲径转危桥，古藤蟠老木。山光当昼寒，竹色上衣绿。时有薰风来，荷气自芬馥。幽鸟啼深林，疏花落棋局。终日远尘氛，萧然似空谷。

#### 拟谢玄晖郡内高斋间望答吕法曹

郡斋亦清旷，俯仰穷幽深。澄川映疏牖，孤峰秀前林。风清独鹤唳，日隐饥鼯吟。不醉樽中酒，空对窗閒琴。思君安可极，朝夕劳中心。幸藉精神通，惠我良书音。何时慰延颈，啸傲凌高岑。

#### 寄怀爱庭四兄

端居寡物役，遥夜屏纷虑。罢琴坐西轩，朗月出高树。念我同生亲，迢迢隔云路。谁禁慕远怀，偏与清景遇。关山无穷极，沧波安可渡。喜接良书音，春风三月暮。离思落花前，纷纷已无数。瞥眼又残秋，芳草委繁露。寒蛩床下鸣，鸿雁云端度。良会岂无期，岁月不肯驻。俯仰何所言，恍然伤幽素。

#### 游横云山庄

一径穿林入，双扉面水开。有山都抱屋，无砌不封苔。云气萦衫袖，岚光落酒杯。到来尘境隔，何必问蓬莱。

地僻松杉古，寥寥人迹稀。寒花含宿露，红叶舞斜晖。山鸟閒催句，溪风冷透衣。笑言深树底，相对澹忘归。

倚檻徘徊久，遙岫起夕陰。桂香傳道氣，梵唄印禪心。遠寺寒鐙小，虛窗皓月深。  
一篙秋水闊，何日重相尋。

#### 秋霽偶成次小姑韻

野塘波冷落紅蕖，茅屋蕭然涼雨餘。一桁山光圍几席，半帘松翠濕圖書。遣懷詩句  
乘閒寫，愛月心情為病除。負却滿前秋意好，素琴三弄乐清虛。

#### 春霽

檐聲向曉初斷，一半春過夢中。花笑林梢旭日，鳩鳴屋角東風。溪光暖漾清淺，草  
色晴連遠空。晝永烟消寶鴨，閒情聊寄焦桐。

#### 曉起

卷箔延輕涼，槿花嬌欲吐。一鳥忽驚飛，蹴落花梢露。

#### 暮春

鳩婦催晴三月天，東風無力雨廉纖。翻書啜茗消長日，滿院飛花不卷帘。

#### 小二月九日雪用東坡聚星堂韻

小樓香氣銷雲葉，日暮江村正飛雪。穿林入隙自悠揚，衣袖輕沾亦幽絕。卷帘閒坐  
不知寒，得句欲書免毫折。黯靄山尖翠影流，模糊徑曲人踪滅。岸旁漁舍烟不起，風際青帘  
凍難掣。爽如秋氣滌襟懷，光若朝暾眩眼纒。試煮床頭新漉酒，爐炭紅餘一寸屑。憶得前年  
呵凍吟，堪惜韶華成一瞥。此時歡樂比屋同，來歲丰穰互相說。夜深清响落風簷，夢破重衾  
冷於鐵。

#### 姚允迪

姚允迪，字蘊生，金山人。巡道培和女，知縣戴鳴球室。有《秋琴閣詩鈔》。

#### 元日同諸兄分韻得洁字

朝陽破雲翳，朔氣變華節。帘栊鳥語新，石鼎香初爇。堂前拜嘉慶，長幼咸欣悅。  
柏酒次第斟，盤蔬隨意設。風暖景物佳，檐梅拆晴雪。過午山齋靜，琴書自閒洁。相將茶一  
瓿，拈韻擘彩纒。諸兄富文藻，顧我慚薄劣。興到亦長吟，遑計工與拙。且遂今日歡，歲月  
任更迭。

#### 苦熱

碧空高高火雲厚，溽暑著人如中酒。斗室渾同深甑蒸，當檐恨不栽榆柳。竹床莞簟  
卧不得，長簟何曾暫離手。況逢久旱禾苗乾，桔槔戽水鳴前灘。农家婦子汗流血，足茧皮焦

力已殫。我庐正与田畴接，默坐思之心惻惻。安居尚畏炎威逼，天生蒸民皆食力，勤者辛劳惰者逸。愿得飘风驱雨来，比屋俱变清凉域。

#### 楼中即目次大侄女韵

断虹收宿雨，野色卷帘浮。风起孤村暮，烟深远树秋。山光明日脚，帆影破潮头。想得凭阑处，吟情一倍幽。

#### 春雨

织烟凝雾一丝丝，洒遍东风绿野滋。弱柳萦愁低翠黛，落花无力湿燕支。凉生深院燕归早，润逼熏笼香散迟。苔色满阶帘不卷，午馀销倦独吟诗。

#### 纳凉

流憩竹林中，翠影浓於幃。幽禽不见人，飞过低枝上。

#### 雨后

飞雨飒然至，一峰天外青。荷花香不已，凉透水心亭。

#### 夜来香

一架延缘引蔓长，淡烟微霭弄新凉。夜深欲摘浑难辨，叶底风来忽有香。

#### 徐夫人以西湖图见赠走笔谢之

狂沙入户春风颠，他乡度日如度年。囊琴束书了不御，羁愁忽忽心茫然。谢君惠我图一帧，西湖万里来穷边。不知两眼困尘土，斗觉满座生云烟。前年我亦曾游此，正值柳嫩花初妍。舫舟处处寻古胜，孤山山下重流连。逋翁已没梅鹤老，野桃蹊杏空娟。夜登湖楼更幽绝，明月恰挂山之巅。枯桐一奏万籁息，平湖十顷波纹圆。临风举酒吸清影，乃知人世别有天。分无仙骨难久住，惟有清梦时相牵。謁来西游真谬算，痴蚕自缚亦可怜。春光九十过已尽，一花一草俱无缘。得归茅屋愿亦足，此身敢望栖林泉。羡君家居山水窟，百年相对真神仙。何时暂脱尘俗累，许我来赋重游篇。

#### 定边杂感

久知边地冷，仲夏似秋深。水绝平和味，天迟长养心。塞长疲骏马，云拥失归禽。唐汉先贤碣，茫茫何处寻。

#### 郭步韞

郭步韞，湘潭人。邵士怀母。有《独吟楼诗钞》。

冰

寒冰虽皎洁，那及人心血。春风有解时，寸心终不裂。

老松

得气孤生碧涧外，耸枝欲入层云端。贞心不识风霜厉，一任朝朝是岁寒。

梅花

藐姑仙人谪几时，垂垂白发两三枝。频邀静赏送新句，那许纤尘蒙素姿。霁雪长亭  
鸦去远，寒天小院鹤归迟。春风二月多桃李，冷蕊疏香知未知。

除夕

骨肉圜圆不可期，每逢佳节倍生悲。年华荏苒成今古，人事迁流多盛衰。尘甑常无  
馥宿粒，空囊惟有苦心诗。声声曙角催残腊，贺岁来朝强自支。

斗室

斗室宜安拙，幽怀颇自閒。溪肥前夜雨，帘卷夕阳山。吹角江城暮，巢梁乳燕还。  
无穷清意味，写入竹屏间。

病起

病起惊秋至，新凉转自嫌。西风吹短鬓，黄叶扑疏帘。久饫冰霜苦，何妨岁月淹。  
驱愁愁不去，依旧上眉尖。

萧萧

萧萧木叶下园林，摇落偏惊抱恨心。老去不嫌青鬓改，愁多翻爱素帏深。菊当九日  
凌霜健，虫避西风隐壁吟。正是夜来愁伏枕，谁家月下击清砧。

贫居

春风亭榭四徘徊，满目萧条院半颓。门掩苍松寒白日，雨馀幽径长青苔。岁华老我  
头将雪，时事消人心已灰。燕子不嫌今冷落，年年此日自飞来。

送莲儿往岳

老来倍觉别离难，瘦骨龙鍾血泪乾。今夜洞庭霜月下，扁舟回首白云寒。

疏林几点乳鸦还，帆影飞飞夕照间。湖上云峰一十二，不知何处是君山。

秋风

漫道秋风好，秋风易白头。空庭黄叶落，叶叶是离愁。

忆莲儿

思儿频倚小楼西，极目云山一望迷。记得去年离别处，满天风雨暮猿啼。

秋霁

秋霁黯将暝，萧条江上村。蝉声催落木，松色老蓬门。聚散复何定，荣枯安足论。年年离别泪，怕见旧衣痕。

元旦

钗荆裙布老深居，帘卷机窗试笔初。吟罢频斟新岁酒，日长细看古人书。年华有信春来去，时事无凭云卷舒。可笑龙鍾还不了，只缘诗债未全除。

鲍之兰

鲍之兰，字畹芳，丹徒人。皋长女，何澧室。

登木末楼有作

狼石千年指旧名，孙刘霸业若何成。平原牧马秋游猎，古木惊风夜整兵。天际帆樯沙屿迥，云中台殿暮烟轻。微生有幸恣游览，木末楼高坐晚晴。

久不得都中书

帘帷风暖暮春初，与古相亲与俗疏。几帙残篇尘短榻，半峰晴翠落衡庐。愁同溪水流难定，心似窗蕉卷未舒。沙鸟群飞空惹恨，何时钓得锦鳞鱼。

鲍之蕙

鲍之蕙，字仲姒，号菡香，丹徒人。皋次女，运判张翊室。有《清娱阁合稿》。

扬州湖上迟月

试镫风细夜潮平，曲岸维舟待月生。垂柳和烟欹水影，乱鸦如雨入林声。山桥客散车尘定，画舫镫红鼓吹清。却忆板舆花里过，湖光应识旧时情。

清娱阁晚眺怀佩芳妹

空阶微雨过，高阁销烦暑。虹影驾长桥，崩云乱烟屿。蛙蛙阁阁喧，归鸟啾啾语。



徘徊动远情，尺素经年阻。忆昔垂髫时，深闺日为侣。欣看案上书，倦织窗间杼。细字写红蕉，新词题白苧。星霜催鬓发，聚散消时序。怅望竟何如，落霞际沙渚。

#### 晚烟

夕阳才下远峰颠，漠漠平芜起暮烟。度水一痕疏复密，随风千缕断还连。花间杂雾迷归鸟，柳外和云锁客船。最是沧江收钓处，溟濛无际晚晴天。

#### 鲍之芬

鲍之芬，字佩芳，一字浣云，丹徒人。皋三女，知县徐彬室。

#### 秋夜闻笛

风薄湘帘露气侵，碧云满地散桐阴。高楼倚月谁家笛，客馆惊秋此夜心。塞雁清音应共听，江梅旧韵不堪寻。中宵引领浑无寐，况有萧萧万井砧。

#### 帘钩

眉痕掩映雾绡空，曳影抛烟近绮丛。一角斜牵犀划水，半规疑堕月留弓。莫惊鱼钥伤春后，镇锁蛾须病酒中。谁见杏花栏槛里，徘徊欲上怯东风。分明擘破玉连环，钗股还敲玳瑁弯。有意参差邀半面，无心舒卷任双鬟。空闺似掷流黄速，隔院频窥屈戌閒。不锁芳春偏锁恨，一声惊恐隔蓬山。

#### 雷氏

雷氏，邵阳人。诸生史继鲁室。有《弥清阁集》。

#### 雁字

薰风无奈祝融火，寒雁一声天地清。不羨上林传汉信，羡他笔笔写孤贞。

#### 元宵哭夫

去年灯火共元宵，为我窗前拂翠翘。佳节依然人不见，一轮明月冷迢迢。

#### 李学温

李学温，字兰贞，小名绀珠，任丘人。中简长女，同县拔贡香河教谕舒其绂继室。有《丽景楼诗》。

#### 济南学署秋日归宁夫子字问归期敬答十二韵

高城秋色深，瑟瑟寒飙至。侵晓倚南楼，青天来雁字。节序过授衣，黄菊惊离思。

展矣怀君子，卓荦才未易。昨日拆缄封，宛转深情致。上言秋雨多，窗兰向憔悴。下问归来期，循讽潜制泪。人事多乖舛，关山隔迢递。虽无帷车来，空愧宝钗寄。欲行还踟蹰，暮野忧魑魅。长吟感萧飒，浩叹悲阴曠。眺望连日夕，反侧不能寐。转蓬离本根，飞扬满天地。冈松与涧石，岁晚同心契。

### 春水

春光何处好，溪水绿烟生。蘸柳偏多态，浮花最有情。泥融知燕喜，风静觉鸥轻。为问桃源路，渔舟小渚横。

### 落叶

西风方劲叶黄时，寒影萧萧作意吹。晓月不遮碁响院，晚烟犹恋鹊巢枝。忽惊似雨敲窗急，惟爱如花扫径迟。剩有幽窗小横幅，春林无恙碧参差。

### 春景

竹亭春草绿，小雨引花香。燕子来何处，衔泥镇日忙。

### 秋蛩

晚风淅沥雁流初，促织微吟在壁隅。碎翦秋声无觅处，淡烟横草露如珠。

### 李学慎

李学慎，字以漪，任丘人。中简次女，沧州左善洵室。

### 题十美图

雕弓金羽学男儿，十载从戎百战归。错认昭阳陪幸者，辇前一笑堕双飞。

蕉簟清凉珊枕明，凉侵玉骨醉初醒。绿云一朵西风里，低衬仙裙上画屏。

绝世天姿出自然，碧苔阶畔晓风前。相看似欲盈盈下，石上三生证夙缘。

将飞未举态婵娟，谁识瑶台自在仙。见说汉皋虚解佩，流风回首怅长川。

金屋群推绝代名，淡妆临镜转亭亭。化身却入丹青里，莫讶蛾眉斗尹邢。

自从辞辇掩长门，旧事凄凉不可论。团扇曾牵怀袖影，几回相对忆君恩。

汉宫明月照边关，马上啼红去不还。非是琵琶解愁思，玉颜容易到天山。

东观书成帝用嘉，能将事业洗铅华。闺中韵事从头数，几个名姝号大家。

轻盈无迹踏青尘，十二金钗一可人。玉笛声中金谷晚，谁将小幅为传神。

霓裳妙舞对花丛，一曲山香扇底风。可是羊家张静婉，小垂手态似惊鸿。

刘氏

刘氏，鹿邑人。州同张坦室。有《拾烬集》。

西楼野望

一片清秋色，西村八九家。渔人归去晚，沽酒入芦花。

金顺

金顺，字德人，乌程人。汪曾裕室。有《传书楼稿》。

秋夜有怀姊氏

空闺闻落叶，天地入秋深。况乃中宵雨，因之远别心。漏长孤梦杳，江阔短书沈。忽听南征雁，离群感自今。

送南州姑氏回清溪

亦知非远别，转觉送君难。把盏心先醉，留题墨未乾。梦应劳寤寐，书望报平安。直为怜多病，临歧苦劝餐。

题管夫人画竹

墨妙由来数仲姬，闺房静对写风枝。王孙若解凌霜节，合署鸥波老画师。

杭温如

杭温如，字玉辉，长安人。典史崇德女，徐枚室。有《息存室吟稿》。

缴衮

纨绮营身物，簪珥饬容具。儿身无所託，纨绮安所附。儿容不复修，簪珥何所顾。空馀此妆衮，衣笥间藏注。饮泣奉高堂，留充嫁与娶。姑闻亦心伤，涕泣零如雨。含泪劝姑前，儿命安所遇。从今不出閤，钗荆与裙布。

自伤

木凋花易谢，凋谢各有时。胡为凋与谢，非时独当之。十三学刺纫，十五学吟诗。

十七长成身，深闺人未知。忽闻父母命，许字他家儿。十九出绣阁，掩泣父母辞。登堂拜姑舅，妇道始从兹。妾本无所能，妾又何所奇。姑舅同欢悦，明珠掌上持。殷情劝阿郎，读书勿自欺。怀安名实败，奋志凤凰池。那知天夺算，一蹶不可医。十九廿一二，劳燕各分离。舅亦寻年歿，赖姑岁月迟。妾无奉姑孝，姑常为妾慈。一朝姑不顾，乘此悍独姿。吁嗟乎，妾死姑可在，姑死妾何资。不然相继死，姑妇常相随。窃比木与花，凋谢此其期。一何留妾身，受此无穷悲。

陈结璘

陈结璘，字宝月，号修兰，常熟人。同县举人瞿元锡室。有《峻喜堂集》、《藕花庄集》。

田家秋兴

秋日郊墟喜渐凉，稻花阡陌散晴香。争梨鸟雀喧斜日，踏藕儿童闹晚塘。老树傍门常扫叶，好山当户故低墙。悠然独坐南窗下，早挂清芬白芷裳。

## 【卷一百八十五】

周映清

周映清，字皖湄，归安人。同县乾隆甲戌进士、湖南布政使叶佩荪室。有《梅笑集》。

梅花

古梅生疏香，幽致邈难写。临风濯寒秀，相对足閒雅。琼姿妙天然，未许粉黛假。譬如歌阳春，曲高和者寡。开轩涵明月，顾影自潇洒。惟应翠袖人，亭亭伴林下。

爱梅入骨随，思作梅花吟。横斜疏影句，谬许孤山林。拟议误唐突，粉蝶兼霜禽。竹外一枝好，坡老诚赏音。何如妙无言，淡然惬素心。不见江贯道，抚琴不弹琴。

谓梅如宰相，调羹待异日。谓梅如高人，迥与枯槁别。谓梅如美女，不炫倾城色。谓梅如神仙，空羡罗浮蝶。鉴怀天地初，相像太始雪。此意明月知，可悟不可说。

登岷山

湖光山翠绕城来，白塔红亭罨画开。松竹径深僧院敞，菰蒲水浅酒船回。残碑谁访题襟集，断石难呼乐圣杯。亦有登临无限意，何如太傅远兴哀。

王石谷山水

清泉百丈飞幽壑，茅屋人家隔丛薄。白云在水树在空，漠漠晴烟下寥廓。断鸿几点去无迹，黄叶一林寒欲落。斜阳何处认前村，隐见危桥傍山郭。先生画笔冠当代，八尺生绡气磅礴。不须平远袭倪黄，能以清空见镰削。秋窗对此足清胜，瑟瑟轻寒生绣箔。掩图不敢挂虚堂，恐有红尘一分著。

#### 琴诗

少小慕古韵，耽此丝桐清。经年事操捋，指涩不成声。一朝得微悟，触手清风生。泠泠判雅俗，一一为分明。贺若不可学，益我思古情。

审弦别其音，审调别其字。字清音益和，累累珠不坠。当其按节初，微芒辨同异。音字两不关，所贵得其意。贞静淡素心，心至声亦至。不然箏与琵琶，宫商岂殊器。

宫亦有时激，羽亦有时沈。苟能识其意，变化皆从心。不见思归乐，商调可犯角。不见如意娘，角调可犯商。

对月谱梅花，幽香发素腕。实声与散声，缓急可静按。缅思制谱初，猱绰不容乱。后人务新声，往往越其畔。新声日以靡，抚琴起三叹。古法多不传，何止《广陵散》。

#### 秋暮南楼偶赋

商飙吹入万人家，窗外轻寒透碧纱。极浦每惊归雁落，高楼况复夕阳斜。破蕉淅沥风如雨，瘦菊离披叶胜花。极目晴云何处望，马蹄荒草隔天涯。

#### 游望湖亭

危亭千尺俯溟濛，绝顶苍茫望不穷。山势远连林屋窠，湖声直撼洞庭风。香台草树依云外，笠泽烟波入镜中。七十二峰何处所，长天墨点落青空。

#### 过前尚书潘公季驯宅

桑椹春熟乳鸠鸣，无复尚书旧履声。蛟断河壖遗迹在，鹤归华表故基倾。每嗟兴废逾三癸，空忆声名说二丁。惟有石麟未辞去，溪边卧看月初生。

#### 古意

美玉产昆冈，千载埋幽壑。一朝出尘氛，光气耀重薄。剖璞得良匠，拂拭事砻错。晶莹无纤瑕，素质秉磅礴。急投非其意，韞椟甘淡泊。忽逢席上聘，观者尽错愕。璠琦遇有时，珍重葆坚确。

东山有佳木，上栖白项乌。晨昏恋旧巢，岁暮犹将雏。雏成刷毛羽，振翮游上都。朝饮蓬池水，夕宿琼苑株。亟归思反哺，岂谓身已孤。绕树三百匝，空使尾毕逋。哀鸣白云端，苍昊不可呼。

### 将入都门别南楼感赋

飞花下浅渚，岸柳催行舟。再拜别高堂，雪涕辞南楼。兹楼廿年住，纵目娱清幽。一旦舍之去，揽裾事远游。青天见黄鹄，振羽翔高秋。岂不恋旧巢，恋亦不能留。

高堂有阿母，日夕层楼间。抚我不离膝，慈训日以。齐肩得予弟，嬉戏承欢颜。生女亦如儿，同此顾复艰。儿生能反哺，尚有莱衣斑。女生终辞家，去去何时还。

辞家竟何之，驾言赴京国。道路阻且长，渺渺异南北。我家沿长溪，菰城近咫尺。朝往夕可还，尚虑烟水隔。何为远行迈，千里动尘迹。北斗挂层霄，望望不可即。

深闺有令范，皎皎扬贞仪。授我四德箴，教我五字诗。深宵侍篝火，譬若形影随。一朝遽言别，相视涕涟洏。楼阴下白日，戚戚晨风吹。既去复回顾，离愁无尽时。

### 渡扬子江望金山

江天淡荡朝霞红，澄波万顷流融融。舟人解缆渡江去，渐觉帆脚生微风。苍茫远树失京口，举头忽现青芙蓉。奔流直下走东海，金山突兀当其中。楼台明灭晃金碧，有如蜃海浮琳宫。晴烟缥缈飞鸟绝，但见古塔撑青空。我闻此水贯楚蜀，北江下注连南东。天留片石作屏障，直与底柱争穹窿。坐揽奇景豁胸臆，敢燃犀角窥蛟龙。收帆瓜步一回首，江南千里青濛濛。

### 扬州

日暮江流呜咽声，停桡怅望近芜城。三千殿脚如云散，廿四桥头自月明。萤苑夜游犹有恨，鸡台晓梦太无情。惟馀渡口垂杨树，愁损眉峰画不成。

### 得家书有感

昨夜银灯喜缀花，平安两字到天涯。细看墨渾痕皆淡，祇恐彤闱鬓有华。北墅旧游芜径暗，南楼归梦月光斜。愁来羡尔中庭树，日暮霜风集子鸦。

### 独坐书感

明镜双眉皱不收，天涯旅思尚悠悠。帘垂清昼阴疑暮，雨送残春冷似秋。一别骆驼桥下水，三年鸿雁影边愁。羡他短棹江南路，缓缓花开唱陌头。

### 秋夜读东坡集

笠屐风流迈永和，瓣香只合拜东坡。文章远过漆园吏，富贵徒嗟春梦婆。万古峨嵋名不没，一身江海命如何。谈空莫更夸仙佛，心迹曾传水调歌。

### 令阿緱入学

从来娇绕膝，今已略知闻。恩义难相掩，贤愚自此分。枣梨余自具，经传汝宜勤。未暮休归舍，童心惧放纷。

低鬟怜阿姊，与汝亦齐肩。且令抛金线，相随理旧编。双行知宛转，坐咏爱清圆。试看俱成诵，今朝若个先。

壬午七夕焚香静对心境清澈飘飘有凌云之想

云际神光果合离，仙家自古此佳期。试从跨鹤缙山日，历数骖鸾汉殿时。恍忆前身同缥缈，偶来下界暂栖迟。何时相逐三山去，重揽灵裙织藕丝。

娇女诗

我家娇女齐蕙芬，媚如春月回微光。终朝据案弄卷轴，清吟婉转调莺簧。今年十二解声韵，七字五字吟琅琅。亦知弱腕乏警策，颇有慧语馀清锵。闺门尚德不尚艺，四诫初不夸词章。岂知陶冶有妙用，能使冰炭消中肠。温柔敦厚本诗教，幽閒贞静传闺房。但令至性得潜发，勿务浮艳鸣荒唐。我昔南楼强解事，力穷汉魏兼齐梁。即今所得尚无几，颇觉辛苦难为偿。怜汝娇憨亦不恶，岂必刘鲍争低昂。作诗因汝感畴昔，祇恐明镜生秋霜。

李含章

李含章，字兰贞，晋宁人。侍郎因培女，叶佩荪继室。有《繁香诗草》。

秋夜露坐

火云秋未收，商气夕乃至。凉飙动木末，梧叶萧萧坠。广庭延伫久，月影半在地。银河淡无波，疏林皎初霁。轩南最幽旷，竹露洒寒翠。清阴下藤萝，馀香冷荷芰。披襟爱晚凉，枯坐竟忘睡。夜久钟漏沈，流萤在衣袂。

即景

斜月映疏帘，夜色起寒暝。行过曲廊西，衣上梨花影。

万固寺

山寺不知路，忽闻流水声。溪随岩石转，塔与白云平。古木上无际，幽禽时一鸣。松根堪小憩，试汲碧泉清。

读王孟诗偶赋

中允文章健笔扛，出关无计敢从降。新愁应继庾开府，老泪曾悲张曲江。阙下新词谁第一，河中名士古无双。平生别有伤心处，几按岐王乐府腔。彭泽高风许独攀，清姿落落绝人寰。月中杨柳词人去，雪后梅花野客閒。归梦应栖桐柏观，羁魂终绕鹿门山。若教明主非相弃，床下何因复放还。

### 秦始皇

金虎宫邻事可怜，漫疑鹑首赐钧天。终令六国还三户，空使诸生笑九泉。车载辘轳山有鬼，舟行缥缈海无仙。伤心万里长城在，依旧扶苏伏剑年。

### 望岱

岩峩岬崴峙神州，万壑风云在下头。海外天光明野马，寰中人影动蜉蝣。金银气涌楼台壮，琴筑声寒草木秋。欲拂穹碑问秦汉，苔封恐自有熊留。

### 拟古

崇桂茂山椒，幽兰媚涧阿。扬华吐芬馨，寂寞无人过。时至亦零落，荣悴皆天和。灼灼桃李花，当春扬婀娜。容华非不好，攀折常苦多。荣名以为宝，勿复辞轹轲。

炎洲多珍禽，自呼孔与鸾。朝栖珊瑚枝，夕宿芙蓉田。文采颇自矜，矫矫振华翰。汉使重珍奇，罗网来重峦。饮以琼池水，翼以白玉栏。禁林任止宿，所食皆琅玕。饮啄岂不时，引吭常悲酸。遗雏在故山，欲往道里艰。君莫笑鸛鷖，一枝乃自安。

芳葩熙春阳，零叶凛秋辰。商飊歛以来，绿叶成枯薪。芬华既云逝，淡泊全其真。直幹凌严霜，根菱肇先春。敷愉安足恃，葆璞完吾淳。孤生各有志，岂惟松柏贞。莫嗟风霜惨，中有大造仁。

我有照乘珠，生长薄海曲。孕月含清辉，光照蛟人屋。一朝逢越贾，采摘出幽壑。献入明光宫，藉以文梓栳。金缸同不夜，符采烂华幄。实至名必归，何必虑鱼目。

### 秋夜读韦诗

山城足秋阴，凉意入深屋。黄昏疏雨过，檐溜断复续。霁色开遥岑，帘际映寒绿。微云淡落月，馀光入修竹。深更人未寝，青镫照幽独。爱此五字诗，静对黄花读。

### 三女令昭于归都门

在家为客莫言勤，此去方知是主人。百岁毁誉关阿母，一时贤否定诸亲。金萱昼永储甘旨，玉笋官清课米薪。傥辍馀閒吟谢絮，锦囊应寄济川滨。

### 霍山道中

莽莽晴沙野草枯，朔风汾水记征途。山头麦垄千层出，溪畔松阴一径纡。高阁残阳飞鹑鸽，乱峰积雪走於菟。千秋唐魏遗风在，认取平阳古帝都。

### 平定州道中



高岭鸟飞绝，崎岖路一湾。悲风生远树，晓雾失前山。麦气荒原下，车声乱石间。千秋燕赵地，兀兀见重关。

### 论诗

好诗如佳人，嫣然媚幽独。铅华屏不御，葆此无瑕玉。巧笑流瑳那，蛾眉腾曼绿。一顾失倾城，何必炫奇服。又如闻好鸟，应节喧百族。引吭扬天和，喁于叶弦乐。春花仓庚歌，夜月杜鹃哭。微物讵有知，听者感衷曲。始知心之声，不在斗繁缛。笑啼根至性，风萧任枵触。勿使天籁乖，要令老姬觉。神充貌自腴，至味乃蕴蓄。自从齐梁来，藻缋眩凡目。土木饰金貂，珣玞荐文牖。旁观岂不好，所苦真意斫。兰苕集翡翠，无由起遐瞩。嗟余少耽吟，月露困雕琢。牢笼及光景，镂刻到草木。迺来喜平淡，绮语久阁束。悲欢不自禁，涉笔或累幅。色黜翦彩艳，声异叩缶俗。妇人职中馈，岂事勤著录。讵知风人志，性灵藉陶淑。发情止礼义，本自三百牍。至音谐宫商，六义有正鹄。吾言或非迂，试取反覆读。

### 武昌舟次

樊山秋月旧登楼，又泊兰桡访昔游。南去山趋平麓断，北来水入大江流。三更画角鱼龙夜，十里平沙雁鹭洲。却望衡湘劳远忆，使星明处是潭州。

### 湘江道中

打桨湘南路，疏帆挂雨轻。青山如旧识，华发是新生。苦竹深藏寺，春潮半入城。行人正愁绝，怕听鹧鸪声。

### 中秋见月感赋

北渚水初落，天涯秋已分。那知今夜月，各照一方云。关塞渺无极，商声不可闻。蓟门风雪早，况瘁剧思君。

### 黄陵庙怀古

君不见湘山高，湘水碧，泪痕染遍琅玕色。雪浪朝连青草浮，愁云暮向苍梧合。当年帝女下璇宫，沔汭曾闻礼秩隆。已傍松云开贰室，旋看日月丽重瞳。鼓琴衣袂天家乐，星轩双曜明珠幄。阿阁都絙素女弦，钧天尽按皇姱曲。一从刻玉下南天，翠辇金舆不复还。漫比胶舟沈汉水，还同遗剑恸桥山。桥山一去成千古，九疑天远留灵琐。玉软难乘悬圃风，明珰空望涔阳浦。涔阳江浦总魂销，更驾飞龙逐晚潮。帝子扬灵江上瑟，夫君愁思洞庭箫。瑟希箫歇人何在，里俗传芭犹不改。贝阙珠宫事渺茫，兰桡桂楫空烟霭。千秋哀怨起骚人，怀古同伤远别情。薜荔秋风山鬼泣，鹧鸪暮雨客船听。謁来倚棹寻遗躅，古木萧萧阶藓绿。庙火青荧鹿角矶，寒潮呜咽巴陵郭。屈赋成时书未焚，书生臆论总纷纭。愿将北渚江头水，一洒高唐峡里云。

### 重至都门

廿年旅梦系京华，此日重看北地花。每历旧游疑隔世，暂休征旆当还家。安心莫问

门如水，容膝何嫌室似蜗。剧喜青藜光彻夜，八驺人漫说官衙。

外以校书过勤肺疾盛作

无官赢得一身轻，转为编摩病骨撑。寡过年方逾大衍，讎经人欲老更生。报恩心重忘疲马，招隐身留未烬檠。珍重年年说长健，好期相伴鬪黄精。

七子山省先大人墓

空馀马鬣五湖隅，不见巫阳降紫都。万里云山栖大鸟，廿年风雨泣诸雏。及门尽望西州树，此地曾还合浦珠。回首音容竟何处，白杨萧瑟惨啼乌。

初归吴兴感赋

楚水燕山忆旧时，廿年踪迹总相随。今朝独返蘋洲棹，冷月寒镫照鬓丝。

每话归田倍怆神，转头谁认旧巢痕。可怜八里桥边水，难返三生石上魂。

乌上桥南卜一廛，辛勤留得大官钱。缘知清白能传后，负郭何须二顷田。

弁岭青连笠泽湄，登楼旷望不胜悲。报君一语君知否，绕郭湖山似昔时。

白雀寺

杏花风细春晴早，暂作春游趁春晓。晓寒尚觉薄侵人，宿露遥看浓湿草。垂杨夹岸拂黄帽，官菜千塍映红袄。长松瘦柏认齐梁，坏塔残碑失寅卯。入山但觉花更妍，到寺始惊春正好。幽寻宛转见飞叶，久坐更番换啼鸟。佛镫青冷照千古，阅历朝昏定多少。灵雀飞来竟何在，昙花现处空如扫。剩有珠幡拜儿女，祇听金铙鸣可岛。前生慧业不敢问，后事苍茫欲何祷。归来但诵佛名经，篆烟一缕心香袅。

岷山

更无百尺俯层巅，扶杖来寻曲曲泉。台榭大都唐以后，觞诗最盛宋中年。云昏乔木遮僧院，风约飞花堕钓船。日暮洼樽亭畔望，眼前谁是酒中仙。

示驺儿应省试

辛苦鸡窗问字年，此行好著祖生鞭。化鲲正厉培风翼，射隼看鸣破的弦。良玉试烧三日火，元珠怕落九层渊。传经家世扶阳重，厚望须教慰夜泉。

叶令仪

叶令仪，字淑君，归安人。佩荪长女，钱慎室。有《花南吟榭遗草》。

舟夜

小艇低昂睡不成，夜深犹自促归程。满窗凉月白於雪，船底忽闻鱼斲声。

硇石旅次

石屋依危峰，三更坐清绝。人语悄不闻，开门四山月。

送琴柯弟之河中官署

不敢留行楫，高堂望尔回。全家蒲坂隔，一棹秣陵开。归梦云千里，离愁酒一杯。昨宵风雨夕，楼外雁声哀。

杏花

鷓鴣声中春事疏，红芳一树映吾庐。卖花深巷莺啼后，赊酒孤村燕到初。寒雨思归虞学士，春风得句宋尚书。琼林别有蓬莱种，秣李夭桃定不如。

汴梁旅次

多谢征途半月晴，雪消东汴马蹄轻。戍楼落日陈桥驿，野草寒沙博浪城。寥落故宫荒蔓合，凄凉战垒暮云平。禹王台畔频回首，渺渺长河万古情。

梁宫词

夜深甘露下空庭，斋素长祈佛有灵。春罢不知宫漏尽，背人犹诵净名经。

叶令嘉

叶令嘉，字淡宜，归安人。佩荪次女，沈昌培室。

寄淑君姊

鸰原分手各天涯，风雨连床愿尚赊。两地空烦诗代简，三春祇有梦还家。病多渐识君臣药，别久愁看姊妹花。他日相思劳远望，五云深处是京华。

叶令昭

叶令昭，字蘋渚，归安人。佩荪三女，侍讲学士丘庭澹室。

寄淑君姊

绣阁当年共理妆，伤心此日各分行。寄书已过樱桃节，惜别休闻芍药香。晓月鸣鸡惊昔梦，夕阳归雁感殊方。平生舟楫偏无分，枉说江南是故乡。

### 陈长生

陈长生，字端笙，号秋穀，钱塘人。太仆寺卿兆仑女孙，巡抚叶绍棿室。有《绘声阁初稿》。

### 秋江晚行

落日下江浔，暝色在高树。渔镫生远岸，历乱不知处。微闻柔橹声，又绕芦洲去。

### 花朝曲

去岁花朝花已落，十丈残红飘绣幕。今岁花朝花未开，春风不到蛾眉来。蛾眉原已作经年住，欲觅春花无觅处。空馀芳草绿萋萋，愁说王孙从此去。王孙欲归归得无，孤镫深夜听啼鸟。此时却忆故园柳，绿到门前第几株。遥知柳绿无人折，都为年年不知别。今朝洒洒酬花神，定祝春花堆似雪。春花似雪不归家，却看他乡雪作花。莫怪花神无赖甚，不移春色到天涯。

### 初夏

虚堂瑟瑟度南薰，炷尽沈烟散午芬。沸鼎茶声疑作雨，隔帘花气欲生云。呕心句少吟逾苦，信手棋多败亦欣。小倦不须寻素簟，碧阑干外坐斜曛。

### 夹竹桃

秾华烂漫不胜描，却爱迎风翠影摇。地拟渭川生锦浪，人来湘浦泣红潮。尽教绰约贞常抱，为报平安恨始销。知有凌霄清节在，不须错认董妖娆。

### 观音门舟夜

落日金陵渡，轻帆此暂停。水流三楚碧，烟锁六朝青。渔火殊明灭，沧波入杳冥。夜长人未寐，篷底漏疏星。

### 春园偶赋

卖饧声里日初长，春满閒庭花事忙。楼外软风莺梦暖，篱边疏雨蝶衣凉。碧桃重似垂头睡，红药残如半面妆。看尽韶光应不倦，题诗长倚小回廊。

### 黄陵庙

苍凉古寺俯明湖，芷屋椒堂事有无。未辨芳魂来澧浦，空传清泪洒苍梧。花深绀殿飞蝴蝶，月冷青山叫鹧鸪。莫向汀洲寻翠珮，湘南到处长蘼芜。

### 长干曲

依住长千里，离愁动隔年。生憎门外柳，不系九江船。

周星薇

周星薇，乌程人。同知叶绍棠室。

悼鹦鹉

羽毛才就惨青霜，敲断银环恨渺茫。连日诵经知有意，昨宵说梦已非祥。绿衣原拟藏金屋，丹诏何年下玉皇。应伴飞琼充鸟使，彩云深处任回翔。

何若琼

何若琼，字闾霞，浙江山阴人。布政使叶绍本室。

题王澹音环青阁稿

东南佳胜数娄江，门第乌衣画戟双。一片横云山色好，眉痕淡写月当窗。

蔡桓

蔡桓，字宣卿，朱源女，钱塘乾隆己卯举人、遂昌训导吴颢室。

忆父

小楼雨过灿虹霓，晓镜慵收晏启闺。愁倚窗棂苦吟望，白云遥在陕城西。

插瓶花有感

折枝皆可添瓶供，贵贱看来有小差。一夜繁英都落尽，紫薇不及马蓝花。

病中咏秋荷

出尘花品爱池荷，零落秋风可奈何。共羨莲房多结子，子多赢得苦心多。

胡慎仪

胡慎仪，字采齐，号石兰，又号鉴湖散人，大兴人。骆烜室。有《石兰诗钞》。

客途新柳

金缕毵毵舞态新，额黄初试正宜人。参差灞岸含朝露，掩映章台报早春。青眼慵舒还是梦，修眉未展画难真。风流绰约谁能似，张绪当年最得神。

### 侍蒋太夫人滕王阁小宴

章城何幸遇仙俦，会向江楼纪胜游。一片夕阳红蓼岸，数声渔笛白蘋秋。西山雨过烟光碧，南浦风翻雪浪浮。自愧暂依乔荫下，敢同兰桂占先筹。

### 自端溪入羚羊峡

西行过端溪，放棹入谷口。千峰叠回环，一水何深浏。沿津三五家，寥落依山阜。岩石凌空虚，相对如配偶。老坑生奇质，鬼神日夕守。鸬鹚眼难逢，蕉叶贵清厚。造琢付词人，文光直射斗。龙蛇惊毫端，烟云泼墨后。举目眺两崖，苔铺虎豹走。俯耳聆渚宫，风激冯夷吼。山川爽襟怀，笔砚吾良友。对此融心神，萧然出尘垢。孤鸿一声来，魑地乡心陡。

### 舟行遇暴风雨

逆水行舟嫌道远，旅人闷对难消遣。倏忽之间风暴来，遥望高山黑云卷。一霎船颠如簸扬，舟子篙乱如飞蝗。随流未辨泊河处，岚光云气芬茫茫。东西南北都不辨，空中但听走雷电。聒耳波涛夹雨声，杳冥变幻如流霰。此时客怀心胆寒，新愁往事集眉端。少年不解离乡苦，老大方知行路难。追思昔日深闺内，玉肌绰约飘香佩。小鬟扶我傍花阴，弓鞋怕溜苔痕翠。宁知中岁苦奔波，烈日狂飙任折磨。自怜憔悴风尘里，谁唱红颜无渡河。坐久云收风雨了，馀霞远带尖峰小。低徊鸥鹭泛清流，忘机只有无情鸟。

### 岭南道中

五椽十三人，艰危仗此身。经年泪洗面，百感痛伤神。塞北无茅屋，燕南有老亲。如何千树云，不是昔时春。

### 岁暮

岁暮崔寒景，凄然自掩扉。眼花看字小，身瘦觉衣肥。异地人情薄，家乡鱼雁稀。一心无著处，空复忆庭闱。

### 胡慎容

胡慎容，字玉亭，号卧云，大兴人。慎仪妹，诸生冯烜室。有《红鹤山庄诗钞》。

### 望庐山

奇势环吴楚，崔嵬迥不群。峰从天上现，泉借日边曛。翠色浓堪摘，岚光秀可分。紫烟缥缈处，只许卧层云。

### 秋雨忆别

云暗重门掩，烟深锁画楼。故人千里梦，凉雨一天秋。别泪滩头水，离魂江渚流。

闷来谁共语，独自下帘钩。

### 春残

堂前春已背人归，检点馀光付品题。曲径愁铺芳草路，小桥横断落花溪。无情夜月能相照，有恨流莺莫乱啼。赢得诗人多少意，碧桃空老雨凄凄。

### 秋夜

白露澄清夜，遥空月似盘。庭阶流素影，玉户不知寒。

### 芦雁

横江片影一声秋，楚岸湘波事事愁。同是水云乡里客，归心空怅荻花洲。

### 别景素四姊

姊妹相依久，情亲胜弟兄。忽惊南北别，不啻死生盟。春梦人千里，秋风雁一声。来宵楼上月，空似镜华明。

### 病中

惚惚魂无定，飘飘若梦中。扶行惊地软，倚卧觉头空。放眼皆疑雾，闻声似起风。那堪窗下雨，寂寞一镫红。

### 戴韞玉

戴韞玉，字西斋，归安人。思恩知府永椿女，仁和同知陈淞室。有《西斋遗稿》。

### 送外君赴江西金学使幕

目送洪都去，临分最怆神。夷犹江上棹，珍重客中身。汲古绠非短，量才尺自均。芙蓉虽入幕，只恐旅愁新。

### 旅魂入梦忽得雁翦分波月鱼惊晒网船二句为足成之

野花横略约，片影自娟娟。雁翦分波月，鱼惊晒网船。好山当野岸，怪石遏流泉。眺望空濛里，时生薜荔烟。

### 送张氏表妹之京师

城南相送暮寒凝，苦爱风流咏絮能。璃匣关情随画舫，珠帘飞梦绕红镫。裁书不惜鱼频寄，拔宅谁将鼠共昇。此别京华多韵事，蓝田日暖泮春冰。

桃花残后慨然有作

转眼残红覆水洿，可怜结子未成阴。沿流不是轻阴薄，春雨春风力不禁。

家大人改官浔州恭赋送别

忽传恩诏出丹墀，出守浔江路险巇。十载劳民心似水，一身去国鬓如丝。浪花荡漾朱旗卷，帆影翩跹碧櫓移。谪宦情深湓浦月，登楼梦逐岭头枝。俸钱散去谋生拙，乡井勾留饮钱迟。达命不须嗟李广，望尘无复避元规。影形固是周旋久，寒燠难期童仆知。红泪纵横愁远道，白云缱绻忆当时。自怜识字原非福，为说投荒更足悲。翘首天涯转征旆，行厨洗手进琼枝。

陈琼菑

陈琼菑，字芬余，仁和人。同知淞女，周襄室。

萤

幽丛月不到，萤火逗新凉。著露沈芳草，因风度短墙。数来光不定，扑处焰难藏。小立香阶畔，时时点芰裳。

陈琼圃

陈琼圃，字闾真，号鉏月。琼菑妹，归安诸生费锡田室。有《红馀草》。

自题山水画册

路转千峰一径斜，烟霞深锁野人家。春来更有幽栖处，开遍东风枳壳花。

家住江南杨柳湾，一蓑烟雨打鱼还。数声芦笛秋风暮，饱看青溪两岸山。

蒹葭深护水云乡，门掩青山对夕阳。吟罢小楼閒眺望，晚风吹起白蘋香。

峰含晓日树含烟，野水微茫接远天。如此溪山谁领取，风光输与钓鱼船。

沈芬

沈芬，字左娇，归安人。知县作霖女，太仆卿戴璐室。

暮春

数声鶗鴂过，门巷罢秋千。怕看荼蘼架，春光又一年。

戴佩衡



戴佩衡，字蕴芳，归安人。璐从女，编修闵惇大室。

#### 送菡塘叔父赴补

晏岁冲寒指帝京，菰芦思慰倚闾情。编排梨枣谋遗集，孝养陔华急远征。台阁大仪绵世德，风流水部继诗名。鞭丝帽影冲寒去，到及春明听早莺。

#### 戴佩荃

戴佩荃，字蘋南，一字春淳，归安人。璐女，仁和赵日照室。有《蘋南遗草》。

#### 读厉樊榭集有和闰秀陈坤维丁巳闰九手检顾秀野元诗选卖供饘粥诗有感次韵

中馈萧凉贫可知，只馀秀野百家诗。节逢闰九情多感，念到先人句更悲。乞米固应烦巧妇，封侯何日慰书痴。里居无复徵鍾范，空叹秋宵握管时。

#### 新燕

羽毛鲜润望依稀，睡足晴窗展翅微。唤母但能啾唧语，恋巢犹怯往来飞。楝花庭院春如许，梅雨池塘客未归。睇向画梁容卜宅，争如随分著乌衣。

#### 戴咏繁

戴咏繁，字沚香，归安人。璐女，韩汝翼室。

#### 永年官署思亲

千里思亲魂梦牵，长宵辗转未成眠。相怜惟有天边月，半照京华半永年。

#### 方芳佩

方芳佩，字芷斋，号怀蓼，钱塘人。仁和湖北巡抚、谥勤僖汪新室。有《在璞堂稿》。

#### 雨中看山

连朝掩扉卧，襟怀殊怏怏。重阴昼亦昏，远色润书幌。忽闻山雨飞，檐溜送清响。开帘得奇观，林木何苍莽。岂徒眼界新，足使神情爽。拥鼻一微吟，挥毫技复痒。横斜字半欹，聊以志幽赏。绝爱群鸦雏，冲烟自来往。

#### 西湖打鱼歌

明湖浩渺万顷秋，荻花红蓼紫汀洲。朝霞散彩旭日上，鸣榔棹出千渔舟。招呼齐起布巨网，回旋水面风飕飕。锦鳞泼刺骇欲道，乱抛玉尺惊眠鸥。渔人生小江湖惯，拍天翠浪

相沈浮。长笛一声烟际起，笑歌归去零管收。云峰不动卧寒碧，浴凫飞鹭还悠悠。

### 初夏书事

日永无尘事，山居境转幽。雨归云外树，人语竹间楼。春去寒仍浅，花残蝶解愁。晚窗茶未熟，一缕翠烟浮。

### 立秋前一日

转瞬流光速，临风易作愁。芙蓉还映水，蟋蟀已鸣秋。爱静居山境，迎凉上小楼。井梧如解事，为我少迟留。

### 春兴

幽居恰喜近山城，乐意相关境转清。双蝶踟蹰林外去，一莺睨睨树间鸣。卢医不疗烟霞疾，高士还深丘壑情。精舍日长閒不得，苔钱数遍绕阶行。

僻处城南一草堂，高情自爱水云乡。临池每困生花笔，得句旋投古锦囊。山送晴晖来画阁，树分浓翠覆吟房。凭阑莫讶韶光浅，春事迟回到海棠。

### 阅书有作

一年弹指又经秋，云物凄凉岁月遒。自昔佳人皆有恨，由来名士尽工愁。班姬失宠难成赋，赵嘏无聊但倚楼。莫向残编动惆怅，可知容易白人头。

山居 了市远山深兴自馀，数椽聊得避尘嚣。閒分鸟迹寻花径，曲引泉流灌药苗。户外何知有鸡犬，闺中亦复乐簞瓢。幽窗喜与秋江近，欹枕长听上下潮。

### ○西湖雪

湖水莽无痕，云峰失故态。猗与芡萝女，遽尔施粉黛。

### 秋夜

绣枕垂云梦乍醒，侍儿憨睡触银屏。褰裳欲问更深浅，露湿红衫月半庭。

### 早春湖上遇雨

山色空濛雨更幽，落镫风里作春游。剧谈往事浑忘倦，每恋清吟为少留。云起忽遮岩畔寺，烟迷时下水边鸥。徘徊未识梅花面，可是归舟载得愁。

### 怀藻姊书来询近况赋此代柬

河桥分手惜匆匆，数载悲欢事不同。至戚已从生死隔，故交惟有梦魂通。噉名漫学

屠龙技，处世今如失马翁。问讯兰闺无恙否，莫教惆怅对飞鸿。

含毫每欲写相思，一纸离愁不自持。连月江山频入梦，经旬镫火罢谈诗。浮云世态无今古，流水韶光感岁时。一语寄君应绝倒，此生竟为读书痴。

哭翁霁堂先生

少微星忽陨寒芒，天丧斯文巨壑藏。四海长留知己感，一生祇有爱才忙。楷模自足垂当代，猿鹤空惊去草堂。闻说故交铭有道，定看金石耀琳琅。

咏纸鸢

剪纸为形骨相寒，常依稚子博悲欢。偶然得藉微风力，却要旁人仰面看。

张藻

张藻，字于湘。镇洋毕辅室，湖广总督沅母。有《培远堂集》。

近得沅儿出抚秦中之信因作诗以箴之

读书裕经纶，学古法政治。功业与文章，斯道非有二。汝宦久秦中，洊膺封圻寄。仰沐圣主慈，宠命九重贲。日夕为汝祈，冰渊慎惕励。譬诸樛栌材，斫小则恐敝。又如任载车，失诚则惧蹶。扃门五夜惭，报答奚所自。我闻经纬才，持重戒轻易。勿以求烦苛，勿以察猥细，勿胶柱纠缠，勿模棱附丽。端已励清操，俭德风下位。大法而小廉，积诚以去伪。西土民气醇，质朴鲜糜费。丰镐有遗音，人文郁炳蔚。况逢郅治隆，钧陶综万类。闾阎守耕凿，饷亩士依媚。大田岁屡丰，多遗秉滞穗。鼓腹遍康衢，击缶乐酒饔。民力久普存，爱养在大吏。润泽因时宜，撙节善调剂。古人树声名，根柢性情地。一一践履真，实心贯实事。曩迹永不磨，昔贤庶可跂。千秋照汗青，今古合符契。不负生平学，不存温饱志。卓哉韩范贤，治绩前史备。事事规模之，其乃克有济。上酬高厚恩，下为家门庇，我家祖德诒，箕裘罔攸坠。痛汝早失怙，遗教幸勿弃。衰年逼桑榆，垂老筋力瘁。曳杖看飞云，目断秦山翠。睡起日高春，乾鹊噪新霁。披衣览镜奁，霜雪满鬓髻。惟馀望汝心，任大勤自毖。书此远寄汝，汝宜日诵记。勉旃矢弗渝，用作官箴肆。

就养秦中一路察访政声闻父老俱称中丞之贤抵署喜赋三章

骖驔乍解路三千，风物秦川慰眼前。到处听来人语好，频年丰乐使君贤。连朝话旧到更深，不尽娄江望远心。莫怪老人添白发，儿童几辈换乡音。周遭竹屿与花潭，槛外云光映翠岚。尽有琐窗诗料在，不须回首忆江南。

灵岩山馆夜坐

圆景下绝壁，山馆忽已暝。石磴静张琴，雪泉清淪茗。不知夜已深，月上青松顶。

正月十二夜偶作

银缸暗画堂，坐数漏偏长。雁影半墙月，鸡声万瓦霜。夜吟多遣兴，春梦不离乡。庭下微风起，梅花入暮香。

#### 小园即事

小园半亩寄西城，每到春深信有情。花里帘栊晴放燕，柳边楼阁晓闻莺。汉书旧读文犹熟，晋帖初临手尚生。自笑争心忘未尽，閒招邻女对棋枰。

#### 邓尉探海

光福寺前日欲曛，上阳村外望絪縕。千林万壑浩无际，不辨湖光与白云。

#### 春残

斐几熏炉百衲琴，绿阴门巷昼沈沈。春来小苑无人扫，花落窗前一寸深。

#### 雨夜

向晚花冥冥，独坐理琴谱。一缕茶烟生，疏帘散春雨。

#### 夏日戏作六言截句

拨火炉香飏来，卷帘梁燕飞去。吴门六月犹寒，雨在江南何处？

#### 静逸园秋日閒居

胜迹招城市，幽居得小园。吾生澹相寄，往事漫追论。人忆乌衣旧，名怜香草存。祇今耽静逸，秋景满丘樊。

字摹王内史，诗爱郑都官。石色青书幌，花阴冷画阑。池鱼一二寸，庭竹两三竿。於此端居好，身閒梦亦安。

地迴人稀到，风清暑不侵。竹帘香细细，桐阁绿悁悁。隐几时看画，安弦静谱琴。夜凉明月上，扫石坐深林。

磴小花枝密，廊深书舍藏。有时翻秘帙，随意坐匡床。诗校前春稿，炉凝隔夜香。庭前蹲石丈，亲见历沧桑。

#### 张绚霄

张绚霄，字霞城。毕沅侧室。有《四福堂稿》。

#### 敬和灵岩山人惜春词

连日几无痛定时，撩人事事总堪思。胆瓶石竹花才放，犹忆生前手插枝。

画廊小步又逡巡，蓦地伤心忆昨辰。鹦鹉不知人已逝，隔帘犹是唤迎春。

朝开妆镜夜熏衣，除尔安排事总非。正是踌躇难料理，新词怕听惜分飞。

周月尊

周月尊，字漪香，长洲人。毕沅侧室。

忆梅和韵

迢递南枝怅水阴，每逢春到寄情深。月牵春晚三更梦，玉斫玲珑一串心。雪海香留应作国，云街手植定成林。他年绣佛皈清梵，藉尔孤芳伴净音。

青门柳枝词

春来折尽更逢春，几见长条拂地新。灞岸年年绾离别，今年不见去年人。

远峰涵碧水拖蓝，才放新青春已三。无那萦愁复萦恨，晓风残月忆江南。

予于谁嗟行路难，红尘扫尽绿枝残。天涯半是伤春客，飘泊烦他青眼看。

毕慧

毕慧，字智珠，号莲汀，镇洋人。沅女，陈覲光室。有《远香阁诗草》。

忆梅和韵

记得孤山竹外阴，横斜水畔径深深。南枝梦断空明月，东阁诗成见素心。腊雪乍添新艳采，春风仍到故园林。冷香得句愁难和，合付金徽託远音。

青门柳枝词

风际游丝澹荡春，画桥低亚柳条新。流莺百啭清阴里，唤起芳郊拾翠人。

晴波倒映漾柔蓝，最好风光三月三。羌管一声萦别恨，漫教吹彻望江南。

不同桃李驻颜难，一色长条春未残。帘外子规啼不住，纷纷红雨倚栏看。

榆荚争春春暗归，绿阴满径染苔衣。嫩烟酥雨年年事，莫趁东风作雪飞。

李筠仙

李筠仙，崇善人。诸生刘可则室。

### 咏竹

亭外猗猗碧几竿，清姿劲节耐霜寒。舞风影作飞莺势，啸月音疑老凤翰。自是主人甘澹泊，不劳童子报平安。阶前那有孙枝秀，写出淇园独坐看。

### 钱孟钿

钱孟钿，字冠之，号浣青，武进人。尚书、谥文敏维城女，巡道崔龙见室。有《浣青诗草》、《鸣秋合籁集》。

### 始皇冢

骊山高复高，落日霾荒台。西风吹白道，下见幽宫开。秦政昔乱纪，刑杀如霆雷。鲸吞六国尽，声色非仙才。童女不复还，龙战飘轮摧。寄言镐池君，英武安在哉？千人竞讴唱，运石清渭隈。筑之崇三坟，下锢泉水来。黄金作天地，日月为樽罍。银海停不流，人膏灿无灰。飞蚕三十箔，一一红玫瑰。知埋几皓齿，何论万匠哀。可怜闭衰草，虎视敛寸坏。虽令地成市，难买青阳回。足使天下倾，何待长城摧。楚炬与牧火，雨赭无遗煨。宝玉不在土，死增骸骨灾。徒闻古丈夫，霞举登蓬莱。

### 古别离

呜咽清渭滨，纷披灞桥柳，今古伤别离，扬鞭各挥手。

### 汉通天台铜人歌

武皇岁起云阳宫，高台屹与云汉通。欲求真诀炼颜色，紫琼之露飞濛濛。青霄不下两皇子，十二仙人一夜死。文成五利不及一少翁，能使香魂望如水。凄凄茂陵月，玉碗埋苔碧。难闻舍人壶，空羡方朔戟。当涂代汉逾百年，铜人之泪流作铅。移经灞水亦伤别，回头立尽东关烟。君不见古今兴废皆陈迹，金石有情悲过客，化为铜驼卧荆棘。

### 中秋待月以平分秋色一轮满分韵得色字

重帘烛暗露华白，桂树凝寒掩瑶魄。为恐人间感别离，飘轮不转纤云织。几家弦管盼清辉，何来匹练澄空碧。影娥池冷镜奁尘，天外徒横秋一色。银汉无声不记年，琼楼有梦空成夕。回头容易参商隔，今日当筵须共惜。越鸟南飞未有期，秦山西去犹为客。愿留光景十分满，莫使深杯等閒掷。

### 蠹简

欲悟神仙理，何辞笔舌残。消磨因久度，辛苦在忘餐。三绝编犹在，千回诵未完。便教成缺略，依旧误儒冠。

### 断碑

野火焚犹在，装池见宛然。数行铭瘞鹤，几叶拓轻蝉。完损神难合，摩挲癖可传。较他嗤没字，片纸亦前贤。

### 忆梅和韵

淡烟漠漠护重阴，思入罗浮梦已深。对月应怜清夜影，怀人空寄岁寒心。云横渭北家千里，春到江南雪一林。谁向天涯问消息，好从孤管写馀音。寒山无恙隔层阴，一缕相思为尔深。梦后何人同载酒，花时有客独关心。飞来晴雪春留影，相送前溪月在林。官阁吟成应寄兴，不教空谷误登音。

### 残荷

一片秋心近水殊，空庭为惜雨声枯。曾含夕露衣同冷，及听清歌梦已孤。几幹纷披随败箨，半塘摇落并残蒲。薰风不与留颜色，翠佩江皋再见无。

### 青门柳枝词

渭城风物又经春，嫩绿初齐客思新。记向大隄和雨折，泥他青眼盼行人。花未飞绵叶翦蓝，风吹无力起眠三。旧游最有难忘处，一路依依近汉南。折赠谁家怅别难，藏鸦时节絮初残。何当系艇扬州郭，一种青青雨后看。花落江潭客未归，轻阴漠漠拂帘衣。那堪烟雨催春去，深巷人家燕子飞。

### 读史偶成

读史弗穷理，泥古辞易谬。炎汉四百年，尺土皆封堠。胡云当涂高，正统反相授。堂堂司马公，乃书亮入寇。朱三亦继唐，此弊孰为救。青史不足凭，挂一乃万漏。悲风噪矶岸，空江泻寒溜。望帝魂不归，啼痕寄猿狖。嗟无两舟米，不得纪蜀后。

### 燕燕吟

燕燕复燕燕，将雏画梁畔。玉楼朱户灿如银，翩翩弄影梨花院。春去烟雨中，花落云巢空。螭蛸悬绣闼，蟋蟀悲秋风。暄凉一转烛，沧海森丛木。他时舞馆金缸凝，今日颓垣蔓草绿。谢公墩上牧儿畊，华表柱头野鸢啄。逝水不可回，春晖去难续。莫奏雍门琴，剩有唐衢哭。白杨风起乌夜啼，燕子还来问华屋。

### 感秋

日月不我待，秋风吹素颜。江云长带雨，海月自衔山。静夜千砧急，高空一雁还。独馀摇落意，终日倚柴关。

### 华清宫怀古

霓裳歌吹动华清，小辇曾催花底行。池上鸳鸯怜并宿，天边牛女笑长生。空悲此日金钗擘，何事当时白练轻。一曲淋铃传夜雨，寿王宫内月同明。

### 潼关

潼关天险郁嵯峨，天外三峰俯大河。六国笙歌明月在，五陵冠剑夕阳多。时来杰士能扞圉，事去将军竟倒戈。终古丸泥凭善守，英雄成败感如何。

### 张子房祠

狙击早销秦帝胆，借筹竟创汉家基。空疑状貌同雌伏，始信功名见猎迟。帷幄总分黄石略，云山不负赤松期。高踪迥出韩彭外，紫柏千秋护旧祠。

### 代书三十韵寄弟妇循之

燕台风日好，少小共婵娟。綦组初争侍，帘帟每互眠。安花矜学步，约翠喜齐肩。柳爱依人弹，桃看隔院妍。不知春事去，惟觉鬓华鲜。乍返长河棹，同歌入越篇。湖山欣把袂，月露各传笺。酒为藏钩覆，茶因赌钏煎。临风调玉琯，倚竹整湘弦。坐羡连枝树，行侔并蒂莲。学诗尊李杜，点笔动云烟。秋水芙蓉港，春风玳瑁筵。玫瑰团作饼，梔子刻为钿。窄袖鹦偕玩，低鬟蕙并拏。清宵无尔我，密意总缠绵。岁月不相待，分飞各一天。明珠徒有赠，宝镜惜空圆。已判差池影，真成断续缘。馀欢留客袂，新恨入征鞚。汝复为春草，吾几作夜鹃。随夫行蜀栈，携子渡秦川。宦思凉如水，归心静似禅。柳花空作絮，榆荚不成钱。松竹留荒径，莼鲈忆旧船。漫言童仆饱，还望故人怜。刀尺霜前女，笙歌海上仙。暂时容梦见，异地各情牵。枫助思亲泪，蝉催去国年。天涯千嶂在，陇上一枝传。何日随归雁，南云滞影旋。

### 庄素磐

庄素磐，字少青，武进人。知府钧女，永济崔景俨室。有《蒙楚阁遗草》。

### 新月

帘卷西风小院门，玉阶凉动近黄昏。蛾眉一曲横天平，疑是嫦娥指爪痕。

### 王采薇

王采薇，初名薇玉，字玉珍，武进人。知县光燮四女，阳湖孙星衍室。有《长离阁集》。

### 晓起效徐陵体

春镜动春烟，春林绿半天。帘低压枝卷，窗迥对禽眠。书帙蝇弹纸，琴床风触弦。辞衾惜香在，扫径待花荐。研墨污罗袖，看鱼落翠钿。谁云厌长日，终是惜驰年。



### 望夫石

妾颜初如花，妾心已如石。定情双妍姿，不忍君归见衰色。妾颜将彫心不移，妾身亦化君始知。冰为肌，草为鬓，山头无人寄君信。妾意浅，君心深，恐君复化填海禽。海禽来衔石方动，不作巫云入君梦。

### 春眠曲

篁梢压户帘纹细，空色湖光著山腻。莺眠树杪弄垂丝，蝶上花须醉芳气。琉璃隔香暗流，薇帐梦醒闻轻钩。空阑尽昼无人影，日炙落红荐不收。

### 梦起

梦醒空阶望翠微，幽苔染影上罗衣。寒天细竹人孤倚，斜日空檐燕对飞。碧岭叠来乡路断，玉梅枯尽旧颜非。夜堂疏磬疑禅寂，冷水閒云照合扉。

### 有感

名香一缕当帘出，故札千函向日开。入梦已迷前度草，返魂惟有去年梅。

### 梦天

碧阑十二花无数，桂叶低笼若青雾。蕊宫谁遣别魂游，只有青禽送来去。波离扉薄不上关，对话月姊琼楼间。银河珊珊泻声小，手弄白云天下晓。

### 舟过丹徒夜半与夫子登岸行三里许

幽行已三里，村落半摘扉。只鸟时依树，孤萤不上衣。月高人影小，潮定橹声稀。沿水星星火，归惊宿鹭飞。

### 寄季述时客和州

空院题诗对碧莎，华年作别叹蹉跎。梦馀卷帐人疑在，书去寻愁语转多。晓岫入云飞断雁，夜镫照雨落残蛾。空江无复怜才客，此夕租船忆啸歌。

### 蒋墅舟次和季述下第有作

一夕霜花湿鬓青，湍声出渚棹初停。病中龙具和衣泣，愁里鱼箫带梦听。隔浦叶多飞似鸟，入林镫小远於星。从君湖海幽寻志，何日浮家去杳冥。

### 春夕

已罢雠书怨夕遥，更闻疏竹度邻箫。灵珑鸟语惊帘押，寂寞香丝绕画绡。一院露光

团作雨，四山花影下如潮。伤离不为何郎句，病久东阳自损腰。

何玉瑛

何玉瑛，字梅邻，侯官人。袁州知府郑鹏程母。有《疏影轩遗草》。

咏史

覆巢无完卵，肉味安赖知。此语达而痛，乃出七龄儿。闻变弈不动，临刑甘如饴。具此浩然气，巾幗胜须眉。假令得永年，岂数女中师。痛哉孔文举，身后无孑遗。裂眦数阿瞞，惨戮一何悲。此女甘荼毒，空赎蔡文姬。王霸厉清操，胡惭令狐友。儿女俗情牵，嗟喟愧其妇。当其偃卧时，理欲交战久。室谪饶有词，北门恐失守。虽贵岂如高，一语醜灌首。古来孟光贤，梁鸿甘杵臼。似此灌园终，毋乃闺中诱。惜哉逸姓名，高风真不朽。

口占勸儿

殖学精於勤，取法贵乎上。功无一息宽，志欲千古抗。临渴而掘井，及泉乌可望。置身贤豪间，男儿何多让。

即景

树杪点霏霏，踰跼燕子飞。数声啼鸟寂，一缕篆烟微。竹筍掀泥出，梨花带雨肥。眼前饶好景，得句愧珠玑。

盼竹友舅氏滇中信

一诺重千金，招魂瘴岭阴。老人虽健饭，闺梦总关心。义胆神灵护，征途雨雪侵。此时回棹未，旦晚盼鸿音。

松涛

轮囷老榦郁千寻，万籁销沈听远音。风雨五更惊鹤梦，波涛一院起龙吟。檐前水泻倾银汉，空外声还答暮砧。雨滴芭蕉风戛竹，一般幽韵谱瑶琴。

截竹为小洞箫吹之合律喜而赋此

琴书馀暇学吹箫，拣得良材制造工。羨汝瘦生偏直节，可人爽籁本虚中。松间滴沥萧疏雨，空外悠扬婀娜风。清响原来需小凤，镜台长伴当梧桐。

寄远

暂同蠅屈亦何悲，风雨终看破壁时。儒者治生原急务，古人随地有师资。关心眠食期加饭，得意溪山乞好诗。来往鲤鱼烦尺素，流光弹指数归期。

游小蓬莱山

满径白云冷，数株风树斜。此中有仙女，愿与乞胡麻。

扫梅

梅花片片白无瑕，吹落阶前雪点斜。未忍和苔黏履迹，月明携帚扫瑶华。

闺中读书

文采翩翩亦未宜，大家遗训恰须知。古来列女非无传，不在多闻在取资。

刘希班

刘希班，长治人。诸生希颜、希曾妹，李续庚聘室。

慰母

大义千年重，浮生一粒轻。留儿贞节在，儿死胜儿生。

方芬

方芬，字采芝，大兴人。维翰女。有《绮云阁诗草》。

晚行过昭山

长沙西去水驿长，季冬不觉江风凉。昭山对面挹秀色，龙口飞渡波茫茫。斜阳缥缈入林去，岸风吹送梅花香。山头古寺鸣钟起，噌吰铿锵和鸣榔。松声撼撼复入耳，须臾明月浮清光。眼前景物动吟兴，千态万变非寻常。

阻风散步伯父原韵

大风彻夜舞狂漪，正是扁舟系缆时。两岸霜枫萦远梦，一帆寒雨乱乡思。江间白浪青山动，天外黄云画角吹。寄语石尤须早息，扬舲稳渡莫教迟。

南行见竹

山前忽见千竿竹，高影猗猗最可人。自别此君双眼俗，相逢为我涤征尘。

思柏

思柏，满洲旗人。侍郎永寿室。有《合存诗钞》。

新秋

气爽凉初至，更阑暑渐清。秋窗闻雁早，梧叶随风轻。野静蛩相语，天高月自明。  
烦蒸从此涤，披卷惬幽情。

### 七夕

渺渺天河风浪多，一年一会尚蹉跎。人间更有黄泉别，鹊去桥空可奈何。

### 廖云锦

廖云锦，字织云，青浦人。知县景文女。有《仙霞阁诗草》。

### 画双松歌

画鳞难画龙，画树难画松。龙乃神物善变化，几人曾见破壁来虚空？松之视龙势不异，离奇蟠曲难形容。谁摹此图真妙手，双松矫矫如双龙。爪破白日擎云雨，咫尺庭阴青万重。祖枝孙榦相追逐，生怕茅屋摇秋风。渴来移挂傍几榻，猛然惊醒午梦浓。绕阶而走心胆落，满庭云气生窗棂。日暮萧斋兀愁坐，夜梦已到扶桑东。

### 喜高平表妹至

尔我襟期喜共知，笑言频到漏残时。开奁会看将完绣，翦烛閒敲未定诗。金鸭灰深香篆袖，晶帘风定落花迟。晚来又恐轻言别，月底鐙前系梦思。

### 张芬

张芬，字紫繁，号月楼，吴县人。举人曾汇女，州同夏清河室。有《两面楼偶存稿》。

### 端午村居

荒村无竞渡，极目野烟昏。欲奠盈樽酒，空悲绕膝恩。五丝难续命，一赋独招魂。  
何以酬佳节，菖蒲绿映门。

### 秋草

一片凄迷乱鬼磷，断肠休问昔如茵。王孙已破天涯梦，游女还伤陌上春。野岸带烟昏晓月，暗蛩和雨絮愁人。谁寻幽径寒林下，吊古空悲萧瑟辰。

### 挽燕

越海还山愿已违，隔帘娇语是耶非？好凭钗影传遗照，独伴花魂葬石矶。一垒香泥閒画棟，几宵春梦别乌衣。可怜吟客斜阳里，泪墨盈笺招不归。

### 七夕咏

晚凉无复旧时妆，欲罢金梭益自伤。莫笑离多偏易别，久时离别作寻常。

和皎如沈妹见怀元韵

香消红袖晚妆残，月下怀下倚曲栏。想得吟情幽绝处，满庭风露玉钗寒。

秋夜怀寂居禅友

楼空愁思迥，凭眺独萧森。月镜开灵觉，霜钟警道心。可怜黄叶落，无奈白云深。想得安禅处，天花正满林。

白杨花和碧云王妹作

柳絮飞来风片斜，牵人魂梦散梨花。淡烟明月迷隋苑，玉燕珠帘忆谢家。莺舌好翻新乐府，蛾眉消却旧韶华。绵绵欲断浑难断，万缕离情怨暮笳。

沈纘

沈纘，字蕙孙，号散花女史，吴县人。教授起凤女，诸生林衍潮室。有《绣馀集》、《翡翠楼诗文集》、《浣沙词》。

读骚

江水流不息，落日秋风劲。渔父诚知言，千载悲独醒。琼佩终不渝，芬芳自辉映。微词莫能显，感物託其性。风诗固一变，声哀义弥正。愿鼓湘灵瑟，高歌发清听。

田家杂兴和林屋山人作

一夜响春泉，微雨湿茅屋。驱犊出门去，平畴霁如沐。禾黍自怀新，生意何戢戢。昨停桔槔声，无人雀争啄。阳和共歆羨，远风转湿燠。龟勉事芸锄，有年从此卜。

向晚群动息，杖策来东菑。邻舍多好怀，往还无厌时。平生守直道，讵假智虑为。辞拙意弥真，礼疏情不移。古风转淳朴，徒为薄俗嗤。

东风昨夜来，不知草木长。晓起荷锄出，眺此平原广。墙头桑叶白，屋后春泉响。节序时迭更，风光正骀荡。野老散鸡豚，相逢时倚杖。

穹室竞熏鼠，岁晚百务閒。踪迹远城市，陶然西畴间。新酒可介寿，园蔬供夕餐。不惜三时勤，获此终岁安。贫贱瘁筋力，貌苦心亦欢。衣食幸自周，苟免饥与寒。

杨太真华清宫上马图

野鹿衔花宫禁悄，沈香侍宴归来早。念奴报道宿醒消，果下名驹鞚初好。春风扶困

上雕鞍，娉婷仙骨何珊珊。杏子裙遮金埒暖，鸳纹袖笼玉鞭寒。香尘暗逐飞花外，半响鸾铃摇月佩。邀得君王带笑看，生怜冠绝风流队。那知铁骑起渔阳，鼙鼓惊残歌舞场。无奈六军皆不发，马前宛转殉红妆。

#### 方正学画竹赞心斋先生家藏

方先生，性正直。靖国难，躬戮力。族不辞，死何惜？剖吾心，割吾舌。身可烹，心难折。炳今古，耀史册。展画竹，泪痕湿。两三竿，五六尺。挺贞姿，效贞节，疏乔枝，翻密叶，岁寒松，同春柏，起英风，凌霜雪。顾此君，人悲切。

#### 独夜闻笛怀清溪伯姊

秋色淡如斯，谁家玉笛吹。一声人静后，千里月明时。莫辨《关山》曲，空悲《杨柳枝》。秋风如可托，为我寄相思。

#### 阻风黄浦和孟韩韵

帆影落波光，迢迢水一方。潮声飞雨白，风色挟沙黄。海月生蓬岛，江蓠裹楚裳。骚人无限意，高咏独苍茫。

#### 秋寺和碧岑姊韵

秋寺寒烟湿，支筇望不迷。石林残雨响，樵径乱云底。落叶埋人迹，疏钟送马蹄。我来参大乘，斜日下招提。

#### 采莲曲同婉兮姊作

红蕖十里晓风凉，露滴侬家翠袖香。桥畔盈盈双髻女，隔溪相唤渡横塘。

小立新凉掠鬓丝，画楼吹罢玉参差。红衣堕处无人见，月白风清子夜时。

#### 题赵承旨画兰

可怜王者香零落，憔悴潇湘第一枝。空向新朝夸画笔，难为骚客写愁思。故宫落日悲荆棘，周道秋风怨《黍离》。何处托根犹故土，淡烟细雨伴江蓠。

#### 书中乾蝴蝶

此身未肯没蓬蒿，翰墨钻研志趣高。早并虫鱼登《尔雅》，自寻香草到《离骚》。怜他金粉耽细帙，写尔芳魂托彩毫。一卷《南华》凭梦醒，始知栩栩亦徒劳。

#### 题二乔观兵书图

舳舻焚尽仗东风，应借奇谋闺阁中。曾把韬铃问夫婿，谁言儿女不英雄。阴符偷读

妨描黛，绣帙双开见唾绒。一十三篇劳指授，螭矶馀烈本吴宫。

张因

张因，字净因，江夏人。举人黄文旻室。有《扫垢山房唱随集》。

送秋平赴试

落叶满阶砌，西风鸣纸窗。晓起促行色，相对两茫茫。虽无久离别，中心自感伤。何如百里妇，庾庾炊高粮。早餐浑未备，枵腹赴征航。细雨湿行袂，凉飕歛短装。饥鸿唳天表，寒鹭下林塘。行李太单薄，何以御严霜。执手斯须立，有泪已盈眶。丈夫富经术，忧患天所尝。行矣勿复顾，努力事明扬。秃笔吐异彩，古墨发新香。不挟兔园册，惟凭胸所藏。幸逢冰作鉴，慎勿轻文章。

夏夜

凉风送远钟，露湿桐阴薄。斜月影沈西，卧见榆花落。

题河鲤登龙门图

懵腾斗室摇长风，壁间锦鳞思成龙。扬波鼓鬣河当中，头角未具鳞甲雄。龙门万仞摩苍穹，纵生八翼层云封。欲跳不跳喧丰隆，我见为之心忪忪，鳞兮鳞兮开鸿濛，超然一跃如飞虹。雷火烧尾五云从，万里青霄路忽通。

春日湖上偶题

湖上春光丽，风微日正稣。蝶随芳草集，柳近画楼多。莺啭疑丝竹，花香散绮罗。谁能掬彩笔，写出好烟波。

衰柳

摇落无心问化工，秋山秋水怨何穷。黄眉惨淡愁逢雨，青眼飘零泣向风。剩得寒蝉鸣古岸，更无残月照离宫。断魂草趁羌人管，又逐清商入远空。

咏庭前绿梅

半放犹含意态殊，迷离香梦仗春扶。月明偶揭湘帘看，不是红儿是绿珠。

疑花疑叶总难分，晴色梢头翦碧云。最是晚来易惆怅，数枝无语立斜曛。

题江碧岑女史龙女抱经图

珠帘不卷坐焚香，小字维摩病合当。要识多才天亦忌，莲台只合拜医王。

已归净土结莲胎，更向尘寰见异才。读尽儒书千万卷，又从佛座授经来。

朱满娘

朱满娘，字月上，乌程人。厉鹗侧室。

题自画红梅

一枝红绽傍墙阴，疑是绛衣仙子临。莫说桃花偏命薄，多缘霜雪未能禁。

方婉仪

方婉仪，号白莲居士，歙县人。江都罗聘室。有《学陆集》、《白莲半格诗》。

记得

记得当时拢髻年，春宵坐月百花前。谢家小妹王家姊，手弄窥窗白玉钱。

题马守贞双钩兰花卷

楚畹幽兰冠众芳，双钩画法异寻常。国香流落空留赏，太息金陵马四娘。

期诸娣姒茶话

旧家门巷草新生，岁岁春风不世情。已办月团三百片，好为同听煮茶声。

生日偶吟

平簾疏帘小阁晴，朝来池畔最关情。清清不染淤泥水，我与荷花同日生。

梅摹魏国夫人画，字仿杨家妹子书。一盏真茶消永昼，玉浆犀液较何如。

次韵题明妃图

冢畔青青草色稠，芳名史册著千秋。画师若把黄金嘱，老守长门到白头。

吴蕙

吴蕙，字兰质，吴江人。兆骞女孙，诸生费定烈室。有《庾楼吟》。

归来草堂有感

寂寞空庭冷，凄凉旧迹存。乾坤埋傲骨，风雨吊游魂。翠色滋阶草，苔痕封树根。  
秋风肃户牖，独立向谁论。



秋日寄怀蓼洲弟

一夜砧声枫树凋，离亭风雨欲魂消。便鸿南向应无数，好寄新诗慰寂寥。

屠■佩

屠■佩，字瑶芳，秀水人。孙渭璜室。有《咽露吟》、《钿奁遗咏》。

观沈氏诸姬演剧

梨园喜见属红妆，三五娉婷出洞房。檀口莺声歌细细，柳枝蝶态舞将将。冠簪雅步参军度，粉墨涂颜伧父行。底事酒阑人未散，月明照彻锦云裳。

佟素衡

佟素衡，浑阳人，国器女。

勉儿勤学

庭槐渐觉影婆娑，岁月催人老奈何。昼永尔宜勤课读，夜深余亦爱吟哦。从来自恃闻偏浅，到处心虑识愈多。美玉琢磨终作器，分阴须惜莫蹉跎。

施坤

施坤，字资生，仪封人。张钜卿室。有《遏云吟》。

咏古

仗剑出昭关，投吴秉节钺。一出败荆师，再起复全越。英风震五湖，霸图日突兀。奈何长寇讎，忠言不能入。君王赐属镂，臣罪当诛灭。鸱夷江水寒，天地泣壮烈。转眼问吴宫，繁华久歇绝。青青馆娃柳，泠泠苏台月。长啸海天空，凉飙振林樾。

咏残牡丹

东风吹老碧桃枝，偏尔能开倾国姿。垂首似含亭北恨，折腰如怨马嵬时。残香尚足惊丹卉，剩粉犹堪入品题。寄语东君好珍重，莫教风雨葬西施。

商可

商可，字长白，会稽人。盘长女，同县王氏聘室。有《昙花一现集》。

自课

韶龢初授经，传家惟四始。和平兼温厚，颇识风人旨。貌遗留乃神，理合变其体。方员无定形，勿学涂印玺。作为冰雪词，独赏无人喜。何用黄金鑑，与世刮眸子。

#### 题高且园指画虢国夫人夜游图追次坡翁韵

阿瞒西幸乘青骢，渔阳鼙鼓来猪龙。当时酿祸由妃子，五家甲第连离宫。八姨婉娜如春柳，紫丝双鞢纤纤手。璧月多情照丽人，钿钗已化长安尘。画师解得娥眉意，不带南都粉黛痕。薰天贵戚原非古，西市门深芳草路。宝炬香车莫近前，丞相耿耿气如虎。

#### 垂帘

柔绿阴无际，垂帘昼似年。莺声催午课，花气拥春眠。向母寻眉谱，随兄治砚田。潜心看内则，钞得两三篇。

忆镜湖和大人韵 蝦笼蟹簖柳阴边，双桨凌波跳白船。著色画图忘不得，红霞一抹晚晴天。

#### ○斗蟋蟀

谁教嘒嘒两争雄，白帝馀威到草虫。可惜旌旗兼壁垒，指挥都是小儿童。

#### 秋柳

多情大垂手，婀娜早春时。忽漫伤憔悴，还能管别离。画轮劳怅望，衰草共愁思。满目金城色，攀条始得知。

#### 题画

云鬓斜分玉指尖，妆成小立影廉纤。痴情细嘱红襟燕，衔取春愁出绣帘。雾縠冰纨称体裁，春兰秋菊一时开。芝田馆外盈盈水，荡尽人间八斗才。

#### 巩年

巩年，兆佳氏，满洲旗人。有《实情草》。

#### 厌酒

愁入肝肠赖酒除，何如遣闷有诗书。圣贤无限安心法，酌尽醇醪恐不如。

#### 题邵飞飞诗卷

多病惜花花黯然，才人幽恨到蛮笺。愁来毕竟憎诗卷，风雨青山叫杜鹃。

#### 牟氏

牟氏，黄岩人。贤女，夏濬室。

立秋雷雨初晴与外共限韵

一叶惊秋雨，殷雷欲住时。寒蛩犹未觉，促织已先知。翦烛同清话，含毫各逞思。微风生夜月，雁影落芳池。

秋楼远眺

秋风迟我一登楼，槛外山枫锦色稠。一片白云归雁急，半林黄叶暮蝉收。

郑镜蓉

郑镜蓉，字玉台，建安人。雍正癸卯进士、袁州知府方坤长女，闽县陈道敷室。有《垂露斋联吟集》。

秋雨用苏岐亭韵

更漏响沈沈，铜壶滴金汁。遣兴与裁诗，含毫纸欲湿。似云石燕飞，哀祈幸一得。潭底起乖龙，如奉律令急。蛙鼓亦齐鸣，唼喋乱鹅鸭。阵阵势倾盆，缕缕烟垂幕。离披蜀葵黄，狼藉鸡冠赤。净洗六街尘，水碧复沙白。茅屋顿凉生，微香吹衣帻。一雨一犁金，贫民免啜泣。从此庆丰年，禾黍盈无缺。原野景色新，能遣悲秋客。且暂解焦劳，小榻呼觴集。

夏日钞书小窗如炙念家严远出捕蝗率彼旷野炎蒸百倍因用家严送有邻弟返里原韵示诸妹

烦暑正流金，长日当季夏。姊妹小窗閒，时作喃喃语。双丸去如梭，倏过端阳假。楸枰已懒弹，对食却杯罍。石鼎响如潮，茶烟看绕舍。榴火复薇花，景物递相迓。蛙鼓不停声，令人几惊咤。白汗如雨挥，黄沙将人射。虽罢火伞张，那得清凉夜。太守同民忧，讵有案牍暇。昔岁厄阳侯，泛滥吁可怕。今幸茁其苗，转眼纳禾稼。胡天不悔祸，鸬鹚未蒙赦。虫豸迭为灾，扑面火云下。大地真如炉，短后衣难卸。返署未浹旬，又促星言驾。虽灭旋复兴，吴越若争霸。宦海嗟茫茫，何时守桑柘。尔辈尚童心，嬉笑还怒骂。我心耿耿然，好怀那得借。因思官阁清，松萝高插架。更有《秋水篇》，千载人脍炙。早晚凉信来，烦忧暂可谢。能息数朝间，好把归鞍跨。蛩声荒砌吟，萤光腐草化。扫地更焚香，襟期古人亚。此事难预期，欲言先呕哑。八阕未云遥，远隔如浣灞。虫口有馀粮，谚语堪慰藉。薪米庆丰年，无忧珠桂价。

夏晓

绿树环庭外，荷含晨露深。轩窗不受暑，水竹自成阴。隙月窥残梦，疏星动晓禽。碧幙风远送，凉气逼衣衾。

新秋

凄凄砌里有虫吟，漏尽声声韵转沈。人入梦时初过雁，月当圆处正闻砧。风微菡萏浮平沼，雨霁梧桐落远林。此夜幽闺偏耿耿，悲秋为感楚骚心。

郑云荫

郑云荫，字绿苔。方坤次女，福清严应渠室。

夏夜乘凉限韵

乘凉凭画阑，萤飞频仰视。解渴何所需，冰盘浸瓜李。便敌曹公梅，差亚陈家紫。星斗挂疏林，柳枝拂几几。忽然起惊风，乱飏芙蓉水。明月皎皎光，直照深潭底。何处碧荷香，沁入金尊里。

郑青蘋

郑青蘋，字花汀。方坤三女，闽县翁振纲室。

赋得绿树阴浓夏日长

学飞乳燕绕回廊，出水芙蓉冉冉香。曲院花凝晨露润，小窗人耐晚风凉。莺梭乱织千条柳，蛙吹时喧半亩塘。欹枕横斜书数卷，了将清课日初长。

郑金銮

郑金銮，字殿仙。方坤四女，闽县林守良室。

蓬莱阁观海和韵

高阁层峦上，沧溟那有垠。射工迎落日，飓母类奔云。缥缈来三岛，高寒到十分。登临馀感慨，渔笛不堪闻。

梨花限韵

三月园林草径荒，一枝晴雪簇东墙。冰姿差后寒花发，缟素浑如贫女妆。艳惹夜蟾光处白，泪含春雨冷时香。空庭寂寞无人迹，引得游蜂阵阵忙。

蒋佩玉

蒋佩玉，字湘纹，长洲人。兵部侍郎元益女，镇洋诸生王洲室。有《湘纹吟草》。

秋夜

锡魄动秋光，淡淡云轻护。夜静独凭栏，徘徊时坦步。清露湿罗衣，商飙来远树。

河汉碧迢迢，微茫星斗布。丛桂影婆娑，广寒疑有路。

#### 篱菊呈家大人

秋光何澹荡，黄菊满篱东。瘦影安排静，幽香点缀工。霜华延令色，晚节傲清风。独有陶彭泽，吟诗逸兴同。

#### 题画

几点青山杳霭中，柴门引水带烟笼。结庐谁在幽篁里，半贮朝霞半晚风。

#### 查女

查女，海宁人。洞庭女。

#### 题驿壁

薄命飞花水上游，翠蛾双锁对沙鸥。塞垣草没三韩路，野戍风凄六月秋。渤海频流思母泪，连山不断背乡愁。伤心漫谱琵琶怨，罗袖香消土满头。

#### 何桂枝

何桂枝，桂林人。

#### 悲命诗

六月六夜雨声急，有女不眠悲思集。侧耳东方人睡酣，倚床低首罗巾湿。有恨无可伸，有语向谁陈？坐对中宵雨，长嗟薄命身。我本广西城里女，此处爷娘非我亲。暗想八九年前事，寸心耿耿独伤神。忆我六七岁，父母双抛弃。寄养向贫亲，贫亲无好意。浔梧将军门下客，一时假虎烈威势。与得金钱知几何，甘心鬻我作人婢。尔时幼小只从他，薄命飘零可若何。当年携到扬州地，山程水程万里多。扬州一入主翁宅，年复一年谁爱惜。朝捧茶饭暮捧汤，寒缺衣裳饥缺食。主翁有时稍见怜，主母鞭箠那禁得。忽然年来情意改，当作亲生女儿待。许我呼爷与呼娘，梳头裹足勤劳倍。不知奸计险於坑，漫道厚恩深似海。箫管琵琶学已终，牙牌双陆亦教通。才延李姐传歌曲，又向张姑习绣工。事事求全勤督责，朝谋夜议谁能测。春来春去时忽忽，道我长大好颜色。嫁得富翁贵公子，终身享用无尽极。昨朝客到敞华堂，逼我堂前见客忙。不识谁家轻薄子，周身上下细端相。但见爷娘喜满面，我正无颜归绣房。惊猜不敢问，自知徒自恨。耳闻堂上言，赢得心中闷。方知堂上宾，乃是浙中人。工科给事官名重，六十无儿娶妾新。岂是寻常行礼节，只闻次第讲金银。怪杀爷娘心惨绝，千金百金争未歇。我生时日我不知，朦胧造作与人说。初五聘定初七嫁，却道行程图快捷。可怜我貌空如花，可怜我命真如叶。今日人家呼作儿，来日人家呼作妾。以此伤心怨复嗟，夜深掩涕肝肠裂。早知粉面换黄金，悔不当年堕江月。已矣哉，且莫哀。不见扬州旧风俗，亲生儿女嫁天涯。天涯复海角，骨肉之间豺虎恶，我复何须泪零落。泪零落，情未休。长江之水无西流，风俗不改古人愁。寄语红颜绿发闺中女，来生誓莫生扬州。

董文

董文，字学舒，阆中人。焦士宏室。

书感

机杼声中络纬鸣，未亡人已久忘情。玉楼赴召今何在，不问三生问再生。

徐德音

徐德音，字淑则，钱塘人。漕运总督、谥清献旭龄女，中书许迎年室，同知佩璜母。有《淥净轩诗集》。

白纥歌

羲和六辔回苍龙，长红小白纷作丛。纤枝绰约随流风，翩翩冶态如惊鸿。一寸眉峰晕春碧，酒潮欲上莲腮赤。热心拟化百枝灯，长倚君王照瑶席。

题大痴老人山水图

听夕画水兼画山，淋漓元气在笔端。此图神妙信杰作，谁欤抗手惟荆关。连云欲接富春岭，鼓棹直溯桐君滩。晚饭雕胡然楚竹，路转山腰见茅屋。日冠山衣尔何人，想见土风尚纯朴。自笑频年车历鹿，子舍栖迟就微禄。吾家旧在湖山澳，别来几度春山绿。曷不言归种杞菊，晴窗展画三摩挲，移情如奏成连曲。

题投笔图

岂薄雕虫技，翻思汗马功。生当封定远，梦合笑文通。圣代烽烟静，儒生意气雄。百年同一掷，感慨画图中。

养疴杂咏

尽日钩帘坐，风光亦复佳。鸟栖云护竹，人静月横阶。对酒忘羁旅，繙书遣老怀。时时学吴咏，自击隐居钗。

三月望日楼居火后示大儿佩璜

高楼一炬委荒芜，补屋何从更买珠。酿酒已无田种秫，打门犹有吏催租。昼操薪桂慵拈笔，夜对缸花学辟纁。尽付郁攸无长物，舟居陆处总艰虞。

答陈竹町

曾课嵇男住岁馀，简编勤诵发慵梳。偶缘红药为佳婿，更恋蘋花卻聘书。老去稻粱谋野鹤，才高沧海掣鲸鱼。华亭同愧霑尘土，愿借春风一扫除。

### 出都留别林亚清夫人

前身风格是林逋，筑室仍依西子湖。班左妍词才独妙，郝锺懿范世应无。扫除铅粉留真韵，点染溪山入画图。却忆当年同里闰，相寻翻似隔蓬壶。

元冥飞霰岁将终，去住无端任转蓬。未易相逢轻作别，预思后会傥能同。惊飙眯目边沙白，衰草黏天猎火红。长路关山如见忆，诗篇莫惜寄邮筒。

### 出塞

六奇枉说汉谋臣，后此和戎是妇人。能使边庭无牧马，蛾眉也合画麒麟。

### 湖上行

芳隄载酒恣遨游，湖上涌作青螺浮。桃蹊李蹊花零落，奇艳惟留红芍药。暖风迟日倍宜人，夹衣初试纤罗薄。松风吹袂声泠然，白舫閒消半篆烟。紫筍钗头分建茗，青瓷蟹眼瀹山泉。酒酣日晏清吟歇，怀古无端意飘忽。凭高更指凤凰山，蔓草遥连宋宫阙。

### 试剑石

石上痕如切，纯钩性最刚。阳山饥渴日，何不试夷光。

### 韩氏

韩氏，自署端静閒人，汉军旗人。锦女，蒙古乾隆庚子进士、国子监祭酒、

蒙乌吉法式善母。有《带绿草堂遗诗》。

### 雁字三十首次韵

木天怅望愧雕虫，那及天然点画工。小抹淡随寒露立，半横细入浅云笼。三千古碣文谁检，十二高台兴不穷。灏气长空真漱尽，笔端清味积来雄。

昨夜丰山响石钟，霜前一字写秋容。蛮书细画来平楚，戍柬新封寄古邕。苔径输他蜗篆瘦，松林蘸得墨烟浓。鸳行若许同挥翰，舒翼趋阶貌本恭。

健翮扶摇未肯降，连篇横拂洞庭艣。霞蒸玉箸棱棱直，风散银钩笔笔双。石室飞花迷暮霭，渔灯涵影入秋江。天涯多少伤心客，莫写啼痕近客窗。

万象包罗一卷诗，破空描出水天思。谁云凤沼专归勛，可惜鹅群已赠羲。秋雨迷离人问渡，野云黯淡客临池。鹿鸣宴及来宾日，珊网精金著意披。

石函百仞倚晴晖，拭眼丹青妙入微。沙白新翻黄纸硬，山青全印墨痕肥。文心向晚

通神速，旅梦随风认是非。一自苏卿书寄后，为人辛苦北南飞。

一队纵横扫碧虚，乱峰遥隔数行疏。五湖到处常逢汝，八法何须强问渠。偶恶弦鸣因阁笔，讵忧粮乏便佣书。羡他空阔波澜老，妙称频年泽国居。

淋漓界破碧天图，醉墨微茫抗酒徒。若使太元生瓦屑，谁将飞白裹金瓯。沙痕已印梅花瓣，声谱兼谐凤穴雏。野鹭家鸡随举似，不须仿本效村儒。

辛苦鸰原顾影齐，天涯未怕道途迷。孤飞断港偏锋掠，倦宿寒汀一笔低。萧馆停云分旧榻，榆关落叶送新题。书空咄咄真何谓，往事凄凉雪后泥。

挥毫到处素心偕，不羨梧冈韵独谐。谁解索书汀有鹤，欲劳题壁石如蜗。轩轩健格头初举，渺渺晴霄目试揩。秋水长天乡梦远，苦吟何地问津涯。

足下风烟任翦裁，何人能识倚天才。久从碧落碑前过，直到青云梯上来。吴楚通流波并偃，关山列阵笔难摧。频将游雾萦空法，写向危峰第一隈。

远眼模糊望不真，晓窗寂寞问归人。有形字更凭谁指，无谱书偕造物论。极浦生潮初润玉，晴沙如雪宛钩银。奇山宕外留题遍，北到幽燕西到秦。

逸气沈酣映日曛，冥冥横洒五花云。秋潭倒卧龙蛇影，晴磧新增蝌蚪文。一画直同天地老，六书何待古今分。祇应上界留真本，不许传流鸟雀群。

撇过云罗没点痕，自然成象悟乾坤。双飞合写新夫妇，同姓能书好弟昆。秋雨人家题画阁，晚潮空舍浣花村。传神一入林良手，模得苍碑缺画存。

湘妃写恨满琅玕，共此秋心入塞翰。琴外送声传妙趣，江头落影漾文澜。渐高勒帛银河近，小注凌波锦鞦鞢。结想衡阳峰顶上，那教俗手揣毫端。

妙墨虚无晓度关，题残楚泽与吴山。烟波以外分明见，风水之文宛转。鸟迹居然淳古在，天书定自玉皇颁。稻梁讵息翬霄志，临罢黄庭半日閒。

秋色清华断碣边，翠微千丈素罗笺。宵征静录天人策，尺幅横描山海篇。点水超超真入妙，飞空草草便成颠。苍苔识得峣嵴迹，驿使无烦召谪仙。

结体峥嵘取势遥，长风捧出丽丹霄。蔚蓝中曳千行墨，远碧浓涂十幅绡。寒暑未停文苑笔，云霞好入太平谣。一从汉武帝成后，高驾飞虹蹑彩桥。

结构虚灵宛象爻，低昂欹整翼相交。云书跋尾湖山卷，梵体当头鸞鹄巢。骨瘦似闻飞燕似，格高不付小胥钞。数声已作秋声赋，更掠纤波舐白茅。

霜雪犹呵欲冻毫，湘江镇日注《离骚》。罡风汹涌心花怒，湿雾模糊笔渍高。云泚玲珑排小隶，烟丝珍重绕灵璫。衔芦更负藏身哲，始信书生富《六韬》。



天门初辟榜银河，可有鸿裁众口哦。夜市千家卖竹扇，秋云一片印花罗。侧因惊吹疑神助，浴尽长波试醉魔。毛羽自丰标格好，肯将文字作身囿。

莫嗤春蚓与秋蛇，不斗儒生梦里花。塞外文光天在下，江南书舍水无涯。枯藤倒影山溪瀑，新月横钩石径沙。玉柱飘零琴韵断，医愁何术学涂鸦。

江北江南水气苍，共随今雨入渔庄。芙蓉垂露迎秋色，沙漠奔泉背夕阳。醉写何妨输草圣，暗摸终恐误中郎。真经要借空空手，漫把鹅群赠与王。

小作欹斜一画轻，纵横成阵亦分明。秋光惨淡文章老，霜气沈酣天地清。濡笔尽随波浪阔，佣书可减稻粱争。教他董赵生惭愧，妙迹通神不近名。

霜冷吴江夜抖翎，烧残野火当藜青。雨馀神鬼连宵哭，漏静蛟鼉隔水听。极浦航归因草草，远湾烟霁一星星。云龙山下空回首，点笔山人放鹤亭。

天与云霞作剡藤，横空腕力得风增。潇湘清怨诗千首，罗刹晴潮墨一升。小住鸥波凭浩荡，几时凤阙许飞腾。迷离苔蘚黄昏蚀，细辨碑阴月是镫。

珍重寒衣万里投，乱碁声里断云流。发书有泪传青塞，罢织谁家倚翠楼。绣被易凉人易远，回文难学婢难偷。红绳足下仍牢系，妆阁归来句再酬。

江湖兄弟并书淫，令节茱萸望远心。歧路分携成折股，顺风直下试悬针。偶鸣得意莺迁木，忽写离情鸟忆林。草满池塘归未遂，欲寻佳句梦中临。

碧落高寒兴正酣，谁将拓本寄江潭。水澄文苕波三折，山拭晴岚石一函。妙手真从天半倚，愁心全向笔端含。浮图顶上曾题遍，千佛名经献彩昙。

白云浅处认牙签，朗朗真宜众目瞻。波扶晴滩初纸拂，露研春草有花黏。萧萧竹借凌霄管，软软沙铺对岸嫌。全力拓开周万里，精神更聚在毫尖。

起草飞从弱水岩，春秋相值语呢喃。人家江浦花封字，使者燕关雪冻涵。天上图书无尺寸，世间笔札别仙凡。殷勤爱煞清虚符，好借轻云画素衫。

### 咏盆中松树

偃蹇依然水石清，贞心独结后凋盟。生来不受人攀折，雪共荒寒月共明。

### 彭玉嵌

彭玉嵌，海盐人。平湖诸生陆煊室。

### 春夜琴兴

杜鹃声里一镫昏，感旧思乡不可论。独取焦桐横膝上，夜寒弹月下花村。

杪春

又是新篁解箨时，东风二十四番吹。碧纱窗展看春雨，剩有残花一两枝。

秋夜怀梅谷客越

真向山阴道上游，归何日咏刀头。吴歌听彻烟江月，楚簟凉生水阁秋。嵎县东回难著屐，剡溪南下不通舟。尺书未寄寒衣薄，莫眺天边风露楼。

虹屏夜临欧书镫烬落成烧痕以诗志之

秋风瑟瑟夜悠悠，翠袖天寒尚写欧。忽听莺声呼可惜，镫花小烬落银钩。

和虹屏秋感绝句

秋气无端入骨苏，清愁自省亦模糊。丹青只有骚人手，画出伤心一片图。

沈彩

沈彩，字虹屏，平湖人。同县陆烜侧室。有《春雨楼集》。

题临献之帖

江梅几点漏春光，鸽眼新磨紫玉香。初试袂衣莺语里，小窗閒写《十三行》。

湖上次主君韵

偶然临眺处，花笑鸟能吟。曲水流青草，遥山映碧林。燕来双翦冷，云去半湖阴。徙倚风前柳，柔情共尔深。

避暑

避暑北窗下，凉风吹幽襟。蕉竹夹深翠，仲夏如秋阴。残花犹未尽，寒蝉已先吟。芳兰供一缶，石上陈清琴。欲按山水调，纤爪力不任。但取横膝上，一寄飞仙心。

夜读

被服纨与绮，流览圣与儒。岂为荣名计，简编自堪娱。栖乌中夜起，明月临前除。皓皓清露冷，萧萧竹影疏。我思英皇女，千载不得俱。复观曹大家，八志《续汉书》。伊余慕前淑，汲古期有馀。譬如月桂影，而欲穷根株。终当事蚕织，私好徒区区。

春日薄游

不须绣幕逐香车，小径春明玩物华。罨画溪添三尺水，催诗雨送一枝花。离离青草终无尽，的的红颜信有涯。准拟明朝钻活火，太湖石上试新茶。

#### 秋夜怀梅谷主君客越同夫人韵

为访灵威烂漫游，潇潇暮雨越溪头。已凋蒲柳千螺翠，未老芙蓉一镜秋。明月双湾无到雁，浙江三折阻归舟。不堪南望增惆怅，凉笛声中独倚楼。

#### 次主君戏赠韵

大海珊瑚折一枝，镂成彩笔寄吟诗。临池上拟岐阳鼓，敲句坚须博浪锤。苦爱蠹书成脉望，不知霞脸去春肢。外孙荠日终何用，欲叩天阍一问之。

#### 晓起作书因题

晓起弄笔札，白露进窗几。虽嫌皓腕冷，滋润亦可喜。欲书青李帖，拂拭苔花纸。漏痕无成心，折钗有妙理。悠悠千载下，可能入米史。鬓丝帘影间，染翰聊记此。

#### 初秋

佛桑花底坐凉飈，正是幽闺七月时。作画应知特健药，镌书须倩伏灵芝。甘回齿颊梨拳破，碧照衣襟竹个垂。欲寄美人摇落思，芭蕉和露写新诗。

#### 清秋临眺

清秋如静女，窈窕不多妆。菱浦微弯月，枫林小著霜。山眉修入画，波縠滑生光。更拟褰裳去，三湘畹芷香。

#### 与夫人论诗偶成

羚羊挂角处，无迹少人知。偶尔成佳句，泊然何所思。从来兰似草，莫认菌为芝。微雨空闺里，茶香细论诗。

#### 秋夜书兴

绣床书轴斗精严，寂坐红闺夜已淹。山子数声如咒月，风姨一笑正褰帘。椒兰无气香将烬，巾舄生潮露暗沾。拟把簪花三寸管，尽收清景入毫尖。

#### 初寒

残菊犹存一两桠，清霜淡驻画檐牙。蝶惊年冷难依草，蝇恋微温易入茶。呵镜白云初滴雨，卷帘红叶故如花。晓来不觉肌生粟，半臂妆成换縠纱。

#### 答邻姝

长啸月当窗，微吟日卓午。邻姝谓余曰，读书徒自苦。多谢邻姝言，余心慕终古。譬如蜂酿蜜，性命藉为主。千函敌百城，万事轻一羽。但愿长如此，来生仍女姥。

#### 春日閒適

閒铺翠毯拂云笺，血玉蛟螭镇一圈。春日花多裁句易，雨窗砚润作书便。将临大令鹅群帖，拟赋庄生蝶梦篇。不觉钟鸣时向午，隔溪修竹上厨烟。

#### 晚兴

雕栏品亚倦馀凭，爱绘青春藻思仍。小苑杏花三月雨，高楼藜火十年灯。閒情已入无何有，好句常来得未曾。便拟下帘重展卷，乌丝淡墨写溪藤。

#### 古诗二首寄采芝山人

山人烟霞心，笔墨师董巨。独立千仞冈，啸傲绝俦侣。貌山粉本收，得句锦囊贮。曾上娥眉峰，或泊鸳鸯渚。清川泛长薄，落日淡容与。依依陇首云，冥冥花间雨。江海空青苍，采芝在何处。

我本青云侣，失足堕尘寰。飘飘鸾凤群，逸兴不可删。拾翠弄菡萏，采香佩兰{閒}。麻姑向我笑，手挽双髻鬟。白玉饰姣貌，丹砂驻酡颜。言写《黄庭经》，仍归青要山。从君采芝术，白云非人间。

#### 述书

不知春蚓与秋蛇，嫡嗣山阴第一家。曾仿金钗为转折，谁云花骨有欹斜。焚书空复嗟秦始，炼石应须问女娲。淳古自难清劲易，十年辛苦悔涂鸦。

#### 晚景独坐遣怀

钩帘暝色下松杉，独倚阑干絮语喃。薄醉懒添螺子黛，嫩寒初试杏花衫。法书大半从人弃，诗草无多且自芟。故事欲查灯未上，好教明月照开函。

#### 题自写兰

入春十日雨兼风，兰叶香迟未破丛。差喜砚田初解冻，墨花争发翠毫中。

#### 有日本人索余书戏作

簪花妙格几曾慳，万里鲸波到海山。不似唐宫一片叶，只随沟水向人间。

#### 姚世鉴

姚世鉴，字金心，归安人。诸生王豫室。

卧病

卧病逾时岁又新，衡门两版绝嚣尘。垂帘怕放东风入，春到贫家不当春。

张粲

张粲，字疏影，江宁人。员外郎许承钦侧室。有《适燕吟》。

楼居偶成

一竿晴旭上帘钩，点点寒山翠入楼。多病懒裁鹦鹉赋，薄寒初御鹧鸪裘。香浮竹叶杯中影，声彻梅花笛里秋。平楚苍茫惊欲雪，澹烟如织迥生愁。

舟中立秋

金井梧桐坠，轻寒渐中人。妾心如落叶，回首惜青春。

信至

门前綦履迹，閤外笑谈声。怪得银缸里，镫花夜夜生。

七夕怀武林诸姊妹

乌鹊桥边夜渡秋，穿针记共上高楼。那知万里银河水，泻入南天尽是愁。

对镜忆冰绡姊

昔年绣对青江，倚槛回看玉一双。今日镜中惟瘦影，含情不忍向寒窗。

闻邻家抚箏

谁家银甲弄春阴，弦上深情指下生。弹到断肠浑不住，应怜漂泊在京城。

晚春

春事阑珊镇日阴，客中消息断肠吟，妾心正似桥头柳，不遇东风恨不深。

弄箫

小栏閒品玉参差，偷眼娇花绽几枝。曲罢巡檐聊骋望，秦楼烟雨正迷离。

梦秦淮别业

曾登快阁看娇红，转眼春光入梦中。安得翩跹同燕子，随风吹过大江东。

王炜

王炜，字辰若，一字功史，太仓人。诸生陈光祿室。有《燕誉楼稿》。

西泠閒咏

澄江回抱古城斜，一片烟云接永嘉。为爱好山聊驻足，偶依高树便成家。湖光潋滟侵行笈，竹影参差带落花。闻道故人将卜隐，短衣双挽鹿门车。

吕坤德

吕坤德，字静斋，汉军旗人。有《襄平女子诗稿》。

杂诗

茫茫弱水隔丹丘，罗襪缁尘感去留。识字更添今日障，散花恐惹后人愁。静观冰雪心源澈，得卧烟霞世味休。一任山光来比并，撩人眉黛拂城头。

汪瑶

汪瑶，字云上，休宁人。朱昂室。

寒山

飞雨过群岭，篮舆陟翠微。幽径入松际，轻风吹人衣。高士有遗迹，想见疏凿时。老屋就深树，寒泉泻平池。墓梅双虬龙，屈铁盘高枝。缅怀硕人轴，偕隐赋乐饥。已辞梁栋材，自远太庙牺。一门擅文藻，渊雅良可师。予亦慕高隐，愿采商山芝。鹿门期可遂，怀古生遐思。

顾有容

顾有容，字香圃，吴县人。兵部侍郎吴玉纶侧室。诗附《玉纶香亭诗稿》。

赋得月如弓

新月盈盈挂晚晴，人从小院忆边情。长空射处旄头落，好卜滇池奏太平。

秋竹

凉露娟娟引晚风，幽篁筛影月明中。窗前一样萧萧响，添却秋声更不同。

王筠

王筠，字松坪，长安人。直隶知县元常女。诗附刻其父《西园瓣香集》后。

明妃怨

紫台风急雁声愁，去国离家不自由。独有穹庐深夜月，清光不异汉宫秋。

史筠

史筠，字湘霞，浙江石门人。镇海余耀室。有《萝月轩诗集》。

忆远吟

车马行时春之初，梧桐叶落秋何如。凄凉憔悴空闺里，珠箔垂垂独自居。忽逢云外秋归雁，一纸家书如覩面。感君念妾意缠绵，濯指开针肠欲断。问君毕竟几时还，妾已愁消红粉颜。几回梦绕关山道，相思不断如连环。相思相思无处说，卷帘诉与天边月。明月已圆人未圆，素辉偏照孤帷前。商飙萧瑟寒机动，蟋蟀声中愁不眠。小鬟梦呖呼不醒，起来自拨残镫影。窗前恨煞长鸣鸡，一声啼起霜天冷。

病中述怀

病为愁侵无计舒，那堪一卧两旬馀。自来自去窗前月，相近相亲架上书。奢望肯随梅冷淡，病躯却似竹空虚。倩人扶起临青镜，旧日形容竟不如。

中秋后春晖归家口占

游子还家乍解鞍，慈帏侍奉已承欢。归期虽负中秋约，兰桂庭前月未残。

周瑶

周瑶，字兰屿，号蕙卿，嘉善人。武功知县鼎枢女，归安礼部尚书、谥文僖姚文田室。有《红蕉阁诗集》。

答外子渡太湖寄诗

已闻黄叶下秋波，两地离愁谁较多。愿得曲湖归赐日，为君亲手织渔蓑。

王瑶湘

王瑶湘，南海人。诸生隼女，李孝先室。有《逍遥楼诗》。

秋琴

美人秋札至，贻我金徽琴。一鼓离鸾曲，谁人知此音。寒霜谱哀调，淡月洗孤心。何事王孙女，千秋遗恨深。

#### 拟送别

孤舟暮归去，别路江南树。烟外有钟声，故人在何处。

#### 许飞云

许飞云，字天衣，吴县人。王又溟室。有《浮家集》、《燕游草》。

#### 谢别观察夫人

自怜生薄命，荆布一蛾眉。何意云天谊，深承礼数知。别时增缱绻，归日更支离。回首秦淮水，悠悠寄梦思。

#### 瓶中丹桂

西风萧瑟透芸窗，金粟凝香吐嫩黄。祇恐秋光易凋绝，胆瓶深护一枝芳。

#### 商采

商采，字云衣，浙江山阴人。诸生罗萼青室。有《花间草》、《绿窗草》。

#### 落花

走马回塘细草齐，有情常自逐春蹄。且教天上看成雪，敢恨人间踏作泥。红板几条村径杳，青烟一片酒旗低。纷纷蜂蝶还无数，翠阁朱楼路已迷。

淡抹斜阳欲暮时，看花犹是惜归迟。馀香不信全消日，瘦影重疑未放枝。草满长堤成远望，山围故国剩相思。清尊短拍年年事，肠断深闺祇自知。

#### 塞上曲

万里长云暗节旄，天山秋尽雁飞高。风吹塞马霜蹄疾，雪扑征衣冻宝刀。

角弓白羽挂雕鞍，醉卧河阳铁甲寒。烽火夜来知有敌，一时齐向月中看。

#### 钱聚瀛

钱聚瀛，字斐仲，号餐霞女史，秀水人。布政使宝甫女，诸生戚士元室。

#### 放言



白云出没山之巔，中有仙客如枯禪。眸子炯炯衣蹁跹，粲然启齿呼我前。我憎凡俗再稽首，仙人隔云更招手。呼尔来，勿尔咎，海边明月难常圆，仙子岂无尘中缘。今来適尔滴数满，携尔且住沧海边。充肠鱼肉应厌饫，药苗芝草常新鲜。人间浊酒那可饮，何如山中一勺飞来泉？荆山之鼎，紫金之丹，授尔宝诀能延年。丹成服食皆神仙，翻然驾鹤冲高天。不知天阙近，但觉天风寒。两行天乐遥相引，调笙握管乘青鸾。下窥尘世在何所，黄云白雾交漫漫。下臣有一语，愿得上帝然。不作朱门之贵客，愿作蓬莱之云烟。

#### 怀陆费季斋表姊

重逢应有喜，何事转生悲。我已愁如许，君今鬓有丝。纵图良晤久，先恨别离时。拟卜墙东舍，终身共咏诗。

忆昔联床夜，相携意最殷。更阑频翦烛，兴到总论文。落拓谁怜我，知心独有君。莫嫌书札杳，操纸思缤纷。

#### 金孝维

金孝维，字仲芬，嘉兴人。礼部主事洁女，同县户部郎中钱豫章室。有《有此庐诗钞》。

#### 集近水楼居分韵得鹄字

居閒客过稀，门巷喧晴鹄。幽人共相访，不负前期约。命婢煮新茗，呼童整清酌。论文输封胡，礼法饶鍾郝。谈笑杂琴书，善戏不为虐。佳会忘夜阑，从教凉月落。

#### 六旬初度书怀

日月不可驻，疾如驹过隙。我年甲己周，老境苦催迫。视听虽未衰，鬓发欲垂白。感慨对生辰，长歌忆畴昔。自我奉箕帚，家事多屯厄。绸缪御岁寒，屏当供宾客。午夜共{难}膏，呶吾閒刀尺。君时课两弟，辛苦朝复夕。诗律戒平庸，文章慎凡格。安贫少闾墙，乐道忘交谪。献赋走长安，春风徒点额。归来卧茅屋，遣闷惟琴弈。檐花几度红，庭草几回碧。壮志惜未施，年华欲虚掷。一朝运重开，昆季俱通籍。粉署与冰垣，声名夸奕奕。所居虽各巷，来往无閒隔。秋月和春花，赏心联绮席。知止遽怀归，更卜城西宅。优游岁月长，逸兴寄泉石。鸿案喜双清，鹿门愿初适。鸰原忽抱恻，悲感日增积。卧病动经年，参苓两无益。今春幸渐瘥，瘦比经霜柏。有酒且同斟，养生在夷怗。卅年忧与乐，回首皆陈迹。达观任所之，人寿詎能百。

#### 读德风亭集

宏才茂学兼多艺，闺阁应传绝代名。若使斯人今尚在，不辞苍鬓拜先生。

#### 陈尔士

陈尔士，字炜卿，馀杭人。员外郎绍翔女，嘉兴给事中钱仪吉室。有《听松楼稿》。

### 帐房

帷宫遗意裁量新，几间几舍布帛均。不宜谋邑宜谋野，却以缝人作梓人。轸耶盖耶随意指，家具纷纷逐迁徙。两方展叠是绳床，三足支撑为曲几。观风行殿巧者作，容数百人安足录。君不见属车九九行相属，马上鳞鳞万家屋。

### 夜坐怀故山

止戈吾旧隐，地僻少人行。高阁对山起，春云如草生。庭昏烟影直，石尽涧声平。此夜一轮满，相思空复情。

### 江楼晚眺

望江楼外曲江横，水气苍凉暑气清。坐觉烟云生几席，何来帆櫓点空明。远山猿啸月初起，古寺钟鸣潮未平。犀弩雄风今歇绝，弄波时见狎童婴。

### 唐太宗

义旗十八定关中，五载旋成混一功。象启玉床争应命，卷繡金镜欲全终。高光大业何难及，臧札清风奈不同。更叹祸机潜倚伏，更衣竟日闭深宫。

### 辑历代后妃表成诗以落之

王政兰闺始，嫔风竹素贻。二千年往复，三五月盈亏。历历区贤佞，悠悠迭盛衰。帝皇权或假，纪传体分歧。虹电荒难问，蘋蘩鉴在兹。法宫明德冠，内则长孙垂。孝养崇长乐，訏谟下实慈。当熊树奇节，观象式清规。秋扇班姬感，春华左妹摘。是家名不朽，几辈宠忘危。傍辇多憨态，倾城诩艳姿。流珠教记曲，娥绿惯顰眉。缥缈芭蕉影，苍凉琥珀思。针神工刺绣，机绝妙牵丝。阅武堂杨柳，涪州驿荔支。簪留龙蕊贵，袖拂凤髻宜。续命琵琶奏，回波桺柸词。批章黄案侧，称制白纱帷。北第捐弦诵，东朝侈宴嬉。杜根空谏直，董养任嗟咨。银鹿畴能设，仓鹕讵可医。镜中希悟主，方底忍埋儿。色授应阶厉，才升亦受疵。由来通险謁，终见覆邦基。进退诚纷若，遭逢信有之。焚椒冤太甚，搗附狱谁治。莫慰含饴慕，徒怀削脯悲。宣仁滋谤牒，显肃误归期。破碎瑶光锦，凋残玉树枝。輿停过庙日，刃胁渡河时。红叶飞无定，琼花落已迟。偷生甘事虏，练行乞为尼。丧乱同漂梗，徵祥恰验蓍。铸金胡弗就，服赭类前知。射卜门屏雀，妖占产帐鸱。徽音犹示异，灵泽孰修祠。威晚仍恩遇，侯封各指撚。园林摹禁囿，鼓角向边陲。沙麓潜成莽，天元竟启隋。婴蚡争艳奕，珧济等诛夷。隆替如棋置，愚蒙效管窥。景濂编未备，迁史法堪师。校写晨披翰，参详夜熬脂。张杨从辨族，宏本总传疑。谏颂删刘毅，簧言著郝随。迹寻梁采女，贞阐蜀昭仪。末学缣緜隘，旁行粉黑施。武韦真倚伏，邢尹漫妍媸。断代兴於汉，何人化自歧。寸心衡得失，还咏《二南》诗。

## 【卷一百八十六】

潘素心

潘素心，字虚白，会稽人。知州汝炯女，少詹事汪润之室。有《不栉吟》。

咏古

一曲琴声两意投，当垆贯酒不知愁。相如空有《长门赋》，却使文君叹《白头》。

熊璉

熊璉，字商珍，号澹仙，又号茹雪山人，如皋人。有《澹仙诗钞》。

渔父词

垂钓本无心，得鱼亦不喜。随意换村醪，归来月满水。独酌听秋声，小艇芦花里。

感旧

叹我浮生不自由，娇痴未惯早知愁。弱龄已醒繁华梦，薄命先分骨肉忧。亲老偏逢多病日，家贫常值不登秋。眼前俱是伤心事，几度临风泪暗流。刺绣馀閒就塾时，也从花里谒名师。贪看夜月憎眠早，倦挽春云上学迟。琴案屡吟秋柳句，锦笺频写落花诗。而今回忆皆成梦，怅望当年旧董帷。

枕上

豆花蒙密掩蓬庐，人卧西风七月初。病似孤城频受困，愁如乱发不胜梳。澄心未了三生业，薄福难消一卷书。际此中年尽磨折，焉知颓老更何如。

萤火

水面光初乱，风前影更轻。背灯兼背月，原不向人明。

村女

柔桑枝上听鸣鸠，晓起提筐上翠畴。借问谁家春梦好，半窗红日未梳头。

菜花

尺土依然雨露匀，黄花灿灿蝶飞频。朝来不厌临窗看，也算贫家一段春。

许孟昭

许孟昭，字景班，元和人。知县廷鑑女，诸生沈之源室。

#### 寒夜曲

金翦生寒夜漏长，玉人纤手懒缝裳。素娥偏耐秋光冷，来照鸳鸯瓦上霜。

#### 越女词

一曲菱歌韵碧澜，耶溪归木翟日将残。情多自易含惆怅，不为秋深玉露寒。

#### 姚益敬

姚益敬，字元吉，乌程人。世钰女，进士董暨室。有《芬陀利居小稿》。

#### 力疾作书寄外因题纸尾

尺素初题罢，轻罗泪未乾。离愁不堪寄，聊复报平安。

#### 夏日雨后对月坐池上呈母

幽斋一雨过，草木醒枯槁。新月竹间明，凉风池上好。閒吟忘溽暑，静话开怀抱。岂必白旂檀，始能除热恼。

#### 冬日同三婶母夜绣

愁寂深闺岁向阑，绣床坐对一镫残。频添彩线知宵永，渐涩金针觉指寒。楚楚花枝香满袖，娟娟霜月正当栏。几回饮罢还相谓，昼短工夫促较难。

#### 岁暮大雪书怀

富家无俭岁，贫年少丰年。何用徵先兆，吾心只泰然。

#### 兀坐

兀坐觉宵沈，萧骚竹风发。雪意到残镫，虚窗半明灭。

#### 题自绣琼林醉归图

上苑花开烂漫枝，醉欹乌帽颭鞭丝。马蹄疾处红将遍，写出春风得意时。

#### 客中值夜

小窗雨过动吟情，乡思欺人睡未宁。翦烛拥衾閒坐久，冷风吹月堕围屏。

夏日戏作莲庄图

人家多在藕花中，枕水窗开面面风。日暮轻雷递前浦，冷香和雨入帘栊。

除夕

椒盘进罢夜犹赊，小琢诗词报物华。莫道寒多春未转，近窗双烛已生花。

春日病中对落花戏成

檐外东风春日斜，纷纷红紫堕窗纱。萧斋不是维摩室，天女何因为散花。

王璐卿

王璐卿，字绣君，号仙蛄，通州人。举人马振飞室。有《锦香堂集》。

答杏飙简稿

满囊文赋焕青雯，半欲珍藏半欲焚。宿有才名惊谢朓，岂非时数忌刘蕡。美人日暮怀香草，帝子中流倚碧云。翘首才知天自阔，沧浪歌罢酒初醺。

吴静

吴静，字定生，昭文人。诸生栋材女，同县项肇基室。有《饮冰集》。

读资治通鉴

雕虫小技诚何用，屈子《离骚》尚未奇。若是杜陵无史笔，姓名亦恐少人知。

雨窗录先夫子遗诗凄然有作

共识生前吟好句，千秋知己有谁何。无非《秋水》《蒹葭》意，尽是《春江花月》歌。半载病痾吟咏少，三年夫妇唱酬多。小窗录罢频惆怅，暮雨潇潇助泪波。

题扇头画菜

去年蝗旱今年疫，江北江南并菜容。若果画师真好事，何妨持此赠司农。

同舍弟展拜先陇

远望松楸已泫然，行行到此泪如泉。牛眠未竟先人志，马鬣还须后嗣贤。且喜孤儿能绩学，可怜弱女不延年。《泐冈阡表》清门事，仗尔他年笔似椽。

### 葬事毕志哀

漫道佳城郁郁哉，经营二载手亲栽。当年未尽晨昏养，此日空馀窀穸哀。渺渺音容归碧落，凄凄松柏傍江隈。泉台有路嗟难赴，肠断西风泪满腮。

### 临歿口占

幼失瞻依长失天，舅亡姑歿嗣无传。一身孤苦弓惊雁，百事艰难浪扑船。此夕黄昏聊自咏，他年青史果谁怜。交亲莫洒别离泪，我是瑶池谪降仙。

### 汪琬玉

汪琬玉，字佩滋，吴县人。同县金学莲室。有《佩滋存草》。

### 古诗

春来桃李发，花开盈路旁。路旁多行人，及此风日长。斜河带山径，疏柳明夕阳。岁华岂不惜，天涯渺茫茫。恨无双羽翼，远逐晨风翔。

中庭有一鸟，不飞亦不鸣。非不能飞鸣，但恐凡鸟惊。问鸟从何来，仙山杳冥冥。白云壮羽翼，三年养始成。有客知此意，见鸟两伤情。胸中起五岳，磊落何时平。

八月下严霜，万物倏已改。四时良易终，兰菊与谁采。芳菲一朝尽，零落竟何待。

### 丙辰除夕

共迎新岁复何求，亦有人多卒岁忧。不信请从城市听，几家欢笑几家愁。

### 平湖曲

平湖湖水西复东，春光淡沲天朦胧。石桥寒浪涨新雨，晴鸠破晓呼东风。东风著柳全无力，新雨飘花可怜色。柳边多少断肠人，百尺红楼是花国。

### 南浦

南浦春深奈若何，楝花风里听吴歌。马头芳草含红雨，船尾寒涛拥翠螺。西子有情离恨少，东君无计暮愁多。玉琴瑶瑟都寥寂，犹忆浓香上绮罗。

### 七夕兰韵堂雅集和韵

良友真如胶漆投，相逢不叹路何修。频年乞巧应题壁，今夕穿针懒上楼。十姊妹花刚按月，一梧桐叶已先秋。同心遮莫伤迟暮，耿耿银河西北流。

### 雪夜

地白天易晓，冻云时未去。绿窗一夜寒，青山渺何处。

#### 夜雨

春气上空林，夜声落寒井。了然斗室间，坐怯良宵永。落地杨柳风，入帘海棠影。烟薄上树消，月微露云冷。能令万籁空，方知一时静。

#### 外子下第作此慰之

北地凉风已早吹，一声长笛怨羌儿。悲嘶瘦马休蹉跎，亦有秋原草长时。

#### 金兑

金兑，字湘芷，长洲人。诸生凤翔女。

#### 秋日杂兴

秋来只有睡工夫，水槛风凉近石湖。却笑溪边老渔父，垂竿终日一鱼无。

#### 袁机

袁机，字素文，钱塘人。枚三妹。有《素文女子稿》。

#### 镜

我有秦宫镜，清光欲上天。近看花独立，远望月孤悬。菱角何时铸，盘龙不记年。无人来照影，抛掷井阑边。

#### 鐙

添尽兰膏惜寸阴，煎熬终不昧初心。孤檠柄曲吹痕淡，细雨更残背壁深。有焰尚能争皎月，无花只可耐孤吟。平生一点分明意，每为终风恨不禁。

#### 春怀

二月清明柳最娇，春痕红到海棠梢。寄声梁上双飞燕，好啄香泥补旧巢。

#### 送云扶妹归扬州

江城花落满溪烟，送汝于归二月天。一路暖风琴瑟好，春声都在木兰船。

此去蘋蘩慎所司，西湖花鸟莫相思。同怀姊妹怜卿小，珍重初离膝下时。

水榭风铎廿四桥，乘鸾月夜好吹箫。双鱼切记勤芳讯，莫负春江一夜潮。

清风林下说才华，久有诗名重谢家。学罢杭州大梳裹，又弯新髻插琼花。

有凤

有凤荒山老，桐花不复春。死还怜弱女，生已作陈人。铎影三更梦，昙花顷刻身。何如蛎与鸂，鸣噪得天真。

闻雁

秋深霜气重，孤雁最先鸣。响入空闺静，心怜永夜清。自从成只影，同是感离情。谁许并高节，寒林有女贞。

得香亭步蟾两弟信作此寄之

细雨斜风冷画屏，西堂月落梦初醒。女儿言语输鹦鹉，兄弟情怀感鹁鸪。远信有时忒客报，书声何日隔花听。吴绵买就无人寄，肠断秋山日暮青。

挽兄子才侍者陶姬

修眉云髻态恹恹，欲返香魂路莫寻。针线频劳双手爪，悲欢同说十年心。无家叹我因缘恶，瘦影怜君春恨深。从此绿窗金翠冷，兰薰粉泽尽消沈。

偶作

归梦隔扬州，空庭雨不休。女娇频乞果，婢小懒梳头。

难逢千日酒，且煮六班茶。怕引游蜂至，不栽香色花。

袁杼

袁杼，字绮文。枚四妹，诸生韩思永室。有《楼居小草》。

秋斋閒咏

閒庭扫落叶，秋月上林梢。竹老穿山径，槐稀露鹊巢。描花嫌纸窄，学字借书钞。拟制玫瑰酱，频呼小婢敲。

寄兄子才

长路迢迢江水寒，潇潇梅雨客衣单。无言但劝归期早，有泪多从别后弹。新暑乍来应保重，高堂虽老幸平安。青山寂寞烟云里，偶倚栏干忍独看。



不寐

晖晖明月转西廊，寂寂宣炉一炷香。替掩双扉风作主，代翻空柜鼠求粮。为寻古字书抽乱，多绣繁花线放长。欹枕不须人睡稳，恐教残梦觅家乡。

袁棠

袁棠，字秋卿。枚从妹，诸生汪孟翊室。有《绣馀吟》、《盈书阁遗稿》。

哭步蟾三兄

昔我于归辞故国，别母牵衣留不得。三兄送我向江南，锦浪桃花同一色。姑女章堂上爱兄贤，代作冰人赘陆宅。一家亲作两家亲，月夕花朝秋复春。同看琼圃花连蒂，醉踏平山月一轮。二兄春赴琼林宴，花砖日影摇金殿。铜章墨绶出都城，远别京华赴洛县。洛县有花花满署，正是板舆迎母处。临安雁字至维扬，整促行装从此去。辞依归去奉高堂，薰风紫紵道路长。地接函关几千里，劳损精神从此始。一家花萼聚中州，金盏琴堂屡唱酬。彩衣正要娱亲侧，天上来催赴玉楼。前年五弟先摧折，今日兄为泉下客。连理人分次第亡，刀铍一夜生胸膈。从今怕见广陵春，回首天涯倍怆神。羨杀世间嬉戏者，荆花成队是何人。

幽居

欲识蓬门境，荒苔草色深。疏篱穿犬道，巧语杂春禽。慢效阮君泪，还怜锺子心。琴书今古意，流水岂知音。

秋夜怀兄

寂寞秋声思不禁，绣帘微动晚风侵。阑干影转千家月，砧杵声移两地心。手足情怀频怅望，诗书灯火费追寻。红笺欲寄何由达，千里江南少雁音。

赋得春风扇微和

春风能扇物，淑气媚晴和。荡漾迎春转，飘摇拂面过。暖吹桃蕊绽，轻递柳梢多。助蝶翻新翅，传莺弄巧歌。有声来竹径，无影动池波。玉律回芳节，清晖映远坡。

春兴回文

沈沈绿柳和风暖，艳艳红桃晓日晴。深苑春莺啼舌巧，林花乱蝶舞风轻。

秋夕

云锁秋光夜气浓，半窗花月影重重。不知谁弄桓伊笛，黄叶萧萧下晚风。

送春有感

留春不住奈春何，飞絮飘红委逝波。巧舌鸟如莺最小，无名花著子偏多。萍浮池馆鱼吹浪，香减酴醾燕出窠。正是绿肥红瘦日，可怜青鬓暗消磨。

### 七夕

遥见微云海上生，接来一带鹊桥横。几家帘卷针楼月，何处人吹玉管笙。传说女牛今夕会，果然风露此时清。嫦娥似亦怜深夜，影照银河分外明。

### 夜过姑苏

繁华初认阖闾城，隐隐亭台月色升。两岸吴歌平岸水，红楼高映满河镫。

### 袁杰

袁杰，字淑英。枚从妹。

### 奉和简斋大兄见贻元韵

地隔乡关梦解通，忽来诗讯自南中。宦游结宅邻江令，归隐名墩属谢公。旧约未忘联舍月，新吟频忆对床风。只应岁晚相依乐，剩许追陪玉局翁。

### 王李氏

王李氏，阳山人。驺室，嘉庆辛酉拔贡安福母。有《一桂轩诗钞》。

### 秋胡行

灼灼闺中妇，猗猗陌上桑。采桑攀柔条，殷勤纤手将。良人久不归，忧思潜断肠。倾筐置路侧，四顾方徬徨。謁来谁氏子，展睇希容光。挥金却不顾，凛凛惊豪强。洗耳向泉水，澄神归家堂。孰意佻达子，即是轻薄郎。郎行薄如水。妾心皎如霜。五年久契阔，婉娈含春芳。窃谓托高义，白首偕我臧。如何乖中道，不念倚闾望。慷慨赴清波，决烈箴愚狂。慷慨固可嘉，决烈亦有妨。陷夫负隐愿，终身为不良。慈姑意斯时，创痛如樱芒。万一遭颠覆，岂非贻之殃。《终风》悼昏暴，先君思不忘。何不少隐忍，予以补救方。美人蹈勇士，意气何激昂。寄言闺中人，於此宜精详。

### 任浣花

任浣花，宜兴人。有《松筠阁集》。

### 口占示妹

痛别椿庭近六年，茕茕母女问谁怜。回思雪案牵衣处，教诵《毛诗》第一篇。

### 徐畹芝

徐畹芝，江阴人。宜兴任东阊室。

#### 借书

玉翦堂前万卷储，一编许读乐何如。浮生愿向书丛老，不惜将身化蠹鱼。

#### 月夜怀玉卮侄女

灯花欲地篆烟微，坐久浑忘月上帟。忽忆昨宵微醉后，满身花影送君归。

#### 寄浣花四姑

菜花桥畔是幽居，静掩双扉剥啄疏。为问新秋残暑后，调铅日著几行书。

#### 任玉卮

任玉卮，宜兴人。诸生颂女，呈炘室。有《拨香斋诗词》。

#### 送陈姨归新安

伤子远别离，辞亲日初晓。后会知何时，泪滴荆溪草。

朝来理行棹，一别萦千思。难为雁行留，执手空嗟咨。

絮语不能尽，归来未几时。双亲惜儿去，白发又丝丝。

隄边古杨柳，暗拂行人衣。绾尽情多少，莫教音信稀。

#### 敬题先严双栖图

图就严亲清健容，薇花夜月两溶溶。应怜母氏留长恨，故遣丹青觅旧踪。

#### 杨琼华

杨琼华，字瑞芝，汉军旗人。大学士应琚女孙，重英女，明新室。有《绿窗吟草》。

#### 偶作

千金买骏马，百金买宝刀。瘴云浓似墨，昨梦到哀牢。

杀气缠旄头，寒光剑铁浮。请缨如有路，愿雪戴天雠。

#### 秋云

乱山飞不断，皎月失光明。不解为霖雨，无端掩太清。边关游子泪，亲舍旅人情。愿藉西风力，依然万里晴。

#### 八月八日闻舍弟长龄蒙恩释狱

闻道金鸡下赦竿，廿年今始脱南冠。泪凝狴犴伤公冶，血洒弓衣愧木兰。绝域丹诚生马角，九重雷雨洗忠肝。遥知多病垂衰母，应为娇儿进一餐。

#### 夫子奉使入都诗以志别

白发高堂望，轻帆去莫迟。计来相别日，想到省亲时。同有乡园感，非关儿女私。庭闱知恋恋，不敢数归期。

#### 惲珠

惲珠，字星联，一字珍浦，晚号蓉湖道人，阳湖人。肥乡典史毓秀女，满洲泰安知府颜廷璐室，嘉庆己巳进士、江南河道总督麟庆母。有《红香馆诗草》。

#### 老松

万古郁葱茏，何人种此松。苍涛声一片，圆盖影千重。鹤骨擎丹壁，虬枝秀碧峰。只愁春今节，雷雨化为龙。

#### 雨过

雨过中庭万象清，绿阴深处晚凉生。自移竹榻来幽院，坐听枝头好鸟鸣。

#### 锦鸡

閒对清波照彩衣，遍身金锦世应稀。一朝脱却樊笼去，好向朝阳学凤飞。

#### 春游

芳草芊芊没马蹄，春光最好帝城西。桃花浪暖鱼苗长，杨柳阴深燕子低。一片明湖如镜朗，几重远岫与云齐。雅游终日浑忘倦，缓促香轮月满溪。

#### 接家书

书寄平安慰远人，那知对此倍思亲。高堂真否身康健，雁字分飞已四春。

#### 暮春

不觉春将去，天涯人未还。可怜巾上泪，点点尽成斑。

种菊次外韵

主人幽兴学陶潜，植向东篱露未乾。花事一年从此尽，等閒莫作众芳看。

雨夜舟中

连宵春雨洒征篷，独拥罗衾漏欲终。千里怀人无远近，梦魂长在浙西东。

钱塘渡江

潮头不怕险，飞棹逐潮行。风力一帆饱，山光两岸明。南来出涧壑，东望达蓬瀛。直破怒涛去，壮怀无限情。

喜大儿麟庆连捷南宫诗以助之

乍见泥金喜复惊，祖宗慈荫汝身荣。功名虽并春风发，心性须如秋水平。处世毋忘修德业，立身慎莫坠家声。言中告戒休轻忽，持此他年事圣明。

崧山驿晓发

旅馆柝声残，呼童整绣鞍。林遮山径黑，月浸戍楼寒。少小长随宦，驰驱竟自安。平生多游兴，到处望烟峦。

佛芸保

佛芸保，字华香。满洲旗人麟庆女，宗室延煦室。有《清韵轩诗草》。

雨后游极乐寺

连朝春雨喜初晴，为访珠林出禁城。古树遮门如有意，野花遍地不知名。竹依佛殿香弥远，鸟入禅■语亦清。笑我拈毫才觅句，几声晚鼓又催行。

寄怀智珠师

一纸书传万里心，何年仍复听琴音。平沙旧曲今谁授，多少离怀托苦吟。兰闺梦不到天涯，南北云山道路赊。又是中天秋月朗，夜深应更忆京华。

张学雅

张学雅，字古什，太原人。诸生佚长女。有《绣馀遗草》。

闺中閒咏

竹院萧萧人语空，夜来风雨太怱怱。侵晨独倚阑干角，閒数池莲几朵红。

张学鲁

张学鲁，字古史，太原人。佚次女。有《倡和集》。

秋闺

窗前松露滴空阶，玉漏沈沈月影斜。忽听数声新雁唳，云山回首渺天涯。

张学仪

张学仪，字古容，太原人。佚三女，金坛给事中于沚室。有《滋兰集》。

晓起漫兴

帘开梁燕觅泥忙，冉冉薰风欲倦妆。苑柳垂绦笼绣户，风桃飞片点书床。修眉不整因伤别，碧槛慵歌怯晓凉。不耐城东吹画角，听来浑欲断人肠。

张学典

张学典，字古政，号羽仙，太原人。佚四女，诸生杨易亭室。有《花樵集》、《倡和吟》。

莲浦谣

谿水溶溶鱼唼唼，初上鸣桡木兰楫。雪羽ㄚ离ㄚ徙映倒光，晴光泛艳苍波阔。翦断春绡碧似烟，花垂两岸浓相连。澄明镜里红妆浅，菡萏新容出水鲜。风飘罗袖红丝蹙，山碧添愁眉半曲。悠悠玉浪浸春云，无穷柳色前隄绿。

江南曲

落日乘潮去，荆歌戏采莲。相逢娇不语，佯笑堕花钿。

宫词

内苑繁华柳放丝，御沟流水涨胭脂。欲将心事题红叶，未识随流付阿谁。

咏霞

冉冉长天散丽辉，韶姿染就媚春晖。光凝画阁铺文绮，彩映晴空曳舞衣。傍水更明添潋潋，因风欲碎转霏微。晚来至竟归何处，一片俄惊上锦机。

感亡姊旧居

绣网蛛丝镜满尘，閒花狼籍不知春。深愁怕见梁间燕，犹是呢喃觅主人。

张学象

张学象，字古图，号凌仙，太原人。佚五女，诸生沈载公室。有《砚隐集》。

岁暮感怀

缉柳编蒲志苦辛，半生多难已忘身。橘林乏实供饘粥，突舍无烟荐藻蘋。空羡田真兄弟乐，堪怜任昉子孙贫。一函遗草谁为达，检得徒令泪满巾。

杂咏

明镜如满月，朝朝弄妆靚。一自弃尘埃，不照孤莺影。

夙昔爱琴鸣，流泉指下生。子期今已没，谁听断肠声。

张学圣

张学圣，字古诚，太原人。佚六女，金坛于廷机室。有《瑶草集》。

晓景

搔首见残月，幽然晓色嘉。迎风抽草带，挹露落琼葩。是物含春意，何方驻岁华。只宜倾绿醕，尤胜试香茶。海气腾寒旭，江烟作早霞。数声听渐远，争起噪群鸦。

春暮

萋迷春晚心，日暮鸟归林。一点花才落，空庭草已深。

张学贤

张学贤，字古明，太原人。佚七女，金坛于星曜室。有《华林集》。

閒望

开窗看落日，还似晓迟迟。波动风来后，花残雨过时。几回闻乳燕，懒去折芳枝。惟对初生月，清辉共映池。

春暮

阶前草渐碧，独坐惜残花。蛱蝶双飞去，疑春在别家。

陈慧珠

陈慧珠，字湘簪，海宁人。同知亿女，遂宁举人张问安室。有《香远斋诗稿》。

冬初即日

吴绵初熨帖，弹指已秋残。人月平分瘦，江天一色寒。窗虚风力峭，树老叶声乾。枵触西堂里，濡毫兴未阑。

送柳门弟之沔阳

念子乍为客，扁舟下武昌。几朝风日好，一棹荇花香。去路江涛阔，山城落日黄。莫缘暂离别，俯首对斜阳。

林颀

林颀，字韵徵。遂宁张问陶继室。

戏题外子写照

爱君笔底有烟霞，自拔金钗付酒家。修到人间才子妇，不辞清瘦似梅花。

胡缘

胡缘，字香轮，平湖人。星禄女，许景钟室。有《琴韵楼诗钞》。

湖上晚归

买棹寻春背夕晖，一双蝴蝶上人衣。明湖十里春无迹，带得花香满袖归。

留春

留春无计送春回，泥饮何须婪尾杯。长日暗移新节序，绿阴深护旧楼台。几番风信吹桐乳，一夜雷声迸竹胎。睡起关心无别事，卷帘好待燕归来。

秋夜吟

秋风淅沥秋月明，秋云澹澹秋露清。高楼夜坐百端集，银河耿耿西南横。秋声一片立寿衣杵，彻夜凄凉不得住。铜炉香烬更漏残，一夜閒愁添几许。

题明小泉居士戈止赏鞠吟后

秋气入林樾，寒花开晚艳。达人羨高节，藉此俗骨砭。至今荣寿堂，往事如电闪。犹想开樽时，各各张坛坫。诗迫杜陵豪，酒倾桑落醪。七贤韵互酬，一老翰独染。留传研粉



笈，墨澹光芒敛。弄藏赖云衲，携赠戒仆僦。扁舟泝斥空明，归途犹永念。微闻担稻歌，凉月出野店。

### 秋夜

脱叶何曾上故茎，乱虫苦作不平鸣。已教楚客愁难遣，况听高楼戛笛声。

### 西谿

残云逐归禽，落日前村暮。荒林木叶多，风吹如急雨。镫火出柴荆，隐隐闻人语。一声古寺钟，月挂西谿树。

### 野花

谁遣名葩在野塘，嫣红姹紫斗春光。一般雨露无私被，到处郊原有异香。逸客孤芳惟自赏，村姑薄媚不成妆。夕阳影里归来晚，为惜韶华醉一觴。

### 送春词

绿阴如幕草如烟，九十韶光弹指还。几处莺啼听不得，高楼烂醉夕阳天。水晶帘卷独吟诗，尚有残红恋故枝。风送榆钱时满地，阿谁教作买春资。

### 琴韵楼春尽遣怀

搓烟垂柳一丝丝，帘押无风放故迟。正是养花天气好，又缘小病负芳时。

草痕得雨绿参差，初日烘窗燕语迟。满地落红閒不扫，自拈象管画乌丝。

### 午梦

午梦初残后，纱窗独坐时。卷帘归燕疾，堕地落花迟。

### 归宁后寄外

社雨连朝洒麦田，辞家又值月初弦。菜花黄后桑芽白，好向东湖放酒船。

### 舟次魏塘

北下丘为里，乘流到魏塘。薄阴催稻秀，断岸叱牛忙。转土多窑户，叉鱼习水乡。閒愁若为遣，恐少养生方。

### 登东塔

绝顶风扶上，何从著点愁。菰蒲初出水，鸿雁渐惊秋。黄叶林中寺，夕阳谿上楼。

登临还极目，得句又句留。

### 送大兄之广陵

明月扬州廿四桥，送君此去路迢迢。纵饶词句飞《金屑》，更有何人按玉箫。

### 落花

花事浑如梦，韶光日暗驰。残霞烘远树，香雾匝新枝。小院莺啼后，高楼帘卷时。将飞犹恋恋，欲落故迟迟。新涨碧於染，浓阴绿渐滋。风吹依细草，雨急点芳池。春色三分尽，秣华一夕衰。江南有孤客，绕树独吟诗。

### 舟中望马厰庙山

雅山之北案山南，翠阜隆起瞰澄潭。虽无洞壑深窈窕，平田遥望堆晴岚。图经地志均失载，马厰名因野庙在。当年遵海岂至此，或因女吴通行李。簪茝南来骑似云，高冈亦散紫骝群。后来秦皇鞭石时，指挥列嶂如市儿。尔独倔强遯荒野，不随九峰环卫海东陲。作诗吊古增惆怅，芥子须弥无定相。苦忆牛山陨涕人，齐女思归长北望。

### 晚过弄珠楼

高楼面湖水，水光澹容裔。扁舟一叶归，碧云起天际。

### 琴韵楼夜坐

凉风吹井梧，淅沥飘残叶。开轩乘晚凉，庭院澹将夕。月出两头纤，清影入帘额。嚶嚶阶下蛩，啼破一痕白。

### 月夜

小院夜沈沈，幽人弄素琴。诗因多病减，愁到暮天深。离恨谁家笛，捣衣何处砧。怕他双鬓影，一夜被霜侵。

### 梁德绳

梁德绳，字楚生，钱塘人。大学士、谥文庄诗正女孙，侍郎敦书女，德清嘉庆己未进士、兵部主事许宗彦室。有《古春轩诗钞》。

### 游海幢寺

春波潋滟漾轻桡，共访禅门到竹寮。人语不闻香界静，花光时引鸟声嚣。参差古殿依山树，早晚疏钟应海潮。归去日斜馀兴永，吟情相与挽长条。

### 镫下写玉篇

百和馥香袅篆烟，镫笼蜡纸照残篇。一章急就窗前课，往事沈思十载前。

#### 寄外

商风落木秋萧瑟，庭橘团霜绽金实。时序推迁感念深，众芳消歇闻啼鴂。屏山徒倚夕阳斜，目送浮云气纤郁。君子于役路悠悠，女子善怀心惓惓。五年三度伤离别，一度柔情一断绝。才当夏尽喜君来，那料秋初君又出。君期岁暮当复还，无奈征期太仓卒。梅关西去接章江，岿嶰吴山青入越。如梭小艇泛瀟湘，如叶轻装度岑嶭。滕王阁外落霞飞，钱塘江上重潮汨。壮游足以散幽滞，远揽山川富奇崛。虫向蛰毫管秃千枝，豪情恣向诗篇泄。迢迢江汉限无梁，思欲从君遑有术。兰闺终日但凝愁，忧从中来不可掇。悄然泪下沾衣裳，出户徘徊仍入室。庭空寂寂昼阴深，窗虚肃肃清飙拂。荷衣已褪菊屏残，海棠半萎蕉心折。苔阶败叶扫还生，似我回肠宽更结。香兔烟微夜长极，帘栊凉影筛秋月。铜铺露气冷於冰，玉砌天光明似雪。盘桓不寐到更残，渐渐星河淡将没。无边景色为谁佳，得句仍忘懒拈笔。人生不有远离悲，焉知聚处足欢悦。行人今夕宿何方，天寒苟得无饥渴。想见亭亭太瘦生，苦吟百计搜心血。听风听水闭筠篷，篷外滩高浪突兀。戍鼓渔榔厉响清，风雅芦雁悲声咽。回望云山千万重，客怀那不增骚屑。纵教内典豁尘根，安心未必能如佛。料应革带日移孔，卯酒壮颜清见骨。寄书不敢道相思，苦劝加餐并慎疾。残镫勿恋看书久，半臂勤添御寒烈。万事加心身在远，僮仆无能徒蹇呐。高堂频自说行人，雁信不来垂忆切。强宽时日数征程，惆怅私心转恍惚。小儿岂止不解意，跳荡终朝尽顽黠。侍姬正复可怜人，似慧如痴复似谲。偏将琐语溷遥思，乱折秋花供簪栉。众中谈笑总无聊，幽衷脉脉何由揭。明知少别非为苦，也识归期近可必。宛转牵愁不自知，春蚕茧缚兰膏熬。仰看众鸟定双翔，俯盼庭枝不单茁。嗟我与君同一身，一身形影如何别。寻常相隔尚相忆，何况三秋千里阔。长路无情漫浩浩，芳时不觉去忽忽。安能奋翅起高飞，到处相随勿相失。

#### 飞来寺

曾侍廉车过此山，十年还又到禅关。苍藤石磴依然在，忆泪弹成苦竹斑。高敞经堂傍水湄，萧梁旧迹几更新。山前一片槃陀石，曾坐西来面壁人。

危亭百尺架山根，瀑布当窗划翠痕。洞口白云迷远近，一环何处访归猿。

净碧屏风面面虚，松杉饱阅岁寒馀。澄江一曲清无底，倒影晴岚画不如。

#### 即景呈夫子

袅袅疏林几抹烟，青阳湾转小村前。薄云漏日明孤塔，新水涵秋淡远天。静坐可无清课遣，举头便结看山缘。凭君妙悟能拈出，画意诗情在者边。

#### 山村

学鸣翠鸟贴枝飞，无主红花乱碧围。溪女贪看岩瀑落，不知细雨湿罗衣。

#### 久雨即景

半月溟濛雨未晴，閒阶如绣绿苔生。亚枝花蕊寒犹禁，出谷莺簧啭尚轻。压树黑云飞不起，栖檐冻雀暗无声。屏山徙倚春游寂，拨尽炉烟梦亦清。

小韞甥女于归吴门以其爱诗为吟五百八十字送之即书明湖饮钱图后

珍禽翔云霄，山林一回顾。池鲂送江河，愿渠得所去。严妆既已竟，旭旦戒兰驭。施衿申丁宁，未语泪先堕。诗人悲《葛{卅晶}》，甥独丁此苦。有姊嫁远方，归安限礼数。有兄守衡门，尺水困濡响。岂无强近亲，相视等陌路。外家谊独真，寒暑无异遇。惟我与汝母，同怀意深固。汝母失养年，遗汝在婴孺。虽非握手讌，默默相委付。汝随严亲游，飘摇亦云屡。桓山悲剧别离，哀音向谁诉。我闻迎汝来，相依一年住。团圞小姊妹，提挈共朝暮。庭有满栏花，襟汝染香雾。室有盈架书，腹汝饱竹素。秀眉日连娟，丰容逾修嫵。湖水泮轻澌，东风绿芳树。婿家宦姑苏，诒吉告迎娶。慰我十年心，肇汝百年务。临当加景行，且复须臾驻。念甥少小日，颖出抱神悟。七岁裁小诗，往往有佳句。所惜女子身，讲授乏师傅。但从意匠营，颇合风雅趣。拟古揽荃桂，体物妙风絮。夫子论诗苛，瘢垢好磨鑿。纷纶辨真伪，许汝得参预。郎君诗礼门，况闻美无度。渊源有舅女章，别集久传布。相攸善所归，岂在盛筵具。芳辰爱景光，帷房乐恬豫。唱酬陶性情，琴瑟宛在御。梁孟暨鲍桓，庶几古贤慕。尚须勤妇职，才名非所据。结帨示成人，著代行降陟。寒湿奉席衽，甘滑调七箸。勿缀夜鐙迟，盥栉晨鸡曙。使令宜敬承，意指勿轻忤。所贵睦上下，但莫惑婢媼。柔顺汝性成，迂懦我所虑。行己苟不愆，发言亦何怖。佩汝白玉珩，愿汝节行步。衣汝红罗襦，愿汝保和煦。外祖舅父母，各各汝告语。一一识诸心，久久勿遗误。述昏傥有诗，申情傥有赋。江鳞既东来，云鸿亦南翥。毋以女萝莠，而忘宛童寓。虽无毛里恩，亦复关肺腑。墨车已授綬，画舫待津渡。伫立望去轮，辗转不知处。感念何时平，释此心神注。

秋日湖上

玉带桥边野望时，明流秀嶂碧参差。香馀水面残荷叶，梦冷隄阴睡鹭鸶。往日销金留落照，於今铸铁剩荒祠。数株衰柳西风里，过客攀条有所思。

至天竺

为礼金仙去，山容出郭清。野花时五色，水鸟爱孤行。一径入寒翠，回溪作雨声。无边萧爽意，暂此豁尘情。

述怀

一住西湖二十年，早看青鬓换华颠。閒来输与眠沙鹭，冷处甘同抱叶蝉。绝少馀资供大药，幸无离梦到遥天。当年本有溪山约，应逐维摩老辋川。

甲午仲春赴邵武輿中口占

衰年决意竟山行，十日浓阴渐放晴。万叠青山围竹径，千条雪涧作潮声。异乡喜见莱衣迓，夹道遥来彩仗迎。此去樵川应不远，早将慰语寄邮程。

曹贞秀

曹贞秀，字墨琴，长洲人。教谕王芑孙室。有《写韵轩集》。

澹香楼题词

青元宫里悟前因，六甲灵飞拜玉真。跨虎不来同写韵，去随南岳魏夫人。

姊妹花间买一鬟，明妃生长问乡关。镜中眉翠浓如许，月子弯弯句曲山。

曼殊小宛盛题词，淮海新编又一时。何日九龙封墓版，我当书志葬西施。

从妹琼娟未婚守志励节甚高寄示言志并见怀之作答之

几年消息渺天涯，不道秦箫换鲁瑩。黄鹄浩歌传白雪，紫鸾孤舞烂红霞。湘筠有泪多成节，古柏留春不在花。千里裁诗寄珍重，相思聊当折疏麻。

秋日偶成

报秋梧叶卷窗前，岁月他乡不计年。冰簟寒生新雨后，玉砧声急晚凉天。蝉嘶疏柳轻烟外，雁度西风落照边。几度望归归未得，还将归信卜金钱。

兆佳氏

兆佳氏，满州旗人。有《西园诗钞》。

短歌行

嗟房之空兮，空且可居。门阑幽寂兮，孟氏之庐。清镫荧荧兮，有子读书。昏夜勤勤兮，吾志硕图。皇天垂鉴兮，儿能成儒。终归泉下兮，无愧吾夫。

秋日

露滴红兰泫，风吹碧叶纷。赋才惭宋玉，病骨似休文。镜篋收残黛，衣囊冷旧薰。不须惊噩梦，过眼总浮云。

高梅阁

高梅阁，晚号荆布老人，项城人。诸生玉麟女，张安雅母。有《彤短集》。

三弟归自云南其去也过舍辞行赋此送之

今宵方一晤，明日复长驱。弟妹中年少，风尘万里孤。青霜盈谷壑，白浪满江湖。珍重平安字，何时到敝庐。

### 晓望

晨钟惊独起，豁眼上高楼。海日披云幔，青天解月钩。露浓花欲睡，树晓鸟慵留。静躁皆由性，多殊莫共谋。

### 老境

事事求全称意难，安贫知足有馀欢。旨甘未缺常时饱，轻暖虽无可御寒。閒共儿孙讲书画，任从子妇备杯盘。老来蔗境真天幸，但愧衰迟日素餐。

### 写字

老人尽日身閒极，巨案长毡设近门。古刻爱临凭手颤，细书不作为瞳昏。春来杨柳风三径，秋到梧桐月一园。漓墨飞毫聊卒岁，珍藏弃掷任儿孙。

### 钱蕙纈

钱蕙纈，嘉定人。江宁府教授塘女，平阳陈振孟室。有《女书痴存稿》。

### 秋感

凉飙日夜至，落叶满平原。敷荣艳春节，萎脱馀秋根。客心易感物，岂不思故园。别离经万里，愁苦难具言。昔为掌中珍，锦幄施华轩。今作路旁草，稀逢雨露恩。飘零每自惜，患害仍朝昏。内养学玄豹，外术惭白猿。湘江有馀恨，纨扇多愁怨。龟勉修令德，迁延弭众冤。归云拥旻日，昏鸟向林翻。独立久延伫，忧伤谁与论。

### 夜坐

遥夜不成寐，披襟坐前扉。凉月下庭砌，北风吹罗帏。花阴纷倚薄，潭影相含辉。人幽境逾寂，心定无是非。有衣聊自著，有笔聊自挥。顾影即为伴，閒吟亦疗饥。疏慵存我拙，傲慢任人非。失足良可悯，坚志谁能违。盈满易倾覆，荣枯同所归。迟明园径熟，浥露摘芳薇。

### 江村

江村时纵目，情景似瀟西。地让群山曲，天临旷野低。浮云连远树，飞瀑接前溪。安得襄阳笔，摊笺一品题。

### 送外之广陵

往事休重省，时来且自强。男儿能作健，蓬筚亦辉光。旅食风霜苦，离居岁月长。傥成苏季志，惟望早还乡。

### 寒夜吟

江干诸姊妹，此夕正相思。那信寒闺内，孤镫独赋诗。

天涯沦落久，能免怨离群。赋尽伤心句，何由寄汝闻。

### 江行杂咏

归舟顺流轻疾，白鸟眠沙正安。惊起却飞何处，随风飘落前滩。

远岸连天莫辨，青山似有若无。隐隐牧童何许，牛羊閒嚼平芜。

闰友戏呼余为女书痴偶成一绝聊以见志

几回惆怅叹蛾眉，寂处深闺未有师。但使一朝通妙义，不妨人唤女书痴。

或问翁归有所积否作诗答之

半生作宦世相违，隐退忽忽返旧扉。一路云山都不带，满船惟载月明归。西粤曾经宦辙驰，金陵住久岁频移。归来自检行囊里，赢得锺山数首诗。

### 段驯

段驯，字淑斋，金坛人。知县玉裁女，仁和苏松太道龚丽正室，自珍母。有《绿华吟榭诗草》。

### 晚行

几点雁横秋，新寒倦客游。碧峰云外隐，纤月水中流。衰草连荒道，残碑卧古丘。停车凝望处，枫叶绕层楼。

### 晓起渡钱塘

晓出钱塘口，江天月尚浮。晴初山色淡，风定早潮收。离雁随人远，樯乌解客愁。富春名胜地，欣得一帆游。

### 金礼羸

金礼羸，字云门，浙江山阴人。秀水举人王昙室。有《秋红丈室遗诗》。

### 舟泊莫泾拓东坡三过堂诗

一棹禅镫四壁红，桑城荒影踏冥濛。为寻马券迟僧寺，谁捏鸿泥塑长公。石版漫镌三过字，布帆轻趁两番风。越来溪上年年住，我亦家山在梦中。

韩鸾仪

韩鸾仪，字隐霄，钱塘人。有《绿窗同怀稿》。

姚米山太守翀以卢观察望吴山八峰诗属和家君因率弟妹限韵分咏玉筍峰

山含岼卓立自然渐，不逐龙孙冒雨添。解箨无心完太璞，笑他玉版断新尖。

棋盘峰

坦如方罫自然平，未许人将黑白争。惟有紫阳招野鹤，沧桑一局寄閒情。

韩凤仪

韩凤仪，字隐雯，鸾仪妹。

玉筍峰

云牙交迸出巉岩，秀挺依稀玉筍尖。朔雪春雷经几许，未曾减亦未曾添。

剑泉峰

棱棱峭立异群峰，疑淬吴钩光上冲。虎阜石顽徒试剑，生公见亦让机锋。

王玉燕

王玉燕，字玳梁，丹徒人。文治女孙。

鲍菡香大家赠诗次韵奉酬

兰香方许脱尘埃，德曜惟堪隐草莱。每对牙签惭失学，乍拈斑管敢言才。琼瑶过尺原难报，锦绣盈机岂易裁。安得化身成脉望，常餐奇字侍妆台。

题自画兰为某夫人寿

砌草原从谢氏栽，清芬和露泛霜杯。人间春蕊开千遍，侍宴兰香夜甫回。

孔璐华

孔璐华，字经楼，曲阜人。衍圣公庆镕女兄，仪徵大学士、谥文达阮元继室。有《唐宋旧经楼稿》。

阙里随祖母程太公夫人恭迎宫輦



《箫韶》风暖净尘沙，缥缈炉烟吐绛霞。凤辇曾停携半袖，玉音重问赐名花。千章宝炬春光晓，十里旌旗泗水斜。何幸随亲同被泽，皇恩优待圣人家。

### 题石室藏书图

敬题藏书图，盥手展卷轴。开图心更伤，先姑倚书屋。端严坐幽居，风景满清目。诗书藏石室，庭前荫桐竹。夫子尚幼年，侍亲捧书读。我舅因远游，慈训严且肃。夫子本好学，显亲与宗族。哀哉孝思纯，每忆慈亲哭。命吾当勤俭，往迹说心曲。诗书亲口传，典衣买薪粟。常自忆昔时，抱恨意未足。我闻惟泪下，哽咽对清烛。未得侍慈颜，百身何所赎。衔哀拜遗容，濡毫更莫祝。

### 题养蚕图

静思吴越中，民妇实可怜。每到春夏交，育蚕胜力田。采桑不辞劳，陌上破晓天。江北蚕独少，求茧尚艰难。我取越蚕子，育之楼榭间。北郊多柔桑，买此不费钱。越中旧仆妇，养蚕已多年。率彼怀其种，如蚁生蠛蠓。每日亲视之，桑叶何攒攒。将成色明洁，分箔上簇山。如雨食叶声，三起还三眠。吐丝皆成缕，作茧皆成圆。缫丝可为帛，剥茧可为绵。我思淮南人，耕稼业已专。何不教村妇，采桑满陌阡。民风既可厚，民力亦少宽。为语儿女辈，物力当知艰。几树桑青青，千个茧团团。贫女一月工，织成绮与纨。绮纨在尔身，忍令污且穿。所以莱公妾，讽谏咏诗篇。

### 冬日雷塘墓庐有感

十载归陈留，每每思故园。未识我姑面，含悲惟自吞。常见吾夫子，逢节慕亲恩。伤心不敢语，幸有椿堂存。视媳如弱女，义训谆谆言。凡为妇道者，德谦礼义纯。优然而待下，仆婢亦和温。克勤亦克俭，所闻敢不尊。谁料今夏时，变幻更莫论。山颓天忽倾，伤心复断魂。耿耿肺腑碎，泪痕变血痕。几度悲往事，无语望黄昏。衰草被长阡，松柏围古墩。罪重复何说，哀哀守墓门。

### 借居冶山弟公邸补种花树偶成

虚庭自幽敞，依依百笏宽。我家汤沐宅，借居聊盘桓。堂前有古槐，绿阴影团圞。我亦爱花木，橐驼种此间。新槐出檐际，垂柳拂栏杆。紫藤杂丁香，还倚竹数竿。海棠最媚妩，桃李何攒攒。虽未成老圃，因之忆杏坛。春深雨渐多，日日对花看。待得三五载，群卉皆可观。出游已十载，复来住长安。开轩惟把卷，恬然心共閒。

### 广东节署新建学海堂

主人羊城节钺久，案牍终朝不释手。馀暇偶登越秀峰，择得一峰辟数亩。略加修筑有堂台，海阔天空眼乍开。夏木千章梅百树，登临遥望兴悠哉。紫澜翠岛摇清目，雨过风生凉满竹。四面窗纱日影微，云树相连满天绿。非为閒游设此堂，为传学业课文章。从今佳士多新作，万卷收来翰墨香。主人素爱研经史，欲美民风莫如此。更助香膏催读书，岭南他日留遗址。吾家尼山虽最高，无此海天好山水。

### 忆外书寄滇南

拟入京华共旧林，不期滇海久分襟。锦囊但觉新诗少，白发还愁旧病深。万里江湖难放棹，一楼风雨独停琴。致君珍重无多语，惟把丹心答帝心。

### 汉金缸歌

一铸金缸忆汉年，汉宫遗制至今传。赵家姊妹来何处，燕燕飞来绝可怜。双双燕入昭阳殿，班姬辞辇甘秋扇。黄金作屋贮温柔，《西京杂记》分明见。专宠承恩望久长，玉阶铜沓斗新妆。碧栊朱户参差起，歌舞声中夜未央。此缸嵌壁巢深阁，象床熊席明珠蛤。白壁蓝田似列钱，缸中翠羽涂金合。汉宫劫后久成灰，春风惟有野棠开。美人黄土归何处，此时犹见燕飞来。当年威斗尽颠倒，鼎在陶陵亦难保。千年未损古金纹，农夫犹得耕芳草。可怜涎涎啄王孙，缸上泥巢旧有痕。一钁人手寒金重，不打仓琅古木门。

### 刘文如

刘文如，字书之，阮文达公侧室。

### 题石室藏书图

开匣拜遗容，凄然心暗伤。未及见慈亲，惟见图卷长。夫子秉遗教，显亲早名扬。当年课夜读，教以古文章。治家似鍾郝，半典嫁时裳。聚得千卷书，训以石室藏。夫子成德器，终天忆北堂。四祭陈五鼎，举爵每徬徨。哀哉寸草心，难报春晖光。於今选楼上，即是古墨庄。圣恩酬母德，更图一品妆。

### 题养蚕图

昔年蚕事传余杭，以纸裹种来维扬。一冬霜雪不甚冷，几番任向书楼藏。时光又到二三月，焚香试拜马头娘。蜷蜷细种活如蚁，手持鹅羽亲分将。此时食叶须细叶，买叶却向城北乡。一篮嫩绿不沾雨，青青颜色含轻香。头眠刚到声寂寂，无风无雨调温凉。越中仆妇最谙此，命伊率事居西堂。二眠二起渐多食，分箔满室还满床。夜来添叶直到晓，声如笔落纸奔忙。三眠已老不食叶，腹中嫩丝含清光。素丝吐尽结成茧，可怜自裹如入囊。草山簇簇摘不尽，珠丸玉果盈倾筐。繰车向风取凉意，轻轻抽得冰丝长。从此织成罗与绮，从此染成玄与黄。传与江城田舍妇，曷不努力兴蚕桑。

### 咏汉金缸

赵家姊弟能音乐，大燕轻盈小燕啄。一朝选入汉宫来，君王宠爱生谣诼。昭仪绝幸住昭阳，彤朱髹漆百宝光。涎涎尾摇金屋里，玉阶铜沓木仓琅。壁带列钱在春殿，明珠翠羽如亲见。繁华铸出黄金缸，屈曲夔纹锁双燕。繁华千载尽成空，甘为绋封自绝宗。太息曹宫赫蹄药，椒香别殿怨东风。此缸小劫天所弃，千载沈埋在何地。拾得圆环归我家，为检《汉书》证古器。团圞想见飞燕时，开匣摩挲手自持。温柔乡冷今何处，不若寒金可咏诗。女师我爱班家淑，辞辇归来守幽独。万载传流赋一篇，莫共伶元外传读。

谢雪

谢雪，字月庄，长洲人。阮文达公侧室。

题石室藏书图

盥手披图看遗迹，图中石室神仙宅。卷轴参差叠六经，都是慈亲手所积。当日严亲游历时，慈亲彝训在书帷。自课四声通韵语，膝前把卷胜名师。敬睹遗容开泪目，依稀小榻依花木。秋庭新爽扇凉生，石室细书随意读。幼学初资慈教成，壮学还因严训行。一品紫泥封诰后，圣人许说显亲名。

真子飞霜镜歌

斋中金石雅堪咏，宝匣初开窥古镜。谁人铸出碧菱花，一片清光月同净。真子作镜名飞霜，背铸梧桐栖凤凰。真子一去不复返，造象依然镜里藏。琳琅修竹戛清影，几上剑光明耿耿。破土龙孙解箨时，残春正暖何尝冷。更有莲花出小池，珠盘翠盖走灵龟。灵龟腹下成虚纽，好让丝绦系更垂。镜背下方有池水，上方云气飘飘起。顾兔天光照水光，千年不改常如此。真子披衣坐竹林，却当初夏弄瑶琴。七弦一拂动风雨，晴来忽激清商音。倏尔长空变凉节，破晓霜华霏玉屑。翡翠楼前片片明，鸳鸯瓦上丝丝结。此时寒逼衣袂轻，月残霜落更虚明。青铜内有古人在，琴上无声如有声。此镜千年圆不缺，真子为谁疑未决。若是山阴道上人，一舟相访霜如雪。

唐庆云

唐庆云，字古霞，吴县人。阮文达公侧室。有《女萝亭稿》。

题石室藏书图

选楼启匣蕙香烟，共仰慈颜意黯然。今日华封真一品，当时庭训比三迁。半园花木归图内，万卷诗书在膝前。石室洞天皆福地，好将仙馆说琅嬛。

咏汉金釭

玩此黄金釭，我怀感古昔。飞燕来赵家，姊妹并殊色。联翩入昭阳，同侍君王侧。昭仪宠更深，宫舍竞华饰。铜沓白玉阶，翠羽绿熊席。壁带为列钱，二等圆一尺。团圞似月明，中嵌蓝田璧。汉宫既为烬，耕夫破荆棘。得此一规铜，尚是西京迹。莫问仓琅门，春燕不相识。

真子飞霜镜歌

我家金石罗文房，案头拂拭开绡囊。晓来启匣见古镜，青铜一片铭飞霜。略似菱花分八角，千年不蚀凝清光。背有古画老桐树，双枝并立栖凤凰。莲花绰约出小沼，神龟游上莲叶香。新筍破泥欲解箨，参差四面皆笄簪。山云轻聚衔半月，下有小几横干将。真子何人

在竹下，膝前更见清琴张。仰观星月共皎洁，七弦乍弄神洋洋。仙人春夏坐晴暖，忽将雅操翻清商。一弹閒院有寒气，再弹更觉天苍凉。五更碧瓦一痕破，惊起青女窥鸳鸯。此时凉气满庭树，拂叶惨淡将成黄。阶前明月冷如水，霏霏玉屑沾衣裳。霜华拂拂看不定，冰蚕丝紧鸣指旁。我揽古鉴照双鬓，神清意静吟且长。云净遥天变春夏，每见夜色寒苍茫。真仙千载不知老，我且磨镜同诗藏。

刘繁荣

刘繁荣，字润芳，宝应人。阮文达公子妇，清河道常生室。

题石室藏书图

闻昔我祖姑，贞静本淑质。相夫兼教子，治家敦朴实。卓识明大谊，忠厚积隐德。克笃生吾亲，年已近三十。吾亲总角时，聪明即起特。作诗见清新，读书深有得。所以吾祖姑，爱亲尚柔克。严法孟母迁，勤效敬姜织。教亲穷经史，必当求绝识。教亲务圣学，不可听异术。教亲明世务，通达贵正直。教亲习礼仪，谦约尚谨飭。每当塾课归，亲即侍几侧。夙夜奉慈颜，动必循典则。书声四处闻，闇然居石室。嗟乎吾祖姑，乡间本共式。披图神往之，能不忆当日。

阮恩滦

阮恩滦，字湄川，仪徵人。文达公女孙，清河道常生女，钱塘沈霖元室。有《慈晖馆诗词》。

和宋白玉蟾弹琴诗韵

湛然抱琴癖，閒弹送夕阳。云和不可作，一曲一回肠。

黯黯秋云里，森森修竹间。化机人不识，飞雁落空山。

山月瞰长空，泠泠十指中。成连沧海上，千古叹高风。

长芦庵

大江茫茫江水白，隄畔筑庵护深碧。绯桃绿柳锁双眉，日浸波光荡云液。新芦簇簇满长洲，深厚由来畜土脉。彼苍眷注优且渥，四十年中地频辟。千村黛色接云容，百顷岚光被郊陌。江流浩浩汇奔注，两山■闼如相揖。昔年曾付丹青手，妙画难得云林笔。忽检巾箱旧图卷，痴翁豪素留名迹。烟江叠嶂渺千里，尺幅不嫌鹅绢窄。借作此图亦快事，风涛飒飒生虚壁。我今恍惚身入画，万壑千岩赴襟舄。弹琴一曲江月寒，苍翠空濛入帘隙。

选楼四时词

六幅蝉纱晓槛开，丝丝烟柳拂池台。佳辰又是清明近，罗幕低垂细雨来。

金镜平开水一方，曲屏如幔石如床。月明风送荷香远，销得诗魂耐晚凉。

草凝寒露竹凝烟，水浅池塘堕白莲。雨过小林凉意足，满庭秋思雁来天。

几日繁霜浅草枯，十三弦柱雁行孤。平林萧瑟栖残照，金背寒鸦接翅呼。

#### 夏夜

薰风夜透池荷贴，拂拂幽香来竹院。起视明星独倚阑，凉云密织鱼鳞片。冰绡雾縠却袞暑，披襟懒挈黄罗扇。铎疏月落不见人，隔花时有流萤现。

#### 立秋日作

水槛凉生雨脚微，青篱络角豆花肥。前宵已听新蛩语，不待梧桐一叶飞。

#### 寒月

霜月照松磴，清辉特地寒。萝阴翠袖薄，心怯倚阑干。

#### 咏琴墅梅

茅屋藏花里，梅开满屋香。七弦鸣绿绮，千树绕红妆。古调凭谁契，冰姿为尔芳。泠泠惊宿鸟，月冻半林霜。

#### 春望

高楼眺平楚，江树何沈沈。茅屋互鳞比，烟霭一以深。青骢识归路，黄鹂弄好音。竭来写怀抱，举目悲登临。蘅芜渺天末，桃李乱云浔。韶华易逝羽，奄忽不可寻。俯仰感今昔，悠悠千古心。回首妆台畔，花落罢瑶琴。

#### 始闻蝉声

日午风暄次第鸣，翛然一碧树无情。好音为报黄梅出，雅奏疑翻白苧轻。弄舌我怜才语涩，上头人爱鬓丝青。莫矜倚託清高甚，应悔秋来玉露零。

#### 湖上

柳阴深处觅新凉，百顷玻璃澹夕阳。閒把渔竿自垂钓，白莲花底起鸳鸯。

#### 玉玲珑阁暴雨

云压长空势欲摧，天教澄墨画图开。翻风乱贴竹阴碎，卷地忽闻荷气来。定有蛟龙迁窟宅，暗惊镫火暝楼台。秋声已在芭蕉树，不觉纱屏梦屡催。

### 早凉

鹊渚西风大火流，青虫扑簌夜缸幽。不知庭外凉多少，一树梧桐一叶秋。

### 新秋感怀

雨馀人意爽，秋气足庭除。水曲闻蝉后，霜关警雁初。风欺袖罗薄，月瞰屋梁虚。渺渺沧江路，谁传双鲤书。

秋夜梦归邗江并得句云花奴载菊自江乡忆先文达公抚浙时每至秋晚必命花

奴自维扬载菊一舟藉传家乡风景绘有秋江载菊图故梦中云云因足成之

家园回首费思量，城郭依依认绿杨。琴客弦诗宜水调，花奴载菊自江乡。柴桑粉本秋容澹，瓜步钟声驿路长。梦醒不知窗月皎，白云何处倍神伤。

兵乱未息乡间久疏南望白云形神交瘁人言愁始欲愁矣率赋长歌用摅忧抱

羽檄半天下，江南复江北。千里望白云，可望不可即。忆昔在室时，帘帟侍晨夕。胜衣授文史，章句勤记述。馀事及绘画，丹青恣涂泽。如何一挥手，鹈蟀顿代易。巾车愿言迈，旋归那可得。岂伊冈阜高，伏莽多螫贼。岂伊风涛阻，旌旗蔽江黑。端忧从中来，寤寐空反侧。深渊有蛟虬，丛薄饶豺獭。音书亦已渺，何况见颜色。日月如转毂，烽火何时熄。欲取瑶琴弹，思归操谁识。欲引浊醪饮，愁病输酒力。区区寸草心，胡以酬爱日。安得扫欃枪，尘氛清四极。上贺风云通，下庆乱离息。载咏《河广》诗，长风送归楫。

### 暮春晚晴

西湖暮春天，连绵雨不歇。草色浓如烟，柳丝重欲折。今兹睹新晴，寻芳闹蜂蝶。归云意迟迟，斜阳半明灭。倚槛澹忘言，悠然自怡悦。晚花散馀香，帘卷一钩月。

### 春柳

倦柳依依舞细腰，风丝轻拂鸟声娇。千门社鼓斜阳陌，一路酒旗红板桥。客梦远随流水去，春痕閒逐落花飘。是谁借与并州翦，翦出离愁万万条。

和白香山月夜调琴忆崔少卿诗

琴韵幽閒寄性情，香山月夜忆崔卿。可怜古调无知己，等作寻常箫管声。

### 寄家书

拈毫欲写几迟回，万种新愁顷刻来。书尽兰笺心未尽，却教缄罢又重开。

### 奉吾母来札喜志

画楼寂寞正徘徊，惊报家书一纸来。半是欢欣半还惧，先看函面莫轻开。

#### 偶作

片月衔山远，归云傍树横。江城吹玉笛，日夜故园情。

#### 冬日偶成

平安两字托鱼笺，回首萱闱倍黯然。怕向高楼卷帘望，青山遮断白云天。

#### 接家书有感

东风又到短长亭，惆怅珠湖柳色青。安得蒲帆悬十幅，随潮直下广陵城。

红桥回首路茫茫，雁足书来每断肠。惟愿烽烟渐平息，归篷影里白蘋香。

#### 和竹斋主人

娇莺啼上绿杨枝，閒傍妆台瘦不支。半榻诗书常乱叠，一楼风雨最相思。瑶琴空抚思归操，黄绢慵赓绝妙词。鸿雁在云鱼在水，更谁传讯到天涯。

#### 初春游云楼

筇舆破晓到云栖，万个琅玕夹道齐。笕路曲盘山磴窄，松阴深锁寺楼低。疏钟顿令尘心远，古壁应无俗客题。却喜寻春来较早，杏花微雨故凄迷。

#### 云栖题壁和先文达公韵

四山滴寒翠，长松夹修篁。江潮齧岸急，天风吹衣凉。谿禅参举叶，礼佛来焚香。定禽寂无语，云间钟梵长。

#### 由云栖紆道至湖上名园古寺游赏竟日泚笔赋之

两载湖山住，题襟愿未酬。说曾闻约略，地始足勾留。棠树垂先泽，花城饱艳游。翦镫劳梦忆，烟柳六桥头。

#### 春日感怀

独有思亲泪，逢春洒更多。两年经别久，千里奈愁何。画阁迟迟日，珠湖渺渺波。归期休复问，一岁一蹉跎。

#### 王照圆

王照圆，字瑞玉，一字婉侔，福山人。栖霞郝懿行室。有《婉侔诗草》。

### 梅花

何处清香远，遥瞻岭上梅。不随群卉茂，独占一阳开。

### 迎春花

顿觉阳和至，迎春早吐花。风来舒绿叶，律转斗黄葩。冻蝶惊新梦，寒蜂出旧衙。预知天地意，逐暖露光华。

### 簪迎春花

灰飞新节至，小苑发春花。迎暖分金蕊，横钗映鬓斜。

### 春柳

时回春日暖，晴看柳垂金。绿叶和风放，新枝拂晓禽。

### 过西海子看新荷

凉亭水榭映朝霞，碧沼初开菡萏花。海子西头杨柳岸，绿烟深处是仙家。

### 题阮太师母石室藏书小照

《簪诂》研经万卷收，嫔嬛仙馆翠烟浮。斋名积古从公定，室有藏书是母留。俭素时妆无一点，丹青小照足千秋。应知淡月疏桐夜，缅想音容在选楼。

### 方寿

方寿，字蓬客，号芝仙，历城人。青县诸生潘可宗室。有《芝仙小草》。

### 寄三弟妇杨恭人都中

米贵长安居大难，相思愁见月团团。贫无锥地眉常展，旦戒仙郎漏正阑。井臼操持钦德曜，文章声价属都官。谁知粉署含香侣，依旧盐荠十载寒。

### 思亲

秋窗点滴两连绵，也似思亲泪未乾。一夜蕉梧声断续，教人辗转不成眠。

### 海棠花

含烟炫露小楼东，脉脉无言媚晚风。好似沉香亭畔醉，阑干十二倚娇红。



雪霁

快雪初晴月乍明，碧天无际透疏棂。香生薝蔔心如水，閒展《黄庭》一卷经。

尤澹仙

尤澹仙，字素兰，号寄湘，长洲人。有《晓春阁诗集》。

田家杂兴同蕙孙沈姊作

微雨溪上来，斜阳澹茅屋。平原一以眺，良苗霭如沐。鸪鸣杏花红，村暗榆阴绿。野老善识时，相勉还相祝。膏润贵及时，秋稔已可卜。

春夜喜山人送梅

寒林漠漠春无影，款扉有客来铜井。折得梅花远寄将，一枝犹带溪云冷。我亦罗浮谪下仙，相逢此夕岂徒然。狂呼明月伴我饮，世人那识三婵娟。

夏夜

玩月憩池塘，独把瑶琴弄。清风漾荷珠，打破鸳鸯梦。

梦母

肠断慈亲却早违，伶仃弱质痛何依。那堪梦里相逢处，犹道儿寒合著衣。

王绮

王绮，大理人。同知胡蔚继室。

悼夫子

挑镫独写奠夫文，绣阁沈沈闇闭门。一字一珠一点泪，九原君定有知闻。

卢碧筠

卢碧筠，德州人。大学士，谥文肃荫溥女，故城贾汝愈聘室。有《璧云轩剩稿》。

铜雀台

城头落日鸟声哀，漳水无情滚滚来。昔日繁华成幻梦，至今词赋想清才。空馀片瓦埋秋草，无复歌声吊夜台。遗冢纷纷竟何用，荒陵寒雨长蒿莱。

陈勤

陈勤，字辛农，一字拙存，甘泉人。符大受室。有《茹蘖閒房诗存》。

夜绩课儿作

丝丝缫不断，似我泪珠长。松静传虚籁，镫孤作细光。衔环非望报，画荻自堪伤。络纬闻深夜，同兹苦织忙。

秋日幽居

叶尽秋深候，西风扫屋尘。鸟饥空啄树，蛩冷渐依人。梦早消江汉，贫常算米薪。敝裙聊自补，累岁御冬频。

腊日书怀

门户频年强自支，孤儿长大忆当时。敢言母教能如父，肯为家贫废就师。事业已空馀手泽，诗书不误有人知。天寒欲雪乌犹噪，唤子宵归共一枝。

孙云凤

孙云凤，字碧梧，钱塘人。按察使嘉乐女。

媚香楼歌

秦淮烟月板桥春，宿粉残脂腻水滨。翠黛红裙竞妆裹，垂杨句惹看花人。香君生长貌无双，新筑红楼唤媚香。春影乱时花弄月，风帘开处燕归梁。盈盈十五春无主，阿母偏怜小儿女。弄玉虽居引凤台，萧郎未遇吹箫侣。公子侯生求燕好，输金欲买红儿笑。桃花春水引渔人，门前系住游仙棹。奄党纤儿相纳交，缠头故遣狡童招。那知西子含颦拒，更比东林结社高。楼中刚耀双星色，无奈风波生顷刻。易服悲离阿软行，重房难把台卿匿。天涯从此别情浓，锦字书凭若个通。桐树已曾栖彩凤，绣帏争肯放游蜂。因愁久已抛歌扇，教坊忽报君王选。啼眉拥髻下妆楼，从今风月凭谁管。柘枝旧谱唱当筵，部曲新翻《燕子笺》。总为圣情怜颦颥，桃花宫扇赐帘前。天子不知征战苦，风前且击催花鼓。阿监潜传铁锁开，美人犹在琼台舞。银箭声残火尚温，君王匹马出宫门。西陵空自宫人泣，南内谁招帝子魂。最是秦淮古渡头，伤心无复媚香楼。可怜一片清溪水，犹向门前呜咽流。

和简斋夫子自挽诗

今春湖碧山紫绿，问字车来傍林麓。丁令才欣化鹤归，剡溪又怅回舟速。小病先徵挽句看，先生怀抱海天宽。渊明歌与司空墓，旷达千秋鼎足观。玉堂宴罢归山早，著书万卷传梨枣。我是门墙听讲人，残膏剩馥沾多少。几番鱼素逐江潮，知往莺花廿四桥。春酒不曾辞酩酊，玄言方且赋逍遥。才人物外多游戏，自云化蝶遥传示。欲为今日眼前欢，预借他年身后事。自有人间不朽文，下为河岳上卿云。即今绛帐攀辕者，笔当戈挥返夕曛。

### 和袁明府枚留别杭州

扑帘飞絮一春终，太史归来去又匆。抱菊昔为三径客，盟鸥今作五湖翁。囊中有句皆成锦，闺里闻名未识公。遥忆花间挥手别，片帆天外挂长风。未曾折柳倍留连，纵得重来又隔年。远水夕阳青雀舫，新蒲春雨白鸥天。三千歌管归花县，十二因缘属散仙。安得讲筵为弟子，名山随处执吟鞭。

### 再游飞云洞

倦客欲休息，驱车问灵境。谷口采樵人，指是飞云岭。古洞响寒泉，高峰明返景。松涛从空来，感此动清警。昔我登此山，垂发始覆颈。杯底吸霞光，溪边捉云影。当时虽无知，脉脉心已领。抚树发长叹，岁月直俄顷。俯仰心豁然，天风磬声冷。

### 山行

晚从春山行，残月挂高树。钟声出烟林，人语隔溪雾。幽壑多奇花，绝壁飞瀑布。今来秋已深，木叶杂风雨。鸡啼似有村，云深不辨路。风景回不同，阴晴亦有数。去去路正遥，悠悠岁云暮。

### 登高示诸弟妹

九日同登百尺台，茱萸遍插菊花开。渚清沙白孤帆远，露冷江空一雁来。人事独悲秋渐老，少年须惜水难回。山川信美非吾土，欲赋《登楼》愧浅才。

### 晚溪

日落烟霏霏，渡头行客少。山月出林迟，幽禽归树早。水面清风来，微波动荇藻。余欲弄扁舟，悠然学垂钓。

### 登韬光寺

灵鹫峰头寺，清幽少俗氛。竹深人不见，木落鸟成群。海气蒸红日，山泉泻白云。我来游未足，莫遣暮钟闻。

### 巫峡道中

秋江木叶下，客子独徘徊。瘴起浓云合，滩鸣骤雨来。凄凉庾信赋，寂寞楚王台。俯仰乾坤里，悲歌亦壮哉。

### 征程

春来江上雁知还，我尚驱车道路间。芳草极天迷客思，白云何处是乡关。地卑城郭多临水，县小人家半住山。闻说西行皆石径，喜无尘土扑征颜。

孙云鹤

孙云鹤，字兰友。嘉乐女，县丞金玮室。

湖楼送别

才向西湖来，又别西湖去。置酒湖上楼，搜索闺中句。遂令负笈人，也逐吹竽数。极目渺绿波，持杯对春树。冥冥暮雨时，青青芳草路。掉首归仓山，扁舟入烟雾。

挽高氏女

由来情种是情痴，匪石坚心两不移。傥使化鱼应比目，就令成树也连枝。红绡已结千秋恨，青史难教后代知。赖有神君解怜惜，为营鸳冢播风诗。

宝剑篇

宝剑遗编在，挑灯击节吟。恩讎千古事，湖海一生心。气逼秋霜冷，光腾夜月沈。从军应有愿，慷慨答知音。

旅楼

旅楼高不极，过客足徘徊。暮色随烟起，春寒逼雨来。壮心樽酒在，乡思岭猿哀。目断巴陵路，衡阳雁独回。

壬寅九日重庆关送伯兄东归

登高兼送远，客泪一沾裳。归棹随流水，乡心带夕阳。秋高山落木，风急雁分行。丛菊何情绪，篱边依旧黄。

席佩兰

席佩兰，字道华，号浣云，昭文人，同县孙原湘室。有《长真阁稿》。

夫子报罢归诗以慰之

君不见，杜陵野老诗中豪，谪仙才子声价高。能为骚坛千古推巨手，不得制科一代名为标。夫子学诗杜与李，不雄即超无绮靡。高唱时时破碧云，深情渺渺如春水。有时放笔悲愤生，腕下疑有工部鬼。或逞挥毫逸兴飞，太白至今犹未死。丰兹嗇彼理或然，不合天才有如此。今春束装上长安，自言如芥拾青紫。飘然几阵鲤鱼风，归来依旧青衫耳。囊中行卷锦绣堆，呼灯展读纱窗底。燕晋山河赴眼前，春秋风月藏诗里。人间试官不敢收，让与李杜为弟子，有唐重诗遗二公，况今不以诗取士。作君之诗守君学，有才如此足传矣。闺中虽无卓识存，颇知乞怜为可耻。功名最足累学业，当时则荣歿则已。君不见，古来圣贤贫贱起。

闻砧

今夕是何夕，凉风动远砧。敲残天外梦，捣碎客边心。韵杂秋霜冷，声催晓月沈。深闺高卧稳，犹自怨孤衾。

#### 蝉声

凉飈送孤响，不定是何枝。断续成三弄，缠绵引一丝。小楼清梦觉，老树夕阳迟。莫更看明镜，先防鬓影衰。

#### 上袁简斋先生

慕公名字读公诗，海内人人望见迟。青眼独来幽阁里，缟衣无奈浣妆时。蓬门昨夜文星照，嘉客先期喜鹊知。愿买杭州丝五色，丝丝亲自绣袁丝。深闺柔翰学涂鸦，重荷先生借齿牙。漫拟刘惔知道蕴，直推徐淑胜秦嘉。解围敢设青绫障，执贄遥褰绛帐纱。声价自经椽笔定，扫眉笔上也生花。南极文昌应一身，幸瞻藜杖拜星辰。十年早定千秋业，片语能生四海春。诗格要烦论伪体，画图何敢秘丰神。愿公参透拈花旨，可是空王座下人。

#### 织女叹

秋月已如雪，秋风已如铁。孤镫取寒光，有女当窗织。废我一宵眠，看丝乍盈尺。废我两宵眠，看丝不成匹。岂不畏龟手，此心凛无逸。昨日入城提蟹筐，东邻嫁女耀丰妆。彩币千百束，绮罗十二箱。龙章象服何煌煌，平生不识蚕与桑。归来泣对机中锦，知与谁人作嫁裳。抽刀断机不如寝，又听络纬啼金井。

#### 古镜

一片秦时月，清光万古新。对君原是我，知尔阅多人。难使年华驻，翻嫌面目真。深藏如不露，何处著纤尘。

#### 喜外归

晓窗幽梦忽然惊，破例今朝雀噪晴。指上正轮归路日，耳边已听入门声。纵怜面目风尘瘦，犹睹襟怀水月清。好向堂前勤慰问，敢先儿女说离情。

#### 十四夜月

最高楼阁最珑玲，齐出玻璃面面屏。十里青山波浸透，一城秋梦鹤呼醒。天无表里皆澄彻，月在中间是性灵。万事将圆未圆好，此情说与素娥听。

#### 十五夜月

吹彻碧云何处箫，一轮捧出九层霄。影如秋水无渣滓，光闪明星欲动摇。万古不磨惟此镜，百年几度是今宵。愿天月与人俱好，暗把心香岁岁烧。

### 柳絮

白似轻霜软似绵，东风飘泊最堪怜。不如点入桃花水，化作浮萍转得圆。

### 寄衣曲

欲制寒衣下翦难，几回冰泪洒霜纨。去时宽窄难凭准，梦里寻君作样看。

### 刺绣

手擘香绒一缕轻，殷勤拣取众芳名。红颜大半霜前落，不绣芙蓉绣女贞。

### 南归日题上党郡署壁

雨后梨花片片残，飞来如露湿阑干。一花一木寻常见，到得离时却耐看。一回首处一凄然，弱质曾经住两年。呼婢留心检妆盒，莫教人拾旧花钿。

### 沧海云帆图为云伯大令赋

挂席拾明月，飘然若木乡。楼船下杨仆，桥柱问秦皇。蜃雨连秋暗，鲸波浴日凉。天风海涛里，一曲《水仙王》。

海外奇文字，苍茫一笔书。仙才苏玉局，赋手木元虚。龙女遗珠佩，鲛人织翠裾。鸥波双笑日，萸玉供钞胥。

### 归懋仪

归懋仪，字佩珊，常熟人。巡道朝煦女，上海李学璜室。有《绣馀小草》。

### 鹤飞来

维海汤汤，三山居其中。鼎足以立，贝阙而珠宫。仙人翱且游，其乐不可穷。谁其从之，二八白鹤往来西复东。山之高矣，有石斯嵒。鹤之洁矣，有羽斯丰。引吭乎皎月，而振翼乎清风。醴泉芝草供饮啄，倏不知春夏与秋冬。鹤之鸣矣，彻於九重。鹤之止矣，间世一逢。衔来丹枣之实大，与安期同得而食之，寿偕天地无时终。

### 五人墓

千古人心终不死，吴中义激五男子。貂氛肆焰朝野昏，翻手势欲倾乾坤。印累绶若不知数，鞠躬俯首声复吞。平居持议徒雄壮，袖手委蛇孰奋往。翻将文墨饰奸贪，扃门内愧曾无状。五人生不读诗书，位不列簪裾，但以善恶为毁誉。当其攘臂共赴难，义勇直欲凌罅诸。呜呼！名败身殃馀贿赂，穹碑峻宇等朝露。松柏青青耐岁寒，冶游人奠山塘路。

### 夜起

不效刘琨舞，闻鸡乍起时。月移花外影，句续梦中诗。香烬金猊冷，风清玉漏迟。宵深怜袖薄，兰露湿阶墀。

#### 白菊

烟霞笑傲几重阳，逸态偏宜浅淡妆。不藉铅华标晚节，肯将颜色媚秋光。月明老圃枝逾瘦，霜仄疏篱叶未黄。恰称素心人送酒，陶家三径好倾觞。

#### 春院

閒庭昼暖日偏长，小立东风撒绣床。空际游丝兼絮舞，阶前瑶草竞兰芳。流莺隐树窥疏槛，粉蝶随人绕曲廊。信步不嫌花径滑，一篙新绿涨池塘。

#### 柳

密叶笼隄暗，长条著水轻。春风一披拂，无限玉关情。

纤月破轻烟，枝头鸟语妍。灞桥归路晚，别思总堪怜。

#### 暮秋忆弟妹

城角秋笳起暮愁，一天凉月照南楼。西风雁影人千里，黄菊清尊又晚秋。

#### 拟古

晦明递循环，倏忽春复秋。万古同旦暮，群类犹浮沤。缅维古圣贤，精诚千载留。其人不可作，其名无时休。风檐展遗书，慨焉企前修。

灼灼园中桃，苍苍岭上松。春风固自得，冬日亦为容。造化岂有殊，物性自各鍾。繁华逞目前，安能保其终。所以古哲人，励志寻高踪。

论古耿中怀，商周非黄虞。独有吾性存，犹能混沌初。时运有升降，大道无盈虚。守己保其真，勿为文质拘。斤斤同异间，祇成章句儒。

文章亦一艺，功因载道起。天籁发自然，名言醞至理。譬欬寄一时，违应占千里。我读上古书，其文浑浑尔。吁嗟三代还，日夸雕绘美。

#### 钱塘弩

怒涛滚滚排山至，此是英雄不平气。英雄灵爽岂易降，人中乃有吴越王。钱王意气迈当世，所贵存心在利济。裂石穿波强弩开，潮头转向西陵逝。势如轰雷震山岳，水底蛟龙尽惊避。宝剑光横十四州，得意难忘根本地。父老欢呼草木荣，丈夫至此岂无情。龙飞凤舞应前讖，他年遂作长安城。陌上花开春复春，钿车零落埋香尘。至今江口寒潮急，犹似当年

射弩声。

### 丽竖烛

玉堂高，良夜静，两行绿鬓珠帘影。双眸光射简编青，蜡花红过枝头杏。墨光如漆颜如玉，如此豪奢差不俗。十载听鸡萧寺中，名成合享风流福。夺得鳌头付阿兄，钜笔如椽专史局。按来新乐五音调，小宋名高宫禁熟。翦烬清宵素手劳，焚膏彩袖扬清馥。月初高，风弄竹，丹铅已看盈篇幅。应与金莲一例传，千秋照耀双枝独。

### 鹰犬

秋高云净天宇辟，金眸闪闪睨空碧。侧身下掠捷如风，矫向空中复盘翮。鸱鸢异类何纷纷，霜爪迅击毛血分。慎尔驱除勿逞暴，廓清要佐凤凰仁。细身田犬五尺长，四足趯捷不可当。首昂喙利两眼赤，众犬视之皆辟易。饲粮常少患肥痴，僵卧廊间甘伏雌。秋清山高风夜吼，一朝踪迹狐兔走。

### 感怀

欹枕梦频惊，残缸暗复明。愁多天地窄，情重死生轻。浮世原知幻，诸魔未易平。秋虫尔何苦，断续和悲鸣。

### 即事述怀

万种伤心蝟集时，况兼贫病费支持。典残钗股空存篋，减尽腰围瘦到诗。温语聊将娇女慰，泪容生恐侍儿窥。镜台晓日分明甚，照见星星鬓上丝。

### 闻唐陶山明府重修桃花庵感赋用原韵

遗祠重为拂埃尘，补种夭桃几树新。红粉也知怜国士，青衫偏是困才人。不逢良木宁求荫，肯为黄金便屈身。纵酒佯狂聊玩世，笙歌队里老青春。

悔占江南第一名，遭他谗口玷冰清。狂依花月为生计，閒藉云山写不平。斗酒每为知己罄，双眸还对美人明。英雄末路真无奈，甘就蒲团证此生。

### 题女史叶小鸾眉子砚

螺子轻研玉样温，摩挲中有古吟魂。一泓暖泻桃花水，洗出当年旧黛痕。

### 金逸

金逸，字纤纤，长洲人。诸生陈基室。有《瘦吟楼草》。

### 拟柳柳州雨后晓行独至愚溪北池



云去楚天凉，晓行惬幽独。日气澹荷风，烟光散乔木。偶然池上来，溪流为谁绿。

#### 和竹士晓游邓尉作

一声笛破晴空烟，欲明不明五更天。树头残月白堕水，湖上晓山青入船。风梵飘香落云外，波光拥棹来门前。四围皆雪失大地，徜徉绝顶疑游仙。

#### 初夏

绣帘风影警花铃，庄蝶才分梦亦醒。一缕茶烟人不到，绿阴如水漾空庭。

#### 雪后伫竹士归

空响不成梦，起来思依依。卷帘映晴雪，风急时霏霏。晓色不离树，嫩寒犹上衣。伫子一樽酒，当看梅花飞。

#### 随园先生来吴门招集女弟子於绣阁余因病未曾赴会率呈二律

西湖续会许相从，闺阁咸钦大雅宗。我岂能诗惭画虎，人言此老好真龙。竹声当牖凉三径，云气深潭幻一峰。未得追随女都讲，春愁偏欲恼吴侬。

柳条不肯系春光，返棹天台钱别觞。青眼早深知己感，白头犹是爱才忙。湖隄草色催新夏，驿路蝉声到夕阳。愿得年年芳讯至，许教桃李附班行。

#### 病起

碧梧移影上林扉，西院无人晓日微。病起名香焚不得，花阴小立当薰衣。

#### 晓起即事

忍将小病累亲忧，为问亲安强下楼。渐觉晓寒禁不得，急将帘放再梳头。

#### 采莲曲

蒲葵扇冷不知秋，花外清歌何处楼。十二雏鬟娇小甚，鸳鸯飞过也回头。

#### 一梧斋与竹士夜谈去后作

一帘细雨不成丝，挽婿灯前与论诗。家近不归如梦远，花寒未放识秋迟。心灰久病拈针懒，眉讳新愁只镜知。约略听他双燕语，腰肢减瘦比来时。

#### 秋词

瑶阶浸月华，心怯花铃警。鸳鸯知未眠，不定枯荷影。池塘明水烟，幽梦閒来去。

隔墙刀尺声，冷答秋虫语。

#### 岁暮张子白进士过访竹士

岁云暮矣走天涯，旧雨相逢便是家。拜墓殷勤移桂棹，探春消息问梅花。催诗林吐蛾眉月，醒酒香浮雀舌茶。佳会难逢愁遽别，怪侬夫婿绪如麻。

#### 与姊别后颇无意绪感旧述怀得七律十六韵

小小依依似雁行，可怜往事不堪详。画楼人去埋尘冷，孤艇潮来载梦忙。记得承欢工雅谑，有时拨闷斗迷藏。读书红翦三更烛，礼佛清烧一瓣香。赌绣当窗随卧起，种花隔夜费商量。娇痴扑蝶携诸弟，好胜敲棋背阿娘。茗碗笑看双影瘦，诗筒拚负十分狂。偶缠薄病亲调药，骤觉新寒教换裳。纨扇并裁聊拟月，锦笺私劈独开箱。听钟湖上秋停棹，踏雪垆头晓举觞。荆树方期终绕膝，蓝桥忽漫赋催妆。羹汤洗手惭为妇，鸿案齐眉各倚郎。暂喜归宁姜被暖，旋惊握别暮山苍。如侬真被浮名误，怪姊甘将旧业荒。昨日庭帏成把晤，今宵镫火暗凄凉。一封寄与相思泪，折向兰闺定断肠。

吴素云女士写秋芳图寄其仲兄兰雪法时帆学士见而爱之以曹墨琴夫人手书洛神赋册易去甲寅春日兰雪过吴门属咏其事

将书易画未嫌憨，好事他年著美谈。我意不如仍付与，两瑶函供一诗龕。

清狂窃笑应无加，读画居然愿望奢。乞写一枝持赠我，病维摩瘦侣秋花。

#### 记梦

膏残镫烬夜凄凄，梦淡如烟去住迷。斜月半溪人不见，忍寒小立板桥西。

#### 次韵李石桐山人夜坐闻远水声

何处发空响，迢迢远水声。窗虚来断续，风定去分明。过石蘚花冷，到溪鸥梦清。夜阑浑不寐，倾听道心生。

#### 柘塘春步

花卧东风柳拂烟，晚晴随步过村前。柘塘一夜催花雨，新水如云绿上天。

#### 秋日有怀王碧云

落尽芙蓉景物非，妆台晏起思依依。雨深别馆虫声急，月冷吴江雁到稀。病畏新寒张晓幔，瘦拈旧线改秋衣。生涯近日君知否，一缕炉香息众机。

#### 舟中即目

绣帘双卷水窗开，一叶风帆镜里回。天意似怜人寂寞，青山移近画船来。

书怀呈竹士

拾扇烦躬曲，招凉共息机。窗坳云细入，帘启燕争飞。久病谙诸药，安贫守故衣。百年何所愿，生死只同归。

暮春偕竹士游塔影园

依然溪水隔林扉，舣棹来寻旧钓矶。幽赏恰宜三月尽，清狂得似两人稀。竹烟浮翠晴生坞，花雨吹红湿溅衣。极阁危栏閒倚望，半天清语塔铃微。

次韵和吴兰雪石溪观桃花

红云飞隔水，应是雨催开。游屐缘溪入，春禽约客来。湿烟低隐屋，老树卧延苔。几度寻诗到，无人立一回。

次韵酬兰雪再赠诗并简蕙风素云两女士

万绪无端理乱丝，避风镇日卷帘迟。二分春教鹦哥惜，一缕寒先燕子知。兰露沁香清幻梦，药烟销碧澹愁眉。《楞严经》说堪疗疾，几净窗明相对宜。

骆绮兰

骆绮兰，字佩香，号秋亭，句容人。龚世治室。有《听秋轩诗集》。

登木末楼

载酒独登楼，凭阑四望收。江光初过雨，山意欲成秋。霸业随流水，孤城起暮愁。微茫烟树外，帆影落瓜洲。

登天平山憩中白云

身在云中不见云，登临忘却日将曛。回头欲辨来时路，只有泉声隔树闻。

玉晨观

地肺开金阙，天文应玉晨。灵风宵步斗，旭日晓朝真。阶净松能扫，门閒鹤自巡。碑应镌碧落，路已隔红尘。紫诰云边下，《黄庭》案上陈。山中陶宰相，世外魏夫人。果熟猿知采，丹成虎亦驯。华阳仙洞里，好领四时春。

寄怀鲍菖香夫人

羨君福慧有谁如，镇日金闺乐事馀。花院养姑春奉酒，篝灯课子夜钞书。旧传词翰

留名久，新起楼台揽胜初。独我他乡飘泊甚，镜中愁见鬓萧疏。

### 重过扬州旧宅

维舟重到绿杨城，门巷萧条转眼更。邻姬相逢应识我，隔墙曾听读书声。

曾将妆阁作诗坛，每日联吟到夜阑。十二年前题壁句，一时和泪拂尘看。

### 钱惠尊

钱惠尊，字诒宜，阳湖人，同县贵溪知县陆继辂室。有《五真阁吟稿》。

### 平原君传书后

公等碌碌皆因人，平原枉有三千宾。囊大曾无一锥贮，见遂不识来何许。邯郸城门昼不开，此时局促真弩骀。不闻公子画奇策，乃至以姊要人哉。吁嗟乎！美人一笑何大罪，特借卿头为士贿。矫情待士士不取，有客飘然向东海。

### 于洁

于洁，汉军旗人。尚书、谥襄勤成龙女孙，按察使鳌图女弟，宗室魁明室。

### 寄兄沧来

织尽人间寡女丝，三更涕泪一镫知。近来焚却从前稿，不为怀兄不作诗。儿女乾啼湿哭馀，偷閒才得寄家书。望兄好继襄勤业，莫使官声竟不如。

### 张敬庵

张敬庵，汉军旗人。知府肇祥女。

### 寄母

去家三百里，回首一千朝。无限白云恨，秋风长短桥。

### 吕福

吕福，字清崑，武进人。河间知县星垣女，同县江川知县陶善昌室。有《绿云山房诗存》。

### 西楼听雨偕二弟作

梧叶萧萧响未停，最难翦烛语丁宁。追随方幸从经幄，温清尤欣侍寝庭。深院滴残三径绿，寒窗冷透一镫青。联床且与吟春草，读杜论苏说典型。

閒坐

晴光来满院，树影入层墀。洗砚磨新墨，拈毫改旧诗。一花才隐约，双蝶正差池。坐到斜阳晚，林梢月上时。

雨窗閒坐

久雨窗明暗，秋云去复还。风泉堪倚槛，尽日听潺湲。

溪上松声

一水依秋碧，孤松夹岸疏。涛声来雨后，远籁在风初。

秋夜

月明觉秋冷，人定觉秋清。帘透疏梅影，无花亦有情。

舟行至湖口作

谁向风前吹竹箫，箫声呜咽还飘摇。我从南武过湖口，肖我离思为写描。晚来湖畔行人少，惟有湖边双白鸟。箫声渐远风篁来，篁杂水声鸣未了。湖边隐者谁家宅，门对澄湖映寒碧。水竹之间客卜居，征人愿此开荆栅。

暮春月家严自青浦寄截句言所寓凄凉

尊师传经以造士，不承权舆乃至此。此邦大夫复何俟，勿亟筑宫请杖履。荒祠一椽避风雨，居陋何足病君子。

己巳五月将之青溪追忆玉山学舍

忆昔玉山与诚堂，群木耸秀四季芳。窗前古梅弄疏影，帘外丛竹生幽凉。编篱一桁遮几曲，林花草卉纷丹绿。重慈忽殒北堂萱，惊心岁月风驰促。羁人转瞬十六年，别归时忆草堂前。值今五月筍争发，低簦透楹高出檐。谁期咫尺成今古，远闻芳径为荒圃。兰陵三载忆初地，枉逢佳节思南武。水阁黄梅接雨风，潺湲声杂橹声中。恰才侨寓谋安席，那更移家再挂篷。我生孩小捐乡宅，早随亲任劳行役。故园归后仅三秋，如何又去家为客。

汪嫫

汪嫫，字雅安，歙县人，同县程鼎调继室。有《雅安书屋诗集》。

舟中晚眺

四围烟景接苍溟，山外高楼寺外亭。远岸影迷千树绿，深林光闪一镫青。舟因送客

难长系，云解留人故暂停。几辈天涯怨摇落，邻船夜话静中听。

### 哭亡侄孙士铨

三岁抚汝大，十八弃我去。经年泪眼枯，魂魄归何处。汝母托我日，跪床泣告语。侄妇死如归，伤心惟稚孺。侄身当中年，妇死必再娶。悯子饥且寒，莫免芦花絮。成立岂易言，不肖尤堪惧。怆绝辞未终，双手亲交付。■我忍泪听，抱汝曲劝谕。一痛忽翦决，生死判急遽。抚汝从兹始，性命相依附。到今十五年，苦心向谁诉。冻馁固可虞，温饱益增虑。痾痒最关怀，焦劳夜复曙。曾记一医来，目我为乳妯。四岁教识字，解诵唐人句。送汝入塾中，督责不汝恕。恐汝德不修，恐汝学不裕。历择名师从，璞质勤磨礪。喜汝尚好学，光阴弗自误。学业渐可观，长者咸称誉。勉然品行修，立身得依据。爱敬根性天，事叔如事父。谓叔性豪侠，轻财略无度。负累日益深，积重病成痼。胡不归里闾，资斧从容措。侄善事大母，叔无忧内顾。门内百事宜，未可倚厕庶。万一值艰难，吾师堪借箸。汝叔闻汝言，意决任驰骛。去去倏两年，家书盈尺素。师教汝秉承，读书明世务。家事无钜纤，若马能驾驭。一一体我心，假手挥仆御。叔母爱汝挚，恩慈多煦煦。叔父寄书来，称汝有才具。云几年卅六，得子望虚屡。侄辈幸得人，吾家本根固。我阅汝叔信，悚然增觉寤。慎重加汝餐，汝好希光祚。胡天不右汝，一病即物故。悲哉我何堪，惊惶瞥僵仆。祸及太无端，痛哭将天吁。我自究我心，何事干天怒。即论汝为人，亦应得天助。年少笃天伦，醇慤本畀赋。处事虽精明，浑厚随■寓。往往律己严，待人气和煦。古谊交朋侪，肝胆每倾吐。岂无富家子，膏粱与纨袴。媿薄无性情，汝心最深恶。天真汝未漓，见义力争赴。先达与乡贤，见汝翻忻慕。依依我膝前，相离未寸步。祷我寿而康，晨昏香一炷。偶逢我疾作，汝心辄惊怖。汤药汝亲尝，悉心为调护。侍奉竭欢娱，片言莫我忤。诣力进竿头，经史渐镕铸。指顾青云霄，毛丰卜腾翥。意此鑫席才，应到玉堂署。祖德扬清风，君恩承湛露。而我衰迈年，绵弱难吹煦。得见汝成名，我志聊堪足。今乃大不然，逆境来错愕。匪云天作孽，于事何抵牾。明知冥漠中，修短关定数。奈我心枯寂，兀坐若泥塑。往事一回首，默然神瞿瞿。汝父久赋閒，守株空待兔。更抱西河痛，岂复有生趣。汝叔犹远游，飘零悲客路。望汝心殷殷，那堪闻此讣。痛汝盼叔归，病中神远注。叔归汝长逝，一散遂难聚。日夕恸不忘，涕泪无所住。六洲三岛间，闻有返魂树。汝魂招不来，我目已如瞽。古寺风潇潇，灵輶且安厝。期汝送我死，今反展汝墓。问天天无言，此理终不悟。

### 金墀

金墀，完颜氏，字韵湘，满洲旗人。侍卫费莫英志室，知府文禧母，甘肃巩昌知府斌越祖母。有《绿芸轩诗集》。

### 秋夜

西风吹老一天秋，露自无心草自愁。砧韵谁家敲断续，声声随月上南楼。

### 秋夜

客散门深闭，空阶月色凉。露轻虫语碎，风静雁声长。不寝频移枕，閒吟懒爇香。遥闻何处笛，深夜尚悠扬。

### 秋日閒吟

独坐幽斋意自怡，窗明几净枕斜欹。棋如可胜何求速，诗果能工不患迟。移竹须移新脱筍，折花休折未开枝。晚来閒步东篱下，最好西风过雁时。

### 夜坐

一自西风起，愁看落叶黄。学诗嫌韵窄，拟句爱更长。树影全归月，苔痕半入墙。夜深人语寂，罗袂暗生凉。

### 春晓

群鸟啼芳树，朝烟散小塘。露轻莺羽润，寒嫩蝶衣凉。残梦随云断，春愁逐柳长。卖花深巷里，窗下正临妆。

### 春晚

凭阑深院里，楼外晚风微。蝶倦寻花宿，莺慵觅柳归。远山凝暮霭，高树恋馀晖。极目丛林处，昏鸦逐队飞。

### 夏日村居

长夏村居景最幽，溪声清似雨声稠。柴门未许閒人到，竹榻能容好梦留。得意鸟啼临水树，忘机蝶入有花楼。晚来一片斜阳影，都在遥山顶上浮。

### 对雨

坐对帘开处，长空散细烟。树头风势乱，池面水纹圆。入竹声偏静，滋花色更鲜。芭蕉深院里，今夜正堪眠。

### 閒吟

树影重重竹影疏，曲栏深处小窗虚。梦回庭院人声寂，卧看风翻案上书。

雨馀烟重柳丝低，不断蝉声竹院西。绿乳浮香书案净，閒拈小笔拟新题。

### 秋日漫兴

微微云影淡如罗，瑟瑟金风雨乍过。量浅酒宜閒处饮，情痴花爱晚来多。梦惊蟋蟀声偏静，秋到梧桐信不讹。满地苔痕无客至，绿窗深处自吟哦。

### 秋夕

竹梢新月上，凉露一天清。人静花轻睡，香消酒半醒。虫吟多叠韵，蝉歇带馀声。

遥忆南飞雁，冲云第几程。

### 野望

近晚郊原好，云山处处幽。苍烟凝远树，残日恋高楼。引犊牛行缓，教雏燕语柔。恰逢时雨霁，野水乱奔流。

### 古寺

一派荒凉景，相看意黯然。垣颓犹有迹，松老不知年。花落惟风扫，庭空任燕穿。远山斜对处，隐隐上苍烟。

### 初晴

笔砚精良短榻横，珠帘高卷雨将晴。花因晚放香尤静，诗到閒吟句易成。馀滴树间轻作响，残流阶下寂无声。凭栏坐久罗衣薄，槛外凉风细细生。

### 晚晴

断云将雨过，飞鸟去仍还。霞影晕高树，烟光合远山。诗临秋易淡，心近晚偏閒。花径无人到，苔痕遍紫斑。

### 秋夜病中忆大儿时 in 溧阳

月影侵罗幕，虫声近曲栏。眼慵偏爱夜，身瘦早知寒。霜虑山中重，衣愁马上单。一镫相对卧，听彻五更残。

### 秋日病中作

最爱清秋景，烟寒草色离。绿苔苍雨径，黄叶落风枝。绕砌栽新菊，临窗改旧诗。但能无病痛，何患鬓添丝。

### 雨中漫兴

雨久苔生砌，庭閒鸟入廊。书残重订线，琴润暂开囊。临水妨钗坠，描花厌袖长。秋来何处觉，窗下簟先凉。

### 春日偶成兼示大儿

催花雨歇晓风轻，閒坐欣看笔墨精。装点繁华春作主，辩论好丑镜无情。不妨诗自聪明得，莫使名从侥幸成。为怯嫩寒帘半卷，隔窗时听鸟声声。

### 二女自库伦来京喜成



忽忽一别几经年，闻有归期喜欲颠。命仆早安看月榻，嘱儿多办买花钱。酒开新瓮香初冽，菜煮春畦味正鲜。人力岂能成此会，天怜远胜自家怜。

兰轩

宗室兰轩，庄亲王女孙，嵩山室，都统能泰母。有《兰轩遗集》。

呈夫子

思量尘事万端轻，今昔回头阅世情。爱月随时同坐坐，看花无事且行行。熟经颠险捐声色，久任衰危薄死生。随分而安何所望，笑双蓬鬓镜华明。

同夫子游城南王氏园

雅吹轻歌绕路斜，韶光草草叹年华。一尊欲劝东君醉，不许春风管落花。

百保

百保，萨古达氏，字友兰，满洲旗人。瓜尔佳延祚室，金衢严道、谥壮介麟趾母。有《冷红轩诗集》。

秋雨

庭梧初落叶，鸿雁已南征。竹径含云气，蕉窗带雨声。沈沈迷画阁，黯黯满秋城。极目疏烟里，苍茫远岫横。

月夜偶成

飒飒金风木叶飞，银河皎洁漏声微。一窗凉月明如水，乡梦因何不肯归。

留别荆南女子吴秀英

携手同游几度春，《骊歌》一曲暗伤神。濒行相嘱还相慰，始识将离意倍亲。

十载晴窗共绣针，挑灯每话至更深。殷勤此后如相忆，秋月春风两地心。

舟次巴东见山居者

谁家岩畔结蜗庐，门对江流画不如。茅屋数椽丛树绕，芋田人背夕阳锄。

万县晓起

惊回晓梦不成眠，起看江行欲曙天。水气岚光分不出，鸟声啼破万峰烟。

### 章江晚泊

一幅云林景，天公设色匀。树鸦团暮霭，村犬趁归人。残照平山外，馀霞远水滨。欲成图画出，粉本妙无伦。

间倚篷窗望，人烟夹岸繁。晴波摇日脚，暝色起山根。几点明渔火，三篙涨水痕。蒲帆看乍落，停泊即前村。

### 秋日书感

风色肃庭院，萧疏生客愁。故园千里梦，新雁一声秋。官阁仍连雨，天涯数倚楼。空怀季鹰意，何日愿方酬。

### 寄中峰诸弟

依然多病心情懒，远盼鳞鸿问讯勤。千里关山愁入梦，三更鐙火叹离群。终年独玩梁园月，何日同看冀北云。官漏沈沈春夜永，无眠意绪总纷纭。

小立花间草似茵，天涯极目可怜身。家园又是三年隔，物候仍看几度新。聊藉诗书消永昼，直将得失等浮尘。举头红雨纷纷坠，强染霜毫赋送春。

### 小松

道旁松尚小，翠色一何新。应有干霄日，浓阴荫路人。

### 春暮感怀

又见枝头红雨飞，近来事事与心违。椿萱老去悲何极，手足离多信亦稀。异地情怀人怅怅，故园花柳梦依依。那堪回忆当年境，一觉黄粱是也非。

### 天竺寺

修竹带朝烟，声喧石底泉。湖山环法界，梵呗落诸天。扑面岚光湿，当空塔影圆。筇舆归路远，回首白云连。

初地今方至，层峦树杪看。修篁三竺路，清磬百花坛。妙境开生面，慈云入大观。风微松韵静，夕照暮烟闭。

### 葛岭

修竹不见天，隐约有茅屋。息足磐石间，春风吹浓绿。

### 沂州道中

平畴雨润晓烟笼，漠漠轻阴护玉骢。驿柳尚依孤艇绿，霜枫初染半林红。临川饮马波纹细，破屋炊薪暖意融。指点前溪通略约，此间风景似南中。

#### 泊孟河口

数丛竹树好探幽，新筍锄来酒共酬。瓜步军声惊去雁，芦湾秋影剩眠鸥。閒看前史消长夜，每忆时艰动隐愁。官舫暂停潮未上，一帆此夕且勾留。

#### 孙荪意

孙荪意，字秀芬，一字苕玉，仁和人。诸生高第室，编修杖母。有《貽砚斋稿》。

#### 仙岩洞遇雨而归

日轮忽倒行，惊雷殷山底。云从洞里生，顷刻迷尺咫。心愁万青松，一一化龙起。坐令攫此峰，飞入苍冥里。火急催登舟，篷背雨声驶。回头不见山，模糊但云水。

#### 所爱猫为颖楼逐去作诗戏之

猫奴虽小畜，首载自《三礼》。祭与八蜡迎，圣人所不废。而况爱者多，难以屈指计。立冢标霜眉，哦诗称粉鼻。黄荃工写生，昌黎曾作记。五德谗见嘲，十玩图斯绘。黄金铸像偿，沈香斫棺瘞。乃知爱猫心，无贵贱钜细。余亦坐此癖，张搏绝相似。贮之绿纱帷，呼以乌圆字。簪裹红盐聘，柳穿白小饲。时时绕膝鸣，夜夜压衾睡。著书盈简编，颇自矜奇秘。神骏支公怜，笼鹅右军嗜。所爱虽不同，玩物宁丧志。檀郎独胡为，似疾义府媚。一旦触其怒，束缚遽捐弃。据座噉牛心，虽然名士气。当门锄兰草，颇伤美人意。知君味禅悦，此举非无谓。吞却死猫头，悟彻无上义。

#### 钱塘怀古

古杭形势称雄界，左右江湖作襟带。我来吊古发长嗟，舞榭歌楼陈迹在。缅昔钱王乘王气，八州保障民生倚。西湖之水不肯填，愿作开门节度使。一朝点检腾风云，四方纳贡皆称臣。是时钱塘归附早，底须振旅烦曹彬。如何瞬息红羊换，绝域兵戈穷庙算。苍黄泥马渡江来，故国山河弃天畔。再延国祚百余年，占得临安半壁天。《黍离》莫洒孤臣泪，回首樊楼只黯然。偏安遂尔成南渡，此事由来亦天数。居民争望小朝廷，汴水苍茫渺何处。北地悲笳夜月哀，西湖歌管春风来。但得和戎长计在，君臣行乐莫相催。即今故殿埋蓬葆，凤凰山上无人到。荆榛寂寞铜驼悲，萝薜荒凉山鬼吊。惟有梳妆台畔池，春来长遍胭脂草。

#### 孝烈将军歌

挟弓刀，跨鞍马，宛宛去边城，妾是从征者。昨夜可汗来徵兵，户有三丁抽一丁。阿爷年衰小弟弱，妾替爷征死亦乐。戎装结束慷慨行，万里驰驱入沙漠。黄河东去黑水西，愁云惨惨阴山低。故乡一片深闺月，夜夜沙场照铁衣。狡兔雌雄那可怜，火伴同行空习见。不画蛾眉十三年，归来依旧芙蓉面。吁嗟乎！英雄何必皆男儿，须眉纷纷徒尔为。君不见，孝烈双兼古莫比，乃在区区一女子。

### 夕阳

闪闪翻鸦背，遥天一线留。钟声孤寺暝，帆影半江秋。流水杳然去，乱山相向愁。虽怜无限好，行客莫夷犹。

### 飞来峰

终古不飞去，苍然卧冷云。秋高山露骨，石瘦树盘筋。宝佛留真相，清泉漾縠纹。胜游怀白傅，千载贻遗文。

### 冷泉亭

孤亭接翠微，徙倚澹忘归。触石水如怒，破空山欲飞。僧閒钟梵寂，日薄树阴肥。不觉轻云过，清寒入袷衣。

### 秋夜

雨过虚堂睡未成，挑灯閒坐夜凄清。草间蛩语林间叶，底事秋来尽不平。

### 听莺

空庭过雨晓烟新，恰恰莺啼杨柳春。好语如簧须自惜，世间识曲已无人。

### 蒋徽

蒋徽，字琴香。号石溪渔妇，江西人。吴嵩梁继室。

### 题潘伴霞漱芳阁诗稿

小谪三湘亦俊游，彩鸾写韵有高楼。怪来诗思清於水，玉女盆曾借洗头。

### 王贞仪

王贞仪，字德卿，江宁人。诸生詹枚室。有《德风亭诗钞》。

### 登焦山

峰势长江矗，涛飞天外声。潜虬能护法，徵士独留名。塔宇金山寺，人家铁瓮城。凭高一耸目，东望海云平。

### 题素心兰画幅

谢庭幽种托根殊，似此孤标绝世无。素质宜陈青玉案，东风初启碧纱幮。萧骚帝子

三闾赋，零落王孙九畹图。一自江皋遗佩后，年年烟雨怨啼鸪。看花作画亦精神，传得双钩楚泽春。燕尾鱼魇差后乘，光风霁月认前身。交从至淡方称契，品到无瑕始见真。裁我瑶笺惭报语，不教青眼误埃尘。

#### 下邳夜泊

黄石城头雨未乾，晚风吹送角声寒。扁舟莫道小如叶，载得春愁分外宽。

#### 许燕珍

许燕珍，字俪琼，号静含，合肥人。武田知县齐卓女，无为诸生汪镇室。有《蒲馀小草》。

#### 古镜

斑斑绿绣土花蚀，首山之铜鬼工凿。背铸篆籀人不识，持向九天问苍颉。云是汉时波祗国中物，森森寒气侵两眸。石破天缺天雨秋，莫悬高台最上头。肝胆照见秦女愁，又惊山鬼魑魅啼啾啾。

#### 题浔阳送客图

月冷风清两岸秋，琵琶一曲感江州。天涯不少无情客，岂独商人重利游。

#### 任崧珠

任崧珠，字端卿，震泽人。张起鹄继室。有《瑶清仙馆草》。

#### 七夕

银河明明影欲泻，微凉飒飒初秋夜。共道天孙会佳期，金盆玉笋陈花下。东家少妇乞智慧，西家儿郎乞富贵。隔院微闻笑声，此时依亦临阶砌。阶前再拜谆谆祷，不乞荣华不乞巧。神仙若问意何求，但愿朱颜长久好。

#### 寄怀

辛苦赋从征，秋风细柳营。魏依闺阁里，剩有梦魂惊。

明月照幽幌，新凉袭素襟。怀君无限意，静院更闻砧。

#### 夜坐

风颤花枝月满庭，逼人凉气冷银屏。清心欲取瑶琴弄，怕有云间鹤驻听。

揽衣起坐听残更，竹影摇窗夜气清。悄对一瓶红菡萏，挑镫检韵到天明。

有示

疏疏烟柳集昏鸦，曲曲雕栏映月斜。莫向楼头吹玉笛，有人清思在梅花。

悼鹦鹉

一卷《金经》忤不成，再生惟愿莫聪明。可怜寂寞秋槐院，无复帘前唤茗声。

聪明文采定非宜，幻质迷离我亦痴。愁对花阴坟一撮，海棠如梦雨如丝。

渔翁

露满清江月满天，得鱼换酒乐陶然。孤篷惯向芦花泊，一任飞霜点鬓边。

雨窗即事

镇日绵绵雨，閒愁脉脉生。痴云浓有影，野水静无声。筍老穿篱瘦，梅肥落地轻。  
翻怜蛙两部，著意向人鸣。

一径林花落，柴门昼掩关。窗深慵点笔，楼窄好看山。得句夸娇妹，拈诗课小鬟。  
不嫌连日雨，赢得数朝閒。

送王氏侄妇归里

深闺欣聚首，宛作竹林看。此日孤舟别，关河路渺漫。提携儿女小，郑重雪霜寒。  
不信相逢易，翻怜判袂难。

龙溪署中登准提阁次韵

强邀女伴上层楼，万叠云山望里幽。共喜岚光添粉本，肯因柳色感云浮。垂纶我羨  
姜诗鲤，扣角谁歌甯戚牛。傍晚钟声听隔院，吟成馀兴尚难休。

一声清磬又登楼，倚遍栏杆客思幽。望远却嫌云树蔽，看山最爱夕阳浮。渔歌隐约  
溪边艇，牧笛横欹陇上牛。同是平生好吟癖，新诗酬唱不能休。

春日偶作

底事年来百不宜，一春常是病支离。身如中酒频投枕，事尽无聊并废诗。白日多从  
閒里度，朱颜暗向镜中移。幽怀无奈偏相触，满箔春蚕正吐丝。

登楼

看山不用出层城，几度登临爱薄晴。云带晚霞无定色，蝉吟夕照有馀声。疏篱木槿

娟娟艳，极浦沙鸥点点明。笑我题诗无健笔，倚栏敲句愧难成。

#### 谢香塘

谢香塘，平阳人。诸生青阳姊。有《红馀诗稿》。

#### 暮春偶成

踏青有约未应违，懒慢心情昼掩扉。燕子不来花又落，恼他杜宇唤春归。

#### 木兰

换得戎装事远征，别亲原自不胜情。销魂最是黄河水，隔断爷娘唤女声。

倾城直欲作干城，忠孝由来出至情。异代有人还继武，桃花马上请长缨。

小轩山茶一株春过半矣尚未盛开口占一绝

春光久已到山城，底事含葩态未呈。绝色由来难便嫁，催妆应是待诗成。

#### 李嫩

李嫩，字婉兮，吴县人。诸生陆昶室。有《琴好楼集》。

#### 怀清溪任夫人

杨柳澹春阴，池塘过疏雨。所思人不来，怅怅徒延伫。洞庭看落花，花落已如许。  
好鸟自嚶鸣，不解离情苦。

#### 春闺

春寒料峭病恹恹，愁到眉峰两碧尖。妒煞呢喃双燕子，寻巢依旧入风帘。

#### 题梁溪孙旭英峡猿集

花落江城水乱流，绣馀一卷独悲秋。分明风雨嘉陵夜，肠断三声在岭头。

#### 秋夕

十二层楼夜月明，美人帘底坐吹笙。芙蓉露冷秋衣薄，翻到霓裳第几声。

#### 陈淑英

陈淑英，字德卿，莆田人，同县诸生翁焕室，兆兰、兆熊母。有《竹素园诗集》。

### 月夜

夜静倚阑干，声声柝未歇。举头忆远人，怕见团圞月。

### 春日归宁途中即景

流水出山远近，落花辞树东西。人从孤艇垂钓，鸟向斜枝乱啼。

### 附家书后

欲凭家信劝加餐，愁里题诗下笔难。为报课儿辛苦处，夜深镫火雨声寒。

### 马绣吟

马绣吟，铜山人。灵璧举人、训导陆大猷室。有《倦绣阁诗草》。

### 春晴

既雨饶春色，游丝空际飏。莺簧调柳陌，蝶粉腻花房。日度迟迟影，炉焚细细香。为防风雨至，静坐惜韶光。

### 李如蕙

李如蕙，字桂泉，香山人。三水梁元室。有《茗香室诗略》。

### 舟发梓潼镇

万里回乡道路难，秋江买棹水漫漫。征帆未挂心先怯，数向舟人问险滩。

### 拟远离曲

送君欲别情难别，望君不望君归早。富贵能如古宋宏，敢惜君归妾颜老。

### 王淑

王淑，字畹兰，吴江人。乾隆丁未进士、御史祖武女。有《竹韵楼诗词》。

### 寄怀筠心姊妹

迢递关河隔，天涯各一方。相思愁万斛，忆别泪千行。迹已空兰若，春还到海棠。病中消岁月，客里惜韶光。北雁传书远，南云引领望。关心新节物，回首旧词场。月落知情重，江流与梦长。卷帘人寂寂，极目倚回廊。



壬戌仲秋出都留别李纫兰杨蕊渊陈衡芳诸姊

听残《薤露》又《骊歌》，折柳临歧唤奈何。白社而今吟兴减，缟衣此去泪痕多。  
他年或有抆沙聚，往日空教逝水过。郑重一声各分手，秋风落叶满关河。

过三叉河

落木满天涯，孤帆逐暮霞。凄凉舟一叶，曲折路三叉。树影随波动，山光隔岸遮。  
篷窗凝望处，寒雁落平沙。

日暮柁楼望，怆然百感生。愁心如水长，病骨与秋争。瘦蝶栖难稳，寒鱼夜有声。  
邮亭镫火暗，数遍短长更。

七夕

银河耿耿夜悠悠，怅望双星独倚楼。莫更修成仙眷属，须知一会一年愁。

风雨连日花事凋残为赋短歌寄慨

尖风荡漾帘波冷，游丝百尺飘香径。湿翠愁红入卧屏，梁间双燕参差影。金钗堕发  
春眠重，可怜春去愁难送。花开花落费商量，凭谁唤醒流莺梦。柳棉榆荚正悠扬，悄倚桃笙  
空断肠。芳菲莫怪春光老，人世年年损靓妆。

江城喜晤李纫兰姊即送其还杭

今夕复何夕，相逢天一隅。关河千里梦，风雨十年愁。我昔辞知己，君频赋《远游》。  
看花曾落下，鼓枻又西州。几载怜征雁，同盟忆冷鸥。垂虹期信宿，话雨益绸缪。旧事空谈  
笑，新词互勘讎。别离诗更苦，儿女语还柔。共惜须臾景，难邀顷刻留。风尘聊洗涤，笔砚  
与归休。西子湖为镜，南屏翠入楼。怀人应有作，寄我许相酬。怕听回帆鼓，愁添报晓筹。  
愿言各珍重，清泪已盈眸。

寄怀宛怀伯母

别后长相思，五见月圆夕。莲衣堕冷红，梧叶飘凄碧。黯然离愁生，苍茫秋水隔。  
昨枉锦字书，言言胜药石。自惭经爨材，重荷知音惜。欲寄万种情，情长嫌纸窄。花影倚阑  
横，凉月穿帘白。不寐独徘徊，天涯渺咫尺。

夏夜偶成

率地湘帘夜气清，映阶碧草雨初晴。裁成白纻翻新曲，思与红莲订旧盟。明月入怀  
摇绮扇，露华如雨湿桃笙。曲阑倚遍浑无语，照见幽情只短檠。

题宛怀伯母诗钞即次卷中和东坡定惠院海棠韵

今秋水潦湮草木，松柏青青受命独。园林两地绝可怜，并少桃顽与杏俗。黯黯愁生感索居。趑趄音喜来空谷。一函珠玉慰葵情，百幅琳琅照茅屋。安心无复九回肠，慧业兼空五净肉。泠然入齿松风清，韵语禅机两忘足。咏絮才真越众昆，簪花格自追前淑。嗟余昏顽昧性根，自笑空虚负痴腹。插架徒思万卷书，绕楼那有千竿竹。聊欲忘忧倚紫萱，谁知中苦同湖目。同心谬许臭如兰，知足奚容妄思蜀。飞蝇何幸得附骥，画虎终差期刻鹄。破闷翻成惆怅词，赏心惟有《懊侬曲》。会须扫地焚清香，影事前尘那忍触。

### 夜坐

落霞深院静，暝色又黄昏。约梦镫留影，浇愁酒有痕。秋风侵病骨，冷月吊诗魂。为惜清宵景，呼鬟莫掩门。

### 帅翰阶

帅翰阶，字兰娟，奉新人。家相女孙。

### 梦得首二句续成

长立小楼前，吟魂荡晓烟。水流还极浦，草色又今年。历雪经春后，轻寒欲暖天。几时杨柳意，青到酒旗边。

### 暮春

堂堂春不住，片片逐花飞。惟有红襟燕，雕梁尚语归。

### 管筠

管筠，字湘玉，钱塘人，同县陈文述侧室。

### 题绣君女史百花卷子

云裳月珮各清华，斑管凝香绚彩霞。知我性耽禅悦惯，毫端多写妙莲花。

### 小鸥波馆豪华蚕饲以百花茧破化蜨飞去赋诗纪之

折花和露贮荆篮，数到眠三起亦三。不望络丝学天女，双蛾珍重赧华蚕。梦绕巫山十二峰，朝云如画楚台封。何如但作双飞蜨，花海春深处处逢。

### 写碧城摘句图竟题诗

奇句如飞仙，长啸弄云碧。天门扫落花，春山横一尺。月华飘羽衣，鹤背夜吹笛。

惊句如侠客，使笔如使剑。星斗寂无声，青天碧云敛。夜中红线来，冰雪芙蓉艳。

俊句如名士，鹤立山鸡群。六朝旧明月，清谈生古春。吐咳弄珠玉，齿颊含风云。

丽句如佳人，天然出名靓。发艳梨涡娇，吹芳兰气静。玉镜一泓春，照见桃花影。

闻颐道夫子议行海运寄诗规之

空劳辛苦说飞刍，几使楸枰一局输。自昔人材混萧艾，未容高议出菰芦。无多斟酌花前酒，随分杯盘竹里厨。月桂风荷好烟景，不如閒写晚凉图。

文静玉

文静玉，字湘霞，吴县人。钱塘陈文述侧室。有《小停云馆诗钞》。

碧城曲

碧城十二阑干曲，梵字回文亚蛾绿。阑前多少晓妆人，雪艳花明都似玉。绕砌三花玉树肥，翠鹇閒共彩鸾飞。池边清响锵瑶佩，花下灵香拂羽衣。羽衣瑶佩纷妍妙，观香弄玉都年少。奏罢《霓裳》奏《绿腰》，上元回首嫣然笑。琴会何如墨会佳，扶风绛帐有金钗。偶拈翠羽吟罗袜，閒谱金荃赋锦鞋。群仙高会群芳宴，紫凤香毫铜雀砚。何人解赋晓仙谣，赋成亲写桃花片。太白星精笔有神，芙蓉城主谪仙人。我来同倚阑干曲，不证兰因证蕙因。

蘼芜香影曲

蘼芜香满蘼芜冢，虞山晓翠春云拥。香名一代柳河东，落花吹遍红箫陇。月地花天几度游，琴河初起绛云楼。桑沧花月人天劫，争及卢家有莫愁。月隄烟柳春痕薄，吾谷閒登秋水阁。东山无复耦耕人，红豆花繁自开落。碧城仙吏最多情，惜玉怜香过一生。重访蛾眉埋玉地，胜他箫鼓葬倾城。黄绢词工碑石冷，鸥波解写婵娟影。踏青遮莫踏蘼芜，恐惊地下春魂醒。

隐仙菴六朝古梅

湘女窥烟翠袖单，色香味已入旃檀。宋齐霜雪梁陈月，玉蕊冰花尽耐寒。

秦沟粉黛砖砚诗

邹峰野火焚，会稽残字假。不见秦代碑，犹见秦宫瓦。萑阳云树暗，兰池烟草萋。不见秦宫瓦，乃见秦沟泥。沟泥亦非泥，洗妆渍粉泽。脂红与黛翠，残香敛魂魄。祖龙平六国，后宫罗婵娟。永巷等阴隧，不见卅六年。清渭涨腻流，远绕骊山路。此砖何自得，应近骊山树。建业印模糊，铁厓书妩媚。何如青陵台，驳落苔花翠。秦云不可见，秦月犹在空。寂寂澄心堂，郁郁阿房宫。

香雪海歌

黄山云海真奇绝，极目波涛任明灭。参横月落翠羽啼，还向湖阴踏香雪。是香是雪

留春痕，非香非雪招春魂。六浮阁外万横玉，暝烟疑入罗浮村。斜阳海气澄，微风海波动。珊瑚冷挂月轮寒，玉蕊冰花一齐冻。香耶雪耶两不知，蛟背湘妃寒入梦。忘机最好伴閒鸥，鹤渚芦田几度游。一棹渔庄倚秋雪，愿从花海泛扁舟。

### 西湖泛月

西子湖边月，流纹荡画桡。露花青雀舫，烟柳赤阑桥。旧谱《霓裳》忆，新词翠袖娇。谁家珠箔里，凉影一枝箫。

### 由灵隐至韬光

几重精舍掩荆扉，一径苍苔上翠微。饥鼠惯从松上窜，幽禽时向竹间飞。雪翻小瀑潜通笕，云共残花半拂衣。清绝不知人世事，夕阳如水澹忘归。

### 凤凰山吊南宋故宫

凤凰山下凤凰门，南宋宫庭辇道存。八桂玉堂秋有迹，万松金阙翠无痕。披香阁圯春云散，洗粉池空暮雨昏。何处残山留一角，夕阳凝望最销魂。

### 月夜放鹤亭听鹤唳

放鹤亭中鹤，霜寒夜不眠。仙心出云表，清响答琴弦。我访巢居阁，因停翫画船。梅花三百树，素月正横烟。

### 东园访南宋画院遗址

富景园西古路斜，疏林黄叶冷啼鸦。空馀金碧昭仪寺，无复丹青待诏家。夜月残山留马远，桃花团扇咏杨娃。宣和遗事分明在，德寿宫庭又奉华。

### 六幕山访南宋宫入斜

从古蛾眉怨入宫，长门老死后庭空。几堆浅土秋阴里，无数残碑暮雨中。晋代玉弓惊谢朓，汉家金碗失卢充。江山半壁朝廷小，一样怜香葬落红。

花明雪艳谢飘轮，玉瘞香埋委路尘。霞帔自怜萤照晚，《霓裳》渐化蝶衣新。空江白雁凄才鬼，冷月红鹃哭丽人。二十四堆春草绿，可怜三十六宫春。

中官麦饭酹斜曛，萧寺残钟入暮云。颈饰丹青留钿轴，腕阑金翠浣苔纹。花香吴寺还刘寺，草暗阎坟又贾坟。同是春山一抔土，胜他青冢葬明君。

赋罢游仙赋梦华，青山曲处玉钩斜。空馀禾黍迷春燕，无复棠梨散暮鸦。鹦鹉楼台非故国，凤凰宫阙又谁家。更怜竺国双经匣，开落冬青一树花。

### 修明怨

修明与夷光，二女同入宫。宫中各妍妙，并蒂双芙蓉。如何姑苏台，惟说西施好。但见西施娇，不觉西施老。舞亦西施舞，歌亦西施歌。蛾眉不见赏，寂寞归山阿。红颜难保恩，玉颜难免妒。后来江采蘋，亦有《楼东赋》。

#### 银河篇寄颐道主人汉皋

六月银河云影碧，八月银河露华白。金风微动晚凉生，最觉分明秋七夕。七夕银河分外明，青天不许片云行。璇宫夜静支机石，微觉珊珊静有声。画屏光冷销银烛，案户横斜还络角。花阴深处倚阑干，罗衣单薄人如玉。红墙宛转鹊桥秋，知有天涯望远愁。天际归舟何日到，莫教织女望牵牛。

#### 姚氏

姚氏，临桂人。嘉庆辛酉进士、同知朱凤森室，琦母。

#### 三元诗

桂林山水甲天下，历朝鼎甲冠诸夏。榕门相国五世孙，翰苑文章齐董贾。伏波玉柱一枝连，可知状元生自天。粤西乡党为之羨，小试三元已在先。三元古今虽叠有，三千年桃十丈藕。张又新，崔元翰，彤廷对策文章焕。孙何王曾暨宋庠，郁乎一代文明昌。复有杨寔王岩叟，英风勃勃登名场。愿为金室孟宗献，勿为元室王宗哲。黄甲由来劝忠孝，此衷何以励臣节。有明商辂真贤臣，加以黄观为两人。又见何涣陈尧叟，谈薈轶事君知否？《南部新书》武翊皇，亘古文名传不朽。我朝醲化庆覃敷，五星连珠光海隅。辛丑湘舲钱学士，后先辉映枫宸趋。统计三元十有七，兹喜哲臣名第一。遥望榕门培远堂，廉吏有后信今日。

## 【卷一百八十七】

#### 汪端

汪端，字允庄，钱塘人。同知陈裴之室。有《自然好学斋诗集》。

#### 孙节妇诗

节母程，嫔于孙，阅六载，琴瑟敦。夫夭亡，妾无子，死从夫，生何恃。堕楼不死神扶持，投缢复被旁人知。舅姑来，向妇泣，两叔未娶亲发白，汝夫不幸归黄泉，汝宜代夫尽子职。舅姑言终妇泪流，妇敢先死贻亲忧。良人地下姑少待，此身暂为双亲留。下抚两叔，上持舅姑。数年月照罗帏孤，夫已墓木拱，妾亦泪眼枯。嗟哉！两叔相继歿，舅姑心摧妇泣血。所遭竟如此，天心讵可测。鬻我嫁时钗，开我镂金箱，为翁置妾延烝尝。叔生未几翁姑亡，孤嫠吊影增凄凉。族中鬼巾惑凭陵久，茕茕衰门妾独守。叔长娶妇妇举男，妾抱子之夫有后。画荻丸熊心力瘁，几年十八游伴水。儿游泮水母心喜，可见舅姑夫子矣。六十八年完

节身，生固非生死非死。呜呼，立孤难，死节易，婴与杵，当年事。处易不得乃处难，请看桐乡节母茹荼志，巾幗须眉固无异。

### 秦沟粉黛砖砚歌

南唐砚山不可见，人间犹贖南唐砚。香姜铜雀久销沈，幻出秦宫云一片。六国蛾眉竞晓妆，歌台舞殿起阿房。星荧明镜骊山远，涨腻凝脂渭水香。四围错落珠玑细，粉晕斑斑黛痕翠。临波想见卷衣人，玉姜艳逸文馨丽。深锁长门卅六年，鱼膏银海閤重泉。御沟空照秦时月，春水流花冷暮烟。楚人一炬悲焦土，留得残砖碧苔古。建业文房好护持，锺山小隐风流主。金缕应填绝妙词，新声曾谱恨来迟。红罗亭榭瑶光殿，知付娥皇付保仪。一行题跋忠宣笔，昆刀细划龙山雪。早春独殿赋梅花，不碍广平心似铁。何处香花识旧墩，百年流转到清门。松烟寒滴蟾蜍泪，兰篆红销晰蜴魂。秦台未到吹箫处，秦山尚有宫人墓。澄心堂纸玉管毫，夜鐙还写《阿房赋》。

### 翁大人得隙地於孤山为菊香小青两女士修墓并建兰因馆其上为夕阳花影楼

楼左为绿阴西阁以祀小青右为秋芳阁以祀菊香先是为明女士杨云友修墓於智果寺因以祔祀遍徵海内题咏哀为兰因集端亦赋四律郑家娇婢解吟诗，和靖风流想见之。遗址误寻高菊圃，前身应是谢芳姿。踏青春访琼姬墓，飞白宵题玉女牌。更乞茂漪书一过，簪花楷法妙临池。焚馀诗草返生香，遗集真应号《断肠》。齐国淑妃原著姓，蒋家小妹是同乡。镜湖桃叶鸥盟远，画阁梅花鹤梦凉。最忆横波摹小影，眉楼一角写斜阳。又见杨娃小印红，容华才笔丽惊鸿。丛残著录留湖上，轻薄姻缘说意中。谢逸画图寒翠晚，汪伦潭水夜星空。依照智果西头路，绝胜仙霞万点枫。碧城坛坵久名家，多少蛾眉礼绛纱。仙子玉垆玉涧雪，美人湘管一枝花。隔湖香冢秋飞蝶，映水红楼晚噪鸦。更访吴宫双玉墓，牡丹厅畔竹阴斜。

### 画兰曲题梁溪女冠韵香画兰长卷

清楚鱼山夜月寒，松花如雨落仙坛。绮窗初试金壶墨，写罢灵飞更画兰。瑶笙吹彻羽衣凉，瑟瑟微波梦碧湘。解为幽花写秋影，玉人原是杜兰香。

### 张秀端

张秀端，字兰士，番禺人。维屏次女，钱邦彦室。有《碧梧楼诗词钞》。

### 银汉

耿耿淡横秋，银云影欲流。至今传渡鹊，终古隔牵牛。离思经年阔，波光入夜浮。仙槎如可汎，天路接瀛洲。

### 白燕

画栋朱门计总非，玉楼寒尽见初归。衔将絮雪营新垒，翦得梨云补旧衣。月黑有时留素影，春红多处爱双飞。前身恰是瑶台谪，王谢重来识亦稀。

### 白雁

芦汀飞雪岸生苔，浪迹风尘亦可哀。秋入岭云乡信滞，月明湘水橹声来。长门梦断银缸炮，绝塞愁多白发催。欲把羁怀传尺素，冰弦挥罢意徘徊。

### 何佩芬

何佩芬，字吟香，歙县人。盐知事秉棠次女，范志全室。有《绿筠阁诗钞》。

### 奉怀家大人时转饷入蜀

每忆长途苦，谁怜蜀道难。山头孤月朗，马首片云寒。雁影传书至，钟声响梦残。不如琴与剑，犹得伴征鞍。

### 冬日书怀

瘦尽年来影，愁魔与病魔。霜飞鸦背冷，风急雁声多。红树明残照，青山淡远波。无穷惆怅事，搔首发长歌。

虚窗纳云影，清气满书帷。败叶无空响，孤花有静姿。冻凝苍蘚径，寒到白鸥湄。尝尽酸辛味，惟应晓镜知。

### 红情

芳心一片总难知，白白朱朱更系思。杨柳浓添今日恨，桃花瘦减去年姿。蜂酣繁艳迷香国，蝶恋馀妍绕玉墀。底事夕阳倍惆怅，韶光又到送春时。

### 绿意

惜花心事肯相捐，绣幕低垂罨碧烟。柳眼慵开愁脉脉，蕉心自结恨绵绵。千丝织翠遮三面，万树连云荫一天。最是重来难遣处，枝头梅子十分圆。

### 秋海棠用渔洋山人秋柳四首韵

销尽幽闺怨女魂，和烟和雨映重门。枝分翠黛秋无影，泪化红冰镜有痕。漫道轻盈桃叶渡，剧怜惆怅浣花村。风姿本是神仙品，菊婢何堪共比论。

娇枝红破一分霜，不共芙蓉值野塘。叶卧岂黏游客屐，花飞时扑美人箱。丰神细写题词李，艳丽翻怜出塞王。知否放翁颠未改，寻秋重到碧鸡坊。

桃花双颊映珠衣，梦醒华清事已非。三径凉生莺燕少，一庭香蕴蛭蜂稀。夕阳屋角红疑滴，细雨墙根翠欲飞。斜倚画阑娇不语，幽情应与世相违。

绿肥红瘦总堪怜，泪洒胭脂欲化烟。不占春光仍烂漫，纵无秋思也缠绵。静含清露

刚三日，艳绝西风又一年。翻羨紫薇高格好，株株占得凤池边。

何佩玉

何佩玉，字琬碧，歙县人。秉堂三女，祝麒室。有《藕香馆诗钞》。

春暮遣怀

多病惜慈亲，春寒费调护。卅载菲盐劳，怡然甘守素。两鬓早如霜，双眸半遮雾。感此伤寸心，无言倚庭树。

题常熟张孝女传后

孝女心，天上月，万古清光长不没。孝女颜，雪中花，千秋香艳明於霞。十龄失怙心如剖，宛转相依惟阿母。屏除粉盥与脂签，日侍茶铛兼药臼。窈窕窗前守一经，天然玉立秀亭亭。螺丸肯画双弯碧，閒煞虞峰入镜青。传家雅有支机石，笑语承欢自朝夕。不绣鸳鸯并凤凰，簪花小仿曹娥格。温清辛勤二十年，一朝母病痛难痊。人间那有长生乐，苦乞参苓晓夜煎。背人偷卷香罗袖，欲倩肌肤延母寿。空庭悄立月无光，虬箭沈沈催玉漏。瓠犀深啮臂脂殷，眼波迸裂攒眉山。一线金刀飞白炼，血痕尽变桃花斑。烹作羹汤进母食，绕床忍著凄凉色。岂知母病太沈绵，百转千回医不得。生身恩重此身轻，代死吁天天亦惊。一瓣心香虔默祷，椎心欲泣不成声。悲鸣鵬鸟号风木，户外清霜折慈竹。白云痛绝影迢迢，愁对寝帟镫晕绿。香桃骨瘦不胜衣，麦粥微餐药饵稀。含笑随亲归碧落，雁行肠断惜分飞。芳名真合标青史，彤管传来凭阿姊。南国徒夸彼美人，北宫不数婴儿子。焚香读处首先低，今古何人可与齐。惆怅琴河寒食节，女贞花发孝乌啼。

听外话皋亭桃花之胜

春波浩荡风泠泠，扁舟结伴来皋亭。閒鸥静鹭解迎客，兰桡直到花边停。一株秀而整，穿云蟠过青山顶。一株艳而娇，欹斜暗束青山腰。日丽霞衣翻片片，何处东外识人面。漫天匝地卷红潮，花郁峰郁都不辨。一重花护一重山，珊瑚倒插翡翠环。但愁封姨扫作胭脂雪，胜游肯放金樽閒。望中红白疏密向背不可数，仿佛身入流水天台间。千枝万枝迷处所，山欲出云花不许。华鬘世界净红尘，惟听仙禽空际语。感君话旧向晴窗，茶嫩香清蝶影双。游女如云花似海，便思打桨泛春江。

送外侍翁大人并子虔兄公入粤

当头明月淡遥空，折柳歌骊曲未终。惜别本无儿女态，联吟喜有父兄同。装轻半载诗书画，道远还愁雨雪风。十里花田烟树里，洋桃水碧佛桑红。休嗟凤泊与鸾飘，一叶帆飞廿四桥。旧梦已怜池草冷，离魂拚共蜡花消。乡关日远鸳鸯水，海国烟寒玳瑁潮。料得情深非久别，莫教再瘦到吟腰。晨昏须博老亲欢，岭表风光任饱看。丹荔绿榕堪入画，珠蚶花蛤好加餐。屈伸未免依人苦，冷暖应知作客难。珍重临歧无别语，早将尺素报平安。不尽离愁宛转思，到时应在早春时。满篮香露花含笑，一路青山鸟画眉。得意何妨归缓缓，关心惟愿去迟迟。素馨抹雨珠娘舫，好谱风华绝妙词。



何佩珠

何佩珠，字芷香，歙县人。秉棠四女。有《环花阁诗钞》。

问春

底事年年费送迎，回黄转绿判枯荣。于人岂有炎凉意，入世何多旖旎情。未必易圆双燕语，竟能催得百花生。漫天匝地红无数，可是君才长养成。

辛丝

辛丝，字瑟婵，太原人。有《瘦云馆诗》。

华顶茅蓬遇女真静如自言百二十岁矣

华顶访茅蓬，铢衣飏晚风。烟霞浮磬外，日月贮壶中。药采村姬碧，花簪酒姥红。玉颜忘甲子，应是李腾空。

病后登小楼有感

小楼屈戌锁孤烟，雁病虫凄又几年。秋冷蠨蛸行砚匣，夜深蝙蝠拂琴弦。水纹自漾书帷上，山翠仍横镜槛前。恐有茂陵遗稿在，残篇重检一凄然。

半野堂怀古

虞山苍翠暮云中，一代声华惜此翁。家国沧桑奈何帝，文章细碎可怜虫。功名庾信空多感，《诗品》锺嵘亦未公。儿女英雄要遭际，蛾眉可惜柳河东。

题鸥波夫人碧城摘句图

明珠作佩玉为台，锦字回文妙翦裁。春到牡丹才国色，人言太白是仙才。定知燕寝焚香坐，如见鸾冈写韵来。我是碧城诗弟子，焚香一读一徘徊。

桃花岭遇雨

缓缓香车渡岭行，四山红雨下无声。夕阳影上春衫薄，身在桃花岭上行。

溪边茅屋两三家，双髻村娃解煮茶。几片湿云松树顶，吹来雨点半桃花。

吴藻

吴藻，字蘋香，钱塘人。有《花帘书屋诗词》。

青黛湖上吊吴宫双玉祠墓双玉者阖闾女胜玉夫差女紫玉也墓久失陈颐道先生为营

抔土鹤碣之西并建词塑像勒文於石青黛湖虎丘后山湖名当即女坟湖也

湖中水暖鱼吹絮，湖边花发莺啼树。吴宫花草久成尘，瞥见吴宫双玉墓。双玉复双玉，玉貌皆婵嫣。白鹤解舞影化烟，各有冤愤沈黄泉。才人解惜婵娟子，瘞玉埋香访遗趾。绣襦甲帐写真形，如向黄泉重唤起。君不见玉波荡漾双莲冷，当年队长无留影。又不见施夷光、郑修明，馆娃宫圯屣廊尽，苏台空有苔花生。玉人如玉年娇小，争似婷婷双玉好。《离骚》哀怨为招魂，应有碧云来缥缈。雀扇铢衣好画图，千秋金粉重三吴。回首兰因吊花影，黛湖何似美人湖。

### 秋雪渔庄

芦絮明寒渚，松阴暗草堂。西溪好烟水，中有此渔庄。筑簑营鸥宅，分田种鹤粮。梅花三百树，晴雪又浮香。

### 龙井道中

一径风篁路，幽泉响石矶。竹林秋筍瘦，苔磴晚花肥。掠雨红晴下，冲烟翠羽飞。松花香冉冉，还复点罗衣。

### 翠谿园

云满楼台水满津，阑干十二碧城春。隆中风月真名士，林下烟霞彼美人。卧砌苔碑昏柳是，隔湖花树暝兰因。辋川恍问王摩诘，金粟如来是后身。

### 李心慧

李心慧，桐乡人。休宁阳江知县金孝继室。

### 挽冯枯堂中丞笱室俞孺人

待节湘南又皖公，髭髥截耳《柏舟》风。百年漆室针神课，四世朱门保母功。侧叶惯经霜雪劲，铅华还屏珥瑜充。而今皓首归泉壤，留得芳名字宙中。

### 刘寿萱

刘寿萱，武进人。江阴缪徵甲室。有《梦蟾楼遗稿》。

### 白头吟

新花开故枝，旧花落多时。郎今勿娱嬉，听妾前致辞。妾为郎后妇，恃爱忘妾丑。郎心置妾怀，妾心印郎口。东市买明珠，南市买罗襦，西市买美酒，北市买银鲙。膏泽面肤悦，衣食信无缺。长跪问前妻，请郎一一说。前妻来归日，值郎贫贱时。无薪炊糜粝，无粟朝忍饥。畜妾今日富，忘郎昔日贫。岂惟忘昔贫，并忘旧时人。旧人为郎死，死后幸有子。劝郎续弦胶，家事须料理。濒危执郎手，惜此呱呱儿。弃置在后人，生死从郎为。妾身赴泉

壤，妾魂守家门。孤儿眼中血，新人掌中痕。郎言听未终，新妇声暗吞。结发尚寡恩，新婚何足论。愿移爱妾意，先慰泉下魂。

### 昭君叹

明妃生长荆门时，布裙照耀倾城姿。心高不肯厮养嫁，年少常期天子知。汉家天子勤宵旰，后宫佳丽无心玩。单于岁入雁门关，羽檄纷驰常待旦。待旦何人侍至尊，三千宫女竞承恩。深宫一入如长夜，镜里朱颜祇泪痕。泪痕终日对东风，月落乌啼朝暮中。春光不管垂杨碧，秋雨谁题落叶红。千金耻买相如赋，况肯低眉暗行赂。画工能窃太阿权，颠倒妍媸君勿顾。赢得乌孙下嫁名，君王惨淡在临行。早知我见犹怜妆，却恨图穷已误卿。卿辞汉殿向黄沙，回首长安不见家。凄绝城头吹笛筑，愁来马上拨琵琶。琵琶幽怨分明语，碧眼胡儿泪如雨。八月边风愁杀人，雪花如掌当风舞。薄命红颜敢自伤，死留青冢土还香。上林验取南飞雁，一纸还凭报汉皇。

### 望行人

登楼望山山不断，山外有天不许看。何当五丁力开山，青天尽置眉妩閒。眉妩閒无复旧朱颜，朱颜容易老，行人何日到。

### 征马嘶

边塞草枯处，将军乍列营。骅骝甘恋栈，骐驎愿从征。战死骨难朽，生还功已成。超腾千里志，不作别离声。

### 古藤书屋吊东坡先生

端明曾小住，宅在水云湄。儋耳频年谪，峨眉故国思。乾坤穷此老，乌鹊吊空枝。月下重相访，藤萝似古时。

### 过青山庄故址

荒庄变墓田，人指旧平泉。即此流萤径，曾开射鸭筵。花神无片土，园户绝多年。兴废非天意，方知疏傅贤。

### 苦寒

欲雪不得雪，寒风彻骨侵。拥衾成泼水，惜火胜兼金。瓶胆无端裂，蕉心何处寻。鸳鸯馀半幅，冻指畏拈针。

### 哭从妹佩荃

幼作出巢雏，中途凤又孤。早知生薄命，决计死从夫。堂上孀姑在，衰年两泪枯。旌门他日事，泉下也知无。

### 病中

几番伏枕思茫茫，此病空将药饵尝。哭子怕看雏燕垒，思亲啼断乳鸦肠。蚕僵苦被千丝缚，鹤瘦惟馀一颈长。听尽阶前秋夜雨，五更鐙火亦无光。

### 寄外

劳能生善古人思，夙奉曹家作女师。绩纺夜深频顾影，窗棂天曙早褰帷。苍苔未扫三三径，绿萼能开九九时。荆布自甘恬淡意，敢因柳色感春迟。

### 偶成

有书意难尽，无梦心转安。悟彻维摩理，初生月似残。

### 春去

游丝和絮乱，啼鸟恋花稀。长昼原如昨，春从何处归。

### 古意

苏武雪中毡，李陵台上月。河梁送别时，知心未知骨。

### 袁绶

袁绶，字紫卿，钱塘人。枚女孙，河内知县通女，江宁诸生南平知县吴国俊室，怀安知县师郊、道光甲辰举人榆次知县师祁、福建县丞师曾母。有《瑶华阁诗词集》。

### 游鸡笼山怀古

琼树歌残璧月遥，閒寻故碣认南朝。草埋智井胭脂冷，萝绕荒亭雉兔骄。湖镜几窥红粉倩，山眉犹学黛蛾娇。临春结绮知何处，潮落空江恨未消。依旧秦淮绕郭流，珍珠河转接荒丘。千村万户环云脚，叠嶂层峦拥石头。复道记曾回玉辇，台城可更护金瓯。我来凭吊斜阳里，烟霭苍茫起暮愁。

### 咏史

亡虜归来思报复，卧薪尝胆是英雄。五湖一棹烟波阔，如此功卧竟善终。

四皓安刘非助吕，戚姬空自泪纵横。若教如意为天子，未必能如孝惠明。

壮发初离宫女腹，绿绋收去使人疑。当时庸主昏难及，自杀娇儿媚宠姬。

馀荫成功何足羨，汾阳七子有谁贤。一军尽甲存何意，骄语还争贵主前。

### 明乐安公主玉印图

乐安公主光宗女，身出天潢贵无比。刺书下降选才人，都尉翩翩似萧史。箫合秦楼琴瑟欢，金莲烟下任人看。天钱撒帐春如海，玉女乘鸾佳遇难。金枝生小耽文翰，异书赐出凭珍玩。锦轴牙签万卷横，簪花格妙词章绚。小印玲珑玉色融，云雷纹细篆来工。画眉窗下摊书坐，素手亲钤一颗红。百年佳偶人争羨，双修福慧神仙眷。不识人间儿女愁，那知世上沧桑变。罡风忽起委琼花，一夕瑶清返钿车。彩云易向秋空散，都尉神伤鬓欲华。總帙虚掩人何处，长簟空床愁日暮。想像音容入梦难，禅心已逐空花悟。一朝流寇犯神京，九庙烟尘帝主惊。鼎湖龙去乾坤破，独木难支大厦倾。精忠都尉肝肠裂，娲皇难补金瓯缺。儿女亲看缚柱焚，冠裳书画从灰灭。揭天鞞鼓震京师，国破家亡恨莫支。身留一剑酬君德，名播千秋答主知。九原相见应含笑，报国捐躯臣节耀。不愧天姻有几人，成佛生天还逆料。此印流传二百年，闺房雅尚想从前。可怜玉石无物，情不管兴亡色皎然。

### 养蚕曲

鸡鸣喔喔女儿起，起视蚕桑镜影里。一重绿叶万蚕眠，蜿蜒而吐丝缠绵。今春喜说蚕成熟，不向三姑夜深卜。结成芳茧忘辛劳，银铛煮出手自纛。月中皎若冰丝白，千丝万丝机中织。织成鸳鸯锦，匹匹加颜色。为君裁作襦，君无寒冷妾心娱。为君裁作被，覆君温暖妾心慰。妾思君，君不知，请君但看襦上丝。妾望君，君未晓，请君但看襦上鸟。他生不愿作神仙，愿化鹣鹣西海老。

### 秋兴

离怀何处放，吟眺晚风前。凉月淡无色，秋花瘦可怜。碧云千里合，锦字几人传。漫挹浮丘袖，閒身不羡仙。

### 薄暮登仓山

好山谁蜡屐，烟景望中佳。岚翠欲眩目，白云常入怀。幽泉漱危石，冷月挂悬厓。归路松林暝，藤萝罥凤钗。

### 夜读示两儿

男儿立志初，所贵乃孝弟。读书启其蒙，岂为博金紫。事君如事亲，忠臣必孝子。治国如治家，循吏必悌弟。尔曹中人姿，习俗易移徙。日读圣贤书，自然识大体。尔祖少食贫，笔耕贯薪米。拔萃举明经，一毡为贫仕。贤良擢令尹，循声著遐迹。五十归道山，宦囊清若水。汝父少失怙，孤立鲜依倚。独木支大厦，恐坠箕裘美。好学寡交游，一编惜寸晷。平生重然诺，所为慎终始。家贫食指繁，菽水无可恃。饥来驱其行，负米长安市。近迹依我翁，幕游恒自耻。来岁试北闱，但愿鱼烧尾。扬名即显亲，文章有知己。嗟我出名阀，颇亦习诗礼。结褵离归汝父，井臼躬料理。大母发垂白，所乐在甘旨。羹汤洗手调，终岁惧毁訾。尔父昨来书，问尔近何似。青镫旧有味，慎无惜稚齿。嬉戏徒自弃，岁月去若驶。何时方成人，慰我顾复喜。未寒衣先裁，未饥食先俟。典钗供脩脯，和丸偕卧起。枣梨莫攘夺，手目共指视。新诗当座铭，高山试仰止。

偶见

绿筠深护小池台，一树红梨倚槛开。帘影漾花浮荇藻，误他双燕掠波来。

闻香雪中梅花尚无消息诗以催之

竹外栏前万树梅，尚无一朵向南开。难邀玉戏酬吟笔，想对明妆劝酒杯。獭髓乍敷红晕浅，虬枝渐耸绿房堆。冲寒未放春消息，拟倩东君羯鼓催。

仓山牡丹盛开家婢母招饮即席感赋

阳春百花发，鼠姑擅盛名。今春雨水迟，三月方含英。嫣然倚东风，解语真倾城。主人开琼筵，邀客吹金笙。行乐贵及时，相与各尽觥。长歌发慷慨，所愁节序更。年时携手伴，落落如晨星。骨肉多远别，踽踽难为情。身遥心自近，梦想通精诚。岂无鱼与雁，奈此千里程。温凉叙片纸，离怀难尽倾。岁月日以去，忧思日以盈。愿附飞鸿翮，乘风以北征。

孟夏饮芍药花下

丈夫贵树立，其志在功名。女子不出户，长年无所营。中馈事粗了，针线须调停。薄暮得暂息，閒吟豁幽情。是时四月天，山深闻晚莺。芍药开较迟，红芳殿春英。花下具杯杓，独酌还独倾。三杯乐陶然，气爽心亦清。凭高豁远目，叠嶂青冥冥。地偏绝市嚣，寺近闻钟声。中怀自萧旷，淡泊无牵萦。

送又村仲弟赴试北闱

去年此日君甫归，木叶落尽霜雪飞。风尘未敢瘁颜色，比貌略较年时肥。手足由来有天性，谗巧翻笑苍蝇非。家庭巨细同会计，心迹如一无相违。名园茅舍距咫尺，三日不见忘朝饥。有时归宁具尊俎，捧觴上寿娱慈闱。鐙窗茗话聚同志，漏尽不觉星河稀。销寒雅集记客岁，矜奇斗巧分新题。人生此乐岂易得，况复努力功名时。骊驹在门酒在盏，行李复发心先驰。愿君科第如拾芥，青云直上符心期。风霜载途善自卫，道远莫使音书迟。十年有约慎无忘，锦衣莱服同光辉。

出山留别

别母牵衣感，随郎远宦情。白云千里隔，华发一时生。愿祝萱常茂，还期草并荣。蓬窗今夜梦，定绕石头城。

弱弟心如一，相依又十年。长贫惯弹铗，小别亦传笺。菽水同商略，芸编莫弃捐。家声惧中落，盼尔继前贤。

束发尤相契，同根姊妹花。卅年荣瘁判，几辈世情嗟。白水盟心迹，青云感岁华。春来宴桃李，应念落天涯。

娇女初离膝，邗江白下分。温凉调乳襦，鐙火伴辛勤。妇德宜相勖，夫怜想更殷。

他时《遂初赋》，馐饷助耕耘。

### 庚子冬赴闽途中与伯镒夫子同作兼忆仓山梅花

我本餐霞人，冲襟爱山水。时平恨不桄，碌碌守乡梓。君沾微禄适闽越，我始同来酹江月。高挂蒲帆趁顺风，回头倏过千芙蓉。望夫石远疑人立，目断归舟龙骨出。万古难销是经情，江声日夜疑呜咽。金焦两点风利不得到，只恐烟萝暗腾笑。古杭五日留，西湖慳一游。毋乃爱惜费，雨雪风飕飕。钱塘复上江山船，船头少女呼同年。江湖也作廊庙想，不用文光射斗象。明眸皓齿竟虚名，水佩风裳空想像。浙西山水天下奇，謁来可惜穷冬时。层峦叠嶂睡未醒，不斗明妆懒画眉。滩河水清石子多，篙师涉险相喧呼。水船轻捷大船笨，瞥眼已过疑飞凫。冰渐雪净天地肃，拨棹空江皱寒绿。篷窗煮酒妥吟魂，手写新诗属君续。忽忆仓山万树花，寒香冷艳纷横斜。罗浮梦好不归去，鹤守南枝应怨嗟。

### 桐江舟次忆仓山同人

故园何处是，云树思依依。岁晚鸥盟冷，潮寒鲤信稀。滩声喧水碓，帆影掠鱼矶。系缆荒村近，含情倚夕晖。

### 钓台

北风忽卷山雨来，系缆不果登高台。先生高尚隐不出，垂竿独钓空江碧。诏书物色聘书徵，五月披裘人易识。故人转忘天子尊，足加腹上惊星辰。先生高卧帝不悦，子竟不肯为我屈。当时求贤如此诚，先生钓鱼兼钓名。先生不出台不圯，万古千秋名著矣。

### 秋日与大儿话旧

有生忧患始，何况困长贫。诘短英雄气，偏疏骨肉亲。谁贻千日酒，醉过百年春。莫叹朱颜改，愁多白发新。

### 南平舟次

西风吹雨满天飞，雾霭遥山碧四围。买得扁舟仍作客，可堪佳节未成归。月宫旧梦沈清角，水国新凉换袷衣。只恐姮娥暗相笑，有人四牡正騑騑。

### 抚州舟次

曲曲溪山俨画屏，秋高气爽好扬舲。几家茅屋依青嶂，一簇蒲帆出绿汀。云碓响春流水急，风鸢低胃落霞停。柳阴阴里推篷坐，幽鸟相呼隔树听。

### 时事

两载夷氛扰，连营海上难。铁衣霜月冷，金柝晓风酸。不战军民遁，无功将相惭。妖星犹闪烁，露布几时看。

### 寄梅竹卿表妹

涉世如虚舟，飘飘随长风。謁来聚闽海，境遇将毋同。同为出岫云，同作随阳鸟。既忝葭莩亲，复结苔岑好。昔人重交谊，高义仰雷陈。生世恨不栉，苦乐恒由人。多君薄时趋，慷慨制侵辱。岂徒愧须眉，兼可振薄俗。凶顽苟能化，田氏荣紫荆。但愁下愚质，久渐故志萌。治家不贵宽，恩多生妄想。所以先圣言，小人最难养。孤琴海上弹，谬蒙知音赏。何日结比邻，晨夕数来往。朱弦静愔愔，落叶鸣撼撼。霜警夜乌啼，鱼跳池水活。此时一尊酒，斟酌谁与同。举头望天末，烟霭相溟濛。美人期不来，寒月何皑皑。下阶倚修竹，顾影空徘徊。夜深还入阁，镫烬和烟落。月亦如慰情，流光照罗幕。

### 京江晚泊

系缆江干正长潮，荻芦风起晚萧萧。人才有数传千古，山水无情送六朝。铁瓮城荒斜照冷，金陵气王阵云销。霸图凭吊空陈迹，乌鹊寒声答丽谯。

### 南山

南山有古柏，高出青云端。根固叶自茂，何惧霜雪寒。幸无大匠知，免被斧斤残。华屋有时倾，栋梁难独完。不如守本性，凌寒寿千年。

### 东城

东城桃李花，灼灼矜芳姿。会蒙春阳煦，烂熳开及时。东皇欲返驾，风雨旋相欺。蜂蝶倏已散，月明嗟空枝。小草任天倪，翻得常华滋。

### 接少兰弟蜀中书感赋

一纸家书百感生，宦游人负杜鹃声。廿年未遂慈帏养，万里轻分手足情。栗里有田堪守拙，桃源无地可归耕。流光坐惜堂堂去，何日乡园昼锦行。

### 得又村仲弟上海殉难讣音诗以哭之

半载家书滞锦鳞，惨闻凶耗走惊魂。竟殉职守完臣节，敢弃城亡负国恩。皓首慈亲逃白刃，青年少妇哭黄昏。天涯有姊空肠断，北望停云积泪痕。

五树荆花贖四枝，宦游常恨会难期。讵知昔岁分飞日，便是今生永诀时。泡影隙光真梦幻，生离死别更凄其。干戈满地家何在，化鹤还山定益悲。

痛亟还思未别前，小仓山下好林泉。坐来花月供吟醉，行处楼台听管弦。离绪忽萦千万缕，乡心已折十三年。故园惨被黄巾陷，何日招魂葬墓田。

### 张凤

张凤，字含珍，号蒹葭女史，平湖人。诚女，高兰曾室。



和夫子行天竺山中次韵

筍輿游天竺，一径入深曲。初日淡高林，苔色萋以绿。山鸟向人鸣，梵音旋相续。我来尘俗中，物情互起伏。殊观得未有，身心增谨肃。寒涛卷长松，微风响幽竹。徘徊坐石根，流泉咽虚谷。言归兴未阑，回首云迷麓。遥指半山巾，人行傍古木。

拟孟浩然夏日南亭怀辛大

日夕雨初过，閒亭敞幽景。结庐远人村，松月共清冷。竹风生夜凉，池荷泻疏影。仰观天宇澄，云路一何永。怅然念古人，此心徒耿耿。

陈山观海歌

冈峦一带明残阳，林花掩映春风香。筍輿得得忘路长，九峰遥障波汪洋。陈山岬崿临中央，振衣直上登高冈。海天渺渺云水黄，陡然突起涛头狂。海风吹水势莫当，凭空壁立千丈强。冯夷击鼓蛟龙翔，银楼十二随飞扬。仰观俯瞩何茫茫，须臾捧出玻璃光。白波万顷摇扶桑，蜃楼蛟室争辉煌。潮平忽见遥山苍，数峰若与船低昂。吁嗟乎！潮汐往来那可测，安得假我凌风翼，飞向瀛洲问消息。

寒郊

岁晚百端集，寒郊生远心。晴烟明野寺，旭日冷松林。云树极空净，川原入望深。关荆善图画，会向此中寻。

自玉换山房步从渺沧湫春望婴山之作

春到山光媚，嫣然笑靥留。莺啼空谷暖，泉挾落花流。石径松杉茂，书堂竹木幽。东风不解事，吹破绿烟浮。

閒坐

西风料峭暮云高，松荫苍茫起翠涛。凉月一庭谁共语，纸窗閒坐读《离骚》。

张襄

张襄，字云裳，一字蔚卿，蒙城人。游击殿华女。有《支机石室诗》、《锦槎轩集》。

登灵岩山

胜地甲三吴，风云想霸图。绮罗西子径，烟雨范公湖。故苑悲麋鹿，空林响鹧鸪。登临无限意，落日下平芜。

题看山读画楼

一路风光引，登楼喜欲仙。青山人读画，翠竹客参禅。雨气奔颓壁，雷声吼怒泉。故乡何处是，遥指白云边。

丙戌春日侍太夫人邓尉探梅遍历铜坑香雪海诸胜太夫人命赋梅花用高青邱韵呈九首

探奇何必万峰台，茅屋疏篱处处栽。林外乱鸦冲雪去，山中孤鹤破烟来。新枝烂缦攒红蕊，古榦杈丫点绿苔。竹处一枝看更好，横斜多傍夕阳开。

千树琪花绕梵宫，罗浮原与碧天通。多生福慧双修得，六代铅华一洗空。诗在灞桥驴背上，曲留关塞角声中。笑他无限痴儿女，但识人间锦绣丛。

王允执

王允执，字舜华，号散女花史，嘉善人。焉飞女，曹锡祺室。

白隄步月

琉璃世界许盘桓，一曲琼箫露影团。行转长隄回首望，楼台高浸水云寒。

高簫

高簫，元和人。举人朱绶室。有《绣篋小集》。

春日吟

去年春风花满墀，抱病孤负花前卮。一年惆怅掉头过，今年又值花开时。庭花对我有怜意，烂缦似发含春姿。春来兮何处，春去兮何之？去何速兮来何迟，飞花一夜随春梦，杜鹃嗟尔啼空枝。

春来

春来何处最关情，一半垂杨一半莺。不定晓烟空锁恨，易阑残梦惯闻声。草飞蝴蝶愁千里，风冷棠梨月二更。欲把相思寄流水，小楼深夜坐调箏。

许学卫

许学卫，字兰漪，钱塘人。吴县诸生周以丰室。有《鬢花小草》。

咏梅和外

园林半树冲寒早，桃李三春斗格难。雪后添肥月前瘦，山中相忆水边看。仙标出世应称绝，风味如君未去酸。最爱黄昏暗香动，好携尊酒佐清欢。

沈善宝

沈善宝，字湘珮，钱塘人。吏部郎中武陵雪继室。有《鸿雪楼诗集》。

寿光除夕

行尽山程与水程，故乡风景已全更。一年又向今宵尽，万感都从此夕生。怅望白云迟雁字，烧残红烛听鸡声。游秦季子裘空敝，倍觉文通赋有情。

夜过塘栖

挂席塘栖路，离乡第一程。凉风吹袂薄，孤月向人明。镫火高堂梦，烟波旅客情。吟成谁与和，村杳正三更。

项纁章

项纁章，一名紉，字屏山，号纁卿，钱塘人。吏部尚书、谥文恪许乃普继室。有《翰墨和鸣馆集》。

题梧桐落叶便面

容易秋风感客心，萧萧木叶下疏林。从今一任泥涂辱，忘却炎天借绿阴。

题画竹

年时避暑忆江乡，为爱萧萧竹一墙。今日移栽纨扇上，无风无雨自生凉。

雁来红

已著西风又著霜，耐寒犹作女儿妆。潇湘云水人何处，草草题红字一行。

张友书

张友书，字静宜，丹徒人。拔贡、候选训导陈宗起室。有《倚云阁诗存》。

新秋微雨入夜月光皎然有怀兰仙母女

远树蝉响寂，一雨生微凉。美人隔秋水，共此明月光。月光空复明，相思苦难已。听尽漏声长，悄然立花底。

长男秋闱获隽感赋

屡雪刘蕡涕，今朝暂展眉。未堪酬汝志，差可慰吾衰。兵燹馀生在，风云后日期。

莫忘忠孝意，努力壮门楣。

张紘 習英

张紘 習英，字孟緄，阳湖人。知县琦长女，主事吴廷■室。有《澹鞠轩集》。

留别弟妹

聚首既云乐，每忧分手时。分手忽在即，离思何可支。堂上白发亲，容颜日以衰。大人虽强饭，辛苦独自持。慈母况抱病，常藉药饵资。荏苒卅八年，骨肉长相随。一旦欲睽隔，恋恋不忍辞。视彼投林鸟，回翔绕故枝。嗟余独远行，何日重牵衣。举头见明月，哑哑慈乌啼。溪流为呜咽，花影亦离披。弟妹设酒筵，殷勤劝一卮。举觥属弟妹，挥泪重致词。游子日以远，亲心日以悲。承欢慎朝夕，步履谨持维。亲身日以康，子心日以夷。千里虽去远，魂梦常相依。丁宁再三属，不必问归期。努力事高堂，慎莫说相思。

古剑

百战雄心在，千秋宝气扬。风霜凝惨色，神鬼泣寒芒。电掣青锋冷，虹横碧落长。良才未沦没，光彩识干将。

夜梦还家

梦里关山近，休歌《行路难》。五更频涉远，千里独冲寒。绕膝仍相聚，牵衣不尽欢。钟声忽惊断，欹枕泪阑干。

婉紉妹将有山右之行作此赠之

绝壁几千尺，名山忆太行。嗟予当远道，赖汝慰高堂。那更重分手，相看欲断肠。谁怜双鬓影，一半点秋霜。

自馆陶入都舟行杂咏

薄暮消残暑，扁舟路渐赊。河声催落日，野色点明霞。岸曲林容黯，风回楫影斜。沈忧销未得，凭眺独咨嗟。

一片长河水，苍茫接远天。我来经几度，系缆绿杨边。野鸟烟中没，孤帆树杪悬。星光杂渔火，迢递满前川。

客行时已久，离思入斜曛。木落乌啼树，风高雁入云。人家依岸仄，鸡犬隔篱闻。指点西山近，浮峦净翠雯。

偶成

堕溷飘茵遇各殊，难凭巧拙判荣枯。可怜绝艳天孙锦，尽作障泥不作襦。倾城何必

尽名姝，月范花模总过谑。此意深知惟宋玉，《高唐》赋后赋《登徒》。

#### 寄若绮妹即寿四十初度兼示婉紉妹仲远弟

吾家弱妹已四十，怪底吾衰鬓萧瑟。半生旧事付云烟，岁月駸駸去何急。忆昔垂髫侍亲侧，四女娟娟最珍惜。名花入槛尽骈枝，娇鸟能言皆比翼。我年十四好读书，一编相与时呶唔。读书常苦识字少，索解不得心烦纡。是时家贫乏衣食，穷巷萧条鲜行迹。严君挟策事壮游，慈母持门瘁心力。午炊晓汲未觉劳，得暇便欲拈柔毫。就中三妹最精锐，昼日苦短常终宵。我长频年苦多病，经月连旬废妆镜。书卷纵横列枕衾，病里耽吟觉心净。妹年最稚性尤敏，漱玉含珠出灵性。五龄解辩《黄花》诗，十岁能工《海棠咏》。深闺窈窕春日长，软尘不到瑶琴旁。诗怀杳杳入霄汉，幽梦瑟瑟飞潇湘。身世浑忘溷尘俗，罗绮何荣脂粉辱。班、宋长怀绝代才，施、媼空陋千秋目。转眼空德人事劳，告归最苦鸟辞巢。六年秦馆犹联袂，一去燕台慨系匏。哀乐中年苦相逼，雁断乌啼剧凄恻。恶劫偏多儿女魔，终天莫报劬劳德。虞渊堕日不可探，我处塞北君江南。消沈心志各已久，我困米盐君井臼。郎署委蛇守一官，故乡迢递无千亩。牵萝补屋愿已迟，羡尔偕隐犹联枝。清贫绝称孟光志，比屋好咏灵均辞。矫矫谭公振时器，骨性清醇似吾弟。身外升沈未足论，尘中契合嗟何易。即今燕婉和且平，参昂肃肃瑶光明。佳儿娇女各争秀，相对便足怡吾情。人生行乐苦不足，况乃襟期厌庸福。得失寻常付一人，荣华变幻纷千族。兰陵三月东风香，樱筍味美琼筵张。弟归千里姊同舍，长歌短倡倾壶觞。我望江乡欲飞至，梦里云山寄遐思。万绪俄生九折肠，卅年最忆童时事。愿祝西池锡大年，相将订我玉台编。汉家十志长生策，刘氏全书不老丹。太息吾衰事难竟，简策丛残多未定。考俗思陈列国风，无邪欲正中闺行。阃内非凭文字传，少时艰苦亦堪怜。百龄扰扰终何补，一世悠悠未足信。我倡新诗为子寿，夙志应须早成就。他日编书集一门，白头重与绳衍谬。

#### 张紉册英

张紉册英，字纬青，阳湖人。琦次女，江阴章政平室。有《纬青遗稿》。

#### 志梦

乡关望不极，离别日已久。不尽倚闾情，空馀泪盈袖。东风滞归鸿，离思苦相逗。飒飒北窗风，迢迢水添漏。辗转不成眠，遥夜长如昼。霜天鸣杜宇，淡月下窗牖。虹桥在何许，缥缈不能渡。嫦娥怜寂寞，指点虚无路。朦胧云雾起，倏忽百馀里。不闻风涛声，归心静如水。扶桑标旭日，浮霞散罗绮。回看半掩扉，依旧苍笥里。绣闼尚依稀，屏开篆缕微。帘栊鹦鹉报，阿弟笑牵衣。连袂趁瑶砌，承欢出锦帟。乌尼晨报喜，镫蕊夜悬辉。寒梅香乍坼，话雨西窗夕。新茗瀹龙团，琼芝泛苍柏。日暖画堂前，飞觞醉绮筵。椿萱同介寿，姊妹各披笄。酒酣携紫佩，飞花点衣袂。散步下阶墀，风细鸟声碎。草色漾新痕，松风拂深翠。流连心神怡，此乐不可再。云烟倏渺渺，惊雷堕天表。肃然动魂魄，曙色横窗晓。乡国杳何之，帐冷残镫小。似闻慈母语，絮絮犹未了。

#### 纳凉

一白月光满，苍笥疏影横。花欹香鬓薄，露裊葛衣轻。蛩语迎风急，萤飘点水明。小窗帘半卷，银汉望盈盈。

张纶英

张纶英，字婉紉，阳湖人。琦三女，同县诸生孙劼室。有《绿槐书屋集》。

题云峰山郑道昭石刻

巍巍云峰山，千仞不可极。猿猱愁攀援，飞鸟苦难越。壮哉郑将军，振衣造云阙。峭壁恣濡翰，云崖留真迹。怒涛腕底生，迅雷笔端出。飒飒龙蛇飞，矫矫鸾凤活。字蕴天地精，墨洒山川泽。妍姿悦仙灵，刚锋惊鬼物。深淳李程规，坚劲锺张骨。烟霞常呵护，风雨不敢蚀。千载仰遗型，神采犹奕奕。斯山藉公灵，海内凭研习。愧我性庸愚，临摹空仿佛。展卷每流连，抗怀长叹息。

送孟缙妹之京师

凉风动高梧，哀蛩响幽咽。欹枕不成眠，揽衣长叹息。瞻彼连枝树，茏葱经岁月。视彼林间鸟，众雏长比翼。嗟我雁行违，迢遥望冀北。再拜送君行，欲语心戚戚。惜昔别姊时，回肠几碎裂。驰驱二三载，神魂日飞越。幸得重聚会，承欢两无极。倏忽数年间，又当远离别。离别复何言，泣涕沾胸臆。君今六翮振，翱翔自安适。而我若梁燕，秋至催归急。焉能避风尘，稳住雕檐侧。身世等浮云，劳逸讵能测。自今一挥手，何时见颜色。努力慰亲心，此躯保金石。

杂诗

寒暄倏代序，日月递盈缺。黄鸟鸣北林，芳华恣欣悦。暄飙荡愁心，轻霜变华发。南园桃李树，累累多结实。嗟我兰蕙花，芳馨坐销歇。涉江复何慕，揽佩不忍结。百草非不芳，庭树日萧瑟。感物增惋伤，沈忧转凄咽。

贫交行

贫交无厚薄，穷壤无岁时。阴阳倏迁变，观化若等夷。夏日炎何早，黄尘压空苦热恼。冬日暖何迟，霜威慄慄侵单袷。凉暄如流去飘忽，转眼芳华已销歇。咨寒怨暑亦何为，松柏森森挺高节。颜枯手皴未遑惜，维愿年年不离别。绮纨被体奚足欢，丘壑藏身宁守拙。君不见，后有梁鸿前冀缺。

江行杂感

挂帆忽千里，小艇放中流。碧月吴天梦，青山楚客愁。烟波摇暝色，佳节入孤舟。无限沧桑感，飘飘羡白鸥。

寄怀孟缙姊京师

朝瞻出岫云，日暮不归山。昔我送君行，一去会面难。道路既阻修，人事日益艰。悠悠楚江远，渺渺燕云寒。抚兹五中裂，念往恻肺肝。昔别十六载，契阔意回环。相逢未经

岁，握手不尽欢。骊歌促遵道，泣涕如洑澜。感姊视我厚，霜鬓孩提看。勗我抚孤儿，辛勤答重泉。如何舍我去，寤寐无时安。寒燠莫我顾，疴痒孰与言。尺书千里来，谆谆教愚顽。洗心涤烦虑，铭此金石篇。君如青松枝，劲质含清妍。我如拔心草，摇落愁霜天。安得凌长风，送我至君前。相依共辰夕，庶慰迟暮年。

#### 署斋卉物诗

治乱有常理，患气百年结。跳梁起群凶，蔓衍来百粤。战斗经五载，行省三得失。锋镝幸已远，黎庶思家室。荒城辟蒿莱，炊烟渐稠密。官衙竞修缮，土木兴不日。此署亦告成，朴素屏丹漆。中庭不盈亩，草木纷罗列。我来播迁馀，及此芳春节。三叹感废兴，殷忧有时毕。

堂西馀隙地，白骨掩榛荆。开池贮流水，画地通沟塍。闭门学农圃，寄意怀躬耕。惜哉泉石志，羁绁伤簪纓。名山无静境，波涛方沸腾。一村得巢柯，聊慰达士情。不见中泽鸿，铙羽徒哀鸣。

五岳起方寸，烟霞积胸襟。高怀多佳覩，奚必求山林。积石写青山，磊落亦崎嶇。割削擅化工，幽灵生妙心。以兹育群才，巨细咸足任。以兹参物理，取舍成升沈。渊衷宁可量，小叩识元音。愿贞构缔怀，良图古所钦。

寒沼拓庭宇，开轩缅清旷。桃梅三两珠，花开俨相向。移根自山中，迁地气能畅。傥有故土怀，临风或惆怅。疏篱缀杂花，错彩如绣幃。閒阶生细草，摇碧若新涨。昼长静相对，衿抱偶一放。回首忆江南，风光正骀荡。

日涉眷春光，春去忽已半。青桐引新绿，垂柳紫金钱。好鸟巢深林，百啭互相唤。蔷薇竞作花，欣欣意已满。物情贵得时，暄妍争系恋。焉知风日外，节序潜已判。独有冬青枝，霜露色无间。

幽兰有高致，质弱苦易零。芳香不可留，滋树徒劳形。小草时作花，嫣红间葱青。閒阶濯新雨，绰态何娉婷。悦目非不怡，所嗟乏奇馨。采之聊把玩，慨彼服媚情。一笑谢东皇，荣枯无定形。

我昔侍宦游，高槐荫书屋。临池日挥毫，简册润新绿。謁来武昌城，绿槐有遗筑。千年迹相合，栖託亦云乐。频年遭兵燹，廨舍成平陆。未知陶丘畔，何人护乔木。浮踪此焉寄，佳景欣可瞩。惜无十丈阴，深檐蔽炎旭。会当求嘉树，植向阑干曲。

种蕉甫逾年，蕉心已作花。浓苞擢菡萏，亭亭迎日华。瓣开如巨莲，细果密相排。攒簇苦难展，芳绪纷如麻。中含仙露浆，甘寒沁齿牙。浥之润诗心，崖蜜美莫加。奈何果方熟，枯樵及根荻。清阴与大叶，渺若飘烟霞。悟彼造物心，浮生信有涯。

水仙最高洁，泉石雅相称。亭亭绝尘滓，迥迥见情性。惜哉柔脆姿，欲与岁寒竞。安能如老梅，风骨冰雪劲。赋形各殊类，锤毓有定命。飘飘列仙人，菱形亦奚病。真意託瑶琴，挥弦孰同听。

老树何轮囷，虬枝偃欲僵。柯叶虽不改，寒暄已备尝。自矜后凋性，了不畏雪霜。严寒苦相逼，凜冽亦可伤。春来发新枝，花开点轻黄。紫芝灿三五，擢秀含英光。晚节聊足怡，及时愿能偿。颓龄资服饵，相与酬青阳。

张紬英

张紬英，字若绮，阳湖人。琦四女，诸生王曦室。有《邻云友月之居集》。

寒月

天迥月初上，沈烟一径深。峭寒凝远岫，冷彩浸空林。篱竹无清影，江梅共素心。莫嫌风景异，好为洗尘襟。

读纬青姊遗稿

浮生若流水，死别忽经年。泪眼惊秋早，离魂有梦牵。鹤飞华表月，花落夕阳天。此日西窗下，空馀咏絮篇。

张凤慧

张凤慧，字筠香，永嘉人。有《留香阁诗存》。

枕流岩

拳石玲珑薪作瘢，只宜高枕处轻澜。白云数尺笼残梦，明月一床听急湍。侧耳清流声愈大，满身斜照夜将阑。鸳鸯文景饶君侈，急及东山卧谢安。

石门访刘文成读书处

巉岩削立石门敞，两扇洞开高千丈。停舟沿径穷清幽，坐看飞瀑激波响。恍疑仙境非人间。不朽名山在天壤。当年披卷面流泉，洗涤尘心恣清赏。山水鍾灵岂偶然，雷雨风云真气象。荒碑林立蔓草敷，一代元勋风泱泱。前度刘郎今已往，年年月照读书幌。夕阳欲暝归扁舟，梵磬一声荡兰桨。

重登池上楼有感

谢客耽游地，予步林麓。古树倚云根，飞泉出岩腹。隔岸旧山青，崔巍耸积穀。峰色青似染，岚光净於沐。月影沈寒潭，清光若可掬。披榛寿古碣，剥藓暗摹读。忆昔题诗处，回步认绿竹。当年诸女伴，搜奇相追逐。陈迹须臾间，踽踽剩我独。俯仰足伤怀，流光幸毋倏。林鸟解留人，一声啼幽谷。残花堆断涧，飞霞落孤鹜。归作《卧游图》，生绡裁半幅。

乌石舟中夜坐



一路奇峰迥，空明石不顽。殷勤溪畔水，流梦到东山。

金兰贞

金兰贞，字纫芳，嘉善人。平湖王丙丰室。有《绣佛楼诗钞》。

吉芝楼杏花盛放

小园一夜放春花，姣态妍姿斗彩霞。正值晓妆帘幕卷，万重红雪拥窗纱。

自金华登陆过桃花岭

渺渺关河路，承欢此一行。水明奁镜净，山远黛眉横。度岭松涛送，归舆客雁迎。风霜缘未历，日日计征程。

桃花岭投旅店

遥望沿山麓，旗飘卖酒垆。小桥双磴滑，野店一镫孤。峭阁临崖下，篮舆挂涧隅。移时歌笑起，云是郢中姝。

丁酉秋归自括苍道经武林遂游西湖

吹来细软晚风柔，到处秋光招我游。江上青峰湖上月，替依扫尽别离愁。

夜过南渡桥

指点申江路，轻舟乘夜过。一镫一语静，两岸月明多。到处皆烽火，潜行避网罗。风声疑草木，数问夜如何。

劳蓉君

劳蓉君，字镜香，浙江山阴人。同县陈锦室。有《绿云山房诗草》。

初至唐昌作柳絮吟呈越中老母

君不见，灞桥之上杨柳枝，荡摇飞絮含丰姿。可怜三月化萍梗，正是垂杨头白时。临流相送悄无语，忍使萍花自飞舞。白门倚望空惘然，泪洒千丝万丝雨。此花本是杨枝生，高飞低舞何轻盈。夕阳芳树东流水，无奈春风欲送行。青眼依依识行路，犹逐西风向东顾。天生弱质有所归，未许本根久依附。祇宜归处便为家，徒羡园中千树花。花落犹在花开处，飞絮茫茫天一涯。看他漂泊今何在，近是比邻远绝塞。回思去国梦魂中，相思未了三生债。但得杨枝老未衰，春风安稳护楼台。明年海燕双飞日，衔取萍花枝上来。

闻南屏钟天大雨霰

冻云叠叠隐禅林，霰堕空山漏欲沈。万点诗魂飞玉屑，一声仙籁破尘心。重添狸幕  
灯光瘦，小试螺杯酒味深。莫道三更寒入梦，有人呵笔尚联吟。

#### 数拟归省不果睹夕阳有感

夕阳红到柳梢头，何处歌传故国愁。归计於今凭尺素，相思劳我辄三秋。环城空有  
桃花水，唤渡难登竹叶舟。刚拟回桡逢海警，梦魂常绕面山楼。

#### 忆龙山故居

傍小琅琊塔影斜，山楼空剩旧烟霞。可怜晓起催妆鸟，犹认窗西铁树花。

#### 述梦

寂寂复寂寂，梦境去来疾。顷涉三千里，不觉关山黑。飘飘入庭闱，怡怡语相接。  
门外藤萝红，窗前柳条碧。诸阮犹垂髫，二老发增白。七载依恋思，一诉爰时日。天鸡喔喔  
鸣，瞿然秋灯侧。郑人埋野鹿，庄生化胡蝶。此境本人间，急追杳无迹。悔我向梦中，多费  
一回别。揽衣起徘徊，梅花印残月。

#### 感怀

英雄何必皆逢时，陡然遇合犹嫌迟。凡鸟纷纷占芳树，凤凰安得梧桐枝。自撇茅庐  
近红日，曩时花草休回忆。君不见，春雷一声天地惊，么{麻骨}瑟缩莫敢出。

#### 忆舅家小园幼时所游

惆怅驹光一瞬中，芜园卅载记游踪。池边鱼影惊新月，竹外鸡声唱午风。绕砌苔枯  
霜点白，盖檐枫老叶翻红。而今王、谢堂前燕，那识当年总角童。

#### 书感

客心与秋气，憔悴古今同。天地朝昏候，人生聚散中。白云亲舍梦，黄叶寺楼钟。  
极目寒烟里，飞鸣三两鸿。

#### 中秋雨

痴心咒雨未曾收，辜负天香一院浮。云幻波涛翻玉宇，风吹箫鼓隔琼楼。候虫寒咽  
迟迟夜，落叶轻传瑟瑟秋。欲向九霄看月色，祇应欹枕梦皇州。

#### 登隆山书院西楼

半空云雾拥层楼，中有仙人驻远眸。千古图书藏石室，万家烟树绕谿流。新诗取压  
吴山会，健笔能扛浙海秋。此地清高远尘世，好从他日证瀛洲。

### 秋日即事

西风萧瑟薄窗纱，半角斜阳散绮霞。瓦鼎煎茶拾红叶，瓷瓶添水插黄花。一楼乡梦惊新雁，九月寒砧起暮鸦。问我秋心向何处，乍归於越又京华。碧天晶晶欲霜时，香驻帘栊卷更迟。日薄江村收笊簖，风摧木叶战燕支。悲秋懒挹芙蓉粉，遣酒新题橘柚词。最是诗粮今岁熟，重阳开过菊千枝。

### 紫云山途中

重寻归径紫峰西，回首禅关路已迷。出岫云都随足起，衔山日正及肩低。谿桥断处撑双塔，烟树丛中卧一犁。不有阮孚千两屐，那能摩壁尽留题。

最爱林皋路几叉，贪看景色屡停车。绕谿屋似鱼鳞细，截道桥如雁齿斜。山远云根疏著树，秋深霜叶艳成花。凌空极目增乡思，千里归来羨暮鸦。

### 小除夕作

云珠洒地东风香，梅花送客归故乡。今年忽忆去年事，梅花与我同苍茫。岁阑检点锦囊里，得诗三百聊自喜。更有一束长安书，书中有语可慰予。上言京华二老健餐饭，下言中山诸女多文誉。窗榻新糊设棐几，针线馀工置勿理。清閒官舍贫不忙，家在桃源万峰里。门前馀雪冷未消，对我犹作花痕娇。寒山苍翠睡欲起，早禽得日鸣连朝。弱柳舒青古苔绿，将弃熏笼就春服。君不见，万户新桃换旧符，黄童白叟争欢呼。元宵预约观灯侣，买取春光满玉壶。

### 春寒

春光寂寂思依依，深院无人昼掩扉。病质吟花红亦瘦，疏帘引草绿争肥。缘慳骨肉辜乡梦，愁老年华傍翠微。酥雨连朝寒不耐，晚来催我更添衣。

### 山窗即景

山窗宜向百花开，好鸟催诗日日来。谁为含情删不得，垂杨分绿护妆台。

春朝常破绣工夫，笔砚安排兴不孤。怪底花枝慵过我，一帘香影倩风扶。

### 春暮

湿烟漠漠绣帘低，寒怯酴醾梦欲迷。风雨渐多春渐老，满城浓翠乳莺啼。

### 夏日偶成

临谿卜得三间屋，水光风影来廊北。四围红藕掉扁舟，一阶芳草眠驯鹿。地少尘缘与世偏，乐有神仙岂我独。夜凉更扫松阴石，明月为茵和霜宿。

### 长夏幽居戏效元人体得二律

长夏幽居兴正赊，石泉新汲自烹茶。戏编小令书蕉叶，乍换轻衫袭藕花。千里书来  
鐙欲语，半山风堕竹先斜。清凉如此何愁暑，吟到松阴健有加。动摇风影爱帘波，石磴花阶  
露气多。几叠云罗蒙澹月，一丸星火度明河。饱听竹籁兼泉籁，遥答樵歌与棹歌。莫信天边  
牛女事，披衣争问夜如何。

### 范薇

范薇，字沅仙，武昌人，同县梓潼知县陈鲤女，诸生黄孚敬室，光绪己丑进士、浙  
江知县大华母。有《浣仙诗草》。

### 息妫

儿女成行泪暗弹，故宫回首夕阳残。楚王任有千金赏，祇买桃花笑曲阑。

### 宫中夜景

博得君王宠，羊车去又来。金炉香篆袅，玉阙漏声催。春色桃腮妒，秋波柳眼开。  
《霓裳》歌一曲，明月上宫槐。

### 睡燕

日午花关倦欲回，红楼望去费疑猜。便从径外衔香返，稳憩梁间待梦来。春暖画堂  
人正静，风过雕槛锦成堆。帘钩斜挂眠方熟，不管芹泥落翠苔。

### 睡蝶

乱红深处恋芬芳，枝上蘼蘼梦正长。诃畏流莺啼远树，祇惊午漏滴花房。云环锦帐  
眠方稳，风促金铃响不妨。一任南园春似海，香魂飞绕黑甜乡。

### 严昙云

严昙云，常熟人。有《拂水草堂诗钞》。

### 山居杂咏

春风次第到空山，云本无心任往还。路转峰回浑入画，绿杨影里有柴关。经卷生涯  
耐寂寥，湘帘风动篆烟飘。侍儿未解《华严》意，闲立松阴学弄箫。

### 齐祥棣

齐祥棣，闽县人。河南知府鲲女，陈兆熊聘室。有《玉尺山楼遗稿》。

簪花

间拈金翦出朱栏，要拣名花髻上安。桃萼太红梨太白，选香选色称心难。

望月

今夕是何夕，当头月皎然。应知千里隔，共此十分圆。树暖鸟初觉，楼深人未眠。前身谁与证，清净悟因缘。

赵景淑

赵景淑，字筠湄，合肥人。都司鹄棠女。有《延秋阁剩稿》。

随家大人乞归留别东甌官舍

春光黯淡别离天，海燕依依剧可怜。临发缠绵重检点，莫教鸿爪落人前。为爱梅花手自锄，十年妆阁当诗庐。不知今夜寒窗月，又照何人夜读书。

瓠江

瓠江烟定浪初回，饮趁西风一棹开。十尺布帆悬未稳，青山斜压短篷来。

西湖泛月

临湖一带澹斜晖，向晚寒鸦倦不飞。明月一轮秋水碧，藕花香里放船归。

偶成

落叶声中梦不成，卷帘依旧晓寒轻。不知近日秋如许，只觉遥山太瘦生。

新霁

晨兴启碧窗，仰面得新霁。云敛半天青，远山沐如髻。宿鸟梳湿翎，飞鸣向天际。花垂泥露痕，池湿归泉细。忽闻清音来，歌声互迢递。

早春

细雨微风漾柳丝，不知春到几多时。窥帘燕子殷勤甚，衔得花泥入砚池。

雨后山行

雨霁碧空净，林深透夕曛。天开销湿雾，山断束归云。晚气清人骨，奇峰隐雁群。待看明月上，花影漾波纹。

### 晚泊平望

落帆野渡小桥横，古戍虫声夹岸清。残月半斜秋色远，鸳鸯微雨漏湖晴。

### 舟过露筋祠

白茆红蕖出水香，一枝柔艸送轻航。船头鸂鶒忽飞起，冲破浪花入野塘。

一叶扁舟趁好风，水天空阔乍飞鸿。篷窗閒坐恰无事，细数秋花两岸红。

秋波始阔蓼花稀，枫树初丹粳稻肥。舟过露筋祠欲暮，水烟深处正蚊飞。

### 沈淮

沈淮，字少琴，临桂人。宣化河南按察使唐咸仰室。有《清馥斋诗草》。

### 中秋玩月寄適唐氏姑母沈太夫人

慈颜睽隔几经秋，秋月重圆万象幽。银汉冲霄横玉宇，金波炫彩射琼楼。迟来雁信频遥盼，怕对蟾光照别愁。翘羡膝前兰桂绕，承欢犹忆比儿不。

### 中秋玩月感怀寄夫子

閒庭月朗正当头，对景徘徊忆旧游。菡萏也愁蟾独照，稻粱犹羡雁双谋。冰轮有耀临疏牖，银汉无声转画楼。天上若怜离别憾，团圞常似此宵留。

### 老犍坡

山径崔嵬不易行，扶摇直上午风轻。巩关西望河千里，一抹烟云绝顶生。

### 留别河东道署庭前新竹

绿竹猗猗手自栽，频行不禁数徘徊。殷勤惟向此君祝，留待儿孙日后来。

### 度佛耳严

高峰层级似天梯，万竹回环好鸟啼。一气扶摇临绝顶，举头犹觉白云低。悬岩绝壁树丫杈，林隙遥窥日已斜。隔著重峦闻犬吠，酒帘飘处有人家。

### 张恩泳

张恩泳，字仙蘧，善化人，同县陈戊室。有《定香阁诗稿》。

### 游岳麓

破晓涉秋江，秋江静无澜。濛濛白云冷，泛泛浮鸥间。隐约螺峰高，侧影清波间。轻舟荡双桨，飞渡芦荻湾。薄雾散前林，行将叩岩关。

盘旋石路曲，{穴叫}青岩高。远闻清梵音，古寺依岩峤。攀藤涉奇境，木落风萧萧。苍藓留鹤迹，石泉泻寒涛。上有百尺松，巖嵒凌云霄。松花香不扫，冷翠摇枝梢。缥缈羽衣仙，飞空架长桥。

晴霞蔽虚壁，玉殿何穹隆。层梯高百级，飘摇亘长虹。飞楼接云汉，一望天地空。秋清远峰秀，叶落疏林红。湘帆片影没，湘水一线通。江城渺不见，隔岸浮岚重。孤原隐落日，大壑生凉风。悠然与襟期，愿寻物外踪。

天低暮靄薄，返照明村西。芳洲采杜若，枉渚拏留夷。秋花黄未开，叶落灵均祠。湘波流浩浩，遗恨空凄凄。白云自往还，帝子降何时。风裳与水珮，缥缈不可期。轻舟泛明月，归客苍烟迷。江鹜如解意，争随帆影飞。

#### 石梧舅氏别墅初成诗以志之

平泉今再见，市隐避尘哗。小艇招明月，危楼枕落霞。园蔬欹露摘，谿水夹隄斜。寒意来朝减，山桃已作花。落霞明夕照，倒影定王台。清磬隔花远，霜钟渡水来。涧松寒滴翠，石筍润生苔。生计谁相问，疏狂毕卓杯。

#### 芋园即席赠幼梅童子

江城对面青崔嵬，群峰一一随城来。名园花柳竞夺秀，池光映日波潏洄。豪竹哀丝最激越，主人爱客清樽开。公子翩翩乃雏凤，新诗示我何累累。却看华藻集毫素，有如肺腑藏琼瑰。即今世故多丧乱，俯仰古今萦襟怀。红羊浩劫经十载，馀生获免亦幸哉。汝当努力惜佳日，譬之种树宜灌培。春华秋实成大器，庙堂待取梁栋材。

#### 李丽文嫔

李丽文嫔，字陶吟，河间人。武安霍州知州白昶继室。有《剑芝阁诗钞》、《剑芝阁诗钞续选》。

#### 步虚词

夜静长吟《金蕊篇》，已通妙悟未通玄。谁知犹结飞霞佩，閒向云中响玉鞭。瑶台宴罢碧云寒，笔向长风跨紫鸾。醉后不须吹玉笛，且登蓬岛听飞湍。

#### 戊寅九月记异

重阳将近湿云遮，朔雪凄风战齿牙。半夜画檐敲玉柱，五更庭树散琼花。高才咏絮知何处，败兴催租定几家。瘦菊萧疏芳景寂，清香一瓣读《南华》。

## 读史

嬾向明光折桂柯，肯随小隐入岩阿。狂奴故态犹难改，烈士雄心自不磨。玉具拄颐聊痛饮，锦囊负背漫吟哦。海山要是移情者，图史其如励志何。

## 梦中作

从来志士易悲秋，驾鹤真为汗漫游。醉上昆仑山顶望，苍烟九点是齐州。

## 去鄂行

宦游屡迁徙，别意坐超急。三载此安居，一旦成分隔。草木有殊芳，楼阁多清绝。飞梯接望中，崎岖如九折。爱山心未至，竟未探云穴。拍遍画阑干，此心以何热。但去勿复辞，徒使离思切。奋袂登轻舆，揽辔慕古杰。出城日已暮，月色忽爽澈。金铎振喧阗，流渐响清咽。千岩如拱揖，似惜忽忽别。我行信悠悠，多情愧岑巖。他日傥再来，清晖为娱悦。

我行亦云劳，况值岁将阑。北风何猎猎，慷慨歌路难。山高林木黑，野阔星斗寒。重裘亦不暖，游子憎衣单。火明至旅店，解装治晚餐。豆粥咄嗟办，幸博慈颜欢。茅柴亦难得，莫作新丰看。明发遵前途，晓气清漫漫。霜威在何许，但见枫林丹。岚光画遥碧，人影晃冰湍。岩深虎豹嗥，天迴云气团。阴晴及朝暮，所见非一端。关山信修阻，引领起长叹。

## 述怀

胸中峥嵘千仞山，眼前寥廓百道泉。光芒直彻万古上，兴酣携卷叫紫烟。箕踞嫚骂吾不取，苏子亦说刘伶颠。名士但当痛饮耳，此语便已亏天全。望之不鄙士行正，诗豪酒圣空称贤。迺来慷慨动君子，愿谒兰陵无秋水。平生意气今几何，玉具拄颐聊尔尔。达人清节贵磨礪，精金讵受纤尘滓。后者瓦砾前秕糠，文士相轻尽如此。愤极冲天欲一鸣，畏人嗔怒还须已。

## 中秋阴雨用东坡先生韵

琼楼岑崕接天高，中有仙人濡吟毫。烟云落纸杂风雨，方塘潋滟生波涛。闻说天台落桂子，故应缥缈随流水。天香云外竟谁传，空阶夜滴凉音起。世事犹来似走丸，珠宫几见瑞光蟠。好凭玉笛吹深处，试掷虹桥入广寒。漳水悠悠近清汴，古风逸事今多变。隼句空留碧玉笺，雅词谁唱红牙板。金飙肃肃合空山，云影虽沈那得坚。自卷湘帘拜蟾魄，更留弦管夜深看。每惜阴晴不长好，掩却秋光太草草。窈窕佳月难屡逢，此语吾闻自坡老。锦绣罗胸未是贫，筵前棣萼亦诗人。松花酒熟莫轻出，举盞惟邀修月客。

## 雪后登邻霄台

北台纵眺意茫然，尝怪冰泥沁锦斑。万瓦寒生晴雪里，一峰独秀乱云间。迟留岁暮衙斋冷，洒落生平笑语閒。试倚危栏望天际，神游沕穆胜骖鸾。

## 交横寺遇雨



山中一雨葛衣凉，斜插莲花倦晚妆。地俭不知康岁乐，民贫惟识野蔬香。著书玩世真何益，采药怡情计亦良。遥望前村半扉水，数家烟火入微茫。

#### 望太行山

太行天下脊，形胜孰能齐。一线盘空上，三霄入望低。杂花薰巘嶂，怪石碎轮蹄。千古孙阳顾，何人解骏嘶。

#### 纪梦

澹泊夙所安，《齐物》得宗旨。既长习勤劳，昼作夜乃止。颓然適天放，杳不知所。叩门谁氏园，灵镜殊栗里。野舍牵薜萝，林木森可喜。云开淡淡山，日漾溶溶水。褰裳涉涧滨，延芳采兰芷。响泉横绝巘，斑斑土花紫。挥手一再行，天籁萦吾指。《广陵》不世传，叔夜信非美。弃置勿重弹，恐使音盈耳。次律悟前生，那须閒故纸。人生亦有涯，世事何穷已。早知蝶是周，不待遽然矣。

#### 残杏花

一枝瘦影不胜簪，谁见繁英落玉樽。寂寂香阶红不扫，澹烟斜月恐黄昏。

#### 夜坐

豪气消除百虑空，静闻虫语度帘栊。太虚不碍织云滓，笑煞秋花媚晚风。

#### 励志

弱龄授诗书，钻研忘早晏。既长读文史，篇帙苦浩瀚。傍搜及百家，茫乎若河汉。迺来二十年，奥义时一见。欣然欲起舞，得失已过半。圣人垂著述，游、夏终莫赞。岂余庸陋姿，所得望津岸。偃鼠走饮河，未动腹已满。蚍蜉不自量，乃欲抱树撼。掩卷发深思，浩然起长叹。

#### 感遇

昔有交让树，蒙茏荫千章。蟠根日郁结，绿叶何芬芳。下有麋鹿游，上有鸾鹤翔。贞石生其隈，廉泉出其傍。高风迈千古，令誉安可望。谁知逢匠石，一旦遭斧斨。零枝作器玩，大本充栋梁。镂金复错彩，奉君白玉堂。自谓尽材任，岂识非其常。修名仍遇梅，掩抑徒自伤。

#### 暮春独行后园遥见垣外白海棠盛开

山城春晚风雨恶，沈沈宝篆紫珠箔。纱窗独坐苦无聊，悄下香阶望遥嶂。举头恰见一树花，亭亭玉立临风斜。珠苞翠叶互掩映，苔垣芜院深深遮。却恨土人不知贵，忍令暮雨朝烟渍。安得移归绣闼傍，日日花前为一醉。乍睹应同拱壁珍，丝丝柔萼绝纤尘。沈香浓艳

知难并，定惠清超恐未真。化月笼光转林麓，滟滟寒波侵明玉。天然素体淡丰容，千古幽兰秀空谷。珍重名芳好自将，冰肌玉骨秘幽香。荒园尽日安荆棘，肯学嫣红薄媚妆。犹忆长平旧时见，药栏东畔开清宴。猩红带露晓霞明，酒醒梦回人已倦。桃李无言杏已霏，绿阴青子送春归。可怜满树玲珑雪，独抱清芬隐翠微。徘徊曲径情何已，繁枝折得蓂盈几。胸中华靡久不纷，岂借烟波濯纨绮。刻意惜花我亦痴，每逢佳卉便题诗。留连一物真成过，不及黄州梦醒时。

#### 夏夜雨霁

珊钩荡漾织帘纹，陡觉罗纨腻麝芬。冻雨乍晴庭翠活，浮烟散尽月华分。护屏蕙炷通宵馥，喧枕涛声彻晓闻。谁向空山赏寥廓，翩翩仙袂思凌云。

#### 纵笔书怀

忆从总角事篇章，坐拥书城乐未央。磨盾才雄空激烈，雕虫技小爱论量。侧身便欲无前古，披发真思下大荒。俯视万殊同一芥，迢迢天路恣翱翔。

廿年辛苦竟何成，几见含毫气吐虹。出水芙蓉方焕若，凌霄云鹤得无同。逞才枉诩屠龙技，锻句真如刻楮功。却悔安心犹未竟，泠然我欲御长风。

#### 静坐

闲来惟静坐，未觉战纷华。纨绮习俱尽，云山志未赊。名心淡秋水，清梦到梅花。处处皆佳境，吾生亦有涯。

#### 山居听雨

向晚关门卧，纱幮听雨眠。秋声起林薄，凉意答山泉。静许诗情得，清教俗虑捐。至人何处梦，吾思本超然。

#### 阅旧作

总角耽文翰，篇章每自娱。只疑多砭玉，岂望得骊珠。杨子悲歧路，庄生戒畏途。廿年尘土梦，展卷一长吁。

#### 晓行南磻

水暖沙平浪不生，远山一抹画难成。黏天芳树青如荠，时有幽禽自在鸣。

#### 不寐

暝色入闺闼，小窗幽更清。凉风渐以厉，落叶交纵横。揽衣下庭除，仰视霜月明。孤光耿云表，山骨瘦峥嵘。浓翠遽如此，节物令我惊。归来倚案立，嗒然忘其生。中心无适莫，勿勿非所营。蓬壶远莫致，浊骨终难轻。兜率在何处，吾欲从之行。二者无一得，翻然

辞瑶京。亮维朝市隐，岂顾俗虑萦。推迁有至理，气象能移情。秋光虽足悲，春色行自荣。谁怜不寐者，竟夕和蛩鸣。

#### 咫尺园赏雨

雾雨暗朝日，霏空绮不如。林花秭欲滴，池藻聚还舒。拔地怜新竹，腾波羨大鱼。为霖应自此，聊复惜三馀。

#### 春日登{山军}山

兹晨心志怡，言瞩芳华景。绣甸扇微风，春岩凌倒影。欣欣灌木荣，澹澹晴川静。水暖白蘋香，露浥红蕖靓。鹭鸶甚閒暇，迴立沙隄永。幽人自往来，赏遍尘凡境。暮色下林端，云霞满遥岭。

#### 孟夏即景同佩青妹作

罗衫新试水沈薰，閒凭雕栏对此君。晓日乱明莲叶露，和风轻飏柳花云。鱼游宛转涵生趣，鸟啭清圆入静闻。自笑年来忙底事，惟将辞采策殊勋。

#### 午窗苦热偶与三妹话及昨宵梦境诗以记之

溽暑烦襟困郁蒸，挥毫落纸赋憎蝇。窗中列岫清如洗，便拟移居最上层。富贵逼人何日了，飘茵落溷徒纷扰。况我身居华屋中，雕栏紫阁如蓬岛。一望云霞一慨然，平生山水有深缘。却思昨夜清凉梦，直到匡庐看瀑泉。仙音泠泠供洗耳，浣尘正要聪明水。一条白练玉龙飞，千古常新谁得拟。长风浩浩袭衣轻，遥指天边桂月明。万顷玻璃身一叶，人间何事更关情。青云冉冉随风漾，遽然一觉惊销帐。罗衾展转不成眠，恍忽犹疑行雾上。烟消日出霁霞生，鸟语花间报早晴。梦寐閒思何足忆，会当鼓翼指霄程。

#### 梦登华山书所见

天风袭衣袂，高坐华山顶。皓月坠林峦，涵空水苕影。

山开成独往，霞峤莹心目。投书别家人，不作昌黎哭。

#### 阅邸报偶成

不肯因人热，其如爱晚凉。魂清无梦寐，齿冷到岩廊。破浪心情懒，看云意兴长。此邦真乐土，何暇计炎荒。

#### 闻某相罢归

十年春梦醒黄扉，高蹈东山愿不违。万里清光新送爽，一庭秋影澹相依。閒支石鼎评茶品，净扫松阴待鹤归。名遂身閒有如此，肯将簪黻易荷衣。

立春后三日试笔

帘垂昼永觉春融，砚释轻冰晕碧泓。晴旭半窗香篆烬，水仙花底写《兰亭》。

花朝早书毕以馀渌作墨花一枝

风风雨雨到花朝，沈水香清闭绮寮。仿得《兰亭》墨华润，更将芳意写生绡。

黄崖晓发

辨色严妆竟，登舆破晓行。麦苗才覆雉，柳叶未藏莺。小雨沾衣润，柔风拂面轻。山灵应笑我，何事日长征。

午至芹泉驿见黄菊盛开有感

辞亲远行迈，所适天一方。脂车戒前途，陟彼千仞冈。清风来禾黍，蕉葛生微凉。忆昔别君初，桃李繁秾芳。如何三月后，遂见黄花香。采采不盈掬，怅然中心藏。手把珊瑚枝，身袭芙蓉裳。清节亮可贵，不佩庸何伤。人生有臧否，此心任低昂。仰视碧天末，矫矫鸿鹄翔。

秋夕望月和张曲江韵

暑退才三日，蟾光迥不同。炎威散林薄，秋意满庭中。园藿滋凉露，池莲堕晓风。澄清徒有愿，常恐壮图空。

予性耽文翰坐是致疾者屡矣书以自解

重裘坐拥尚憎寒，羸弱真堪仿土安。不为读书耽雅趣，那能与病结清欢。妄心已逐风云散，素志终期宇宙宽。香畹夙因何日觉，庭前柏子任君看。

立春日试笔

绮岁何遒驶，光景如奔轮。回思三十载，所见无一真。绿鬓渐以华，朱颜日以陈。尘务未能遣，愧彼贤达人。东风吹户牖，万象皆呈新。繁花吐芳树，玉沼游锦鳞。欣欣物向荣，我生益自珍。冰炭勿相战，为乐须及晨。何当屏百虑，一赏郊原春。

古意

艺兰那计畹，一一春风前。芳枝抱贞素，翠叶何鲜妍。幽芬不及远，空谷谁能传。乃知璠玕质，不遇终相捐。馨香虽自好，蕝蕝世方贤。对此坐叹息，中心为悁悁。

翁端恩

翁端恩，字璇华，常熟人。文端公女，文恭公女兄，归安国子监祭酒钱振伦继室。

有《簪花阁诗钞》。

### 金鳌玉蜺观荷

澄波曲绕凤池通，万顷夫渠映日红。绣幰尘催花外路，珠栏香浸水边风。鱼游细浪纹初活，莺啭深林语渐融。太华峰头莲十丈，霞标云锦总相同。

### 夜渡鄱阳湖

黄芦瑟瑟送扁舟，千里江天一叶浮。山影忽随云气涌，浪花寒迸月光流。宫亭接食传神鸟，沙渚随波浴野鸥。此际篷窗舒远眺，匡庐真面已全收。

### 送玉甫兄叔平弟偕绂卿侄应试金陵

雁影涵秋趁晓风，壮游难得一门同。已欣佳句如灵运，更喜清谈有阿戎。万里江涛归赋笔，六朝山色入诗筒。攀香蟾窟家声旧，会看三株灿月中。

### 长至日书怀

又见葭灰飞玉琯，深宵拥被对孤镫。青春渐逐尊前改，白发多从镜里增。苦盼音书怜女远，欣看家学有儿承。平生愧乏《螽斯》化，挥尽黄金尚未能。

### 仲渊侄胪唱第一悲喜交集诗以却寄

一纸泥金乍到门，开颜翻使泪添痕。更无凭藉通天路，却道滋荣并宿根。哀乐杂乘真梦幻，升沈不次总君恩。却看雏凤高飞处，苦向樊笼忆哲昆。

## 【卷一百八十八】

### 顾太清

顾太清，字子春，汉军旗人。多罗贝勒奕绘侧室。有《天游阁集》。

### 游仙

层台起虚馆，桂柱兰为堂。微风从东来，吹动罗衣裳。翻阶木芍药，薜荔当门墙。挥杯发清兴，弦歌诵诗草。繁星映户牖，明月照两厢。为乐及良时，光景孰云长。

缥缈十二楼，上有仙人居。左据青玉案，右拥鸿宝书。琼瑶制危冠，芙蓉曳轻裾。欢笑粲玉齿，从容下丹除。俯察碧流水，清波戏朱鱼。仰观青天云，舒卷任太虚。

巫山高巍巍，江水碧深杳。中有阳台人，清容舒窈窕。翠袖倚朱阑，颜色常美好。

我欲往从之，不见三青鸟。

层岩下斜日，云雾生重阴。昏烟迷修渚，飞鸟投荒林。清宵伫凉月，开窗弄鸣琴。悠悠世中事，泠泠弦上音。

#### 清明雪后侍太夫人夫人游西山诸寺

三月山花尚未发，一春忽忽过清明。云移列岫山无数，雪满丛林树有声。怪石自成蹲虎势，老松谁与卧龙名。晚晴碧涧添新水，归路回看暮霭平。

#### 东山草堂

春水满池塘，春光入草堂。黄茅初盖顶，紫燕欲窥梁。卉木见真趣，图书森古香。濛濛新雨歇，花萼婉清扬。

淑气催花萼，春风入酒樽。日长帘幕寂，人静鸟声喧。拂座清松影，侵阶碧藓痕。山堂通略约，词赋接文园。

#### 至日

衰颜暗向鬓丝催，地渐南游暖渐来。春意待看河畔草，天心已复地中雷。晴窗彩线盘金缕，碧海灵风破玉梅。忽忽浮生三十四，百年行乐几倾杯。

#### 次夫子清明日双桥新寓原韵

萧寺垂杨岸，明湖第几湾。去来今日事，二十五年间。碧瓦凄春殿，玉峰看远山。僧窗对流水，欲往听潺潺。

欲往城西寺，还须待杏花。羸躯仍怯冷，好景不容赊。柳眼蘸春水，渡头明晚霞。溪山生暝色，闪闪数归鸦。

#### 宝藏寺

宝藏云峰秀，春山碧草齐。清凉禅客室，冰玉主人题。花雨层台上，泉声法座西。登高渺城郭，万井晓烟低。

#### 游南谷天台寺

三月三日天台寺，日午灵风入法堂。一段残碑哀社稷，满山春草牧牛羊。庭前柏子参真谛，洞口桃花发妙香。笑指他年从葬处，白云堆里是吾乡。

#### 自题道装像

双峰丫髻道家装，回首云山去路长。莫道神仙颜可驻，麻姑两鬓已成霜。

乙未元旦

声声爆竹散林鸦，烟火春城千万家。碧瓦才临新日色，宫镫未翦去年花。死生转觉人情切，进退须防道路差。节物惊心同逝水，等閒谁敢负韶华。

二十二日由白云观过天宁寺

遂过天宁寺，花香染客裾。藓碑迷故事，风障护春蔬。野草浓於绣，遥山淡若虚。方今正望雨，宿麦及时锄。

法源寺看海棠遇阮许云姜许石珊枝钱李纫兰即次壁刻钱百福老人诗韵赠之

簪石文章在，风流天下传。即看诗句好，想见老人颠。绕座飞花雨，成阴荡碧烟。禅房春昼静，香接逆风前。

春老花盈树，丰神借客传。绿阴随日转，红片任风颠。邂逅江南秀，檀栾法界烟。题诗寄同好，问讯绮窗前。

游孔水用吴郡卢襄石刻诗韵

溪去山楼凡七里，平坦不烦折屐齿。下有泉源上石堂，万佛妙相参差倚。青苔亘古不见日，森森浓绿疑无始。龙泉古壁何年失，虎尾春冰岂可履。夕阴水鸟上渔梁，倒映山容碧滩陟。人生行乐须及时，花外光阴去如矢。开元残碑嵌绝壁，幸得庐襄刻诗纪。出山一路又看山，二水合流成漫水。马耳东风拂面香，鸳鸯属玉惊人起。归涂借问今何时，梨花桃花才结子。渺渺春波万古閒，悠悠天地长如此。偕隐何辞挽鹿车，云水遨游胜朝市。

夜行翠微山麓遂宿龙泉菴

篮輿一径入云深，两两明镫过树林。吹面不嫌山气冷，满天星斗压春岑。

夏日城东泛舟归来有作

卅年不到城东去，云水空濛接远天。野岸新蛎鸣偶尔，山门枯木尚依然。已非昔日僧迎客，犹记当初柳系船。一路薰风吹酒醒，重城西望隔苍烟。

岁暮寄仲兄用东坡和子由苦寒见寄韵雪后北风起，岁暮临新年。言念客中人，何日方当还。旅食恐不周，多病凋丰颜。一月两寄书，一书五六篇。告我客中事，略有好因缘。县令与之游，我闻心喜欢。吾兄本书生，所馀惟青毡。明哲贵保身，思退慎进前。出处各有时，请看墀与墙。乐道毋忧贫，仰不愧於天。且

待春风至，万物同新鲜。寄以敝狐裘，副以苍玉钁。翘首望南云，新雁将北旋。

四十初度

百感中来不自由，思亲此日泪空流。雁行隔岁无消息，诗卷经年富唱酬。过眼韶华成逝水，惊心人事等浮沤。那堪更忆儿时，陈迹东风有梦不。

自先夫子薨逝后意不为诗冬窗检点遗稿卷中诗多唱和触目感怀结习难忘遂

赋数字非敢有所怨聊记予生之不幸也兼示钊初两儿昏昏天欲雪，围炉坐南荣。开卷读遗编，痛极不成声。况此衰病身，泪多眼不明。仙人自登仙，飘然归玉京。有儿性痴顽，有女年尚婴。斗粟与尺布，有所不能行。陋巷数椽屋，何异空谷情。呜呜儿女啼，哀哀摇心旌。几欲殉泉下，此身不敢轻。贱妾岂自惜，为君教儿成。

己亥生日哭先夫子

虚室东风冷，幽居泻泪泉。去年同宴乐，此日隔人天。生死原如幻，浮休岂望仙。断肠空有恨，难寄到君前。

静坐偶成

一番磨炼一重关，悟到无生心自閒。探得真源何所论，繁枝乱叶尽须删。

万松涵月歌

青天皓月悬明珠，中涵松影千万株。森森林立无边隅，幽阴如闻天籁呼。浓皴淡染谁所濡，粗枝密叶参天铺。其质滑腻美且都，文登大理人所谗。贵来方与凡石殊，天开画本应难模。微云一抹如有无，远山掩映疑蓬壶。其中应结仙人庐，世间日月自征徂。惟此松能常不枯，可谓寿矣天地俱。儿之所好能不愚，毡包载归以献吾。自勺清泉涤泥涂，天生灵物岂容污。斫木为架覆以幬，相对不忍离须臾。恨不将身入画图，片石珍重抵琼瑜。

潜真洞

传有真人乘鹤去，空馀老杏手亲栽。至今深洞悬钟乳，终古阴崖长碧苔。大道无为且游戏，谷神不死或归来。秋风落日仙坛静，涧草岩花到处开。

游潜真洞晚归度梅儿岭口占

夕阳西下乱山围，缥缈遥村暮霭霏。游兴最嫌秋日短，马头明月照人归。

夏日听道初两儿读书

翛然花木荫茅菴，一炷炉烟经半函。閒向窗前课儿女，微风晴日诵《周南》。

过访少如座中忽值雷电交作雨雹横飞闻朝阳城楼竟为雷火所毁便道往观归

来赋此记之时壬寅夏四月二十二日也岁次壬寅夏维首，庚子日斜风似吼。是时亢旱



已愆期，触热来访金闺友。新词妙句共相论，消烦更酌尊中酒，俄然墨云挟雨飞，奇峰乱掣金蛇走。一声霹雳震阶庭，匕箸翻盘杯落手。旋经老姬报仓皇，神龙攫物传万口。朝阳城楼势嵯峨，中藏灵宝天公取。我闻此语心咄嗟，辞归不畏泥涂厚。沿途仰视光烛天，浓烟烈焰冲牛斗。聚观拥道如堵墙，云云默默互前后。细思此事何休祥，雷师毋乃职其咎。盍效昆阳助战争，一为吾皇击群丑。

夏伊兰

夏伊兰，字佩仙，钱塘人。诸生夏之盛女。有《吟红阁诗钞》。

古意

涧底松桓桓，冈头柏郁郁。劲节历冰霜，不知世荣辱。中有绝代姿，牵萝补茅屋。爱洁憩林泉，含贞抱幽独。欲折贻佳人，素心渺何託。缅彼春花开，红紫纷繁缛。争妍更取怜，时荣亦时落。遂令深情人，怜香歌当哭。所以桃李姿，不及女贞木。

山家

山家景物未全非，一院醺醺静掩扉。睡鸭池塘花落早，浴蚕天气客来稀。条桑小憩绿云坞，试翦新裁白袷衣。牵到柔丝千缕细，垂杨肯遽放春归。

睡醒得句

睡醒黑甜乡，悠然诗味长。虫声侵梦短，镫影逼窗凉。骨肉喜团聚，书编愁健忘。几番劳阿母，替翦夜来香。

侍家慈登吴山

十万楼台指顾间，凭高最足豁心颜。晴云淡挂胥祠树，残雪微明越岸山。天意尚留寒料峭，人情转爱境清閒。篮舆不厌探幽去，履舄追陪乐未还。

读列女传

我披《列女传》，怀古心长悸。忠孝节义风，罗列类略备。闺阁垂师表，摹仿匪易易。幼读《女孝经》，晨昏殊自愧。幸生贤女后，所学为何事。不见蓬户女，书史未睹记。或投梭表洁，或奉匜养志。至性有馀师，殊途而一致。况综三千年，供我精取舍。贤媛去今遥，精灵简策寄。后先心印心，一一呼欲至。我辈工絮吟，聊以娱亲意。大义重节孝，餘技通文艺。陶孟范犹存，曹庞型未坠。千秋仰止情，盥薇一编肄。

漫成

樱桃成实筍抽芽，春老西泠女士家。拆到绵衣刚欲曝，画楼恰恰落杨花。

明河词

微云点缀有无边，咫尺红墙望邈然。记取浣纱河畔路，碧虚清浅自年年。迢迢一水隐星妃，惆怅仙游旧迹非。我亦乘槎怀远想，只愁无学辨支机。

#### 吟红阁晚坐

梧竹萧萧里，凉阴一院赊。湿云疏漏月，微雨淡沾花。暑减谢挥扇，诗清借饮茶。牙签编百卷，奇富女儿家。

#### 圣因寺揽胜斋小憩

揽胜还将胜境登，几回小憩倚枯藤。竹声多似清吟客，梅格高如戒行僧。游爱早春人寂静，饮当薄醉兴萋腾。散花我本天仙女，胜果能参最上乘。

#### 哭族兄钱江

浓华馆里共周旋，长我居然三十年。蜡屐寻山娴相地，缁袍入座侈谈天。研经王济爻吞《易》，闭户袁安爨绝烟。惆怅人群容易谢，累依弱妹也凄然。

#### 葛岭吊贾秋壑

山中宰相任游嬉，兵困襄樊已失机。半壁笙歌荒蟀闹，华堂灯火暮萤飞。藏春有隔书空积，输币无灵计总非。凄绝木棉庵里月，幽魂千里未能归。

#### 耽寂

拟耽寂静养天和，偏有芸编费揣摩。月上方知临水好，树深才觉得秋多。花香淡袭七碗茗，虫语凉侵一径莎。赋到新诗还自赏，槃阿入夜少人过。

#### 甲申除夕

啸歌回首迹都陈，又见风光转绿蘋。弱婢营盘供饯岁，老亲剪纸写宜春。团圞好借尊前酒，僇忤难通画里神。但愿承欢依膝下，年年常作帨鞶身。

#### 忆祖母

严亲幼稚赖提携，两代深情一脉遗。骨肉已归三尺土，恩勤犹记十年时。人天渺渺神何在，笑语依依愿已亏。几度绣窗劳翦髻，伶俜忆昔苦无知。

#### 春日侍家慈天竺礼佛

何年梵刹倚丹青，拂座幡幢影乱飘。挟到天风喧佛呗，聚将香市杂尘嚣。山沈磬响清逾远，云沍炉烟冷不销。我欲题诗参震旦，松篁戛韵类笙箫。

### 游灵隐寺

飞来峰畔几番寻，梵刹庄严倚夕曛。幡影淡摇三殿月，炉烟寒郁半山云。丹厓桂子落无迹，碧洞猿声杳莫闻。遍地野花开烂漫，偷閒聊拟破苔纹。

### 飞来峰

奇峰生羽翼，摩空势轩翥。相传古灵鹫，佛国名长署。何年石飞来，梵刹永蹲踞。浩浩荡云烟，重重拥岩树。古剑劈山开，千古石隙露。虹梁跨半空，群峰尽奔赴。山风忽怒号，潮音喧日暮。未识缁衣徒，可领烟霞趣。我本散花女，佛前常拥护。瑶台一小谪，西泠十载住。峰下久徘徊，慄慄增危惧。但恐石狡狴，负我竺国去。入险更出险，罗衣幂云雾。一笑谢山灵，胜游殊匆遽。

### 吊宋阎妃墓

佛火钟鱼紺院幽，珮环谁忆六宫游。山空昼落松钗静，径断云埋石镜秋。芳履誓随真后去，宠名羞共贾婆留。香销粉冷灵峰侧，麦饭何人奠古丘。

### 吟红阁小坐

尘积借风除，屋敞延花补。山云覩无人，滃然入牖户。

### 郊外

东风小试袷衣鲜，结伴曾经度陌阡。人影淡留桑径里，春光黄到菜花边。几重云树留残照，十簇楼台入暝烟。曾得郊行多乐意，胜游最好纪年年。

### 登六合塔

群松势天矫，张翼将天盖。一塔独昂然，翘首矗云外。我辈巾幗流，每苦囿尘壒。幸得礼浮图，佛天灵堪勺。螺旋径曲曲，偃仄毋乃太。初行颇暗黑，接引鐙火赖。历尽七层巅，昭然豁昏昧。户牖妙嵌空，风来发虚籁。远山淡无边，濛濛杂苍霭。烟树认隔江，几丛隐蔚薈。乾坤千万里，咫尺罗襟带。才信神禹功，天地同其大。昔闻慈恩塔，杜句妙如绘。傥能恣登眺，兹塔等自郤。岂知造化巧，随意骋狡狴。名迹此亦奇，胜赏今为最。临危神自安，凭高心转泰。潮声晚来壮，奔腾激江濑。天风薄罗袂，忍寒殊无奈。倚柱立移时，夕阳下西山兑。何时挈伴登，重与续良会。

### 云栖寺

出山不见云，入山惟见竹。竹尽露寺门，绿阴环曲曲。莲池昔居此，安禅构茅屋。高踪西去久，衣钵今谁属。我来偶徜徉，香积饭初熟。禅从玉版参，书向金函读。转怜名利辈，抗尘空逐逐。晚钟云外来，催我还辘速。

### 偶成

人生德与才，兼备方为善。独至评闺材，持论恒相反。有德才可赅，有才德反损。无非亦无仪，动摇古训典。我意颇不然，此论殊褊浅。不见《三百篇》，妇作传匪鲜。《葛覃》念父母，旋归忘路远。《柏舟》矢靡他，之死心不转。自来篇什中，何非节孝选。妇言与妇功，德亦藉兹阐。勿谓好名心，名媛亦不免。女子在室时，承欢职难谢。及长事舅姑，或难依亲舍。孩提至及笄，廿年时颇暇。行宜奉杖屨，食宜罗酒炙。有女即当儿，服劳亲所藉。此时不努力，终身责难卸。他年纵思亲，往来联姻娅。顾此转失彼，孝思终假借。膝下乐融融，一刻千金价。纵言至於斯，慄慄心胆怕。所以北宫女，懿行昭华夏。环珞都屏撤，老死誓不嫁。

才子泣穷途，佳人苦薄命。不料此定例，千年难改政。谓系如分晓，殊难一例评。庄姜赋《绿衣》，《终风》暴自迅。昭君嫁沙漠，琵琶寄哀咏。彼独非贞淑，何都罹强横。昭昭祸福门，颠倒胡无定。空空轮回理，渺茫难凭信。十二万年前，偶然分逆顺。化工草创成，铁案堪凭证。夭寿贞不貳，古训式贤圣。趋避徒烦劳，但当受其正。

### 即事

春归新绿满园除，节近清和暖渐加。连日好风催楝子，一溪流水落松花。乌丝界字临多宝，香篆萦帘诵《法华》。奇福笑依都占尽，兰房即是列仙家。

### 吟红阁送春

绣阁延芳梦未阑，吹将玉笛数声残。蝦帘卷雨芭蕉暗，蛤粉黏墙薜荔寒。迤邐光阴閒展卷，寂寥心事倦凭阑。碧桃枝上馀春在，小勒红英几朵看。

### 夜读

展卷坐深宵，竹阴趁清暇。引人书味长，佳境如啖蔗。女伴幸不来，憧扰片时谢。罗纨向夕挥，放我凉风借。妙理耐钻研，闺房当书舍。创获珍珠船，宝贵真无价。蛩吟豆花篱，萤堕蔷薇架。月解窥读来，玲珑穿树罅。

### 偕姊妹辈雨中登望湖楼

我辈联群互唱酬，楼延暮霭尚勾留。四围烟雨凉无际，一片云山淡入秋。柳影垂青低别浦，湖光摇白送归舟。荷花依旧开无主，冷落当年玉局游。

### 秋日再过葛岭

无复西湖纵夜游，椒房恩宠一朝休。夕阳依旧南朝树，蟋蟀于今半壁秋。孱弱官家裘仅委，颓唐国事水空流。华堂歌舞都非昔，衰草寒云起暮愁。

### 皋亭山看桃花

出港橹有声，沿山花无数。春风替我作前驱，引入红霞最深处。霞光水色沍千重，

翦绡曳彩凭天工。半山傥作汾山比，禅偈参来色即空。空明倒影窥屏嶂，夕阳几处闻渔唱。一镜春晴泻绿油，三篙香暖霏红浪。桃花尽处露烟村，鸡犬桑麻聚子孙。不信西湖名胜外，此间别有武陵源。

#### 清明展祖姑母墓

松根携弱弟，展墓泪频倾。白发人何在，空山岁几更。弥留绕床梦，瞻拜阖家诚。几味钉盘冷，聊申返哺情。

#### 度亲庵

纷排桀戟旧门庭，舍宅于今岁几更。佛果证来忠孝好，尘机洗到磬钟清。疏花几簇密无路，流水一溪寒有声。我亦劬劳惭未报，残碑读罢转心惊。

#### 偕诸表姊妹游三潭印月

小艇一叶轻，穿波驶如箭。携将联吟侣，三潭游历遍。借彼德生堂，团圞开华宴。芰荷未著花，风来叶频颤。纤鳞聚族多，喷沫银浪溅。返照入潭心，万匹混金练。凭栏立移时，心摇更目眩。澄影写心心，鉴光窥面面。何时踏月来，吟秋聚名媛。寿师昔放生，乐善意不倦。旧迹久荒凉，葑根簇湖堰。犹幸去年夏，胜境重修缮。川泳鲂鳢乐，云飞鸿鹄便。生机溢湖澳，空明融一片。缅彼大悲心，千载犹如见。

#### 偕程二表姊孙七表妹登湖山一览阁

湖山罗户牖，杰阁联容与。凭高豁心颜，幸联咏絮侣。况当孟夏时，草木尽繁庑。居高更眺远，月令典可数。梵音度悠扬，何处传钟鼓。云忙意自閒，心静境都古。茗味淡可怜，诗情瘦如许。真乐个中多，妙悟各无语。好风扑帘来，松花落如雨。

#### 偶吟

寂坐山房里，尘心销几许。残镫黯无光，烟外闻人语。

#### 鲁兰仙

鲁兰仙，字灵香，山阳人。一同姊，黄照室。有《瘦春仙馆诗剩》。

#### 荒村

荒村何所见，茅屋两三椽。人语白云外，秋来黄叶边。野光吹落日，海气接长天。仰首飞鸿度，凄凄亦可怜。

#### 野望

天末风初起，苍茫落日时。海云翻大壑，山木堕寒枝。穷野归鸦急，高原去马嘶。

那堪当暮景，黄叶更离离。

### 溪上曲

溪头日落寒鸦悲，往来溪上攀杨枝。溪小无声杨枝堕，游鱼穿波花满舸。回首东山月半竿，水天苍茫一色寒。但见暝色千里来，随人直上高楼端。芦荻萧萧风又起，夜深落叶落不止。

### 小娥别余三载矣近颇不见消息再寄长句

出门怅何适，满目尽芳草。不见故人来，惟见春花老。春花几度藏月多，别时容颜今如何。忆昔香车驾初枉，握手中庭秋月朗。幽蛩啼歇寒霜飞，野风四起群木响。我心此时悲蹉跎，君未知之呼我歌。我歌一曲君戚戚，徘徊为之三叹息。自从君归长别离，春秋燕雁更代飞。几折垂杨无所赠，倚遍碧桃总相思。相思出向清溪头，溪上飞花逐水流。

### 述梦

独夜隐几卧，梦落湘江浦。湘水去悠悠，伫立浑无语。忽闻波涛声，疑是洞庭渚。仿佛黄陵庙，明妆俨二女。江水东流深，君山自终古。临风启《九辩》，清泪落如雨。梦魂忽归来，卷上湿几许。

### 咏怀

盈盈高山草，寂寂幽壑兰。春风非有异，地卑长岁寒。我来采薇蕨，对此空吁叹。安得有仙术，移之向层峦。日夕游园中，有鸟西北来。飞飞林木间，欲栖久徘徊。鸟栖尚徘徊，人情岂无猜。所以富春翁，不共汉尘灰。

### 和兰岑客中感怀

四望浮云蔽远山，一身惆怅荻芦间。洪流尚未安徐甸，宛马何由入汉关。万里风烟人去远，三秋明月鸟飞还。思亲况是兼忧国，知道愁多鬓易斑。

独夜楼头怅成华，秋来无处不堪嗟。雁惊远浦离人梦，霜落孤村处士家。曲院风寒人尽散，虚堂帘卷月初斜。凭栏更惜篱前菊，枝叶萧疏尚有花。

### 风雨篇

春风习习，春雨丝丝。出门四顾，小草离离。风雨无情，草尚随时。人生有志，而不相知。嗟尔君子，何其多疑。非君子疑，世路易迷。岂如草木，萋萋无私。感此之故，令我心悲。白云渺渺，志在崇山。非如流水，回环人间。泉流胡择，云意难攀。

### 李媿

李媿，字安子，号吏香，上海人。嘉庆丙辰进士、户部员外郎松林女，桐城方传烈

室。有《犹得住楼遗稿》。

桃花

流水重杨拟若耶，绿阴深处小桥斜。春风不识谁家女，独立溪边自浣纱。

呈家大人

寂寂柴门镇日关，吟诗须静奕须閒。杜陵老去犹忧国，彭泽归来肯出山。倦把申江收眼底，醉携《周易》注窗间。旁人漫说家庭乐，不信年来鬓亦斑。

咏雪

呵冻咏飞花，推敲何太苦。不及谢庭人，一语留千古。

望家书

自离慈母膝，镜里鬓何如。难缩千程水，惟凭尺素书。苦无双鲤至，倏又产年馀。况是前番札，曾云病未除。

怀竹孙弟

身世谁怜早岁孤，风尘扶母走长途。池塘春早连天碧，为问行人得句无。

狮林偕香崖姊晚步

一丘一壑总凌空，閒与同怀入此中。诗境果然须曲折，文心如是便玲珑。欲题石壁无佳句，爱听松涛待晚风。坐久不知天又暮，回看树杪夕阳红。

方荫华

方荫华，字季娴，阳湖人。嘉庆戊寅举人、闽县知县履簃妹，武进湖北按察使赵仁基继室，易州知州烈文母。有《双清阁诗》。

和外见赠原韵

春光烂漫去重回，斗转星移岁度催。楼上微闻吹玉笛，花间常愿共金罍。疏梅艳夺三冬雪，爆竹声喧一院雷。风景尊前差可乐，拈毫愧乏谢家才。

亲操井臼未全知，不见高堂白发丝。护惜犹思依母日，梦魂尚忆作儿时。故山已过猫头筍，小院频挑鸭脚葵。翦烛听君谈往事，敢忘先德自吾师。

轩车到处万民安，手种桑麻露未乾。吹面不惊风似雪，当头喜见月如盘。好花欲放还微雨，春色初来尚薄寒。莫道琴装萧瑟甚，帘芦纸阁有馀欢。

无端风雨小窗前，料峭轻寒著半肩。远路分携惟有泪，深宵慢忆若为怜。晴芳古道无边绿，璧月中天一样圆。闽海路遥飞不到，承欢犹是忆前年。

#### 忆兄

梅花春信远相闻，别意远如落絮纷。山隔螺痕频有梦，江涵雁影记初分。裁笺祇觉言难尽，学咏何由思不群。此日高堂应慰藉，遥听百里颂神君。

#### 登大观亭谒余忠宣墓

芳亭犹是古乾坤，想见当年碧血痕。叠叠江山存浩气，重重烟水吊忠魂。四围绿树依神宇，千载啼乌泣墓门。江上丛祠频报赛，知公威德到今存。

#### 春日感怀

年来心绪倩谁知，一病经旬睡起迟。难释离怀因忆母，重温旧学试规儿。愁中偏易逢佳节，梦里差能得好诗。听尽廉纤终日雨，又堪墙外柳丝丝。

#### 悼翠姬

堪叹弥留近百朝，严霜一夕折柔条。方期渐渐沈痾愈，岂料茫茫泉路遥。官舍孤镫凄欲绝，旅窗冷月泪难消。伤心最是怜征客，谁共尊前慰寂寥。

#### 癸卯病后作

六月既望后，二竖忽来侵。日神游房栊，夜鬼窥窗棂。疾来如水火，势急空刀针。饥饱俱不知，魂魄将归阴。儿女绕床泣，亲邻亦惊心。岂愿重生世，一息延至今。所望儿成立，不妨衰病临。

我初来阳羨，百晦如云集。孩提事不知，欲泣不成泣。苦忧家计空，又愁儿难立。尽日独筹量，终夜寒衾湿。展转求名师，望汝诗礼习。严惭孟母机，教愧欧氏荻。庶几读父书，篇幅劳什袭。

#### 周之瑛

周之瑛，号研芬，嘉善人，同县举人、江苏知县丁廷鸾继室。有《薇云室诗》。

#### 春夜

红炉轻拨护春寒，一卷《骚经》读未阑。夜永不知明月上，瞥惊梅影到阑干。

#### 送春



东风一夜去瑶台，杜宇声声唤不回。心惜落花收拾懒，卷穷空待燕衔来。

#### 秋日病起感事

萧萧木叶逐西风，愁听蛩吟暮雨中。玄鸟辞人归海北，白云随意过楼东。病馀眠良都成懒，悟后悲欢渐觉空。静看韶华依次改，拈毫终愧未能工。

#### 题黄仲虬西山记游图

吴趋山水古无匹，一角西南更幽绝。灵岩深秀邓尉奇，环燕由来孰优劣。名山本待名人游，江夏才子今其俦。尘区闭置不得意，约客试探千岩幽。青山鸣禽劝客醉，吴王池馆春常在。响屐廊边细草香，玩花池畔清波汇。一望红亭白塔间，孤高佛日还追攀。忽惊具区出足底，琉璃冷浸双烟鬟。相将更泛清溪棹，何处幽香来绝妙。吾家山畔桐井东，积雪千条留玉照。年年梅花春早开，今年二月犹含蕊。凝冰敛雾一万树，忍寒为待诗人来。诗人自古多好事，似此清游难恕置。已将踪迹付丹青，更录千诗作游记。

#### 花朝雨

微风细雨酿春朝，红杏枝头渐放娇。不惜苔痕黏绣履，金铃亲自繁花梢。

#### 秋日漫兴

越罗轻袷未装绵，坐傍蕉窗欲雨天。药裹有灵何碍病，华胥无梦不求仙。每因易感秋多瘦，苦为耽吟夜损眠。欲展《骚经》吊湘客，博山先爇水沈烟。

#### 梅花和尚墓

上智能全历劫时，一抔无恙水之湄。梅留傲骨撑晴昊，竹写高怀认古碑。名姓久登《高士传》，丹青空系后人思。东风岁岁逢寒食，谁踏蘼芜酹一卮。

#### 题读书秋树根图

微霜下木末，丹黄变庭绿。翻风飒高寒，清籁散岩壑。中有幽居人，旷焉绝尘俗。把卷坐林根，忘形静耽读。兀兀千古心，烂烂双电目。道妙一以探，神理早涵蓄。茂先三十车，金楼八万轴。秘之生蠹鱼，曷若贮诸腹。用舍得自然，纵横洵是乐。先生黄门裔，书仓有旧筑。车箭与南金，世誉仍相属。稽古继前荣，好学真为福。

#### 夏行曲

栏干叠影回纹细，日炙渠荷红玉腻。蝉鸣树杪咽清风，鱼跃波心唼花气。葵英碎粉疑堕黄，蛛丝织瓦琉璃光。湿萤沾露飞不起，一星惨碧依兰堂。

#### 秋夜曲

蛸虫织月帘荡影，庭露无声桂花冷。凉砧捣夜人未眠，风过檐铃一声警。流苏压幔珊瑚钩，明窗静对银河秋。空梁燕去碎泥落，香散金猊黯不收。

### 采莲曲

生小横塘住，烟波一棹轻。年年采莲惯，莲种尽知名。镜影净湖光，人面花枝映。红衣薄似依，不耐秋风冷。朝来采莲处，露叶未曾乾。欲取珠相赠，终怜无定圆。折莲丝绕手，根蒂还牵藕。回棹漫相惊，鸳鸯此中守。

### 和右岩叔秋夜原韵

夜静月逾洁，翛然意欲仙。镫凝红豆子，香散碧炉烟。蛩语破孤响，钟声空万缘。微风一回过，落叶满阶前。

### 客中秋感

无端作客此淹留，触绪能消万斛愁。乡思望圆三度月，砧声凉送一城秋。粮空宜学餐霞去，书富犹堪负笈游。聚散年来类萍梗，何时听唱大刀头。

### 宗婉

宗婉，字婉生，常熟人。山西同知萧瓚、北河州判锦炤母。有《梦湘楼稿》。

### 寄怀家大人时赴伯父粤东任所

初离膝下时，朝暮常相忆。转眼半载馀，中心更悱恻。翩翩空中鸟，欲飞有羽翼。薄薄天上云，欲行仗风行。身非鸟与云，飞行不可得。思亲在异乡，迢递隔南北。有女在晨昏，不能视颜色。迢迢客路长，渺渺江流直。儿身恨难随，儿心在亲侧。手缄一幅笺，心尽数行墨。

### 春晓

一帘红日晓光浮，帘外东风响玉钩。半掩画屏人未起，似闻鹦鹉唤梳头。

### 夏夜登小蓬莱阁同丽生二弟晋作

近水花如梦，当窗树作屏。玉箫閒一弄，夜气忽吹醒。衫薄萦香雾，鬟低坠素馨。隔墙谁笑语，扶月悄然听。

### 感示两儿

半生辛苦母兼师，朝课经书夜课诗。但得汝曹能努力，馀生终有展眉时。

### 汉宫瓦砚歌

千年古殿生蒿莱，瓦砚变化成良材。文房珍玩何足道，盛衰贵贱亦幻哉。谁人作砚供书契，云是帝鸿古遗制。琢玉奇珍祇饰观，澄泥别样夸新制。避雎风宇古样镌，合欢秋叶新题签。小者文场便怀袖，大者椽笔挥云烟。砚材百种此尤寡，陶质苍然古而雅。问年神雀五凤初，讫地长生未央下。当年立仗覆千官，此日抔泥出寒野。良工琢付识者藏，摩挲日久腾辉光。储以水晶琉璃之宝匣，配以珊瑚翡翠之笔床。更闻此砚能发墨，濡染淋漓殊自得。凹处犹馀士蚀痕，中央已没苔花色。君不见玉龙金凤铜雀台，於今无地无尘埃。又不见离宫别馆三十六，望里莘莘走麋鹿。羡尔犹存历劫身，芸窗珍重伴词人。他时携上通明殿，书遍吟毫五色新。

湘茧合稿刊成铁云妹婿贻余以诗过蒙推许叠此奉酬

争传忠简旧家门，虚誉何当众口喧。闺里秀方元不桀，篇端伯氏敢居尊。枣梨略志平生愿，棣萼同怀罔极恩。从此尽填诸缺陷，百年长熬瓣香温。

壬戌四月偕粲生妹北上留别书君女甥

去去难为别，行行思更深。沧桑虽屡变，桃李尚多阴。他日故乡返，仍期旧谊寻。一椽还共卜，归老遂予心。

宗粲

宗粲，字倩宜，一字菡生，常熟人。长洲陆清泰室。有《茧香馆吟草》。

刺绣

春日正迟迟，当窗理彩丝。鸳鸯慵不绣，祇绣女贞枝。

雨窗

晚雨正潇潇，红窗坐寂寥。云低天在宇，风急水如潮。砚喜螺香润，炉嫌麝炷消。卷帘频望霁，花事恐萧条。

揖山楼漫成

小楼一角敞雕檐，檐际岚光逼镜奁。生怕秋山来笑我，妆成才敢卷珠帘。

落叶

秋气乍萧森，天涯落叶深。西风数行雁，暮雨几家砧。黄密埋荒径，红疏露远岑。惟留松与柏，苍翠自成阴。

敬读慈亲绣馀遗稿

挑灯细读绣馀诗，字字清新字字悲。多恐一缄红豆子，还从南雁寄相思。

绿阴

江南春已老，绿叶展芳林。几日落花尽，连番新雨深。窗中人似梦，帘外昼偏阴。偶向回廊倚，沾来翠满襟。

焚香

帘外月华明，焚香小坐清。博山炉袅篆，缕缕是依情。

别燕

画梁无意更淹留，软向西风话别愁。寄语明春休误认，杏花深处小红楼。

游破山寺同铁云作

隔谿现琳宇，携手恣幽寻。泉响细通涧，竹阴凉堕林。烟云晴蔼蔼，钟磬昼沈沈。偶向禅关憩，顿消尘世心。

谢婉生姊赠兰

生平爱种梅与兰，梅花易种兰花难。相思万斛消不得，惟馀清梦萦湘干。凉风蓦地送香气，美人容谷来姗姗。一枝亲向胆瓶供，对之喜动双眉端。名花本推国香香，赠花人更余相欢。忆从古梅林下别，遥通音问惟青鸾。芳踪相隔心不隔，贻我秋佩清芬攒。见花如见玉人面，无言常向妆台看。

庞书君女史惠赠纨扇诗以谢之

桐阴如水环阶清，秋云压住帘波平。碧空飞下一轮月，虚堂飒飒凉风生。是谁翦出齐纨洁，素影团圞傲霜雪。半施彩笔半金针，烘出婵娟真丽绝。扇中美人好容华，赠扇人亦娇如花。海棠姿态梅风格，压倒群芳绝代夸。感君宛转云情重，未曾识面先承宠。一握绸缪寄合欢，携来直当瑶华奉。招凉徙倚绿窗前，望断银河渺渺天。寄语西风休报冷，秋凉忍向篋中捐。

七夕寄外

宝鸭香烧袅细烟，一弯眉月露婵娟。愁心似草锄仍茁，病骨如花瘦自怜。多恨人偏逢此夕，有情仙祇别经年。雏儿解向双星拜，助我相思更万千。

题沈竹斋太守夫人慈晖馆诗草

文字流真性，难忘白发亲。年华花信短，才调玉台新。珠佩杳如梦，锦囊空自春。仙郎腰已瘦，披读更伤神。

### 吴兰畹

吴兰畹，字宛之，常熟人。宜兴拔贡、浙江巡抚任道镕室。有《灌香草堂初稿》。

### 秋声

冷雨敲窗清梦湿，洞庭木落怒涛生。疏砧静捣天边月，羌笛愁听塞外声。汉上风云寒彭角，江间波浪走蛟鲸。何须更作悲秋客，四壁虫声已不平。

### 寒寺

萧疏枫叶护云林，萝壁荒凉朔气侵。几杵霜钟惊客梦，一龛镫火照禅心。西风鹤唳空坛冷，残月乌啼曲径深。雪满山中无蜡屐，掩关寂寂夕阳沈。

### 清明

弹指光阴百六时，故乡景物转凄其。碧桃影里停游骑，红杏村中认酒旗。细雨楼台飞燕子，春风帘幕啭莺儿。不知此日关门柳，羌笛声中馀几枝。

### 雨夜不寐

风雨悲摇落，潇潇警客眠。愁心千里碎，孤梦五更悬。独醒知何恨，馀哀转自怜。纵横镫下泪，流不到重泉。

幽梦太无凭，伤心独拊膺。沈阴压树黑，残烬背镫凝。地下魂应老，人间恨未胜。空馀遗象在，色笑痛难承。

### 遣怀

飘泊忽千里，浮踪鄂渚边。角声寒落月，江气接荒烟。鬼哭无新旧，烽飞历岁年。承平应有日，泪眼向秋天。

### 即事

魏绛和戎策，时危未可论。风翻西苑火，尘起禁林昏。北极星辰远，南天盗寇尊。安危仗长策，何日转乾坤。

### 杂咏

俯首一长叹，仰首悟太清。万物各有司，今古徒纷争。严霜摧百草，松柏郁空青。阴阳倏变化，风雨励晦明。馥馥幽兰姿，寒谷隐其馨。蔼蔼君子堂，萧艾莫纵横。岂无媚世容，所宝在荣名。

揽衣涉太行，搔首穷八荒。上有青青冥，下有垒垒冈。鸱鸢啼我前，虎豹嗔我旁。回风振山谷，徬徨摧中肠。欲举苦无翼，神魂驰远方。浩歌复长啸，哀哀鉴彼苍。万古同一辙，何为自悲伤。

寒衾不能寐，静夜援鸣琴。孤月皎中天，清风激素襟。玄鹤舞瑶阶，丹凤和遥岑。幽兰与白雪，泠泠太古音。歌苦调自高，识者赏其忱。伯牙遇子期，千载契同心。茫茫此天地，旷世独悲吟。

人生若轻尘，为乐苦不早。荣辱同一瞬，劳心徒懊懊。既无子晋术，又乏忘忧草。良辰岂云再，愁思令速老。志士宝其名，庸人工其巧。试问萧艾姿，安知松筠抱。

### 送别

去去不可留，清泪沾胸臆。今夕斗酒欢，明日分南北。君行日以远，我心日以恻。岂独离别伤，转念孤征寂。举目童仆亲，搔首骨肉隔。野店孤镫青，轮蹄晓霜白。念此迫中肠，尽夜难安席。愿言加餐饭，善保躯金石。

### 游玉泉山寺和夫子作

玉阳多胜事，鹫岭快登临。塔耸风烟古，山空花木深。飞泉悬峭壁，清磬答遥岑。智者安禅处，莲开月满林。

万籁肃群虑，苍凉梵宇开。高歌动日月，虚壑隐风雷。断碣空陈迹，妆楼胜劫灰。灵岩秋寂寂，遗恨没蒿莱。

搔首涉峰顶，江山一碧浮。凄凉今夜月，萧瑟故园秋。鹤唳惊残梦，猿啼起暮愁。丹砂如可觅，还伴葛仙游。

### 宿乐乡关

廿载萍蓬迹，劳劳续书征。乾坤犹浩劫，花木冷春城。风劲波涛怒，村荒禾黍平。残山馀落日，归鸟觅林鸣。

### 永夜

永夜不成眠，徘徊绕兰室。为欢未多时，郁郁忆畴昔。征雁带离声，居人心断绝。去日霜雪寒，今时杨柳碧。关山隔言笑，魂梦徒飞越。寸衷苦难达，相思两无极。皎月鉴薄帷，青镫照幽咽。六翻振何时，恒怅此遥夕。

### 家书忽至眷属以中途梗塞暂居越城次夫子韵

惆怅莺花梦里过，沧桑不改旧山河。乾坤满眼风涛阔，湖海惊心浪迹多。千里白云凄远目，九秋零露冷烟波。凄凉故国凭谁问，一样愁思寄咏歌。

多敏

多敏，喜塔腊氏，字惠如，满洲旗人。漕运总督松椿室，宝康母。有《逸菴阁遗诗》。

题茗溪女史秦淮秋柳卷子

憔悴烟痕水阁头，娟娟凉露怯深秋。旧时枝叶凋零尽，写出西风一夜愁。

行路难

雕轮马足秋霜深，天荆地棘惊羈心。羈心幽迴向谁诉，南辕北辙多沈吟。西风一夜歌归去，桑柘依依钓游处。

秋夜即事

罗衣脆薄水天凉，小阁寒团一夜霜。曲径竹阴频闪月，疏帘花气暗添香。倚窗梦短凭秋续，翦烛书慵况夜长。病怯东风了无寐，漫随镫影绕回廊。

冬日即事

寒色逼虚幌，深闺暮掩门。墮来凉月影，写出晚愁痕。永夜镫疑雪，微烟夕敛昏。不须嗟缟袂，金鸭手重温。

春雨

晓来霏细雨，苔蘚晕寒青。凉意围罗幕，幽人愁未醒。

春日有感

赢得春如许，窗环六扇纱。眉痕纤月影，病意小桃花。纸样裁衣薄，珠华亚鬓斜。闲中看露叶，弱影不胜鸦。

春闺杂咏

琉璃屏敞掩罽毼，嫩雨轻寒二月时。最是閒愁磨慧骨，一枝香雪一床诗。

春到亭林景物霏，如烟小雨点苔衣。幽禽向晚归来急，却傍垂垂花树飞。

三分水竹二分居，碧玉苔纹晕绮疏。一瓣拈花参佛谛，天龙八部读禅书。

燕子风前趁午矦，海棠低映茜窗纱。蜘蛛也解留春住，一角晴丝罥落花。

秋词

露砌独立幽花侣，秋虫啼寒夜深语。棱棱风厉薄罗衣，绕径寻诗来复去。方塘一夜西风紧，苔点寒青鹤知警。晓起微吟莲叶东，满池荷芰红衣冷。

#### 勺园春步

春厓九曲伴烟霞，唤梦寒禽绕屋斜。几处浅云残雪径，忍寒独自折梅花。

#### 三月十五日

夜色凉如水，杏花寒不寒。诗魂牵一缕，绕遍曲阑干。衣薄秋同样，窗虚月共看。小鬟閒偶语，似亦怅春残。

#### 出都即事

驮梦轻车出凤城，晓风频点客衣轻。炊烟竹屋看晨馐，帽影鞭丝趁午晴。草色半摇迷远道，花枝低亚笑长征。二千里外江南地，才度燕南第一程。驱车晓发走春泥，夹岸风微柳絮低。天暖马嘶芳草地，午晴人过绿杨隄。数声啼鸟花三月，几个浮鸥水一谿。未识今宵何处宿，渐看斜照出林西。

#### 过永定河

晓日风尘暗，披襟乍觉寒。关山诗句瘦，风水客行难。波影自明灭，烟痕故曲盘。长安回首望，云树渺无端。

#### 赵北口

晓风吹遍柳花低，露叶烟条一翦齐。十二阑干陂水涨，碧玲珑唱酒帘西。

#### 济宁舟中

迢迢水国数千里，梦逐寒云过江水。东风雨雪晓濛濛，一叶往来湿烟里。

#### 微山湖夜泊

一枝柔橹渡蜻蜓，酒畔《离骚》读未停。明月欲残偎树白，湖山破晓入船青。自怜病骨禁宵坐，最怕春寒袭梦醒。试取瑶琴弹一曲，恍疑篷底有龙听。

#### 露筋祠

椒兰玉座拜神仪，水驿孤船夜泊时。三十六陂秋水夜，流萤青闪小姑祠。

#### 高邮道中

髻社湖边路，舟行一叶深。药炉谙病骨，经卷忏愁心。水国牵幽梦，山灵笑苦吟。



隔花声细细，对面有春禽。

### 小摩诃馆閒坐

摩诃閒馆静，吟咏意何慵。山石围三径，秋云幻数峰。瘦疑花是侣，寒促酒先浓。满眼蘼芜色，扑人翠影重。

苦热。

池荷送香气，露坐判微凉。归鸟急高树，幽花明夕阳。室霉搜蠹简，草细蔓蛇床。辟暑愁无计，难寻冰雪方。

### 游金山作

水晶帘外绝尘气，铃语随风下界闻。小阁窗寒微有树，长江天远不留云。春衫罗薄依松静，秋舫镫明隔水分。拈笔刻厓记游迹，下山归径入斜曛。

### 夜坐梅花下口占

吟魂直欲化秋烟，瘦到梅花骨亦仙。扶病不禁春似水，耽诗却爱夜如年。雨沈水阁虫吟老，木落吴江月影圆。贪看一枝斜入画，翦镫裁句不成眠。

### 八月十三日坐密倩精舍

月华如水凉，庭阶花叶警。夜风泠然来，零乱海棠影。

幽梦任风吹，踏花来复去。天晓梦初醒，寒蛩犹絮絮。

### 济宁舟中

一叶轻舠趁雨馀，水纹圆活结涡初。雕文髹几閒安置，半供梅花半载书。

橹声孤泊野桥西，一角微风飏酒旗。应有网鱼吹水上，柳花随雨点前谿。

### 钩弋夫人小印歌

玉钩冰筋棱棱起，故印珍藏识天水。照人颜色黯人魂，颓粉零香汉宫史。绿绋自署昭阳春，婕妤故是拳夫人。金屋沈沈阿娇老，河间灵气锺其身。秋风荏苒君恩歇，秋叶哀蝉响呜咽。莫问当年尧母门，摩挲鸳石真愁绝。云阳西去女君亭，一树梨花冷曙星。只恐茂陵松柏里，空馀石马嘶冬青。

### 寻诗

一抹斜阳驻碧墀，平阑斜倚立多时。梨花庭院春如雪，会得襄阳五字诗。

### 从灵光寺至秘魔崖

筍輿作蛇行，人来山腰里。一峰复一峰，青青伏还起。宽处若掌平，仄处仅容趾。忽然来云中，忽然行涧底。路绕秘魔崖，石磴更齿齿。势欲苍冥齐，群峰未可拟。俯视下城郭，罗列如屏几。酌酒对山灵，我行殊未已。

### 游西山

徘徊向西崦，曲径非一曲。诸峰送寒青，远树拂轻縠。回望高崖云，无心远相逐。时有微风来，吹雨洒幽竹。久立石级寒，秋色益苍肃。树杪澈清梵，经堂见幽麓。稍自理蜡屐，行将悟金粟。萧然空尘思，四顾悄山绿。

昔年虎阜游，秋叶闻幽蝉。今来宝珠洞，春渌流溪泉。灵碣龙象寂，紺壁螭螭悬。冈峦窅然深，竹树何便娟。揽衣造绝顶，凭吊怀豪贤。岩厓漱墨留，妙迹疑神仙。文字竟终古，黤黠兹山巅。铃铎自相语，松涛驱暮烟。岁月有代谢，古今徒慨然。

### 与素芳女弟子论诗

何必论唐宋，诗原写性灵。遣怀明似月，落管灿於星。语夺千山绿，思灯一水青。只今谁作者，空缅旧仪型。

### 深秋感怀

西风将夜气，秋夕一何长。月渡鹅儿水，诗吟燕子霜。衣轻妨砌露，帘细隔炉香。萧瑟芙蓉渚，离怀感欲伤。

### 龙幺妹歌

弓刀小队花如雪，英雄儿女真奇绝。良玉曾闻乐府篇，兰珠争诵人才笔。丁香小幄明春华，游龙使女出龙家。肌肤妒雪眉欺月，窈窕生香海外花。小姑独处菱枝弱，姓字薰香护花叶。不将眉黛斗星妆，自有功名望南阁。绛袍斜罥丁香绦，不喜珠华喜宝刀。书开秘笈亲军事，令下如山不动摇。日将骑射教姝丽，粉膩脂香三百骑。瘴地蛮天任指挥，雪剑霜矛精击刺。昔年小丑生潢池，碧鸡无声金马痴。名地夜陷官偷活，冷月宵荧鬼守尸。王师驿骑流星急，熊罴十万分驰入。铜鼓边城拥护劳，铁券家声宣慰裘。阿兄意气如雷巖，连环双槊黄金鞬。锡封自号百蛮长，象犀远贡元和年。龙幺小妹金闺彦，婉孌将军经百战。星舒猿臂竹枝弓，秋晕霜华杨柳箭。白莲妖孽阵云凉，髑髅夜泣天徬徨。羽书一纸星火急，檄催猛勇驱天狼。阿兄抱病经秋苦，阿妹从容请纓去。芙蓉旧部领蛮奴，彪虎兵符照劲旅。扫眉傅粉女儿营，沈沈刁斗春无声。羽旗影飏鸳鸯叠，绣幕香园翡翠轻。永夜谈兵翦青烛，龙娘妙计群酋服。白头老将空咨嗟，苍鹘游军尽慑伏。猺中妖女何娉婷，娇云焰焰雄风腥。七圣刀飞古雪白，天魔神舞枯魂青。将军血战战未已，娥眉报国誓以死。三千铜弩射无声，八队云旗势如驶。人龙马踏营空，捷书早报甘泉宫。若从诸将论勋伐，屈指龙娘第一功。翩翩孝廉旧入幕，曾见猺仙话亲故。绿字双笺赠客诗，朱丝一角回文赋。当时佳话人传扬，至今香冢烟水荒。歌成自酌梨花酒，蛮云不语天茫茫。

王甥植

王甥植，字伯颖，江阴人。季芝昌室。有《茗韵轩遗诗》。

水窗夜坐和外子

遥林微抹暝烟生，云与澄心一样平。便是共君消夏处，枣花邻院晚香清。

春愁

紫燕衔花入小楼，东风镇日逗帘钩。柳眉未展丝千缕，不系春光只系愁。

莲蓬人敬次母氏韵

通灵骨相半衰翁，休怅繁华似转蓬。香粉生涯归净界，绿房辛苦到秋风。前缘或者如来座，独立依然君子风。且共种花人徙倚，衔杯珍重郑家筒。

悟后

扫除烦恼即清凉，看淡荣华忆故乡。爱网解时疑网脱，尘缘悟后道缘长。篆纹成字天然势，茶味回甘自在香。欲唤梦中人早醒，拾薪先为煮黄粱。

潘焕嫔

潘焕嫔，字半霞，罗田人。知县焕龙女兄，诸生郭时润室。有《漱芳阁诗钞》。

寄绮青浣芳两妹

料侍高堂养，团圞乐不支。嫂贤殊胜姊，兄友可兼师。夜月花千树，春风酒一卮。怜予定相忆，曾否有新诗。

小已小雨

山光泼翠水拖蓝，此日人家话养蚕。柳絮桃花春九十，雨丝风片节重三。莺藏叶底黄都湿，兰采岩中绿正酣。天气酿寒微送冷，庇身犹觉薄绵堪。

小游仙

绿衣骑马色无伦，玉蕊开时艳照人。天上名花多异种，问渠何事爱红尘。

天厨肴饌自来精，凤脯麟肝玉碗盛。偏是几家甘淡泊，只茹芝草两三茎。

万树仙桃结实稠，园中金锁付予收。昨宵阿母殷勤属，莫遣东方得再偷。

吐饭成蜂惊《抱朴》，唾盘为獭说樊姑。漫将狡狴矜奇术，我亦能抛米作珠。

陈宝四

陈宝四，字箴史，承德人。文登王者政继室。有《蜀道停绣草》。

绵州早行

白露犹沾草，晨光渐上时。乱云低欲堕，小雨暗相随。野色连修竹，秋花卧短篱。四围山尽瘦，寒溜正淅淅。

凤岭

举步蹑朝霞，凌空越飞鸟。排天万仞高，极目青未了。中有巢凤处，一峰瘦更好。云岫互吐吞，几莫辨昏晓。飒然长风来，山深秋先老。

张常惠

张常惠，嘉兴人。举人廷济女，海宁查世璜室。

唐聚庆墓志砖

幼读周雅诗，聚子识希姓。今读唐志砖，聚君厥名庆。君籍本秦中，来禾世已更。卒葬依祖坟，也合首丘正。志文不支离，无取词锋横。书者不著人，朴质笔破硬。想见幽竈藏，沈霾九泉迸。文字显有时，会逢农耒柄。蜡泽与苔华，纯黝光交映。刚暮绣漪停，裁笺发短咏。无异碑生金，不敢砖磨镜。一笑艳妻笺，何事别毛、郑。

陈文瑛

陈文瑛，字素珍，会稽人。道光癸巳进士、同知光绪女，施燕辰室。

盆梅

移种向幽林，香凝碧缶深。赖君邀月影，使我涤尘襟。小贮雪霜节，远关天地心。一枝春已足，窗外觉寒禽。

全璞

全璞，号辉山，金谿人。宜春胡光莹继室。有《全恭人诗集》。

偶题

月夜静如何，光阴迅速过。病从秋后觉，泪向梦中多。惟忆音书绝，无心笑语和。

回看帘外影，风叶正婆娑。

金鸿佑

金鸿佑，字淑芸，秀水人。温州府教授衍宗女，同县诸生何长龄室。

梅花依家大人韵

南枝春可到，一白浩冰霜。有色标孤洁，无心斗淡妆。蹇驴谁踏冻，瘦鹤自眠香。  
欲下玉阶折，天风缟袂凉。

华氏

华氏，宝应人。刘宝图室。

萤

自信微明在，秋来委砌傍。在生同腐草，没后有馀光。

纸鸢

借得东方力，无端生羽翰。一丝通线索，谁不仰头看。

秋扇

篋里深藏得自完，人情冷暖一何叹。劝君切莫轻抛掷，留待春回另眼看。

香

解秽除烦豁性灵，玉炉风细绕彤庭。最怜宝鼎烟销后，身已成灰气尚馨。

刘汝藻

刘汝藻，武进人。大学士，谥文恪於义曾女孙，无锡杨陞葵室，丹徒训导绍基母。  
有《筠心阁诗集》。

思亲一首寄呈大姊

秋雨兼旬久，水溢芙蓉塘。芙蓉波淼淼，别绪与之长。昨梦游九峰，严亲劝加觞。  
慈帏欣促坐，笑语殊未央。醒来一叹息，落月满屋梁。忆昔别亲时，牵衣断人肠。  
提挈荷亲恩，镂骨深未忘。凉秋届九月，节序记白藏。空庭木叶脱，微风发清商。  
霜威搜北窗，露气侵西廊。亲年已垂耄，晓寒袭帷裳。远别心耿耿，含悲泪浪浪。  
伯兄登龙门，仲兄贡玉堂。膝下更无人，谁为感冰鲋。幸赖吾姊贤，差能奉壶浆。  
云间足珍味，鲜肥产江乡。泖湖风浪阔，鲈鱼巨口张。更兼华亭舍，莼菜绿含芳。  
甘脆粗足供，所愿亦已偿。我今隔梁溪，《陟

站》心所伤。愿亲赐尺书，河鲤遥相将。潮落薛涛殿湖，烟波浩茫茫。

### 采莲词偕伯嫂分韵同作

吴姬采莲漾银塘，打桨惊起双鸳鸯。鸳鸯飞散入远沚，千柄红莲绿云里。绿云覆渚菡萏秋，花开出水过人头。过人头，入花去，棹讴一曲不知处。折得莲花笑语归，香风一翦吹罗衣。

### 有感

身世茫茫万事非，歌残黄鹄泪频挥。休题旧恨添眉皱，莫放新愁减带围。荒院小猫迎客吠，空仓饥雀避人飞。韶光瞥眼春如梦，怕检箱中金缕衣。

### 庄盘珠

庄盘珠，字莲佩，阳湖人。举人吴弑室。有《紫薇轩集》。

### 咏晋史

铁销消兵后，羊车纵乐时。儿痴原果报，妇毒原果报，妇毒竟流离。荆棘铜驼泣，风沙石虎移。百年征战里，何地不疮痍。

### 锁瑞芝

锁瑞芝，字佩芳，钱塘人。举人吴兆麟室。有《红蔷吟馆诗草》。

### 湖上观晚霞

画图互天际，倒压长桥影。空舟掠波来，沙隄一千顷。微风吹澄湖，夕阳归远岭。逋仙在何许，红梅梦初醒。隔岸有芙蓉，娟娟媚清冷。狂吟小谢诗，不羡潇湘景。

### 荔支香新歌曲

海棠初醒华清睡，锦繖长生供游戏。《荔支香》里按新声，风流争说唐皇事。唐皇旧事说难详，别院离宫乐未央。閒却翠钗空贮盒，抛残红豆欲盈箱。金盘颗颗呈佳果，雪质冰肌看磊砢。玉儿娇韵两无双，剥鲜笑卷珠帘坐。梨园子弟试轻喉，一幅绡绡十斛愁。唱到生辰新制曲，六宫无语尽低头。人生悲与欢相续，左车动摇病已伏。芳树移来南国轻，凉风吹到西头促。《霓裳羽衣》舞且歌，封事飞传唤奈何。恨杀李、杨双相国，君王妃子别愁多。渔阳鞞鼓纷纭起，珠沈玉碎梨花死。黄泉碧落两茫茫，空传名字留仙史。吁嗟乎！侧生当日翠眉开，扰扰红尘吊马嵬。关内六军陪辇去，岭南一骑捧盘来。

### 花朝口占

晓日迟迟露未收，红绡翦彩祝添筹。二分春色催新句，一片花魂寄远愁。画扇烟凝

杨柳岸，琼箫声暖木兰舟。妆成小坐帘初卷，乳燕踟蹰傍玉楼。

题自怜待月湘帘下银烛烟多怕点镫诗意便面

天风飒飒起银河，但觉帘阴次第过。曾记梨花时节雨，西窗翦烛夜寒多。

明明花影画昏黄，翠减脂轻耐晚凉。罗袖斜欹团扇薄，碧栏杆外话南唐。

凌兴凤

凌兴凤，字清湘，衡阳人。谭积林室。有《清湘楼诗集》。

从夫耕田魏家町

郎种桑麻妾种花，种花未吐预收麻。麻功甫毕花应吐，每到花开不在家。

七夕

三更漏彻忽生愁，玉镜高悬十二楼。不向天边亲织女，敢从月下拜牵衣。

宗桂

宗桂，字秋丹，会稽人。知府圣垣女孙，知县霏女，稷辰女弟，游击史鹏室。有《秋爽亭诗钞》。

对月

一片白如水，清光万里流。漫怀今古事，极目海天秋。露湿月中树，笛吹云际楼。坐深浑不觉，心与共悠悠。

秋阴

秋阴寥廓景凄凄，衰草荒村望欲迷。黄菊閒开篱落外，白鸥静立板桥西。浣衣日暮碓犹急，防堠烟销垒渐低。最是离人萧瑟听，昏鸦头白不禁啼。

冬日偶成

畏冷每常高卧，爱閒懒学涂鸦。炉火守如丹灶，殷勤自煮芽茶。

妆罢焚香小阁，幽窗寂寂阴晴。不解夕阳何处，但闻日午鸡鸣。

宗梅

宗梅，字古雪，一字寿芎，晚号鹿竺。霏女，同县知府王庆龄室。有《六竹居诗草》。

### 零陵旱后喜雨呈家大人

日日倚山楼，望云作甘雨。今朝雨应时，商羊快飞舞。乔柯翠满帘，新苔绿侵户。砚床润斑晕，茶鼎含烟缕。斋居且欣赏，况在农与圃。因思月馀来，虔祈仗严父。民歌保赤诚，明神果心许。弱昧亦何知，解喜岂能语。敢效《喜雨》篇，欢颜庆庭庑。

### 悼女芝馨

芝城生弱息，命名託瑞草。二龄湘上归，尚未离怀抱。毁齿粗识书，古诫闻妇道。束髻渐工绣，夙慧悟天巧。颇喜性格温，足称善心窈。静者理宜永，素谓必寿考。岂料乔松根，反同朝菌夭。问名成幻缘，离尘怜苦恼。枉劳十八秋，辛勤为持保。珠沈掌谁抚，泪落心似捣。濒去恐母伤，度言业债少。无因或有因，此义岂能了。曷慰两重慈，膝前念幽渺。尤恐汝父知，天涯增悼悵。呼芝芝不应，形消影同杳。独坐一镫昏，霜乌起林杪。

### 春雨

卑湿重湖地，连朝雨未停。山涵千态绿，水涨一痕青。宿雾笼沙岸，浮烟幔远汀。小斋无个事，閒自试《茶经》。

### 新月

素娥新出貌，掩映照池塘。不识清辉影，心疑月有双。

### 宗庆

宗庆，字韵卿，会稽人。稷辰女，青田端木百禄继室。有《古欢室诗稿》。

### 南田移居

枿苍旧隐一年馀，为爱南田此卜居。野径锄云添小圃，山泉分溜入新渠。衡门僻静堪消夏，容谷幽深自结庐。数片桃花春后水，无端招得武陵渔。

移家宛在白云巅，写入吟图逸似仙。棐几横琴延月榭，春风归棹载花船。泉香最爱烹茶饮，地僻偏宜选石眠。绿满空庭经雨后，阶苔处处缀青钱。

松门杉磴翠阴斜，占住名山亦足夸。宿雾初开盘谷树，春风遥隔镜湖花。田园冷落渊明宅，池馆幽閒小谢家。独坐竹窗谁破寂，声声啼鸟自相哗。

### 劳淑静

劳淑静，字岫娱，善化人。云贵总督、谥文毅崇光女，长沙工部尚书徐树铭室。有《苕簞貽芬集》。



### 槐阴玩月

灵蟾濯魄金飙凉，玉炉爇罢笃耨香。瑶阶净拭疑铺霜，紫蕉爽挹槐花黄。绿槐古株年寿长，浓阴幂摇青苍。幽人歌咏声琅琅，银汉不隔天红墙。

### 张梦龙

张梦龙，字静斋，湘阴人。嘉庆辛未进士学尹女，衡山陈士源室，光绪癸未进士长治知县毓光、同知毓昌、己丑进士翰林院编修漳州知府嘉言母。有《柏心堂遗稿》。

### 烧诗

汨罗江上一女子，生来二十九年矣。文章牢落苦无成，滔滔岁月看流水。忆昔儿时喜读书，操治简策若蚕桑。先公经术寿日月，茫茫沧海失涯矣。自陈榛棋执中馈，墨守膏盲百不理。夫子论诗独遯迹，苍龙出没天河里。书窗讽咏有倡和，往往駉駉随騄骥。贞松百岁连枝叶，庶几文字共终始。岂知人事倏变迁，羸者未亡壮者死。黔娄先生终有谥，柳下大夫何须诔。孤儿顽稚须教诲，旧经重繙頼有泚。惟有诗稿不可读，使我徒增切怛耳。呼儿爇火摧烧之，长向九京伴才鬼。

### 口号

痛极疑非痛，悲深似不悲。无端肠断句，刻刻上心来。

### 发衡山县

默默辞里闾，漫漫即长路。长路渺何许，寂历秋江树。江行日逾迈，虚觉晨昏度。中坐愁暗生，欲遣不可去。吁嗟风木哀，侧塞牛衣故。失怙独何辜，不天谁与诉。暖彼重泉下，幽阴永朝暮。悄然孤怀深，遂矣沈忧痼。众雏环我啼，顾之泪如注。娇嗔不肯卧，欲怒未忍忤。栖鸦起寒光，假寐旋自寤。伤哉两大间，抚事若流寓。

蒲帆乘晓风，策策如飞禽。归宁既适愿，胡为愁苦侵。念我垂白母，悲女常伤心。九载不得见，忧思独难任。此行将远怀，慰此离别深。弱弟能承欢，天真抒素忱。闻姊近且归，高斋扫空蟬。焚香或默坐，竟日惟悁悁。浮生感馀息，灰败犹枯苓。定省阙晨夕，郁郁曾至今。安得缩地方，瞬息归故林。不闻榜人妇，鼓枻扬哀音。

### 夜过长沙

秋水茫茫秋月白，扁舟一叶过长沙。十年离别悲风火，两岸萧条剩荻葭。不信浮生如此幻，相看何处是吾家。寒鸦哀叫游魂哭，坐倚孤篷百感赊。

### 次韵谦之闻雁见忆

廓落不须忧，乾坤放胆游。浮生谁百岁，诗事独千秋。兄弟关山远，江湖战伐愁。忽惊来雁意，嘹唳暮云头。

题张孟缙夫人澹菊轩图

老圃秋心澹若此，聊持健笔洗霜华。当年唱和留高咏，今日风徽擅旧家。何必齐眉都白发，由来晚节属黄花。篱东自写幽人意，瑟瑟金飙夕照斜。

枯藤

荒园有枯藤，岁久根亦朽。土润斑斓杂荆棘，网丝断续伤尘垢。当时青葱蔽云日，虬怒龙蟠复何有。乃知荣达出夤缘，时过势孤难自守。岂无甘瓜佐盘饌，亦有蒲萄足补酒。所生所出皆见用，老废空令习粗丑。雪凌霜欺曾几时，中心已死谁能持。君不见亭亭骨立摩云树，万岁千秋犹得支。

言忠贞

言忠贞，字静芳，常熟人。昭文道光戊子举人、扬州府教授施震福继室。有《话雨楼诗草》。

元旦

红烛光中度岁除，云鬓略整不须梳。清晨献罢椒觞后，仍对梅花读古书。

外得海门校官赴任半月音杳感成宦游敢惜受风尘，此去天涯正小春。海上潮声惊客梦，闺中镫影瘦离人。程非千里音何杳，日似三秋语始真。莫怪相思曾化石，偶然分手已伤神。

○风阻

随宦寒冬海上游，停帆薄暮感离愁。潮原有信迎来客，风若多情阻去舟。四野鸟声喧似曙，半弯月影淡於秋。却输渔父安閒甚，静傍芦花下钓钩。

咏梅

偶见村梅放一枝，怜花寂寞笑花痴。孤山空嫁林和靖，冷月清霜只自知。

悲外偶作

梦中寻梦梦无痕，梦醒凄凉不可论。水复山重悲远道，乌啼月落盼归魂。未亡转觉身多累，独活难如草有根。坐对遗容成一叹，居然梁案共晨昏。

岁暮偶成

一身贫病又残年，百事艰难在眼前。无赖诗魔偏冷落，有情愁绪最缠绵。风云变态诚如梦，冰雪为肠不耐煎。试看梅花清彻骨，几曾开到好春天。

### 偶书

荒凉陋巷称贫居，忘却人间岁已除。酒不浇愁缘量浅，诗难脱俗愧才疏。閒梳白发千丝短，老寄红尘百计虚。叹息繁华容易谢，春风无力枉吹嘘。

### 寒夜不寐有感而作

帘外宵深露渐凝，手挥老泪欲成冰。五更寒逼三椽屋，四面风欺一点镫。梦后徒生寻梦想，人间久住恐人憎。凭栏细数从前事，落月疏钟感不胜。

### 除夕偶成

年除俗事本寻常，论到贫家分外忙。检点敝裘谋质库，安排清酌奠灵床。门无爆竹迎新岁，瓶有梅花送暗香。料得九原尤寂寞，纸钱能否买春光。

### 悼外

别具棱峥骨相清，读书原不慕公卿。一官贫到无长物，七秩年犹累至情。南浦帆归才几夕，西河泪尽痛今生。只知重作天涯计，遽尔寻儿地下行。

### 何桂珍

何桂珍，字梅因，善化人。上虞广西庆远同知俞维藩室，光绪癸巳举人、内阁侍读俞寿沧母。有《枸橼轩诗钞》。

余于归俞氏弃诗书十年矣丙子养疾东庄偶展行篋得仲弟桐云旧赠之作怆然有触聊赋一律

荆篱茅舍野人居，养疾东庄夜读书。静里光阴依药石，梦中夫婿佩龟鱼。悠悠往事嗟同气，耿耿深怀问太虚。行篋凋零诗句在，颍滨消息近何如。

### 望桂林山水喜而有作

桂林山水冠诸州，天遣诗人豁远眸。云气西侵昭岭色，河声东泻广江秋。孤城落日闻猿啸，野水连天放棹游。近日小斋无一事，晚来强半为诗留。

### 漓江晚泛

放棹漓江上，悠然水一湾。软风轻拂浪，落日半含山。兰桨双痕活，菱歌一艇还。无言观逝水，沙上白鸥閒。

### 独秀峰

巨灵舒半臂，天外石飞来。屹立峰千仞，凌虚翠一堆。水流岩寂历，岭峻鸟徘徊。粤右多奇境，如斯亦壮哉。

### 秋感

行遍天涯力未胜，时平顾虑亦殊能。寥天海立叉圆蟹，大漠霜清击俊鹰。野草萋萋秋色满，古城暖暖戍烟升。木棉花发王佗墓，一代雄风尔足称。

### 桂林诸山

边山锐上名融丘，尝从经师受《尔雅》。箭簇突兀雁翎刷，刀锷峥嵘鹬膏泻。仙人身披古色裘，捧持天仗骑骝马。狂风吹落蛮云中，散为桂林画分野。大舰如拖五丈檣，广屋如侧千鳞瓦。作诗犹隘昔人吟，入画竟无妙手写。晴红雨翠万态供，酒樽游榼千场惹。使人倦眼等閒开，如彼禅栖不妨假。省门病起意何如，遥对琼峰挥玉斝。小山招饮有吾侪，请看闺中同志者。

### 永福邑斋对月

月色花光绕讼庭，遐方无事户常扃。关山南卫森孤戍，河汉西流带大星。斯世弈棋千局变，一生醉梦几人醒。长安路共行车远，唧唧秋蛩未忍听。

### 大滩谒伏波庙

将军浩气镇乾坤，庙貌威严桂海存。往事何堪论薏苡，新恩应许报鸡豚。丛林锁翠双峰插，雪浪排空万马奔。我亦徘徊情不尽，夕阳渡口又黄昏。

### 醉歌行

火云腾空作紫绛，玉女素趺骑采虹。羿弓连月嫦娥降，霞浆浮角戈清腑脏。与我三夕斂衽让，欲饮不饮却羞量。飞琼吹箫双成唱，雪靥银齿恣谑浪。天风忽吹气晃荡，织女招手天河上。石室机张三万丈，自言此工殊可怆。我欲从之窥帝仗，三辰七宿形模壮。王母嗔顾谁所谤，翻然一觉堕烟瘴。梧月在窗梅插帐，炉烟已烬俄蓬放。山城漏点槽牙向，行人夜趁广江涨。

### 感事

夜晏宣传尧母门，明珠世界不黄昏。月擎琼树虚留影，草傍龙池尽沐恩。啾々鸾吹摇玉佩，飘飘凤仗捧金根。侍中不觉宵寒重，新赐宫袍天语温。天涯何处是边州，多少羊头关内侯。旧业未穿鸛鸽砚，新恩遍著鹓鹓裘。男钱散尽庞萌去，女乐颁来魏降留。休说当年丰镐地，长空衰草陈云浮。尺天寸地戴尧年，万宝输将来日边。刘晏持筹宽甲帖，徐温抗疏免丁钱。一篱松菊壶中隐，千亩桑麻梦亦仙。自是太平新气象，厚生知有圣恩骈。繁华镜里托生灵，岌岌长安世路冥。千市簪裾沈璧月，万家楼阁落旗星。似闻置俎龙归董，错认乘轩鹤姓丁。圣代即今犹富庶，《豳风》秉愿续《葩经》。

### 陶然亭

臂卷西山翠，楼台水气中。苇花千涧雨，槐约半林风。帘影窥金鸟，箫声引玉骢。  
置身图画里，又见夕阳红。

### 左锡璇

左锡璇，字芙江，阳湖人。宛平道光丁未进士、延建邵道、谥文节袁绩懋继室。有《碧梧红蕉馆诗》。

### 忆大姊婉洵

凉秋八月白露寒，月明夜夜照阑干。阑干十二房枕静，茜窗烛炮红绡冷。宝帐香沈  
暮复朝，天涯归梦亦寥寥。梦回冰簟罗巾湿，怅望江南长太息。菱花菱叶不胜愁，秋水无情  
满江碧。

### 微雪野望

远岫空濛隐翠微，松杉深处鹤忘机。乱云隔渚霏霏合，断霰惊风故故飞。孤屿梅花  
香欲结，空山流水梦应稀。自怜十载留都邑，回首家园怅已非。

### 润州行

官城如纸贼城铁，围城十旬城不得。六军喧作夜潮声，万帐蒸成死灰色。火云突兀  
空中来，猿鹤掷跳沙虫哀。血光火光四围迸，月色染出红玫瑰。轻舩大舸同一炬，江水澜翻  
沸成釜。游尸蔽江江不流，留与蛟龙饱人脯。浙军弃甲先奔遁，潮州健卒咸惊呼。颇类平原  
纵野烧，薰狸灼獾焚麋{鹿吾}。阿奴火攻本下策，主阃无谋甘败绩。东南半壁生夕阴，子弟  
八千同一泣。

### 雨夜怀婉洵婉静两姊

狂风飏飏吼如虎，老树纵横倏飞舞。博山香重散氤氲，轻烟漠漠满庭户。急点跳珠  
洒画窗，芭蕉渍绿溅笔床。笔床翡翠多零落，疑是幽兰发古香。采之欲赠湘皋远，焦心一寸  
愁难展。雨雨风风可奈何，菱华照罢愁蛾敛。去乡日以遥，离思日以缓。别泪染征衫，痕深  
不能浣。江南杨柳绿千条，绾得春愁向空卷。屏山寂寂沈烟篆，庭院深深秋梦断。试听檐前  
淅沥声，怕教芳景成秋苑。风卷新凉入绮寮，镫花颤影吐红绡。年来谙尽怀人味，惟有吟诗  
慰寂寥。

### 孟缙寄母赴楚半载作此奉怀

鱼信经时阔，关河感不禁。乱蛩醒别梦，晓角警离心。树迴天围堞，霜高月满林。  
衡阳何处是，南望楚云深。

### 八叔自津门至京见示感怀诗作此奉呈即步原韵

冷官风味本清贫，泉石琴书寄此身。深竹凌寒留夜月，古梅破腊待诗人。宦情似水频年淡，好句如花一卷新。杂坐团圞无俗韵，村醪细酌比芳醇。

#### 十叔书问近况以此答之

落叶掩萧关，幽禽自往还。窗分遥岫绿，人共白云閒。秋老诗怀减，囊空酒兴慳。祇馀双管在，长写米家山。

#### 秋兴

万木萧然绕蓟城，长天萧瑟暮云轻。凉蝉噪雨晚犹急，冷露霑荷晴更清。卷地金风收暑气，绕阶梧叶作秋声。凭阑无限离人思，极目苍茫百感生。

京洛年年起客愁，韶光荏苒已如流。寒生修竹衣裳冷，风入疏棂枕簟幽。鲁酒倾尊难洗恨，齐纨藏篋倍惊秋。夜来拂拭龙泉剑，剩有寒光谢斗牛。

#### 南归留别姊弟

列飙逗高梧，浮云夜暗徂。念此涉远道，风波良可虞。持尊不能饮，揽辔出清都。相顾各无语，握手重踟蹰。徘徊歧路侧，横涕霑罗襦。别晷一何促，愁思郁难舒。悲风振林木，零雨散秋芜。昨夜霜华重，红叶满征途。从兹一分手，何日复牵裾。努力各自勉，善保千金躯。

#### 晓发

曙色晓迷漫，惊魂压绣鞍。梦摇钗影小，枕贴粉香残。黄叶秋林瘦，西风翠袂单。离亲日以远，别泪几时乾。

#### 安陵野望漫成

古台摇落树苍凉，水碓无云独雁翔。乱草西风埋断冢，荒芜秋色冷斜阳。云随樵子归何处，山共诗人瘦不妨。欲识凄凄离别意，江流宛转似回肠。

#### 酬外子凤阳道中寄书

榆高垂恶阴，竹劲秉坚质。生物各有涯，盈虚莫可必。省书感君意，临饭不能食。道远苦风多，胡为独行役。网罗满天地，群动何时息。悲来如循环，音尘渺相隔。焉得从长风，慰君肠似结。

#### 晚眺

香气袭窗纱，藤床日影斜。谁家新燕子，衔出隔墙花。

### 夜行

溪暗闻流泉，月黑不知路。时闻出涧中，幽禽学人语。

### 春日偶兴

晴曦红到曲廊西，画里天然景不齐。夜雨小桃翻锦浪，春风百草绣香泥。窗虚尽纳修篁影，林静时闻好鸟啼。酒病诗魔消未得，芳情半在绿杨隄。

### 小云妹见示寄怀诗即步原韵

静夜悄难寐，吟行月渐阴。疏星下残柳，飞露湿空砧。酒酿相思泪，铎摇怨别心。冰弦不复理，恐作断肠音。

芳草碧千里，浮云路几重。寒生残雪夜，月落暮天钟。香篆随风散，家书泼墨浓。相思两相忆，别梦绕回峰。

### 左锡嘉

左锡嘉，字婉芬，一字小云，晚号冰如，阳湖人。华阳道光甲辰进士、吉安知府赠太仆寺卿曾咏继室。有《浣香小草》、《吟云集》、《卷菴吟》、《冷吟集》。

### 艳歌

袖舞云千片，铎摇酒一卮。花应怜独影，梦亦解相思。屈戌深藏处，阑干小立时。幽情无可诉，瘦骨有衾知。

院静夜逾静，月圆人未圆。红兰娇挹露，碧筱淡淡烟。妆罢收明镜，词成调素弦。玉阶长寂寂，苔色自娟娟。

### 秋夜曲

井梧飒飒堕寒翠，海棠蘸露红香醉。铃杓无声河汉低，斜月一簷双鹤睡。小窗烛短愁夜长，锦衾瑶瑟生微凉。欲眠不眠坐申旦，十二云屏思断肠。

### 长昼

风扣竹飞晴翠，藕塘波蘸红香醉。曲廊斜度竹桥西，紫藤花下狸奴睡。一枰棋局消长昼，閒倚琴床数莲漏。焚香坐久晚窗深，月子玲珑花影瘦。

### 水窗即景

拥被独沈吟，红烛结香篆。更鼓隔岸挝，斗柄西北转。停桡倚石根，波平白沙软。

群山枕流卧，野寺孤云伴。水深鸥梦寒，风急雁行断。反侧不成眠，遥夜意缱绻。欸乃闻邻舟，清霜布帆卷。

### 秋夜

露重湿烟凝，西风户独扃。乱蛩鸣振鸣，饥鼠出窥灯。梦冷愁如织，骨瘡寒有棱。破窗还夜色，缺月挂孤藤。

### 春望

杨柳风多作意吹，古藤野葛绿垂垂。一竿春水溪童钓，半突寒烟病妇炊。竹抱虚心留劲节，花含幽思敛啼眉。衫轻骨瘦凭危石，自写牢愁勒断碑。

### 访赵悟莲晚归

数里出城郭，悠然远市嚣。寺閒风卷磬，泉激月生潮。密竹隐茅舍，疏花带野桥。曲隄郁芳若，归路不知遥。

襟怀恒落落，身世等劳劳。惜与故人别，归来山月高。清溪鸣水碓，虚壑响松涛。灯影透墙隙，书声散郁陶。

### 枯树叹

黄沙茫茫若华匿，枯树无皮当道立。拏云捉月奋爪牙，四起悲风鬼神泣。饱经霜雪不记年，夕阳古堠同巍然。浓阴密叶曾荫暍，意以屈曲全其天。君不见，丁戊之间旱为虐，两年不雨日熏灼。析骸易子嗟此邦，岂惜树身遭剥落。我行抚树兴长嗟，蜕馀苍骨寒杈丫。为问河东千里道，凶年饥馑馀几家。颓垣败壁隐蓬户，呜呜仿佛闻人语。佝偻老翁兀向前，欲诉未申泪如雨。自言身本故家子，颇有田园傍汾水。火云炽野草木枯，邻里亲丁皆饿死。昔年豪兴游江湖，归葬骨肉还故都。所亲无存家为墟，孑然一身何所图。愁容惨淡兼衰病，枯树剥肤感同命。少时裘葛老无衣，羞向人前道名姓。哀弦未终天欲暮，行色忽忽戒前路。长揖老翁申慰辞，人力难回信有数。前村野店悬孤灯，当为老翁枯树留长句。

### 过龙泉关

壁灯荧荧天未曙，仆夫促驾出村树。乱峰攒攒青接天，悬流千寻飞瀑布。石梯险滑级不分，健马力争下蹄处。长歌行路关山难，蚁缘九曲云崖间。星精摇摇仰可攀，积雪耀日秋风寒。马蹄碎兮人力竭，一关横界长天碧。我思开山烦五丁，凿穿石穴通青冥。又欲移山效愚公，眼前障碍一扫空。吁嗟乎！所欲安可得，不若卸肩且休息。

### 喜晴

庭坳深积水，寮绮耀晨曦。花弹纚红影，云空露翠微。懒鸠朝拂羽，倦蝶晚烘衣。天意怜禾稼，阳光满甸圻。



久雨苦湿涝，朱阳豁众心。菰蒲分水界，苔藓上墙阴。蟪蛄补残网，蝓蟥发朗吟。开轩当远岫，幽思惬鸣琴。

#### 寒夜得萧月楼与乌拉紫桐云两夫人书感赋小诗藉以作答

北风撼窗纸，寒向味寒寂。离绪纷如芒，兀坐但守默。青鸟不辞远，翩跹落云翮。故人情意长，迢递寄胸臆。申函蜡炬红，墨花浮黛色。上言久别离，下言长相忆。知交感参商，良晤安可得。念子夫婿贵，古幹皎松柏。念子太瘦生，辛劳职内则。两贤不我遗，同心悦芳泽。因知悻悻怀，名族等閼闑。岂不云路翔，官高各异域。人生怀至性，离悃料难释。愿子时加餐，珍重卫朝夕。和霭生春风，景福自天锡。嗟我就薄养，对案每忘食。朔方多风沙，传舍复逼侧。平生有姊弟，宦辙异南北。儿女虽成行，出门云水隔。天涯念骨肉，音书常梗涩。绵渺难忘情，望远心常惕。况复秋霜零，芙蓉萎芳节。触目怀感伤，忍泪不成滴。将老遭兹病，日促鬓丝白。何以报知己，仪一心如结。夜深砚冰凝，过雁送风急。纸短难具陈，月落晓天碧。

#### 范淑

范淑，字性宜，德化人。咸丰壬子举人元亨妹。有《忆秋轩诗》。

#### 秋晓

残叶忽然尽，西风夜入关。云无来去意，秋在渺冥间。雨后村烟湿，林疏鸟语閒。凭高如有悟，久立尚迟还。

#### 林下

竟日碧云下，默坐已无暑。凉风自何来，绿竹动清渚。好鸟歇幽林，梳翎复自语。不知下有人，此心静如许。

#### 夏日西斋看雨

突作奇声不可测，长风欲使孤松折。林叶不待西风飞，顿觉南风有秋色。怒雨忽山外来，跳波击瓦心怀开。雷驱电助不可息，风声盘走如相催。暑馀晴雨失调剂，黄尘得雨吹腥气。竹中新构读书堂，一缕炎风摇不至。书窗掩卷静无声，电卷雷收雨渐停。推窗一望净如洗，天光凝碧青山青。茅檐低接锄花圃，山园风味清如许。数声啼鸟出新晴，半树斜阳滴残雨。

#### 望夜见月

亙古留清气，虚空一鉴磨。晚花凉照影，秋水静无波。不识圆时好，谁怜缺处多。閒云如解得，莫向月前过。

#### 秋日

吹风吹雨到秋庭，回合秋声入杳冥。去日艰辛如梦梦，近来心绪亦惺惺。松思护鹤枝常绿，蕉惯听秋叶尚青。此境十年亲领略，不须感叹说凋零。

#### 绝句

我慕水中莲，慕其心独苦。清泉知汝深，相照各无语。

#### 落梅

率意来空圃，无心见落梅。依依自相惜，恋恋欲空回。花落枝仍古，篱荒气不衰。眼看桃欲放，为汝一徘徊。

#### 问园杂诗

高花短树绿萝墙，十载閒居插种忙。偶爱数竿青竹好，三年迸筍渐成行。

绿阴铺径茁新芽，堕地春桃雨后加。记得仲春敷茗碗，风来树树落桃花。

#### 问园閒坐

忘此是何地，坐成幽绝境。苔纹上石壁，泉响落古井。深树绿如屏，朱白渐疏整。斜阳日日来，画我园林影。

#### 凉夜

凉夜立前楹，茅檐好风露。眉月有沈忧，微光隔幽树。

#### 古意

霜天好明月，感人独凄绝。莫怨朔风寒，总是汝衣单。

#### 怀直侯兄

凄风自何来，百感在胸臆。人生有生死，骨肉倏离析。既已感零落，胡能忘畴昔。韶龄共嬉戏，天真自为得。未来了不思，既往若未历。扑蝶入蒿莱，听蟀觅幽僻。聚金拾瓦砾，设食陈梨栗。背诵互相夸，迷藏善为匿。东园有佳树，相爱若相识。赠名引为友，每见必以揖。至今犹忆之，怀思动凄恻。儿时最爱物，嘱余藏其秘。一朝竟失之，君固未我斥。转为相慰语，爱割亦吾益。我心殊悄悄，追悔每不释。当时倚膝下，友爱实靡及。历历此寸心，依依如昨日。稍长人事乖，嗟痛慈亲失。吾家复多难，重以饥驱迫。君迹太飘零，君心倍苦挚。别君百里遥，怀君若咫尺。君书昨日至，君言满金石。赠我芝兰枝，贻我古松柏。芝兰固自好，何以避霜雪。惟兹松柏枝，隆冬好颜色。

#### 忆和城旧舍

一棹辞归又十霜，梦魂犹忆读书堂。推窗遥指一江水，卷幔微闻千树香。既往韶光何太促，未来人事觉犹长。几回重说儿时事，误道他乡是故乡。

### 秋晚

落叶声中下夕阳，草根摇动野风凉。黄昏月上不觉晚，薄暮花开何处香。一片烟痕山入梦，数声虫语夜生霜。徘徊渐识秋深意，又见归飞客燕忙。

### 春晓雨后

片雨过东园，新泥湿未半。苔痕青可怜，鸟语多不乱。风静柳枝閒，云横山色断。饥鸟衔实归，哺子松林畔。

### 借斋

小斋无物足游观，石砚瓷壶一两端。听雨恰宜千个竹，钞诗合带一分寒。静中生意窗前草，悟后心香案上兰。好是匡山排闥入，朝朝把作画图看。

### 春晴

云漾晴光水漾波，閒中得句景中哦。读书岁月何常永，啼鸟园林渐觉和。人有奇贫尘事少，诗无险体性情多。盘桓半亩成幽赏，每送黄昏日影过。

### 怀直侯

思君不得见，见此夕阳寒。生小多奇志，成人有泪弹。多情因自爱，万苦博心安。悟透沧桑事，人间一别难。

月夜青山有白云，青天有明月。月明天更青，云行山欲活。主人好园林，良夜爱清绝。临风作遥望，如怀远离别。

○忆秋轩葺成和直侯韵芦帘纸阁亦何嫌，几费商量夕照天。放入花香无隙地，许留明月与千年。炉烟入妙通禅悟，幽鸟来依亦有缘。参透浮生无限事，别离天又小团圆。

病中杂诗大风遥起不胜悲，久病先灰各样思。只有夙根愁不断，五更清梦醒来时。久不窥园蔬菜瘦，又探篱下已残枝。近来事事都思了，想到亲恩泪欲垂。

○作家书寄直侯旋自焚之鲁书将发又旋焚，便觉微生细似尘。气短自知心力瘁，尚持孤愤寄何人。

### 徐咸安

徐咸安，桐乡人。乌程张钧衡室。有《韞玉楼遗稿》。

春日出游春风到处绿成阴，浅草平芜缓步寻。野外有花皆缀玉，隄边无树不摇金。塞鸿数点寥天没，梁燕双飞曲巷深。放眼韶光无限好，舞雩归去一长吟。

○月夜放歌中天明月正团团，秋闺寂寞凭阑干。四壁唧唧虫鸣寒，隔墙风弄青琅玕。疏林老鸦栖未安，一声惊起空中盘。萤火点点如流丸，宵深露重高飞难。何人抱琴一再弹，如怨如诉声悲酸。停弦不语涕汎澜，馀韵袅袅遏云端。秋来自怜腰带宽，闻此益觉摧肺肝。银河欲落漏已阑，闭户起剔银缸残。倚枕假寐愁漫漫，辗转反侧空长叹。

### 云栖寺

云栖最高处，快意一登临。鸟度碧山远，僧行黄叶深。修篁团翠色，流水滴清音。萧寺偶留憩，佛镫明我心。

### 適园梅花盛开

隔墙消息逗，遥指一枝新。索笑来檐际，寻芳过水滨。香霏千树雪，花发满园春。莫问古梅渡，荒凉愁煞人。

### 庭前旧植鸡冠海棠凤仙数本秋日花开欣然赋此

西风庭院一巡行，绀碧丹黄刺眼明。映日争看朱帟耀，乞阴会待绿章成。化工好事饶秋景，丛艳撩人步晚晴。更有凤仙好颜色，秦楼飞去不胜情。

### 郊外閒眺

信步不知远，西风郊外行。有秋千户足，无事一身轻。沙鸟对人立，溪花沿路生。物华玩无尽，归路夕阳明。

### 落叶

西风落叶满庭堆，扫取烹茶日几回。万物祇须人利用，竹头木屑亦奇材。

### 晓登五云山

览胜登五云，临发天未晓。不辨径高低，祇觉行人少。輿行二三里，月尚挂林杪。野外唱晨鸡，树边喧宿鸟。我怯溪桥危，仆讶山路小。盘旋上高峰，曲折如鸟道。旭日忽东升，三江烟雾绕。早潮一线来，龛赭犹缥缈。

### 適园避暑作

不耐炎炎暑，还依漠漠阴。凉飈荷渚近，清响竹林深。虬笛参差奏，鱼鳞隐约沈。静观原自得，坐久豁幽襟。

### 西湖即事

钱塘门外水清浅，轻舟荡漾随波卷。游湖才了又游山，独向巉岩踏苍藓。

有约邓尉探海梅遇雨不果

吾闻虎山之崦峰回互，仙境昔有仙尉住。面临太湖三万顷，七十二峰似争渡。居人家种梅花，覆压山村不知数。风飘十里五里香，雪满千枝万枝树。大庾亦无此奇观，足所未历心倾慕。倾慕于今几十年，年年花时等閒度。今年棹出阖庐城，渴望庶几慰平素。闺侣殷殷折柬招，蜻蜓艇子克期赴。香海由来传盛名，锦囊满拟贮佳句。不道春来日日晴，临行却被天公妒。侵晓无端急雨零，弥天但见阴云布。扁舟欲行不得行，寂寞空堂绕廊步。愁绝小窗欹枕眠，梦魂还绕锦峰路。

水阁纳凉偕外子作

杨柳依依里，楼台月正中。池光明槛外，萤火度墙东。竹粉涵清露，荷香沁晚风。此间堪却暑，幽致与君同。

初夏即景

漫言春色好，春色不如今。红落几番雨，绿添无数阴。荷圆初贴水，竹稚未成林。触景便成趣，凭栏时一吟。

张印

张印，字月潭，潼关人。山东巡抚澧中女，闽县陕西布政使林寿图继室。有《茧窝遗诗》。

学诗

洗心栖沕穆，渊渊鸣天籁。缅怀汉班姬，何事日怨艾。扇固有时捐，月亦有时晦。乃思恩爱重，不共秋风退。我诗取怡情，凡百人不逮。寒燠听造化，盈亏置度外。不淫不伤旨，默与《关雎》会。

写兰

望望楚天云，月坠秋江冷。帝子魂不来，为写一枝影。

读班大家传有感

忆昔侍笔砚，群籍纷披搜。我母时禁止，夺书或父尤。父时告我母，曾闻大家不。表志迈迁史，笔削追《春秋》。六宫席前拜，融续门下收。子成荷母荫，亦封关内侯。而我闻之喜，逸气同云遒。迄今读其书，颜色惨以愀。史必三长具，宁独词藻优。捷仔固家学，左谢安能俦。我才远不逮，古人良可求。勗哉闺门内，掩卷神与游。

夫子植梅棠於寄园诗以纪之翌日复以二株置庭前索余作因次元韵

春禽啄破青苔封，吟人未到先游蜂。晓日时正三竿红，此花允合精庐供。荷锄先薙  
营与蓬，位置无使遮西峰。是何娉婷姿态工，效颦宁比施家东。重萼叠跗不概见，星冠霞佩  
神女同。一留伴我一归翁，翁能无愧身龙鍾。云收雨卷香何许，睡起月下还相逢。桃李夭郁  
一扫空，杨妃姊妹肌多丰。垂丝持较铁幹罕，铃索将护吾宁慵。

重游陶然亭

弹指流光过，重来岂等閒。澄怀酬短景，揽泪惜残山。柳影当门碎，苔花上砌斑。  
旧题无一在，秋意满禅关。

今朝呈外

今朝天放霁，徙倚向空园。碧藓生缘壁，新篁长过门。石奇饶画意，茶苦入诗痕。  
及取公馀意，归来共一尊。

春晓

春醒无一宿，破晓意翛然。苦乏清新句，来全淡宕天。细花如媚我，时鸟与催年。  
美景行消歇，欢愉及眼前。

夫子九日游黑窑厂归以诗见示作此广之

天宇湛空明，人意益愴怳。矧此菊花时，秋阴失俯仰。人生无百年，及时当自放。  
我家梁伯鸾，欣然杖策往。缓步登高冈，四顾胸怀敞。左拂碣石云，右瞻滹沱漾。瞬息明月  
来，暮色四山苍。星光逗遥岑，野火越林莽。郁郁草木香，浩浩风烟爽。既醉柴桑酒，欲卧  
葛陂杖。归来夸所见，历历如视掌。忆昔客东海，侍亲泰岳上。夜共白云眠，晨观初日昶。  
海涛破诗声，天风振羽旆。洵哉为大观，视此直粪壤。忽忽逾十年，抚今空念曩。何日谢簪  
组，我为办屐两。携手共入山，五岳恣探裳。胡为久居此，穷年困尘鞅。蛩音时自容，蛛丝  
婴彼网。相对默无言，大有出尘想。

种菜

我性喜种植，况此多荒陂。春风吹浩荡，人意良迟迟。赤脚灶下婢，饭后辄酣嬉。  
亦欲课之读，目不识书诗。顾使把犁锄，欣然愿我随。荆榛既日辟，礧砢亦日夷。於此压豆  
箕，於彼播露葵。秋菘与春韭，燥湿相所宜。纵横有经纬，我心堪自师。中馈及暇日，到此  
神旷怡。会当微雨过，生理渐以滋。破土玉芽茁，临风翠叶披。哑然时失笑，暴富同贫儿。

燕台

客次驱车此地过，孤城形势郁嵯峨。高秋树老栖鸛鹄，落日坟荒卧骆驼。访事已无  
知郭隗，伤心莫更说荆轲。十年燕草悬吾目，怕触萧风未敢歌。

### 途中远望

料峭西风向晚天，黄茅乱石莽无边。骆驼卧地如拳大，鹰隼盘空作盖圆。钟后僧归松径雪，饭前渔泊柳隄烟。板舆忽忽青门进，可许归时此买田。

### 谢秦中亲族

秦中我故里，堕地未一归。客岁奉命，出藩来西陲。地方正苦战，蕃汉交相持。疮痍苦不起，宁复顾家为。今岁寄我书，属我板舆随。乡音喜入耳，秦关望崔嵬。忆昔父谓我，吾土帝王畿。泰华称天险，泾渭襟带之。风俗本淳朴，犹有周公遗。我今远嫁女，能来事真稀。载念母与兄，今乃在京师。岂无外家亲，风雨系所思。跼伏已旬日，未敢使闻知。昨有远兄弟，叩门立我墀。我姑素鍾爱，从不妇轻嗤。我夫久益敬，如宾无讐仪。我亦何所虑，我亦何所疑。所虑有官守，所疑人讪讥。回首顾闾者，人来善为解。咫尺天涯隔，此身有所羁。市上宁真虎，杯中宁真虺。持躬稍不慎，噬脐悔何追。愿保千金躯，勿为霜露欺。不死会相见，瓜代以为期。

### 送表弟下第南归

南风吹面夏云凉，绿阴满地槐花黄。鸣蝉声里人怀乡，宝剑且愿腰间藏。平田麦熟烟漠漠，前有斑鸠后黄雀。驱车直下黄金台，转瞬明春献赋来。百年人事率如此，暂蹶霜蹄未为耻。白发萧萧正倚闾，归省晨昏胜甘旨。云胡不乐心如毁。

### 元夜有感

寂寂衙斋向晚阴，金台回首几沈吟。月鐙梦入当年事，暉草诗留此夜心。漫浪生涯过岁酒，飘零骨肉念家林。旁人莫便夸佳节，吾思春前已许深。

### 寄阳湖张婉紉女史

《汉书》阙八表，大家为续编。《周官》称绝学，宣文独专研。古来多闺秀，名氏世所贤。我朝论文派，阳湖谁开山。惜哉皋文子，刻苦不永年。有弟令馆陶，宛邻集曾镌。君为其淑女，卓尔家学传。去年寄我诗，选理精且坚。展卷再三读，清风生我前。隐写《柏舟》志，托兴穷风烟。宁直汉、魏继，悄然《三百篇》。奈何生不辰，晚遇益迍邐。自惭才力薄，与为翰墨缘。覩颜致短语，梦坠吴江边。

### 赠荃女

昔贤故有言，四海皆弟兄。矧我与尔母，俨如娥与英。尔更育於我，宁无骨肉情。今尔年既长，加笄礼告成。相从逾十载，念此摧人肠。忆我初嫁时，尔年尚孩婴。发燥两肩披，身高才几平。祖母仅有尔，视同掌珠擎。乡音异南北，语意苦不明。我身方京尔，尔乃避道行。我手方招尔，尔乃秋波横。我心时寒栗，恨难达我诚。幸尔日长大，视我如故常。晨知就我栉，夜知就我床，饥知就我食，寒知就我裳。有时我入厨，未解作南烹。尔乃私谓我，斫鱼当为羹。亦或逢节庆，未办效闽妆。尔复私谓我，红绳缠髻梁。中间生尔妹，未克尔扶将。祖母唤尔去，依依仍我傍。妹啼尔抱持，妹饥尔料量。须臾不舍我，谁谓非我生。

祖母与我家，同出南轩张。虽则闽与秦，谱牒渺难详。祖母恒顾我，无视我姑女章。我生未有女，不如呼我娘。祖母诚爱我，亦由尔回翔。有时我外家，迎迓我归宁。携尔与尔妹，偕行登我堂。我母恒谓我，此女何娉婷。我兄亦爱尔，每来辄叮咛。谓当善抚此，此真为我甥。尔貌实静好，尔性实端贞。舅时课尔字，笔画晰以清。亦或教尔读，上口声琅琅。尔父曩客陕，尽室胥留京。我时方小极，茶炉伴药囊。尔能解我意，凡事为摒挡。去岁父书来，属我即首程。祖母既老迈，我复体羸尪。沿途端赖尔，使我忘长征。尔父尝谓我，择婿当择良。苟中乘龙选，何必拘故乡。我本远嫁女，感此增徬徨。忍以己不欲，乃使儿身当。昨父告我婿，安定安吴杭。祖为大中丞，父亦京曹郎。婿年方及冠，头角颇峥嵘。近在国子监，读书行成名。我愿业已足，何事复泪滂。昨闻有书来，纳采今秋凉。百年难共守，去去时吞声。虽然我闻之，舅姑今在堂。随时进甘旨，亲手调羹汤。蘋蘩乃妇职，春秋妥烝尝。下有二伯姊，贞明称里坊。亦有弱弟一，风雨恒对床。宜念秭归义，勿使荆树戕。伉俪必以敬，乃觉恩爱长。有无俱黽勉，学业毋嬉荒。即或忤我意，举案当益庄。间有小不适，亦当身退藏。人道贵谦抑，天道忌盛盈。毋自恃门第，毋自亏簪纓。勉矣曹大家，女诚实隄防。早晚为人妇，从此去家庭。毋为娇憨态，亦毋心悲伤。祖母今老矣，尔母身早亡。惟我与尔父，年亦非壮强。尤悔尔知免，诰诫我当详。晶晶秋菊芳，馥馥丹桂香。朴质为此语，且置尔巾箱。一字算一泪，点点生珠光。

### 望官道

墙外即官道，秋高偶纵视。荒荒草半焦，兀兀寒烟起。前头谁家坟，白杨挂钱纸。我亦有先垅，我亦为人子。潼关咫尺地，春秋不一祀。望望落日斜，霜叶连山紫。

### 除夕感怀

廿年作客黄金台，有婿乘龙今归来。忽念远嫁向东越，萧然忍对残冬雪。此时我何忆，所忆母与兄。相望不相见，两地难为情。况母今年七十高，兄谋甘旨官京曹。潼关有家归不得，饥驱两鬓霜华飘。忆甘奉姑宣南住，不归旬日一把晤。往来数数将车迎，家常共话欢平生。不苦冻泥溅裙袴，但觉春风生户庭。一日夫婿下枢直，手携鹿尾称上赐。急索篋中旧貂裘，命质香醪谋一醉。留兄共饮午窗前，此中风味殊新鲜。半酣呼人迎我母，省识此乐真稀有。可怜年事多未完，犹道今朝二十九。我职中馈时入厨，洗手亦复同围炉。薄暮母去坐无语，始悟宵来已岁除。故乡胜似他乡远，我今来秦反愁惘。亦有梅花插胆瓶，依然狂雪大如掌。当时两家俨如一，今日一身难化两。儿女守岁不思眠，事事上心犹昔曩。白云飞处是京华，料母回头同此想。吁嗟！好花不久妍，好月不常圆。身为既嫁女，骨肉安得长为欢。母今不归我行去，天南地北相逢难，令人念此郁郁摧心肝。

### 从军行

昔闻从军苦，今见从军乐。从军岂真乐，毋乃为残虐。我有灶下媪，全家住近洛。饭罢袖手閒，为我谈厓略。昨有潼关兵，新调来襄鄂。入市逢酒肆，牛羊恣大嚼。撒手出门去，佣保还诺诺。乘醉过青楼，应声奏箫箏。幸蒙垂爱怜，临行簪珥攫。一夕报贼来，远近惊风鹤。彼闻翻大喜，踴踊如雀跃。沿途有村店，藉口制草屨。毫无造物仁，俨同敝赋索。一人不如意，千百横刀槩。民也告之官，县官惊以愕。投刺谒主帅，主帅殊落寞。身家与性命，畴不儿郎託。似此区区者，九牛一毛灼。掉头更不言，反是县官错。翌日拔队行，所在苦剽掠。有马不刍秣，十匹百匹捉。有兵不肩荷，前车后车缚。时或值商贾，搜求罄其橐。



鞭夫如鞭狗，弹人如弹鹊。一事稍阻挠，首级立时落。一级银二钱，请赏向戎幕。娇姹谁家女，亦既成婚约。宁馨谁家儿，绕项金锁钥。女驮马上去，男系民前铎。夫婿蹶迹追，爷娘望尘扑。看看十里外，日已西山薄。明早见积骸，狼藉填沟壑。家人哭之恸，捶胸更拊髀。保正为报营，营中方饮酌。粉黛排屏风，珠宝堆山岳。开口未及说，身已贯木索。綑置大旗边，自分死锋镞。倏见缚鸡来，认得羽毛驳。今供役盘飧，昨食我稻粬。须臾兵尽醉，相邀纵六博。卢雉信口呼，金钱信手摸。想见倪来物，源源不一涸。乘间逃生归，思欲主帅吁。相距三百里，程途数日隔。男儿生胡为，恨不兵籍著。呜呼彼军人，此孽何可作。亦既客欺主，又复强凌弱。我闻湘泽间，近亦风声恶。岂无儿在家，岂无女出阁。一旦有兵役，宁能免鼎镬。天道信难知，作诗叩冥漠。

### 病起

衙鼓冬冬夜四更，空闺无籁断人行。几微花影月吞吐，三两竹声风送迎。镫意做寒如许倦，药烟遮梦有余清。经旬病起浑閒事，眼见秋残猛一惊。

### 久雨颇为农患诗以祷之

盗贼虽已远，有田无人耕。夫子久官此，四顾难为情。散赈给牛籽，俾各遂所生。流亡渐以集，秧稻亦纵横。丰登会有日，《击壤》歌承平。奈何天隐晦，一雨不肯晴。三农果何辜，今秋又无成。我家劣得饱，念彼泪如倾。作诗祷上帝，庶几鉴吾诚。

### 寄听菴兄

闻道东南美，湖山入眼亲。诗书无事业，冠剑尚风尘。闽越平生梦，江关咫尺身。岁寒宜白玉，家有倚闾人。

### 风雨

秋雨秋风作许哀，空廊无语自徘徊。平生解取须臾达，祇有今愁遣不来。

### 闻夫子将回驻西安书寄

戎马问关未了期，一春如梦耐人思。唐陵西去吹沙暗，秦岭东回出雾迟。诗句会成穷事业，年光几换旧须眉。归来看取青尊在，留意公馀话片时。

### 春日寄外

庭前楼行树，墙头数点山。东风日过我，人意相与閒。世事灞桥水，一去无时还。群盗尚未息，俄顷生百患。军书急如火，严兵屯潼关。边功无足道，三叹临花间。

### 茧窝告成晓起遣兴

秦中二月初，偶辟小瓜庐。人倦胜判酒，花疏称读书。持颐思昨梦，整发答新居。及取春光好，他时恐不如。

### 赠听菴兄

六年翘首望南天，此日青门喜暂还。湖水化为诗句好，岳云照见鬓毛斑。家人聚散惊如梦，公暇过从拾一閒。多少时光抛马上，须臾情话亦忻然。

### 种菜示棣儿

屋后有隙地，岁久藏狐狸。偶率仆婢往，慨然荒秽治。凿池便引水，编竹取为篱。侵晨抱瓮出，薄暮荷锄归。渐爱风日燠，兼得霜露滋。稚甲坼土出，嘉苗连畦披。小儿不解事，劝我毋尔为。意恐父不悦，故事徵拔葵。我笑顾谓儿，幸勿尔父疑。蘋蘩系妇职，瓜壶见风诗。咬根父所习，式穀父所期。矧兹挂冠日，食力理宜宜。吾宁好事者，聊以警荒嬉。

### 游大兄园亭

物外此遗荣，天然野趣成。再来还系马，三请不烦莺。骨肉须臾意，乡关尔汝情。林深疑向晚，归路日偏明。

### 别秦中亲故

人生聚散等浮萍，九载茫茫一梦醒。握手恐劳坚后约，掉头莫笑少乡情。终南马首愁难见，灞水关前惜此行。今日将雏何处去，也同春燕暂南征。

### 出关

往岁来青门，车中同白发。今岁去青门，惟见车碾雪。雪中乌鸦飞，令人意凄绝。念我与我姑，今乃成永诀。灵旌何迟迟，輶车何兀兀。妇行及关前，延伫未敢发。望姑魂归来，同出此秦阙。相将供南返，卜葬先人穴。棺只一板隔，身直九泉彻。音容日益远，痛苦声难达。山深狐狸多，夜静鹃啼血。姑寒衣谁进，姑饥食谁设。不如此长途，朝夕得奠醊。

### 寒食

门巷今朝正卖饧，数椽暂借主人情。试看老屋栽花遍，肯放春愁逐草生。东去江流催世事，南征诗卷谢时名。客中容易过佳节，苦雨凄风不满城。

### 路过小姑山从湖口望大姑山

放棹东南去，天寒岁向阑。子男同祀典，姊妹各名山。白点涛头影，青浮雨后鬟。古今时俯仰，人事太间关。

### 金山

秋风小泊广陵船，金碧楼台淡晚烟。夜半鱼龙闻笛起，波涛卷梦落南天。

### 望惠山

昔读《梁鸿传》，今渡梁鸿谿。暝色到孤艇，四顾烟凄迷。人生无去住，一苇听东西。安得盈尺地，结茅来同栖。山头第二泉，《图经》吾能稽。饮行可送老，临风生馀凄。

### 望瓜洲

木落空江寒，潮平人语静。一鸟掠舟过，芦花风起棱。何处晚钟来，二更月色暝。

### 过鸳鸯湖

一船稳载一家人，名字沿江听最真。多少风前双水宿，阿依生与白鸥邻。

### 久闻听菴兄说西湖山水今乃见之感赋

西湖山色最清拔，南高北高雁行列。松声如曲可入琴，云客欲画难著笔。渡江应有仙真栖，挂单未许顽僧歇。我来干戈喜初平，照眼杜鹃尚凝血。

香山白与眉山苏，筑隄划作里外湖。柳色几行断桥断，梅花数点孤山孤。瓜皮艇小瞥若燕，莼丝味美配有鱼。南宋君臣一逝水，积金至斗销得无。

### 吴山

远嫁天涯独怆神，岁寒犹是未归身。可怜第一峰头望，祇见江潮不见人。

### 读阮云台先生西洋米到纪事诗有感

潜河要溯源，种木当护根。源室流不畅，根伤叶不繁。我读文达诗，慨然生愁烦。以茶易外米，意在民食屯。虽云通有无，彼利难具陈。况乃减彼税，悬禁苦吾民。我荒彼鼓舞，我丰彼逡巡。价值贵贱间，操纵权在人。何异教子弟，跬步限家门。又不绝其交，奸徒滋攀援。父兄年日迈，子弟智在昏。一旦有不讳，人将倾我困。会须辟田亩，努力事耕耘。岂容束手坐，终岁乞诸邻。区区执政者，营腾我无论。如何一代贤，亦复口津津。阖言不外出，谁为达天阍。

### 自江头舟行至富阳

溪山随岸旋，倏忽不知处。势若鹰隼疾，一折一回顾。泽中秋兰香，仿佛喷细雾。起看蒹葭丛，暝色浑欲暮。蜿蜒富阳城，眼前忽披露。塔层明斜阳，楼影蔽深树。风景诚大佳，人烟淡如许。审知兵火馀，益以淫霖注。默默正无言，扁舟抵前渡。

### 建溪途次梦刘氏姊感赋

我昨浙中来，草木已黄落。一下建溪水，绿叶纷沃若。回念母在京，年已桑榆薄。同产有一姊，天乃夺之速。昨夜来入梦，颜色犹曩宿。肴饌既已陈，谓我食无肉。饔飧既已

罄，犹索玉田粥。自言数年中，处境真荼毒。亦欲通消息，使令无僮仆。亦欲过谈心，往来车无轴。慰藉苦无词，姊乃放声哭。掩口劝勿声，忽尔视为辱。自揣姊何辜，遇人竟不淑。平生颇修谨，奚至占脱辐。复念秦与闽，道里五千足。姊宁有羽翰，远举如黄鹄。村鸡忽唱晓，豆大镫摇绿。倚枕自沈吟，此意日往复。

### 初抵闽中

吾爱闽中好，从难笔墨传。编民蛇有户，课税蛭成田。灌木经年碧，寒花入腊然。万山青不断，直到海门边。

### 思亲

春随客到家，故国渺天涯。竹称幽人影，梅馀隔岁花。山高时有雪，海近晚多霞。看取思亲意，年来鬓已华。

### 坐雨

谁谓春光好，新来雨更多。南归无一可，北思更如何。诗句生残夜，年华付逝波。明朝天霁否，尚拟墓门过。

### 春日寄怀

都道还乡梦自恬，閒居无事转多嫌。天时变幻无裘葛，家政生疏到米盐。行菜更凭谁抱瓮，焚香只合独垂帘。算来一事差强意，春筍登盘价最廉。

### 食山东白菜

我本秦中女，复於京华长。每觉风雪天，此味口最爽。一自到南中，三餐蛤与蚌。腥臊辄欲呕，当筵失俯仰。虽有永福产，筋多嫌刺噪。晨起客叩门，来自青齐壤。贻我凡十株，磊落堆盆盎。我喜过所望，有似太牢飧。急授庖人术，唤集儿女赏。万羊耻过分，五鼎非夙想。但得咬菜根，从此谢尘鞅。

### 春日游西湖书院

随遇可自適，要不如乡居。宁必入山深，始能得所娱。今晨会无事，驾言来西湖。四山政过雨，青翠沾衣裾。一奁春水活，荡漾靴纹疏。忽惊波面响，泼刺飞双鱼。天然管与弦，鸟声上下呼。时值生徒散，喜与儿女俱。坐久觉稍倦，槛外立须臾。邻妇见我来，挈儿更呼夫。生计不缝纫，辛苦惟耰锄。始悟南与北，风气绝相殊。见我尊无酒，命儿贷村酤。又见食无肉，命夫分社猪。情意颇殷挚，言语宁嫌粗。倏忽暝色来，忽忽将升舆。尚问湖蟹美，十月能来无。

### 纪梦

昨夕梦见姑，颜色如平居。娓娓无他嘱，似怜妇貌癯。慎忽纵儿痴，刻苦宜诗书。

女大理当嫁，教导宁区区。尔夫本儒素，家人生计疏。服官三十载，今乃一椽无。中馈端尔赖，语罢意不舒。一恸不自觉，醒来泪垂枯。音声犹在耳，铎影何模糊。孝养苦无及，念此徒欷歔。

### 昼坐

忆昔姑在堂，早起视晨餐。邻鸡甫唱晓，盥洗粗已完。汲汲入厨下，督人理杯盘。日出及日入，迅疾如惊翰。今乃倦失眠，动见日三竿。中间五六时，欲度良苦难。天运有迟速，人意有悲欢。矧此夏日永，百感来循环，生者各千里，逝者直九泉。悲来无可解，政如坐针毡。一日等一岁，羲驭无快鞭。念此心焦郁，吾鬓俄成斑。

### 孙佩兰

孙佩兰，字谱香，钱塘人，同县胡学纶室。

### 寄怀沈畹香弟妇

晓起看花小立时，一重帘外雨如丝。天公鉴我思君意，催取新裁第一诗。

### 月夜寄怀子搢二弟

天街如水怯轻寒，何处箫声出画阑。忆弟天涯迢递隔，未知曾否月同看。

### 沈畹香

沈畹香，钱塘人，同县侍郎谥文惠孙诒经室。有《寄生馆诗稿》。

### 偶成

勘破机关世局中，春花秋月太匆匆。尘缘一梦何由觉，梦觉尘缘色相空。

### 周维德

周维德，字湘湄，浙江山阴人。张师济室。有《千里楼诗》。

### 河南道中

三月洛阳边，阵阵飞红雨。曲槛谁家楼，寂寂临洲渚。篱落板桥斜，水清鱼可数。杨柳齐作花，春风似解语。

### 思乡

镜湖东，结茅屋，湖上波光映楼绿。楼上曾藏万卷书，是我先人手自著。当时捉笔疑风雨，年年恐逐蛟龙去。何日重回湖上舟，摊书还卧楼上头。

将去西园走笔留别

天涯何处卜江村，又向天涯别故园。满院落花悲杜宇，一庭芳草怨王孙。春当欲老犹怜别，人为多情易断魂。此后相思须共记，何堪风雨伴黄昏。

初得叔云十一兄书即步见赠原韵

廿载离乡百不如，一朝身傍谪仙居。未逢锦字来芸阁，先见文星耀敝庐。晓漏应趋青琐闼，夜窗想草紫泥书。左芬久负难兄望，惭愧无才继大家。

高顺贞

高顺贞，字德华，迁安人。直隶知县南直刘垂荫继室。有《翠微轩诗稿》。

晨起

晨起慵临镜，开窗曙色微。梦随啼鸟散，愁逐落花飞。时节看频换，行人尚未归。遥怜驿路柳，霏絮点征衣。

初至居庸

天险何年辟翠螺，銮舆想见昔经过。山连上谷秋声壮，地近卢龙朔气多。曲涧成群嘶牧马，危岩作阵走明驼。时清不用防边戍，裕国长输例税科。

昌黎道中柬外

极目郊原阔，篮舆趁晓行。远山环郭峙，古木抱村生。海气连云润，沙田积雨平。无材惭佐治，入境畏官声。

邑属韩公后，遗型万代观。士敦文定富，民朴政宜宽。地势雄堪镇，岚光秀可餐。高风与形胜，瞻仰藉微官。万井人烟集，相看等一家。察情周疾苦，问俗到桑麻。吾道诚能尽，民生自有涯。蒲鞭虽示辱，黎庶莫轻加。折狱须仁术，如山案定时。是非容己判，得失有天知。此俸能无愧，斯民未可欺。愿君常懷念，止水寸心期。

屠敬心

屠敬心，荆溪人，同县任星咸室。有《玩月轩诗草》。

有感

舟避银涛风满川，奇峰万叠墨云连。鳧儿不解天将雨，犹上平沙傍母眠。

秋云

散却奇峰入太清，卷舒恰似绮罗轻。诗人省识秋来薄，莫想衣裳想世情。

白海棠

一场春梦欲醒时，缟素全非旧日姿。淡粉应斑贞妇泪，素纨不入婕妤诗。临妆祇许冰为鉴，对酒宜将玉作卮。愿共黄花同晚节，肯教红烛近阶墀。

李湘

李湘，自署吴下女史。

题壁

在花天酒地已成空，梦醒黄梁旅馆中。旧日胭脂今日泪，两般颜色一般红。

忽换笙箫作鼓笳，更惊烽火失烟霞。海风吹折青松树，何惜江村一朵花。

苍天不昧我谁欺，敢负良人志或移。脱却皮囊付尘土，要留清白世人知。

## 【卷一百八十九】

李长霞

李长霞，字德霄，掖县人。胶州诸生柯蘅室。有《锜斋诗集》。

寒食接父书

久别怀儿女，谁从问起居。难将为客意，尽此数行书。令节他乡感，穷愁鬓发疏。介根城下路，未许赋归欤。

胶莱道中

停车向古道，乱树冷斜曛。落叶欲迷径，远钟多在云。溪流经雨急，山色对烟分。回首乡关近，令予愁绪纷。

锦秋湖

柳陌菱塘路欲迷，荷花荷叶与人齐。舟横野岸偎芳草，水拥寒沙上废隄。

中秋夜作

明月出云崖，飞光薄前轩。褰帷怡清夜，景物何澄鲜。熠燿度虚牖，络纬响颓垣。清辉时相照，嘉木郁芊芊。斜汉引长素，空籁出苍烟。圆灵无停斡，顾兔不时安。扶疏丹桂枝，既有复非然。俯仰感世人，营营将何干。

#### 秋夕

开帘眺夕景，寥天气清澈。广宇生夕凉，虚牖来华月。暗虫傍砌吟，明光习就烟灭。垂露秋柔条，迅商赴丛樾。睇目尽幽遐，倾耳聆清越。适己物焉违，虑淡情罕阙。胡不秘精魂，营营为谁竭。

#### 宿山驿闻雨

言投山驿宿，岩壑暮阴重。径僻穿芳草，门閒闭乱松。疏镫深夜雨，倚枕隔溪钟。明日下山路，云迷处处峰。

#### 八月十五夜忆严亲

露下候虫鸣，閒阶取次行。华星云隙出，凉月户边生。梦远桑乾水，秋高稷下城。相看怜弱弟，也解忆神京。

#### 未夏月夜迷怀

亮月丽高隅，澄辉盈遥目。霁景敛夕霏，回飙薄乔木。凄籁纷递兴，繁星灿相属。朱明倏欲移，万象迎秋肃。即景娱新晷，悼旧思往躅。斧藻懔前修，迨时以自勖。

#### 旅行杂诗

疏柳隐孤村，颓阳下烟岭。结屋背巉岩，列槿临清泠。远圃散黄华，新蒲擢紫颖。馀晖照平畴，高下禾黍影。对此羨幽栖，何事慕华省。

驱车牛山麓，枯蓬卷黄埃。山寒春草短，风急苍松哀。中有齐王墓，蔽亏任蒿莱。饥乌鸣其颠，野鼠穴其隈。白骨安识此，人生多所怀。去去莫复顾，重顾令心摧。

昨发於陵城，今过伏生里。荒陇春不耕，残碑断犹峙。饥兔走陂陀，惊鼠缘松杞。缅怀祖龙时，生也为博士。焚书识先机，遁迹归桑梓。却徵甘草莱，传经赖女子。衰贱固云然，渝节亦所耻。鄙哉叔孙生，朝仪媚君旨。

#### 晚至云河驿

路照寒星出，人家尽枕河。水田归雁下，烟草暗虫多。屋矮藏镫火，篱残补芻萝。劳劳远行者，数问夜如何。

#### 春日思家



閒阶生众绿，幽草媚晴晖。蝶逐落花起，燕衔残絮飞。繁愁因梦重，久别美人归。  
蒟北迢迢望，泉源愿久违。

#### 九日思归

风雨度重九，萧然生暮愁。散金残菊卧，委翠古槐秋。别信迟来雁，乡心怯倚楼。  
好将今夜梦，飞越到芦沟。

#### 送夫姊姚少夫人之汴

相看不忍别，相送转凄其。车马不相待，音书空后期。篱花秋烂漫，官道暮倭迟。  
珍重泉源咏，言归慰我思。

离言欲诉少，握手共沾襟。以子辞家苦，伤余别母心。关河秋雁影，闺阁暮虫音。  
他日重回首，浊河秋更深。

#### 拟鲍明远车武吟

男儿贵用世，仗剑行从军。割恩辞父母，飞旆出关门。暗谷履霜雪，危峰蹶烟云。  
斧冰汲朝饮，期程不遑温。饥乌啄白骨，空碛飞青磷。回首望汉关，腾沙昼恒昏。岂不怀乡  
县，冀邀明主恩。百战摧杂虏，九死馀一身。耿介成罪辜，功绩委埃尘。薄劳无特达，忧素  
将谁陈。归来守贫贱，愿侪麋鹿群。金、张藉旧业，卫、霍为近臣。封侯良有道，岂必树功  
勋。

#### 房山道中

巉绝房山路，群峦一望收。石崖垂草细，春涧带花流。风雨荒陵古，丹青野寺幽。  
由来天设险，屏障近皇州。

#### 高密城下寄姚少夫人

乱树平沙望渺茫，介根回首海云苍。城头一曲娥眉月，照到离人更断肠。

#### 忆昔篇

忆昔别家时，时秋月维九。仆人严驾俟，欲住安能久。弱弟牵我衣，阿母执予手。  
汝行勿怆神，努力奉姑舅。谦以睦六亲，劳以事井臼。以此慰我怀，感感将何有。含涕拜慈  
亲，敢使慈言负。欲忍更失声，寸心靡所守。出门赴征轩，和铃声相叩。我车已改阡，我母  
犹门首。顾此两心摧，吞声恧自咎。朝出稷下门，寒郊罢耕耦。暮宿淄水滨，茅店依衰柳。  
子女互啼饥，解囊陈芳糗。翦烛暗虫飞，拂榻惊鼠走。辗转永夜深，惆怅离心疚。回思倚闾  
情，音容宛在右。耿耿月照梁，肃肃风吹牖。喔喔鸡号晨，灿灿星回斗。旅思动苍茫，晨光  
辨陇阜。去去勿复辞，忧绪何纷纠。

#### 唐申拟古

行行重行行，哀此生别离。别离难为情，而况赴戎机。圣主方殷忧，安顾子与妻。从军今几载，饷绝恒苦饥。天风吹败箨，部伍各东西。岂乏忠义心，举世少见知。事至日天运，理实由人基。

回车驾言迈，日夕望五原。郁郁茂陵树，目极但寒烟。汉武本雄才，远略思拓边。西服夜郎郡，北靖祈连山。羽书不近塞，何由达甘泉。晚世弛纲纪，和虏在偷安。寡义安知舅，饰懦藉仁言。留此青冢草，愧彼汉臣颜。

东城高且长，飞楼与云霄。中有彼姝子，被服罗裳衣。容华世莫睹，上与仙人期。下者不敢仰，恐为祸所基。妙语闻九天，邈不可似思。可化油油云，下泽苍与黎。

客从远方来，云是江汉民。流氛遍南土，家室无完存。大将日高宴，而以捷书闻。可怜七萃士，涣然若浮云。远近事剽掠，安辨寇与军。好乱岂天性，贼众多饥人。

#### 寄姚少夫人

闽峤七千里，烽烟十二秋。不知明镜里，也有雪盈头。

#### 和佩韦夫子题淮阴侯祠壁

淮阴山水清且閒，古祠老树生寒烟。汉家宫阙不知处，韩侯庙貌犹人间。渚蘋无复行客荐，西风卷水秋潺湲。当时逐鹿中原起，国士由来重知己。登坛既遇隆准公，入宫胡怨儿女子。追亡相国无始终，如何不救钟室死。故乡虽好不能归，自古功臣多如此。

#### 围城中作

援绝孤城小，秋高雁不过。苍生今若此，守土竟如何。鼙鼓深宵近，烽烟夕照多。当途有上策，几月息横戈。

#### 辛酉纪事一百韵

开春贼东窜，避乱事远出。秋来复北行，烽火起仓卒。呼号闻比邻，惶惶出闺闼。女弱涕涟漉，姑老色惴慄。大儿前挽车，小儿后提挈。暮出东郭门，秋潦多乱辙。月暗影眈眈，路昏行蹙蹙。我随车徒行，十步再蹉跎。野田忽高低，陟降弗遑歇。前至海上村，镫火闪蓬草。寄迹葭莩亲，妇子共一室。新穀荐黄粱，蕃羹杂薇蕨。栖息虽云安，中夜常惊怵。诘旦赴海壖，海气尚郁勃。扬帆事遐征，天风吹萧瑟。岛屿影浮枕，波涛声荡潏。渺然感人生，一粟寄溟渤。三五蟾兔盈，澄辉何皎洁。鱼龙动混茫，星斗垂寥阔。我本怀百忧，反因异境发。回首望邑城，迢递火光彻。舍宇恐摧颓，松楸或斩伐。况闻海防军，昨日新战没。矫矫王将军，力能贯七札。矢绝无继兵，父子同一烈。昂昂陈义士，十荡还十决。战胜众人依，战死谁收骨。贼势遂日横，所在逞豕突。沿海事焚劫，杀戮到岩窟。越旬闻贼行，归帆顿飘瞥。来时之所经，廛市半丘垤。迟迟造里闾，女仆迎门闥。伯氏先我还，亲戚问存歿。敝庐幸复存，敢怨多遗失。尘釜事浣涤，敝簟重振拂。次第理琴书，殷勤整卷帙。人劳乐苟安，时危易为悦。远近传虚警，消息时恍惚。何方为乐土，欲去还中辍。群丑复北旋，倏忽

势莫遏。扶掖入郿城，历险嗟更迭。讬迹向冀宫，广厦一毡设。遥望见焚烧，烟焰生林末，风逐怒嫖飞，霄炽秋云热。哀哉胶东民，惨比他邑别。刺史本神明，缙绅多贤哲。仁厚戒征诛，守成贵密勿。夫子事登陴，长子随行列。渚不汲污池，湿薪斫丛樾。永日不再炊，深秋无重褐。阿姑时叹息，老病怀惊怛。小女畏贼来，枕席亦机隍。强欢欲相慰，反使泣呜咽。但云贼当去，贼去当全活。蓄惊意怏怏，含忧心惛惛。再见蟾兔盈，严霜木叶脱。有时闻贼行，或言远搜括。比日断烽烟，寥天气清澈。欲出复迟疑，贼谋恐诡譎。三旬始出城，惆怅异天日。瓦砾塞通衢，连薨百无一。回风吹血腥，当途馐杀越。空巷行萧条，败壁立突兀。残烬拥颓垣，故居认仿佛。去去将安之，摧残到瓜葛。幸有宗人舍，暂留仅容膝。三秋倏以迈，天寒气栗冽。三见蟾兔盈，时维冬十月。昊天胡不惠，大戾弗我恤。慈姑病缠绵，弥留竟永绝。乱馐遭凶凶，谁云理无阙。哀哀视君子，麻衣泪凝血。渐止涕纵横，莫使回肠结。阿姑暂浮屠，黄泉未定穴。当思昔贤言，毁不使性灭。衔恤更晨昏，荐瘞时未竭。厄运伤不已，含憾视琐屑。维时方荐臻，余复罹疾疫。次染及儿女，呻吟杂喧聒。冷灶静无烟，敝衾寒如铁。顾瞻使心伤，涕零无复啜。汝辈行当痊，予疾恐成诀。嘱女莫娇痴，嘱男勿怠逸。怠逸成荒废，娇痴遭瞋喝。夫子相慰言，汝言何不达。人生天所命，胡为伤情切。先事而绸缪，为计良亦拙。所遇在辘张，且与同饥渴。闻此感予心，忧怀勉为豁。时序自有常，阳和回穷节。女病渐加餐，男愈行蹇蹇。予疾亦云疗，扶杖犹颠蹶。隆冬肃寒威，气严手指裂。壁隙鸣风飐，窗阴积霜雪。艰难寄居情，人事安能说。矧乃沂水阳，游骑尚突轶。遥闻古濰州，战士多人杰。分抄不及境，贼气为之夺。束装思北上，流离犹未毕。何日息疮痍，上将临节钺。解此下民忧，济时望稷契。

#### 赴濰县

昨发胶水浹，遥遥去黔陬。村落少人烟，天寒路途修。板扉当昼闭，馐烬痕尚留。两三老寡妻，相语双涕流。往春殖二麦，贼众来南州。麦田为战场，麦苗饲马牛。无麦犹尚可，秋复遇虔刘。少壮为贼役，老弱死道周。有魂不可招，无骨将安收。官死有馐荣，令名垂千秋。兵死有厚恤，皇恩一何优。惟此农民死，灭若浮水沤。下有子冲幼，上有母白头。业失未能复，官赋未能休。死者长已矣，生者恒殷忧。

#### 南留店

烈烈北风凉，摇摇鐙烛光。旅愁不能寐，耿耿寒夜长。小女衣裳薄，辗转依我旁。问我今何之，去去将何方。闻此感予怀，泪下忽沾裳。往昔忆慈亲，恨不居共乡。今日行且近，反觉意徬徨。有家知怀土，无家将焉伤。起看月在户，回视月在床。松楸日云远，何以慰蒸尝。

#### 忆巢燕

旧垒已无地，归时敢望归。空馐将子意，难傍故檐飞。天地还春色，兵戈未息机。余怀不可遣，为尔一沾衣。

#### 寒食作呈佩韦夫子

春色为谁来，绿遍西原草。念我时艰虞，反伤春色好。天地方甲兵，沈忧催人老。莫挽西江水，辙鱼同枯槁。缅思先舅姑，悲来心如捣。富贵不及养，荣名安足宝。况我沈沦

土，流离更远道。麦饭莫不时，墓门复谁扫。伤心首丘意，华发悲年早。愿利幽人贞，敬身以承考。区区小草心，永言伤怀抱。

### 村居

一雨收残暑，乡思又及秋。初寒多在竹，小梦亦生愁。叶老虫丝卷，苔明蜗篆留。村居近三载，归计未能筹。

### 拟塞下曲

閒写家书付六亲，纵为部曲亦王臣。生成热血消霜雪，不用寒衣寄远人。

自浇雪水洗刀瘢，昨日龙堆接战还。闻说前山骄虏在，更无归梦度榆关。

北风吹雪下卢龙，寒入征衣冻几重。尚有君恩酬未尽，家书纵到不开封。

《铙歌》唱彻海风秋，收取关山五十州。终古烽烟不近塞，功成何必尽封侯。

### 看桃花

村南村北桃作花，绿芜尽处明春霞。我来看时雨初歇，野烟淡淡花未遮。侧蕊傍花纷婀娜，长枝短幹交横斜。南者盛开北者蕊，一株气候閒有差。似留馀美戒先尽，含采不复相矜夸。我因避乱去乡邑，花时怅望归路遐。他乡春色忽烂熳，故园花好将焉加。符山之峰出花外，石骨皴绿无土沙。点染纵无灼灼华，此邦已觉清且嘉。况有武陵在人世，有田可卖吾将家。

### 和吉侯弟秋苔诗

微物亦生理，勿教屐齿侵。疏林馀宿润，古井半秋阴。一雨寒如此，无烟绿自深。小园生欲遍，漠漠感愁心。

### 拟古

篱花焕异彩，畹兰吐幽香。鷕鷀尔何物，啼之使不芳。好生本天德，汝何反其常。凤凰不尔顾，罽罗不尔张。我欲避之去，怨彼何无梁。不忍闻其声，掩耳以心伤。

丹桂气辛香，其下无蕃草。至美伏杀机，造物非颠倒。羽士服黄精，颜色常美好。不弃小草用，遂使永寿考。昔圣讯刍蕘，侧陋多遗老。

洋洋万顷波，扰之不能浑。游泳涵众有，安辨介与鳞。湛湛九霄露，为泽一何均。苍蔚茂万木，安识松与榛。明察非令德，至人灭见闻。所以古圣哲，无为风自醇。

富贵移本性，贫贱何励身。世人多所欲，徇之失天真。五月有披裘，季子称其人。华歆渝素守，管、邴耻为群。苟去与苟得，其重若千钧。

### 秋感

高梧下寒叶，虚阶静有声。出户独徬徨，流飏绕前楹。履霜不自警，寒衣何由成。知风鸟背巢，随阳雁南征。微物亦何识，先时知所营。豫来虑易怯，愁至疾若并。苍然眺远色，秋气伤人情。

三妹德馨歿於去春二月今夏家人忆之皆为涕零哀死者之早夭遗生者之永思

伤哉此情用托斯篇并示吉侯弟昭昭白日光，夜台不蒙辉。冥冥泉下人，讵识生者悲。和风扇春林，病叶忽辞枝。大化有逸顺，庸情安可知。忆昔送将归，不谓成永辞。奄忽岁已迁，家人空馀思。宿莽回青阳，蛰魄无骇时。彭、聃以为天，斯理谁能齐。悲来时涕零，援笔空复词。

### 寄六妹

长夜何漫漫，月照室南端。别离未云几，桂树生秋寒。西风夜来度，凉绕庭前树。蕊蕊叶底花，团团叶上露。花开不相见，花落隔乡县。出户独徬徨，花前月如练。月色迥然秋，相望不胜愁。朝为山中水，日暮出山流。流波无回澜，夏来若循环。愿言缄此辞，寄彼凌风翰。

### 战城南

战城南，城南鄙，健儿追北，日暝不止。几年骑马破残贼，闻说将军今日死。青磷照野骷髅语，应是当时旧部伍。将军战死未归骨，谁宴军门擂大鼓。

### 孔淑人诗

凤鸟有灵匹，芝兰有灵根。有女欢薄祜，少小失二人。阿弟方弱龄，茕茕寡友昆。十年贞不字，抚弟多苦辛。诗书夙所好，礼仪夙所敦。馀事擅写生，妙笔追天真。高行人所羨，媒妁来殷勤。云有赞皇令，蒯氏为清门。遂缔百年好，鸣凤託高冈。玉帛安及时，佳耦世无双。结褵离行有日，群寇来抢攘。蒯侯恤民事，率众巡所疆。猝然与贼遇，万骑精且强。合围桑落镇，众寡莫相当。天狼不可射，威弧不可张。嗟哉忠义士，身死为国殇。佳运叹何迟，厄运来何促。忽闻消息来，心摧莫能哭。女子谓阿弟，我生亦何艰。二人谁则无，父母早见捐。伉俪谁则无，未嫁失所天。我命实不犹，皇灵无私恩。岂不重一死，身殉义得全。一日饥不食，二日饥不餐。光光烈女子，冥冥向重泉。合葬蒯氏莹，遂彼同穴言。高义世所重，有司以上闻。明明皇帝制，曰赠为淑人。借问淑人谁，宣圣之裔孙。

### 戒子诗

羲和无返轡，昔贤惜分阴。念尔流离子，少小值苦辛。荒废惜往昔，儻俯慎在今。娉修苟不力，老大倏相寻。乾行贵不息，纤条成修林。

海气绚蜃采，楼阁生虚空。蛟人不可处，幻灭随天风。实道由践履，力至性乃充。

誉广必毁至，名高慎悔从。凤鸟无灵德，文章叹华虫。

缅矣西江水，枯辙不获滋。大哉魏王瓠，坚重不可持。行远升自迹，一簣成丕基。黄鹄烂明镜，轻尘淄素衣。小善小过言，三复诚可师。

大哉魏王瓠，坚重不可持。微矣骊龙珠，光耀世所希。古人执一经，专精乃不移。明两归一照，吹万成咸美。射鸿慎物迁，亡羊感路歧。

#### 回西村

西山远翠生春烟，南溪新涨明沧涟。斑斑红杏雨生晕，裊裊绿杨风可怜。将军驰檄藟门道，客子寄书漳水边。年来离乱逢春色，又向晴波感逝川。

#### 寒食寄吉侯弟

肠断墓门道，青青小草春。死生皆作客，去住各因人。徒有皋鱼泣，空怜季路贫。客途今日梦，应阻大河滨。

#### 春日忆少子劬恣

雨气绯桃重，苔痕石砌幽。青春怜尔远，白发对花愁。消息传戎马，关山念阻修。双鱼应有寄，漳水日东流。

#### 述事五百字寄吉侯弟

盗贼生东海，玃衡指北躔。巢禽初去越，胡马不归燕。濉汭侨居久，山村假舍便。慈萱欣日永，小草得春妍。布乏公孙被，床无子敬毡。围炉分宿火，和药典华钿。屡见尘中釜，频经突少烟。窗寒宵擘絮，镫地夜陈篇。羊蔡邻居久，殷韩共地偏。水清鱼泼泼，风暖蝶娟娟。秋圃花如锦，春塘柳似绵。弟兄欢刻烛，甥舅乐分笺。得意真如许，穷愁半释焉。不为毛义檄，肯著祖生鞭。儿赋《渭阳》什，予惭屈姊贤。征篷汴水外，客路大河前。梁燕辞何易，藩羝兆已先。一从云出岫，屡冀水归泉。大耋占离昃，乔林望景延。涟如空泣血，嗟若漫呼天。宛洛迟归鞅，青齐遍控弦。一棺分旧冢，抔土寄新阡。骇兽知先步，惊禽敢后蹇。围城孤似斗，假舍小如船。鼓角晨风里，旌旗落照边。将军诸道合，节度九营连。壁垒防应固，凶徒恶未悛。鼎真鱼莫脱，隄竟蚁能穿。似说擒张步，还闻遁李全。泽鸿哀未息，辙鲋涸堪怜。旧业思馀烬，新居叹坐捐。至今犹寇盗，回首忆倾颠。饭少东方来，居无许子廛。兔真嫌窟少，鸠拙怨巢迁。窄屋能容膝，荒垣仅及肩。霜黄垂户草，苔绿上阶钱。迅景催穷节，愁心畏暮年。东来书渺渺，西望意悁悁。异地留王粲，何人引服虔。近闻烽火息，望尔赋归旋。

#### 搗衣诗

朝槿谢朱荣，晚兰辞秋馥。燠往愒晷长，寒来惜景促。虚檐栖馀景，苔阶结残绿。佳人拭清砧，鸣机罢夕柚。淒淒砧繁声，哀蛩伴幽独。變變回飈度，历历馀音属。敢畏露气寒，霜威边地速。敢畏力不任，道远难频复。戚戚感离心，肃肃怜宵躅。萦情理繄素，含凄

对明烛。不识后时颜，犹裁别时服。

### 避寇海上

万里沧溟一望开，二劳山色晚崔嵬。天浮积气星辰动，潮蹴长风岛屿回。币岸妖氛宵更恶，孤城画角夜偏哀。那堪戎马纵横甚，可有官军入援来。

清秋诸岛气萧森，漠漠风烟接太阴。沧海东浮云似墨，孤城北望火如林。怀居忽下危时泪，卜地空馀遁世心。极目惊涛无尽处，侧身西望一沾襟。

### 西园即景

老树邀寒色，空烟淡夕晖。鸣风秋叶急，垂架晚瓜稀。花暖蝶为幄，苔寒石作衣。萧然怜景暮，络纬促鸣机。

### 中秋对月

天上闭圜月，人间寂寞愁。蟾寒丹桂老，河淡白榆秋。明镜消银烛，清樽对白头。别离怜尔照，清景莫西流。千里同明月，离人几处看。形因多病改，书欲寄愁难。高露浮空气，疏花照夜寒。昔年同此乐，今夕路漫漫。前烛知宵永，添衣觉露滋。系檐蛛讬网，栖树鸟馀枝。吟咏怜儿解，艰虞畏母知。谁惊一行雁，南北各天涯。

### 九日寄吉侯弟禹州

萧萧木叶下庭陬，黯黯秋阴我欲愁。篱菊重开犹作客，乡山正远莫登楼。浊河水落黄蓬，故国霜来白草秋。欲寄音书归雁少，钧州何事苦淹留。

### 和八妹九日诗寄六七两妹长山

烟草萋萋独闭门，每逢佳节黯销魂。莫将白发临青镜，且采黄花对绿樽。济北书迟秋后雁，阜山木落雨中村。他时姊妹归来日，应有新诗仔细论。

### 拟魏文帝公宴

日暮游西园，逍遥曲池旁。好风有馀善，灵卉敷时芳。扶疏珍木阴，嘉鸟傍巢翔。奔星流清汉，华月生精光。朋从协时豫，美酒溢金觞。结欢虽在迹，鸣埭多遐方。终此金兰契，久要不可忘。

### 拟陈思王仙人篇

至人乘化游，讬迹在元冲。整驾紫濛野，迈迹过崆峒。云气交神衢，扶辖来天风。八龙何婉婉，蹑景无遗踪。紫房深窈窕，绛阙渺瞳眈。仙人多俦侣，来往骖轻鸿。素节莅金母，青裙来玉童。宓妃拂瑶瑟，青女叩清钟。张乐列丹台，灵奏声骇空。大明诤显晦，羲娥互西东。俯首望尘寰，天路谁能通。培塿见五岳，馀视空濛濛。回车指帝乡，朝谒登紫宫。

注名石室内，延龄寿无穷。

### 别长女宝懿

秋蓬去故所，随风自东西。人生遇时艰，移徙将安辞。今兹别汝去，念汝不能携。山川虽云远，音书肯尔稀。不见林中鸟，晨飞暮相依。勿为别离念，相共自有期。暖日煦早春，好风拂柔枝。万物豫天和，胡为常凄其。努力以自爱，慰我桑榆时。

### 车遥遥篇

车遥遥，去乡国。心摇摇，忘南北。车轮方，行客伤。车轮转，故乡远。行止难，客自怜。

### 湖山泝道中

车马透迟湖水浔，湖光空翠晓阴阴。村烟一带柳丝重，岚气四围春雨深。依旧青山留客梦，漫教黄鸟唤愁心。结茅抱瓮曾题句，回首前尘感不禁。

### 章丘驿寄弟妇及八妹

处处新黄上柳条，故园东望路迢迢。老来诗句愁中得，梦里山村觉后遥。暮雨云生长白树，春风人过绣江桥。禁烟明日逢寒食，念尔深闺倍寂寥。

### 途次齐河县过黄河

湛湛清济水，忽入浊河流。川渚有迁移，人事将谁尤。遥趋铁门关，南北划齐州。我非壮士怀，大波怯阳侯。舟子轻洪澜，理楫发长讴。孤舟何迢迢，危樯风飕飕。汎汎沙岸近，榜人维予舟。回首瞻岱色，浮云天际愁。俯仰念乡邑，山川阻且修。怀土亦天性，不见狐首丘。

### 莘县途次

客路过莘野，孤村落日低。荒田多白卤，矮屋尽黄泥。饥下呼群雀，寒栖上距鸡。萧条民业少，生计悯苍黎。

### 汴梁城外作

透迟车马倦，近郭日初曛。古庙沙扶碣，危城塔入云。地平河势阔，风远市声闻。好忆湖山路，烟岚翠不分。

### 返西村旧舍

三载西村舍，重归感我思。到门疑有母，如梦忆来时。雪释苔生屋，春寒柳未丝。庭前旧乌雀，还上向檐枝。



## 对雨

终日凄凄雨，连朝漠漠阴。低花沾宿蝶，高树湿巢禽。萧瑟初寒意，凄其望远心。春秋倏易序，岁月太骎骎。

春日辞乡国，秋风感客襟。愁颜蟾子破，诗句女儿吟。罗扇閒捐雪，甘瓜罢剖金。庭前芳草色，一雨绿偏深。

一雨将无极，空堂更寂寥。野云低黯黯，庭竹晚潇潇。紫气仙台近，青山海国遥。沈吟思往事，魂断不堪招。

往事知何许，分明一梦真。未亡怜弱女，永殁痛慈亲。垂老家偏索，馀生业更贫。相依惟弟妹，此别更伤神。

弟妹皆分散，同居此愿违。少孤长作客，远嫁苦思归。露柳垂仙珮，风花学舞衣。昔年吟赏地，回首倍依依。

回首西村舍，遥怀少子居。三秋曾远别，两载喜随予。晚景谁相慰，多愁望尔书。思归归不得，惆怅复何如。

惆怅归无计，他乡苦滞留。家山频入梦，老病怯迎秋。饥雀依檐宿，低萤入户流。吟诗烧短烛，风雨下帘钩。

## 哭长姊诗

允矣我姊，令德祁祁。十年之长，事为我仪。我幼姊线，我读姊师。怡怡闺闼。我迈十龄，姊赋于归。翩翩者雁，中道分飞。虽曰童稚，怆矣其悲。道里悠远，山川间之。滔滔岁月，绵绵予思。星次载周，姊再归宁。春仲斯至，夏首斯征。来若萌华，别如振英。譬彼山泉，分流趋壑。始则同源，终焉异託。维此东国，扰矣时艰。鸿阻於冥，鱼沈於渊。不相见者，三十馀年。我赋流离，罔或宁处。历百苦辛，晤言以诉。胡不我顾，而即长暮。我有梦寐，忆姊旧形。今也何似，我弗姊明。我昔焚巢，姊闻而伤。今也冥漠，姊或予忘。哀矣予情，爰託斯文。我弗姊睹，姊宁我闻。昭昭莫形，冥冥安处。知灵有无，恻此泉路。

## 赴楚途中作

南辕无北辙，白首越乡县。往岁去青齐，今兹辞梁汴。汝水涉迢遥，楚山眺葱蒨。林葩耀蜀锦，隰烟浮吴练。杜若长春洲，鸕鹚下芳甸。来巢事亦微，鲁史徵昔谚。物性靡迁移，人情悦安晏。往岁莅金豕，乾坤方转战。宛洛有戍兵，海岱时传箭。二纪疮痍消，十载忧患浚。譬彼辞根蓬，当兹九秋转。俯仰感多难，忧来谁能遣。

## 发应山

晓色开众山，霁景荡层阴。曦晖散林畔，叫啸闻哀禽。逶迤山西麓，沿回水东浔。

履沙越洲渚，蹑石上岨岑。润气生空翠，风泉有清音。细径出丛樾，晨寒袭重襟。南景允为美，北怀郁以深。遥遥望白云，端忧不可任。

#### 黄陂道中作

穷纪辞乡县，客迹随蓬飘。往岁河阳旅，今即楚路遥。宿雨绿崖谷，阳春秀时苗。朱樱耀翠巘，碧藓绚丹椒。逼侧山际路，飕飕涧底飙。旁行近崖岨，上陟逾岩峣。寥沅见千里，虹洞两仪辽。海岱崇且广，驰目不可邀。丹霞承夕景，寒烟幂远皋。晚晚崦嵫日，时往孰能要。大化赋众有，物理任长消。营魂不自慰，颓阳岂重朝。持明有穷照，毕烛乃馀膏。理为室者达，恹叹付长谣。

#### 江行望岸上诸山

长江趋东南，连山峙其外。平流淡无姿，群有静含态。青岑生白云，苍衣约皛带。苍蔚蔽崑崎，青葱翳松桧。安得一攀跻，令我访胜概。攀林摘瑶英，倚石窥寒濑。幽境不可寻，长风催行迈。回首望众山，苍苍但烟霭。

#### 命女

乾刚坤柔，太始判德。维物赋性，维性生则。维尔女子，柔顺是职。由庚以茂，或愆是惕。良金克宝，趋型从革。慎尔柔仪，以来百福。

谦为德舍，让为礼基。竞徽骛胜，允非女宜。逸必后获，劳务先施。美未可任，过宁尽辞。任美弗至，过辞安移。修以明德，洁必浣衣。

夫正而和，妇顺而敬。维兹居室，伦始德柄。肃与德成，慢必忝并。愆微终著，穀渐以盛。温恭是庸，庄而无竞。迺迪远则，为家之政。

女德无极，维顺是长。昔戒有言，取妇如响。妇焉如斯，姑焉尔赏。何能可倚，何巧可尚。智有一失，才难百当。过由爱隐，善由爱奖。

小心翼翼，在圣犹称。梦梦季女，实惧难能。何事可怠，何言可轻。何微可忽，何细可胜。人多善始，无替在恒。如履虎尾，如履春冰。

维诗与书，发天明命。长善成仁，达理卫性。道在莫离，事成日用。岂必男子，女子是共。勿谓华辞，斯道之盛。兴至名篇，温和以正。

德成於谨，业盛於勤。日计在旦，岁计在春。习之成性，励之由人。女职是首，妇道是敦。秋虫响夕，寒鸡司晨。黽勉夙夜，亶亶振振。

#### 泊兴国州城外作

东风原隰绿，迢递接关河。芳草故乡远，斜阳积水多。楚山春晚晚，客路岁蹉跎。十载犹浮梗，西园忆薜萝。

### 重泊武昌

西来山色认从前，回首鸿泥意黯然。疏雨淡云寒食节，孤篷短棹汉江边。萍蓬寄迹家千里，蒿蔚馀生客十年。黄鹤楼头频怅望，汝南济北各风烟。

### 秋夜

寂寂虫吟砌，策策叶鸣枝。房栊凄以静，下帘还掩扉。镫火出檐隙，宿鸟忽惊飞。人物胡相扰，灭烛息光辉。寒雨滴长夜，凄风入轻帷。忧戚相倚伏，衰疾自追随。居室各千里，含愁将诉谁。薄祜由天赋，多艰岂人为。何用得所遣，委命复奚疑。

### 感怀

故乡几千里，望远临高楼。徘徊将何见，苍然江汉秋。楚山远无极，楚水天际流。微茫大岷影，窈窕鹦鹉洲。芳草将欲歇，寒皋色正愁。驰晖无缓景，久客生百忧。滔滔长江水，迢迢东海头。

### 哀哉行

有弟客河阳，少小寡宁处。往岁射策归，道死郑州路。人生亦何常，祸福随所遇。昔别经十年，今别永不晤。昨夜梦中来，素颜如平素。含戚若有诉，欲语成惊寤。江介秋雨多，晨风不可渡。尔魄去何之，萧萧青枫树。摇摇当风树，枝叶不获安。寂寂枯菱根，冥漠委郊原。生者去乡国，死者就黄泉。黄泉多新鬼，相见理或然。冥冥不可讯，衔哀将谁宣。西风吹白草，萧萧丘垅寒。哀哉复哀哉，涕下空洑澜。

### 西原谒墓归

稼尽原隰空，木脱山容近。绵亘暮岭长，断续寒流引。寸莽竭穷樵，槁壤连修畛。白日隐寒云，哀商正凄紧。玄冥逼凛秋，急景催时迅。四序自有常，三寿谁能准。来息自劳劳，往消怜泯泯。景物怅萧条，人事劳坎壈秋。鲜知成独复，多方谢众敏。日夕掩柴关，清琴理瑶轸。

### 秋怀

乔木振天风，落叶依衰草。高下势殊殊，同此秋枯槁。贵为多物营，贱与沈忧老。不见南山石，亡知得寿考。

### 雪后

目极川原阔，登楼时倚栏。高风一雁远，晴雪万家寒。景短残年逼，时荒善政难。流离怜老弱，辽海路漫漫。

吉侯弟歿由夏及秋聞其眷屬未歸旅櫟難返天涯有汨傷也如何昔人云長歌可以代哭

爰成七言二章春日公车指帝乡，秋风遗魄滞河阳。慈亲涕泪随年尽，游子关山入梦长。迟暮靡依怜白发，《式微》无后继青箱。楚些空有《招魂赋》，荆豫无如各一方。古刹凄风啼夜乌，龙輶何日赴征途。他乡眷属能归未，地下庭

帏得到无。白草栖霞先陇隔，苍苔漏雨故园荒。可怜同气今馀几，恸哭鸰原泪眼枯。

信阳道中

一川芳草露初晞，几处人家倚翠微。樵径烟深松叶暗，沙隄水浅荻芽肥。十年烽火青山在，三月春愁白发稀。武胜由来天下险，关门不掩乱云飞。

柯劭慧

柯劭慧，字稚筠，胶州人。荣成拔贡孙季咸室。有《思古斋诗钞》。

秋怀

唧唧草虫鸣，离离众星列。白露劲柔条，激楚结丛樾。踟躕还入房，含凄心如结。罗帐漾清商，绮牖笼寒月。百忧触物生，万感因秋作。朝槿谢残红，篱菊发黄藻。金风生桂枝，玉露凋芳草。客怀多感伤，览物憎寒早。转身入我房，怒焉心如捣。绮窗暖夕晖，邃室增幽窈。岂必日月驰，维忧以用老。

秋风自何来，吹我庭前草。昨旦含芬芳，今夕成枯槁。物理有变迁，人事岂常保。寄语闺中女，勿恃朱颜好。莫挽羲娥车，奄忽催人老。密勿思古人，庶以慰怀抱。

落叶下亭皋，岁暮不自聊。羁旅无定所，翩翩若蓬飘。开轩一以眺，四野何萧条。心随商猋飞，目共秋旻辽。寒烟结远隰，馀景散陵乔。冉冉羲娥驰，兴往不可要。

枯莽委岩趾，槁箨陨林梢。高下虽殊科，零落固同朝。念我非金石，胡为长郁陶。人生本物旅，大化谁能超。以此慰我怀，援笔成长谣。耀灵驰西陆，少昊司秋节。翩翩野藿飞，澄澄寒潭洁。我生多艰虞，览物难为悦。时往若驰波，一逝不可辍。来忧如循环，百转还相结。御风伤绌絺，卒岁无衣褐。徘徊终何之，对影惟明月。

凝霜凋兰蕙，白露被荆榛。好恶殊以何，零落同秋旻。天地无终极，物理难长存。持此有时躯，而怀常苦辛。始知至人德，乐道在守真。营魂不自慰，毕景岂再晨。

秋夜一何长，漫漫难及晨。我非壮士志，胡为怀苦辛。披衣起徘徊，仰看参与辰。三星犹在户，河汉未西沈。世累忽相扰，百忧坐自臻。欢愉随时弃，衰病逐年侵。戟独自天启，多艰将焉畛。弃置无复道，惆怅难再陈。

拟古

朝采陌上花，夕玩庭中月。赏心亦何常，遇物即迁别。人情旦夕更，宠禄岂长讫。颜阖逃鲁币，子搜恋丹穴。寡虑物可遗，欣名道自阙。修身非外求，达生信可乐。

女萝本微薄，得依松柏枝。繁英何蕊蕊，密叶以萋萋。朝蒙庆云惠，夕被渥露滋。哀此小草心，自谓终不移。阴阳有变化，祸福自相基。凄寒变春旭，杲日忽阴霾。朔风振林莽，乔木难独持。松柏既摧败，女萝亦离披。流潦凋翠采，春日委青萋。薄祐由天启，知命复何疑。感此聊自慰，同归亮有期。森森千尺松，亭亭自偃盖。陵谷有变迁，此木独不改。既负栋梁材，岂辞翦与败。谁知岁寒姿，未足美人睐。兰蕙吐异香，云霞焕奇采。回首语寒松，持节将焉待。

#### 拟行行重行行

遥遥远行迈，悠悠怀所思。问我将焉怀，哀此生别离。去君日永久，相见邈无期。隰淇皆有岸，相思独无涯。朱颜退红采，绿鬓著素丝。春华委霜霰，营魂岂久持。一息不自保，何况待来兹。

#### 拟涉江采芙蓉

采采芙蓉花，灼灼多佳色。日暮水层波，沈吟楚江侧。兰蕙不时生，芳洲安可得。馨香难久留，念此远行客。

#### 拟青青河畔草

灼灼桃李花，天天当风枝。皎皎彼姝女，娈娈好容仪。锵锵鸣玉佩，采采罗裳衣。佳人谁不慕，高节难与离。交爱无良媒，空令神魂驰。何不化行云，慰我长相思。

#### 拟庭中有奇树

珍木生庭中，花叶含清芬。爱此好颜色，可以赠佳人。繁英久已茂，欲寄感无因。行行芳树下，不觉泪沾巾。谁谓感节物，有怀意所亲。

#### 记梦

晨风起幽闺，落月照东壁。念彼泉下人，凄怆无终极。昔别各千里，今别永幽隔。昨夜梦君来，朱颜若畴昔。褰帷相与言，似诉久离析。含悲语未毕，惊寤杳无迹。顾眄惟四壁，尔魂何由适。天路本茫茫，此理谁能识。反忆梦中情，默默思所历。

秋声何凄清，栖禽夜勿惊。我生逢百忧，感此涕自零。涕零可奈何，思君若流波。暂别伤契阔，永离况泉穴。房枕来悲风，虚空自生寒。忆昨梦寐中，仿佛睹君颜。惕寤无所见，形影空自怜。冥冥泉下人，曷云复来还。君往不复还，余生岂能延。寄居当几时，忧患在其间。昊天实为之，为之复何言。

#### 送二兄赴蜀

瑟瑟晚风兴，朗朗铎烛明。今夕共言笑，明晨即远行。清醕多且旨，嘉肴皆丰盈。行人怨离别，对酒不能倾。晤言欲相慰，未语涕自零。余心尚如此，客怀难为情。黽勉加餐

饭，温恭交友生。劝君莫感伤，岁往若流星。努力各自爱，慎勿慚所生。

流波恋故溪，栖鸟忆旧枝。感此念同生。宿夕当别离。依依家人意，绵绵游子思。鸡鸣起行迈，焉得常相依。愁多夜转促，欲语难尽辞。勿怀川陆长，相晤自有期。勿为贫贱伤，勋业自有时。愿君爱玉体，慰我长渴饥。

#### 仲秋玩月怀敬孺凤孙两兄

丹桂花始芳，绿兰香未歇。之子隔异乡，奄忽至佳节。攀桂意莫舒，采兰心自结。持此欲赠问，道远音尘阙。惆怅望遥天，寒色生秋月。月色令人悲，入户还掩扉。琐窗凝素靄，瑶席委清晖。清晖不可扫，愁怀不能道。反忆远行人，应伤秋色好。与君为连枝，相见时何少。轆轳百年间，离忧摧人老。绵绵一寸心，迢迢行里道。

#### 初晴

山村雨初晴，园林净如沐。皎洁寒潭清， 沆秋旻肃。炎暑随节阑，清商因时复。兰蕙含宿滋，葵藿倾晨旭。花篱解残红，苔蹊著新绿。良游信可欢，客意苦拘束。何以遣我怀，自种庭前菊。

#### 春日杂诗

仲春多清和，喜逢新雨后。驾言出行游，徘徊顾我囿。缟李被素锦，夭桃著丹绣。交交仓庚鸣，青青堇麦秀。穀晨亮可欢，客怀难为候。理来物非昔，感往情如旧。空怀淇潁心，徒羨松乔寿。此志未云就，俯仰终宇宙。焉得鲁阳戈，勿使曦娥骤。神仙非力求，富贵自天授。不如秉烛游，聊以慰昏昼。

#### 咏菊

百卉具腓日，东篱菊正芳。月明偏益艳，风静更闻香。蒨粲杂朝露，参差映夕阳。岁华已寂寞，不忍避秋霜。

#### 秋夜书怀

明月皎皎流素晖，宿禽栖树惊忽飞。感此夜分不能寐，忧怀辗转若有维。披衣出户何所见，秋花烂缦霜中瘁。苍昊布惠万物茂，青娥司运百卉腓。谁知造化竟何意，由来好恶同荣萎。始悟人生须行乐，胡为憔悴令心悲，慊慊怀忧终何为。

#### 孟夏读黄庭经偶题

閒阁焚香诵玉编，暗将庸智比前贤。谁知性外元无道，始悟身中别有天。金简易书消永昼，琼丹难得慰残年。谁言朝市非仙界，陶、许何曾早挂冠。

#### 九月九日与兰妹登高阁作

壶中有酒且同酬，共向西园忆旧游。万事回看旦夕异，一身体为百年愁。但寻黄菊簪青鬓，莫采茱萸怨素秋。乐饮不须辞日暮，人生能得几登楼。

#### 寄大兄

到眼韶光瞬息空，一年不觉又东风。庭前杨柳含烟重，帘外桃花裊露浓。白日全消愁思里，青春尽老别离中。不知客路能归未，且采瑶华待信通。

#### 再到西园故居偶题

前溪山色转苍然，斗觉春光到客边。忽见西园花满树，始知别后已经年。

#### 秋夜有感

风叶落空阶，秋声感客怀。多情天上月，夜夜入帷来。

### 【卷一百九十】

#### 那逊兰保

那逊兰保，博尔济吉特氏，字莲友，蒙古旗人，自署喀尔喀部落女史。宗室

副都御史恒恩室，祭酒盛昱母。有《芸香馆遗诗》。

#### 成趣园夜坐

林壑杳以深，拂石坐忘冷。凉月不亲人，孤松转清影。

#### 游西山

清晨驾巾车，日晡到山脚。顿簾不辞劳，山灵如有约。转路入烟霞，回头隔城郭。危磴杂松楸，远寺闻钟铎。孤青表遥峰，万绿争一壑。行行下筇舆，径窄步引却。还与叩僧寮，荒荒红日落。

我爱秘魔厓，怪石高撑天。复爱宝珠洞，下瞰及平田。快哉御风行，顷刻如登山。探幽及穷僻，选胜防人先。所愧腰脚劣，呼婢相引牵。夹路橡实厚，嵌石孤花鲜。流连剧忘归，峰峰凝暮烟。

#### 宿大觉寺

十亩松阴满寺凉，一条瀑布界山光。峰峦青逼衣裳冷，镫火红盘栈路长。时有微得来佛座，偶闻孤磬出僧房。游人对坐浑无睡，明日登山礼佛忙。

瀛俊二兄奉使库伦故吾家也送行之日率成此诗

四岁来京师，卅载辞故乡。故乡在何所，塞北云茫茫。成吉有遗谱，库伦馀故疆。弯弧十万众，天骄自古强。夕宿便毡幕，早餐甘湶浆。幸逢大一统，中外无边防。带刀入宿卫，列爵袭冠裳。自笑闺阁质，早易时世妆。无梦到鞍马，有意工文章。绿窗事粉黛，红镫勒缥緌。华夷隔风气，故国为殊方。问以啁哳语，逊谢称全忘。我兄承使命，将归尽锦堂。乃作异域视，举家心徬徨。我独有一言，临行奉离觞。天子守四夷，原为捍要荒。近闻颇柔懦，醇俗醺其常。所愧非男儿，归愿无由偿。冀兄加振厉，旧业须重光。勿为儿女泣，相对徒悲伤。

谢张孟缙夫人辱题小照即赠

闺阁论才子，当今第一人。我生犹未晚，尘海暂相亲。鰕菜江南梦，莺花上国春。层楼高写韵，怅望每凝神。

庚申冬寄外时在滦阳

漫道相思苦，从悲《行路难》。烽烟三辅近，风雪一裘寒。去住都无信，浮沈奈此官。亲裁三百字，替竹报平安。

卢德仪

卢德仪，字俪兰，一字梅邻，黄岩人。举人坝女孙，肃炆女，同县王维龄室，同治庚午举人太常寺少卿彦威、诸生彦澂、通判彦载、彦武、彦戡母。有《焦尾阁遗稿》。

月下读唐人诗悠然有悟

几卷唐诗手自娱，不须笺传苦纷拏。有时悟到忘言处，明月梨花澹欲无。

寄大弟温州

到今犹未赋还家，时节忽忽易岁华。增我怀思宵半月，滞人归梦客边花。终非故土情何恋，便不天涯路已赊。可识严亲悬望苦，也应穷巷赋回车。

秋夜课廉儿读诗

良宵闲雅与诗宜，清课从头莫告疲。矮屋数椽镫一点，我家喜有读书儿。

莫春偶成寄妹

雨丝风片作春寒，寂寞深闺自掩关。瘦尽梨花飞尽絮，从卿商略莫凭阑。

和夫子游委羽山诗



危峰缥缈矗云间，薄雾初开路几湾。清磬一声声破晓，閒花如雨下春山。

神仙曾此荡精灵，山水为缘感夙因。鹤自翩翩梅自瘦，教侬无福作閒人。

#### 出城

最佳风日是新晴，随意梳妆趁晓行。薄雾濛濛天欲白，流莺声里出春城。

#### 春日

绣包无事且徘徊，庭院沈沈长绿苔。一桁垂帘春昼永，桃花如雪燕飞来。

#### 闻雁

孤雁一声语，秋心暗里知。衡阳归有路，怜我竟何之。

#### 避乱感怀

不堪思往事，涕泪一潸然。遭乱又今日，浮生已卅年。傍人秋后燕，凄我雨中鹃。所幸慈姑健，犹为喜白天。

#### 避乱石{敦山}滩声作横彻夜不寐感赋一章

干戈满地欲何之，穷谷藏身岁已迟。彻夜滩声眠不得，似为羁客写愁思。

#### 避兵五部已弥岁矣长至祀先怆然有感

几瓿麦饭几盂茶，莫向荒郊泪转加。为告诸姑兼伯叔，也应怜我是无家。

#### 冬夜偶成

朔风吹雪铎光冷，茅屋萧然四壁静。避人彊起理寒衣，抚事凄凉心耿耿。忆昨宛转深闺时，春风澹冶花弄姿。买秋延夏日搜讨，花里浮生聊自怡。浮生乐事浮云幻，转瞬年华易燕雁。世事沧桑不忍闻，回首烽烟嗟岁晏。岁晏荒寒仍若斯，茫茫天意有谁知。穷谷犹传猿鹤警，亲遭兵燹将焉之。将焉之，伤别离，君不见矮屋团栾日，犹胜围城叫苦时。

#### 春草

春色渺无寄，春心无处藏。昨宵微雨过，一线草痕长。泥润看成活，风过别有香。天涯羁旅客，为尔更思乡。

#### 看花

两载干戈避，荒村暂住家。流年真潦草，此日饱看花。作色香逾媚，无言态欲斜。於君倍郑重，几忘在天涯。

### 回首

忆昨避乱时，严冬彊就道。风尘猿鹤惊，寄庑何草草。虽曰非家乡，安居亦大好。谁知弥月间，入山恐不早。爨火断无温，雪冷前山皓。浮生四十年，两度干戈扰。生恐忧患多，朱颜不自保。回首望高堂，凄然已垂老。閒閒上高楼，山远楼与齐。绿竹罩春霭，子规啼复啼。有时微雨过，芳草何萋萋。耕夫荷锄来，款款晴一犁。风景岂不佳，所伤客邸栖。回首望家园，嗟哉云与泥。

### 吴茵

吴茵，字珮纓，一字纫之，吴县人。汪鍾霖嗣母。有《佩秋阁诗稿》。

### 秋雨连旬秋意萧然握管书此

官柳河桥烟雨深，刁骚愁绪几消沈。《怀沙》空堕灵均泪，失路重悲广武吟。遥夜魂归风铎语，虚廊人去石苔侵。残山枵触馀生恨，落叶疏林黯暮阴。

### 杂诗

秋风从西来，吹我庭中树。岂无辉煌姿，零落已非故。昔年花满枝，春日迎和煦。薜华易朝夕，倏忽变秋暮。如何繁华子，同此委霜露。

招摇犹在北，明河影西沈。徬徨下前除，清风吹衣襟。露蛩栖衰草，华月明高林。流光入虚室，照我素弦琴。《大雅》不可作，抗节自哀吟。

木落波始寒，云山互重掩。黄叶满村居，归鸦没残点。平野迴寒芜，寥寥秋怀澹。闭关穷林中，荦确畏险。贤达与蠢愚，何者且知勉。盛年各有待，努力贵自勉。

### 夏日杂兴

荷叶何田田，白蘋更冉冉。诗人义同采，讎兴初不辨。诂知其本殊，出处亦相反。荷叶自有根，蘋乃随波转。飘泊既靡定，流荡复忘返。所以臭味殊，割席有华管。

猛雨过恶木，森森有馀阴。憔悴所不息，亮哉志士心。天道自迢邰，矧兹白日骛。登高一以眺，浮云蔽遥岑。猗嗟心怫郁，写我刺促吟。刺促歌终竭，向风聊开襟。

### 秋窗夜课风雨鸣檐百端交集凄然成咏

竟夕吟未已，翛然对短檠。无家成濩落，有梦未分明。秋老江湖色，风高鞞鼓声。残篇空自检，幽恨总难平。

读罢《江南赋》，伤心泪不乾。孤踪愁蠹负，三徙困鹏抃。雨暗蛩音细，宵分客梦残。独怜身世浅，零露未成餐。

西风动禾黍，败叶堕梧楸。空寄蜉蝣世，难寻麟凤洲。烦忧伤拥树，多难怕登楼。怅怵重泉杳，孤魂何处求。

回首殊风景，惊心感奈何。关山驰羽檄，荆棘没铜驼。变徵吴歎促，幽忧杞国多。寒窗镫欲烬，诗思尽蹉跎。

#### 佩秋阁同诸姊夜坐赋赠归庐江氏仲姊

频年踪迹感难知，残竹哀丝又一时。斜月帘钩风弄影，小窗镫火夜填词。兵戈聚首良非易，涕泪馀生最可悲。太息蘋蘩劳悴甚，为君重赋《硕人》诗。

#### 西岩访桂不果后十日凤冈登眺并寻山中古迹

太白仙人不可作，卧游庐岳图龙眠。一丘一壑放神志，志松之游吾虚焉。秋风丛桂花徒发，謁来招隐穷危巔。餐芝朝漱钟山液，拄杖西笑峨嵋仙。云物幻变万峰顶，排空直上凌紫烟。瀑布琤潺琴筑响，崖嶂合沓梯栈悬。选石危坐涤尘虑，春芽手里烹山泉。夕阳西下叶满寺，暮云明灭争秋妍。陂陀芊确寻古径，岩穴别见开洞天。古墓不归华表鹤，残碑剥落藤纠缠。洞阴狡狴閤日月，采薇寂寞三百年。回首荒台走麋鹿，颓波不激悲前贤。缅怀高风嗟已往，平原衰草流逝川。踟蹰茧足下山麓，夜深清梦飞蹁跹。

#### 明锦衣卫牙牌

东林下狱钩党死，宫门铁牌卧不起。城狐社鼠肆炎威，海水波澜从此始。方寸之牌铸错成，匹如挥掷银铛声。客魏荫子赐铁券，岂知有齿终焚身。牌出东司百有七，比似朱仙下更疾。矫旨不闻诏延尉，但见缇骑纷四出。当年毒焰凌衣冠，有若处置腰间悬。杨左君子一网尽，厂臣威柄生戈鋌。吁嗟乎！虎豹狺狺九关闭，天子无愁阶之厉。可怜宫殿已含秋，鹿角银牌荒草坠。此牌弃置三百年，圭棱历劫磨方圆。微物偶传果何有，土花斑驳犹腥膻。思宗未造振乾断，诛及无须嗟已晚。史家捉尘说兴亡，风雨孝陵耕玉碗。

#### 酒醒

霜重天初晓，馀寒醒宿醒。芜城老秋色，沧海感浮生。明月刀环梦，残山鼓角声。八州今已寂，遗恨写兰成。尘暗秋无迹，窗明月有痕。露蛩自凄吊，栖鹄互惊翻。漆室空悲志，巫阳失问冤。独弹家国泪，残野卧荒村。

#### 梅里卜居

海虞旧灵藪，劫后长蒿莱。焦土馀生藉，官仪旧制回。潮平沙港没，风细塔铃哀。虎口从今脱，旅怀得好开。

#### 寄怀湘雯申江

乍别梅花阁，长吟折柳条。衰时多梗道，客思逼中宵。芦荻秋翻雪，鱼龙夜吼潮。有怀吟絮侣，星旦赋招摇。

谁怨平羌笛，嗟余行役休。木棉攀北渚，金雁度南楼。戍鼓催残梦，孤灯暗早秋。故人愁不见，烟水满汀洲。罢著《閒居赋》，同怀蹈海心。遥怜东阁夕，细谱《水龙吟》。良觐兵戈阻，餘

生涕泪深。刺船人已老，祇自鼓瑶琴。吴头通楚尾，一水急波澜。海气冥冥雨，江湖漠漠寒。瑶华双鲤札，乡梦五湖竿。吾辈真如寄，敢辞《行路难》。

### 琴川寓馆同兰生夜话赋赠三十二韵时余将之娄江

人生慳遇合，踪迹尤难明。寓目瀛海内，怀抱端忧生。行止矧无常，岁月坐峥嵘。年来苦充斥，转侧嗟经营。开窟愧狡兔，琐尾随流氓。三月赁君庑，幽忧甘藿羹。小窗共镫火，月落参斗横。是时秋气深，萧槭枯桑鸣。寒蛩绕四壁，明河耿西征。稍闻刁斗劲，愁逐车轮萦。蒹葭秋水阔，飞鸿堕哀声。输君鹿门隐，力作研田耕。词夺贾岛瘦，神似卫玠清。珠玉一咳吐，恍聆九凤笙。临池无暇晷，墨水生光精。纵笔逞姿媚，运腕烟云崩。剡藤茧纸厚，兽骇而蛇惊。君言有女弟，霜姿如琼莹。荒园伤漆室，别鹄悲陶婴。闭门甘澹泊，抱木慕女贞。雏凤喜颖慧，神情似舅甥。零丁日坎坷，造物洵忌盈。兹言足叹息，抱命莫与争。即今干戈际，无处堪避兵。此方濒海壖，劫后扫榛荆。羽书日夕下，江上愁孤城。楼船近驻节，横海翦鲛鲸。沧桑幻乡国，方寸如悬旌。因君慷慨志，感我艰难情。琼瑶辄相报，意气贵相倾。良会不可常，美酒贻双罍。何当图雅集，一举二妙并。

### 晓发梅塘寄怀家姊

熵如津鼓歇，舫舟泊村岸。野犬声渐微，荒鸡夜过半。霜华压篷背，冷露汀草漫。居人方梦酣，行子已戒旦。晓风袂被寒，戢戢听解缆。其时月未堕，斗柄光犹烂。孤芦响萧瑟，秋虫续发断。时危互戒惧，夷险路难判。篙师贪程发，吾心忧丧乱。扬舲过浦溆，渐见东方灿。晨光暖熹微，晞发宿雾散。谁念去乡国，吁嗟违亲串。眷言同怀人，云中君不见。

### 舟次白柳塘遇雪至梅里闻省城克捷时癸亥冬十月廿五日也

白柳扬帆驶急流，荻花枫叶渺沧洲。江潮夜走重关怒，吴榜朝喧估客愁。落日冻云迷泽国，朔风吹雪上征裘。羽书一月传三捷，喜说将军入蔡州。

### 归次沙头宿龚氏草堂夜雪怀臞仙

消息江湖断，天涯怅盍簪。琴书高阁迥，风雪夜堂深。蜡泪铜盘腻，苔纹石齿侵。谁怜倦游客，醉墨此题襟。

### 初入郡城

西风吹木叶，放溜出空山。作客能无悔，浮家独后还。芜城遍衰草，战血尚馀斑。

辛苦乡关路，因之涕泪潜。

#### 雨中还山感赋

山雨抽帆野色昏，琳宫销歇断垣存。连江烟树迷吴苑，倚枕风涛入海门。路绕横塘初背郭，桥回早市自成村。谁怜劫后重经棹，肠断难招未返魂。

#### 送业师鹤巢夫子公车北上

绿波春水孝廉船，计日回翔学士砖。驿路梅花欹席帽，津门柳色上吟鞭。歌残渭雨愁三叠，梦逐京华路几千。若忆故山猿鹤侣，宦成应赋《遂初篇》。

#### 王采蘋

王采蘋，字润香，太仓人。无锡举人程培元室。有《读选楼诗稿》。

#### 白荷花

亭亭翠盖覆华池，独立谁怜绝世姿。一镜清波低照影，月明风静露凉时。

#### 秋窗夜读

斗室绝尘嚣，澹然清百虑。一卷读未终，暝色起庭树。焚膏用三馀，中馈毕群务。惜此良夜长，疏镫耿兰炷。明月静罗帷，流辉照简素。澄怀得微会，知新在温故。清幽庾信诗，绮丽相如赋。朗诵恍有神，流连得真趣。渐闻林鸟啼，疏帘透风露。

#### 题婉紉从母师绿槐书屋诗稿

清才亚班女，家学绍中郎。一卷五言诗，玉振谐笙簧。思亲赋蒿莪，忆弟梦池塘。澄怀鉴明月，清节含冰霜。人事慨变迁，抚时多感伤。义心激苦调，幽意凄金商。洞庭秋水深，木叶飞潇湘。灵妃鼓瑶瑟，天地皆苍凉。潜螭跃神渊，孤凤栖幽篁。空山悄无人，日暮秋兰香。茅屋埋穷阎，所思在沧浪。灵珠俨盈握，尘垢随风扬。少小侍宣文，纱幔授篇章。所愧性庸愚，学步终茫茫。十年困墙面，师资未敢忘。缅怀列国风，二《南》何洋洋。蔚为风教始，千载流芬芳。后世何陵夷，日下江河长。浮华失明性，俗变嗟靡常。何当播希声，薄海休风彰。古来移国俗，匹妇有札梁。仰止望高山，顾影心徬徨。

#### 偕右星弟回楚晓发禹州却呈舅姑

朔风吹空林，月黑天茫茫。羁怀迫残岁，望远魂飞扬。吾弟蓟北来，促我戒归装。艰难成一官，萧瑟馀妖孳摇寒芒。州城常戒严，军政迫不遑。安能顾儿女，言归慰高堂。烽燧幸暂休，豫楚同丰穰。念我白发亲，倚闾久相望。命我赋归宁，慈恩浹肝肠。去住难为心，万绪俄低昂。女子古有行，善全竟无方。中宵不成寐，揽衣盼晨光。举室送我行，相看意徬徨。忆昔初来时，夭桃花正芳。今日得归去，寡鹄悲何长。三十鬓已丝，顾影怜清孀。沧桑多积感，人事纷难量。哀哉生别离，两地同参商。何当联骨肉，聚首共一堂。再拜恋庭帟，

涕下沾衣裳。君姑执我手，丁宁话难忘。水陆千里馀，关津限河梁。征途值隆冬，木落飞严霜。古驿生骤寒，周道多虎狼。朝晚宜自慎，小别原寻常。闻之益悲怆，欲答不能详。挥手强出门，惆怅若有亡。倏忽已三舍，轮蹄去何忙。草枯蔽原野，落日征尘黄。钓台渺何处，凝睇空神伤。

### 述哀

改火感桑柘，倏焉已再期。松楸望难极，响象茫难追。招魂峡江头。甘醴盈尊罍。援琴不成声，万绪纷如丝。同气三五人，慰我毋自悲。我悲讵能已，惻惻中肠摧。俯察逝水流，仰瞰孤云飞。年命亦靡常，泉台会相随。灵旗渺何处，烈烈飘风来。

一恸对几筵，旧事感历历。吾舅官均州，十载多政绩。棠阴俨然在，樵牧勤护惜。斯时况多故，剽掠纷盗贼。孚信能足兵，清野在坚壁。捍御何辛劳，听宵忘寝食。催科拙甘任，逋赋日已积。空余利济怀，宁免司牧责。改官赴信阳，捧檄嗟行役。能无折腰叹，感此暮景迫。引疾聊息肩，就养足怡悦。堂构喜克承，循良有貽则。武邑与蔡坡，弦诵同一辙。奈何爱日驰，五载去飘瞥。欢惊杳难追，兰寝断行迹。再歌《蓼莪》篇，呼吁亦何极。

缅怀属纆时，死丧叠相继。舅老白盈颠，频年病惊悸。大药苦难求，骑箕竟长逝。叔也二竖侵，和缓费疗治。兀兀簿书间，食少形已瘁。一朝构凶凶，天性难守戒。姑也体素羸，神伤益憔悴。抚兹杞妇悲，复洒西河泪。全归庶无憾，遗痛曷有既。嗟哉薄宦贫，棺衾未预置。斯时夏正中，炎热如火炽。瓦盘挹水多，葵扇招凉至。三日殓始成，惴惴胡敢懈。蹢躅一号啕，惨惨日阴曠。天道其宁论，胡为酷如是。

旅殡何苍凉，窀穸犹未安。期年议始定，众口徒纷然。厚薄本寸心，庶免悔吝愆。故乡千馀里，水陆多险艰。萧萧班马声，瑟瑟丹旌寒。护持赖手足，凡百皆周旋。奈何未克归，执紼随征鞍。百身安可赎，眺远空长叹。何当侍先茔，诛茅结一椽。瞻依傍松柏，享祀供蘋蘩。风尘正湏洞，双鬓惜已斑。丹砂竟何益，仙驭茫难攀。安得少伯舟，飘然五湖边。斯怀苦难遂，奋往无修翰。平原愁纵目，短碣埋荒烟。何时马鬣封，恩光被重泉。一为《蒿里》曲，援笔涕洟澜。宦游客中州，飘零馀八口。清风传奕世，囊橐无所有。官逋及私负，累累积如阜。典鬻易米薪，操持到井臼。幸有娣妇贤，艰难互相守。风雨何飘摇，谁与保户牖。苦居失昏旦，愤愤如中酒。刻木空肖形，英灵俨座右。遗物少奇珍，故衣杂佩玖。緘封未忍开，奚必竞分割。岂无萋菲言，利害切肤受。信我皎日怀，中表谊尤厚。伯氏篆固陵，禄米分升斗。日给仅可敷，忧来独搔首。安贫本吾分，内省亦何咎。媚时宁有方，取舍忍无苟。生意何寥寥，微躯当速朽。

### 种菜

蔓草盈中庭，荒秽不遑理。晨兴课老妪，辟径携耒耜，蒹除绝其根，萌蘖庶可止。隙地颇有馀，众芳惜已萎。园蔬随意栽，御冬谋蓄旨。翠甲喜渐肥，黄芽美无比。霜严能耐冷，雨过净如洗。亦有岁寒心，青青常不改。地僻无珍羞，官贫少俸米。佐我菽水欢，足以充簞簋。朱门饕梁肉，沟壑多冻馁。山陝犹用兵，荏苒苦难已。空留诸葛名，莫有奇人起。浮生丧乱馀，一饱亦已矣。国计难与谋，世事何足齿。抚兹学圃心，贤者亦乐此。毋辞灌溉劳，抱瓮时汲水。聊当秋花看，一碧亦堪喜。骚客去已遥，凭谁艺兰芷。

朱保喆

朱保喆，字锦香，长兴人。钱塘侍郎谥文节戴熙子妇。有《霁月楼诗存》。

绝命词

烽火连宵警，长城一旦倾。伤心惟有泪，取义誓全贞。性比坚金固，身如朽木轻。寸灵终不泯，杀贼待来生。

严永华

严永华，字少蓝，桐乡人。安徽巡抚归安沈秉成继室。有《纫兰室诗钞》、《蝶砚庐诗钞》。

拟古

弹雀珠陨山，斩蛟壁沦水。知之不甚惜，未足为知己。楚王称爱宝，贱目而贵耳。鼠璞既争投，燕石复深喜。哀哀荆山隰，泪尽卞和子。

阳春被原野，百卉日以滋。幽兰托深谷，匪石不可移。娟娟如美人，岂藉东风知。无言谢桃李，珍重繁霜时。

武侯祠

丞相祠堂吊夕晖，森森翠柏俨成围。百蛮风俗留铜鼓，一代勋名本布衣。北伐未能恢帝业，南人终古慑天威。当年将略难轻议，长有风云听指挥。

送叔和兄归试

今朝分袂去，两地鹧鸪愁。浙水怅离别，华山怀唱酬。莺花动西笑，风雨壮南游。遥指滇池路，行鞭去不留。

次韵绚霞嫂行次泾南见怀

人间最苦是别离，一别如何遂二期。天边鸿雁忽飞至，新诗慰我长相思。既言怀才如谢女，又言佩德同班姬。感君期望意良厚，初七下九徒荒嬉。忆自五华一挥手，无复领略书画诗，惜哉相思不相见，长夜魂梦空奔驰。我居蒲门已二载，山城地僻多蛮夷。今忽闻君赋行役，蒲帆日挂河之湄。暮云春树望不极。恍从落月窥芳仪。见何难兮别何易，珍重迢迢双鲤贻。

送缙生兄赴黔

聚首既云乐，肯复分两地。今朝忽临歧，此别殊非意。忆我垂髫年，曾向绛帷侍。三月坐春风，居然动诗思。擘笺送君行，耽吟自此始。君生有夙慧，笔挟风云气。抟扶期直

上，胡为艰一第。科名不在文，我早识此义。先君虽久宦，为政称廉吏。身后竟萧然，至遗慈母累。饥来驱君行，出门一挥泪。黔中君旧游，云天有高谊。使君况友善，愿拜麦舟赐。炎飙正酷烈，珍重慎寝馈。计程无一月，尺书勤寄慰。沿途揽名胜，佳句收灵异。境穷诗益工，斯言良可味。相顾增太息，会难别何易。

#### 石虬亭

滇山看已遍，来上石虬亭。嵌壁碑文绿，盈阶草色青。相逢原旧识，此别可重经。倚柱閒吟句，神龙漫出听。

#### 夜作

钟残未忍眠，惜此一池墨。拈毫作小诗，妙在无心得。

#### 取雪煎茶戏作

蛮奴缚帚不须忙，留取中庭白一方。学得仙人餐玉法，重楼十二转神浆。

蟹眼初翻颗颗珠，斟来香色味皆殊。《茶经》但著人间品，识得天河一派无。

#### 拟古六言

夏姬十年转少，戴洋五日重苏。服媚不求荀草，长生要诣蓬壶。

康成婢子识字，逸少保母能书。渺兹青衣尚尔，可以吾侪不如。

隐逸虽云有福，神仙自出无心。请看入洞刘阮，绝胜辞家向禽。

#### 蜗居

短短墙垣曲曲篱，蜗居小隐北山陲。入门绿雾迷三径，绕屋红泉汇一池。竹影暗摇疑凤舞，波纹圆动觉鱼嬉。笑他广厦千间想，谁及壶中日月迟。

#### 再次叔和兄感怀韵

旌旗猎猎拂云杓，燕寝凝香逐处飘。帝识张堪多惠政，人推黄霸重当朝。春晖可爱斑衣暖，卿月长悬剑气消。笑倚慈闱言故实，南朝女戴侍中貂。

年来兄弟惯天涯，冀北江南倍系怀。千里寄梅缄玉札，几回对月卜金钗。时艰转觉勋名易，俗美因知政事佳。幸我迟来春未暮，犹薰花气满衙斋。

乙丑五月十四日叛苗陷石阡叔兄巷战死节余亟负母逾垣出余人从之既闻贼将至全家投署后荷池中贼相谓曰严太守清官眷属不可犯也遂得免贼退后奉母旋里途中纪事



边城从古叹孤悬，忽见军烽照义泉。狭巷短兵相接战，亲闱永诀敢图全。衔须温序忠魂在，食肉班超壮志捐。恨乏兰台修史笔，《国殇》犹待杀青编。

早办靴刀一死轻，全家蕉萃困围城。已拌沈水从先络，谁使逾垣作吕荣。天意欲全黄口嗣，时危竟弛赤眉兵。惊魂定后还思痛，自是明祗感至诚。

吏才经术久闻名，东海争夸万石荣。毕竟家声传义勇，早知天道极神明。白头色养心馀恋，朱鸟归来泪共倾。最是联床思旧约，中宵风雨怆离情。

瘴雾蛮烟路欲迷，荒村野店听鸣鸡。只知当道横黑虎，又说严城急鼓鼙。饥鼠夜深背镫出，怪禽日落向人啼。加餐还祝慈闱健，早晚归程指浙西。

#### 双山寓庐

应龙矫天闾，威凤巢阿阁。敢与燕雀齐，所志但帷幕。偕隐双山间，一廛差可托。诂爱岩涧幽，聊寻亲友乐。和气含古春，雅怀申新酌。镜中罢晓妆，晴翠当窗落。春色方骀荡，乘烟命筇舆。升高望苍雪，上有先人庐。鞠荒元亮径，蒿没仲蔚居。所思隔云水，欲往徒趑趄。乾坤同逆旅，古人已启予。随分笃古欢，怀抱且自摅。山斋新雨霁，时觉花药薰。隔溪白发姊，遗我冰雪文。开缄一何丽，锦织天孙云。吾家十姊妹，君独思不群。阿兄富文藻，笔扫貔貅军。何当联白社，驻此青山曛。玉蜍跃东海，清辉照虚室。偶坐怀抱开，相与理瑶瑟。赏心惟良知，笃好贵真率。如月恒当头，如桐日横膝。愿效高柔贤，陋彼莱妻逸。三复河洲篇，与子以为弼。

#### 题焦山吸江楼

到此游踪倦，山椒旧有亭。一椽聊可憩，四达不为扃。石佛低眉坐，云君招手停。老龙听诗处，清韵发中泠。

绝顶临高阁，苍茫入望收。山含太古意，月照大江秋。云水通呼吸，帆樯自去留。何须扫浓翠，面面豁吟眸。

#### 春日偶成

鹊噪晴枝傍绮栊，东风吹放小桃红。暂开帘押迎归燕，偶擘云笺寄远鸿。春事今朝花影里，诗魂昨夜雨声中。寻芳双蝶过墙去，绣陌新添绿几丛。

菜花风过又清明，深巷箫声记卖饧。画好终须摹古意，才疏每愧负时名。居凭楼阁神先旷，案有琴书气自清。更欲移家远城市，五湖烟月不胜情。

#### 杂兴

班惠传家学，岂惟富文词。和熹实受业，景耀铺来兹。元兴延平间，功德何巍巍。定策采人誉，群公协畴咨。损膳赡黎苗，流化加华夷。长乐有记注，典训归母师。官箴最清静，女诫垂令仪。彤管表风烈，愿言告所司。

昆仑与玄圃，实惟王母台。云和扬妙音，容成进玉杯。双材悲不纳，抗歌一何哀。戴胜愁既欢，蛾眉矐已摧。幸有三青鸟，为我衔书来。阿环总真籍，五岳秀骨开。元气互不死，与之久徘徊。神仙济万世，蜉蝣安在哉。霆声发春荣，百卉纷以茁。清风有时来，香草遂见别。幼清好奇服，纫之为佩纁。盈腰户服艾，不采庸何伤。众嫫妒盛颜，彼姝爱时节。愿言长敷荣，毋使芳非歇。

浙江指滇池，计程乃盈万。先君赋行役，边徼扬令问。文翁辟讲肆，弦管有流韵。乐职已陈诗，讲德方撰论。空馀神马颂，竟绝碧鸡讯。愧非伦芝才，清名轶南郡。

边郡荒以寂，土风清且敦。叛夷一朝集，守兵焉复存。叔兄何慷慨，辞诀堂上亲。竟为侍中血，宁惭温序魂。余时负母出，逾垣若有神。岂知质孱弱，忽然已忘身。全家赴清池，誓不为瓦全。提携出重险，祐助感自天。至诚岂能格，忠义固所安。安得惇史笔，垂光照重泉。

猗猗萱草花，郁郁荆树林。宛宛女贞枝，恻恻卷施心。自谓永不衰，托根在同岑。人事忽乖迕，霜霰遂见侵。中夜揽衣起，鸿雁流哀音。披帷见明月，感彼商与参。《河广》及《载驰》，命意一河深。女子信善怀，惻怆匪自今。瑶京不可即，天风吹佩环。峨峨古神女，玉座何便娟。祸福生呼吸，恩威伺容颜。众灵杂遘至，恍惚云雾间。嗟彼愚下人，欲见无由缘。愿借白日光，排空接灵輶。济南儒家子，实授《尚书》传。木杏与金祥，五行善推衍。水旱各有徵，天意不虚谴。自从新法行，罕复论灾变。阴阳互消息，精义於兹见。请陈《繁露》戒，聊代百工谏。

汉译四万里，博望开其源。遂建都护号，复设戊己屯。称乾多善幻，荒诞难具论。舟车行千里，权輿实椎轮。塹山而堙谷，欲穷造化根。滔滔尽西逝，狂澜日崩奔。汉阴老抱瓮，亦复贍一身。九阍傥可叫，吾欲室巧门。

仕宦囊金帛，商贾争锥刀。富厚众所归，趋之非一朝。子弟夸玉馐，宾从御狐白。岂知冻死骨，藉藉满草泽。恶盈固天道，多财为害患。百年会有尽，膏火相熬煎。钵飴熏毗邪，同食故不餒。愿此檀施开，功德难思议。

桃李岁再实，来年为之衰。求鱼至乾谷，岂复遗鯢鲋。利不自地出，亦不自天来。桑孔精心计，利源自兹开。吾观《盐铁论》，斟酌堪活国。文学何纵横，祝生古遗直。彼哉两府士，斗筭固容默。勿貽匈奴羞，中朝思袞职。

杞人虑天倾，鲁女忧园葵。漆室倚柱啸，岂复中顾私。微生饰笃陋，亦荷造物慈。况复借光宠，出入有羽仪。瞽诗及夜诵，良意有所规。虫蚁示赤心，言故不足施。

桓氏传经学，文林有志介。愧非五更后，累世见宗派。诵芬守儒素，敢忘清约诫。操行良所奇，贞枝要当戒。骢马行步工，门间会将大。

双壁曜郢握，并是荆山璆。感此大造恩，锺灵贲岩幽。他山有攻错，比德君子侔。太璞绝雕琢，夜光无暗投。祥金羞跃冶，志士诟衒媒。特达有真赏，席珍方见求。垂声满天汉，腾光烛遐陬。率璠未足俪，勛哉绍前修。

### 泛舟横塘

垂柳阴中一苇杭，篷窗瑟瑟水风凉。横塘西曲閒鸥少，输与冰莲十里香。

登耒三月随外子挈松柏两儿买棹游西湖还登烟雨楼遂至青镇奉母返吴门作诗四章以纪之

西湖幽绝处，人迹罕经行。古木四围合，野禽三两声。孤山终不俗，处士旧留名。欲荐寒泉菊，高风同借宿招提境，吟诗静夜分。月光初地见，花气后台闻。何处晓钟动，满城香钵熏。山僧绝供亿，欹枕卧看云。水鸟飞何处，苍茫云满湖。《棹歌》有遗响，不见小长芦。浦溆仍烟雨，楼台似画图。家风在严濑，能把钓竿无。

曩昔执箕帚，扫君堂上尘。仁人许乌哺，供养白头亲。画舫归装便，安舆乐事频。愿持九酝酒，酿作一家春。

### 外子侨吴十年矣甲申冬以京兆诏起感述

伯鸾高士未受职，五忆长谣去京国。运期姓氏无人知，汉皇悲伤求不得。我佩子綬逢清时，左殮右粥皆帝力。赁庑聊复充偕隐，灭灶何尝希悻直。往者巨屏防蔽贤，坐耗太仓自投劾。本非汲黯薄淮阳，敢望樊英应坛席。忽闻徵辟到东山，便办严装趋北阙。黄图三辅古称雄，赤县九门今更剧。自从近畿更水旱，未免穷檐有饥溺。要令襦袴遍拊循，庶几桴鼓少衰息。东望瀛海通析津，北游空桐戴斗极。鹿车对挽夙所慕，油幢共引愿岂及。画眉未敢被轻情，蓬头幸复知礼则。京秩从来策旧勋，夙夜寅清励明德。

### 羊流驿

堕泪碑前百感生，泰山姓族旧知名。行人但指羊流驿，岂识当时有宪英。

### 浯溪行

昔读磨崖碑，已耳浯溪名。今向岭西游，快作《浯溪行》。浯溪之水清千尺，浯溪之石更奇特。次山文字平原书，万古光芒烛奎壁。嗣皇灵武成中兴，元戎两京显殊绩。惜哉张、李乱纪纲，我览斯文增叹息。当时不识颜真卿，天生汾阳为社稷。壮士解衣吁可危，槛车就逮寒无色。若非仙李识奇才，那得冲风起云异。纵令厮养皆英雄，要伏词臣大识力。苍茫怀古意无限，老枫无言山自碧。更将揽胜登广吾台，遗址荒凉不可得。记委符节归江湖，賸有窠樽涵月魄。振衣四顾浩悲歌，行人指点漫郎宅。

### 琼花

海山仙人玉炼颜，峨峨高髻齐桃鬟。蛮烟瘴雨侵不得，时有天风吹佩环。芳姿独立映南极，姑射肌肤谢莹饰。月殿霓裳自一奇，仙家琪树应无色。飞琼姓字蓬莱注，步虚声里银河度。但觉瑶台露气清，焉知尘世风光暮。秦女骖鸾凌紫霞，奇馨曾引七香车。烟霏鹤唳渺何处，犹忆唐昌玉蕊花。

随宦桂林未遂揽胜之愿忽忽去阻雨愆期因挈马甥瑞熙女寿慈两儿瑞琳瑞麟登叠彩山盘桓竟日赋此留题

桂森山水窟，名甲寰宇中。天教廓诗境，宦迹留泥鸿。未遑事幽讨，尘俗空填胸。携雏欲先去，归棹寻吴淞。仆马已在御，歌骊行忽忽。阳侯若有知，恍惚梦里逢。为言名胜地，自古无异同。胡为滞溪游，长歌诗兴浓。兹境不一顾，毋乃情不锺。因之小作虐，澎湃横流冲。颠风已断渡，媮閒访灵踪。山城无百里，跌宕多奇峰。层峦叠锦彩，佳气郁葱茏。飞阁出岭表，清赏溯元公。古堞隐崇雉，深涧饮长虹。坐久心颜开，瑟瑟来清风。雨馀空翠滴，洞古白云封。豁然忽开朗，异境探不穷。老佛坐岩际，天半闻清钟。青山寿太古，底事首尽童。俯仰忽有悟，山性与人通。此邦人质直，山亦无修容。参差如束筍，夭矫若游龙。山下多沃土，潏洄水一泓。种荷能消暑，种桑倍农功。民瘠久必乱，民裕国乃丰。愿民登衽席，蚕织毋疏慵。漓江波似镜，倒影青芙蓉。小艇自来去，荡漾双桨红。清景俨图画，拙笔摹难工。凭眺不忍去，夕照辉长空。何当携绿绮，一鼓《风入松》。

严澂华

严澂华，字稚芎，桐乡人。顺宁知府廷珩女。有《含芳馆诗草》。

早梅

占断春风第一枝，银钩低挂玉尘吹。清标压倒繁华境，桃李纷纷总后时。

中秋

问取天香信若何，桂枝摇曳漾金波。一年月色此宵最，四海秋光何处多。安得长绳羁玉兔，可无佳句侑红螺。遥闻隔院儿童语，连臂街头去踏歌。

留别威清官署

容易流光过两春，却从临去倍伤神。名花也解留人住，又向枝头著意新。

燕子多情去复还，教依别思几回环。不知今后红闺内，又是何人整翠鬟。

寄怀少蓝姊

绣阁知君乐事多，唱酬从此仿鸥波。何须更学新眉样，相对双山写翠蛾。

郭筠

郭筠，字诵芬，蕲水人。道光戊戌进士、两淮盐运使霈霖女，湘乡大学士谥文正曾国藩子妇，举人郎中纪鸿室。有《艺芳馆诗集》。

示儿子广钧应春官试

男儿贵自励，秋实滋春华。神京旧游地，飞盖耀朝霞。怀抱非楚璧，雕虫慎毋夸。努力事砚耕，夙夕勉休嘉。先德缅高风，敬畏理无差。勿为流俗迁，言行相毗夸。驱车不遑息，祇役出田园。明星杂微月，残暑映离筵。肃肃戒宵征，闻鸡促先鞭。野树合浓云，江花湛露圆。葆真而守约，嚣烦自能捐。小住石城署，承欢杖履前。蒙荫蹈良规，进退毋自专。秋至百草凄，转轸无流连。行矣慎寒暑，戒之在短篇。

#### 故园

杨柳参差漾晚风，十年归认旧帘栊。方塘水满秧初绿，别浦春回杏晚红。处处青山含翠黛，依依松竹郁葱珑。盘餐翦韭香粳熟，戚友相逢酌圃中。

#### 次韵钧儿山居

残曛隔岭冠轻霞，疏柳微风宿暮鸦。数顷秧田飞白鹭，西头槿壁粲红花。王孙洲上樵踪细，帝子祠边社树斜。似比东山更清绝，愿分杨柳即移家。

#### 广铨北上书此训之

欧美辞家已十年，闻鸡更欲整先鞭。征途远涉愁风雨，世事何知有变迁。祖训能持期恪守，清芬无替继前贤。京华挟策怜游子，陇树燕云有梦牵。

#### 六月十九夜玩月有怀钧儿京师铨儿泰西偕镕珊兄妹同作

空庭凉意似新秋，露下晴皋湿翠畴。淡淡轻烟迷远岫，盈盈新月上帘钩。不殊风景人千里，尚识离情遍九州。独羡忘机垂钓客，烟蓑无语狎沙鸥。

#### 大沽乘轮赴浙寄俞氏女夫妇

流年时赋《北征》，车轮镗鞳梦难成。波摇银海千层碧，月傍琼霄一点明。往昔双飞成旧恨，中年百病剩馀生。蓬莱何处求灵药，芟却牢愁霭太清。

#### 春间广钧来书将归里门欲改外官

修竹间三径，林庐自在春。水回流水活，门掩杂花新。志岂求温饱，诗应泣鬼神。思亲数行泪，独感二毛人。

#### 分韵教育歌

四坐且勿喧，听我歌教育。平明入书舍，日午黄粱熟。亭亭倚石松，裊裊当窗竹。心神日怡畅，志虑自纯淑。淹博通五经，卧游记荒服。地脉探全图，天文指列宿。士商与农工。义务各竞逐。或驾轻车游，或篝青镫读。瑚琏贡上方，东庠式乡族。由来弱积久，因循怨当轴。果能求实效，何必畏伸缩。比来数年中，时时弃边幅。达者处艰危，志士频眉蹙。扫除积习深，无为珠蕴椟。勤能百艺兴，杞忧空击筑。育化教青年，普天邀百福。

### 湘水谣

湘山青，湘水秀，山川孕灵多结构。瞥眼韶华四十年，旺气消磨暮烟凑。城中向未经兵革，夏屋渠渠比相接。不知天意庇此方，祇道金瓯固无缺。东省流离失元气，广西跳梁尤难制。男儿不令事诗书，窄袖蛮靴逐游逸。夜半笙歌响遏云，日中绣被犹横膝。生男悬弧虽足珍，寒暖保媪时睢巡。不明教诲育儿法，偶有病疴祈灵神。长沙近日颓风教，日日拜神为尽孝。玉颜沙土拜香歌，破钞羞颜人尽效。男儿自弃真庸愚，妇女讽经不循道。混混世间人，猛省犹可造。天生动物类，为人最精巧。名誉胜黄金，志岂图温饱。君不见扶桑东海青年志，学校分科穷力治。人人奋勇储英才，男女同功参奥义。养成锐气振环球，武略文名典章备。当年彼我本同文，倏尔失足千丈深。依人俯仰如病虎，自困非必因书焚。湘流浩浩山青青，岁月掣电如马奔。谁能拯此立根本，震雷惊醒同俦魂。

### 秋日过振艺女塾

荻花霜紧雁飞回，乘兴重来问讲台。天女殷勤裁锦去，青娥辛苦织机来。海琴学鼓《归风曲》，江笔应怜咏雪才。欲济时艰期裕国，七襄璀璨绣成堆。

### 何慧生

何慧生，字莲因，善化人。临桂龙启瑞继室。有《梅神吟馆诗集》。

### 春闺杂咏

湘帘半卷梦初醒，閒听争巢燕子鸣。人静绿窗春昼永，落花如雨点棋枰。万籁无声天地空，帘钩摇荡画阑风。楼台十二明如雪，知是银河月正中。

### 江行

长江波浪静，清露夜沾襟。万里飞鸿急，千山落叶深。寒猿啸云谷，冷月泻霜林。愁听芦花下，秋虫唧唧吟。

风物夜凄迷，天边远树齐。云深猿啸谷，石乱水鸣溪。野岭三更月，寒城半夜鸡。客情正无限，怕听子规啼。

### 春日閒居

片云孤鹤兴无穷，野水危桥处处通。十里琴箏人似玉，五陵冠盖马如龙。楼台隐隐寒烟外，桃李阴阴细雨中。回首沧波空叹息，六朝剩有夕阳红。

### 感事

天下兵犹满，司农算已空。群黎饲豺虎，战士几沙虫。扫荡知何日，谋猷误数公。可怜惟赤子，无路诉苍穹。

王师已疲困，盗贼尚纵横。四野空闻战，频年不解兵。颇劳持使节，何以对苍生。感慨惟长叹，深恩负圣明。

#### 放言

天涯扰扰尽风尘，欲报君恩愧此身。若使朝廷用巾幗，高凉应有洗夫人。

#### 寒夜吟

寒风萧萧响修竹，抱琴閒作《水仙曲》。月明天际鹤归来，夜深独伴梅花宿。

#### 邓瑜

邓瑜，字慧珏，金匱人。奉化知县恩锡女，钱塘举人、知县诸可宝继室。有《清足居诗词集》。

#### 喜晴与杜表姊景姜同作

久雨喜新霁，晴空旭影浮。狂花如欲笑，眠柳若为愁。重订湔裙约，还邀拾翠游。春郊浑似画，无限暮山幽。

#### 夜坐假寐得末一韵因足成之

俯仰乾坤感古今，倦时假寐醒沈吟。无情暮杵催愁起，有味寒鐙耐夜深。自分性迂甘忤俗，转欣才拙少知音。痴魂愿化天边月，照彻人间静女心。

#### 戊辰九月将从楚游留呈两大人兼别弟妹

于归甫两月，轳轳回柔肠。我生廿六年，无日离高堂。一旦甬江水，送我游荆襄。我生日以远，我心日以伤。天涯即门外，夙愿何时偿。

北宫有奇女，不嫁能安贫。甘心粥钗珥，守贞奉老亲。有志我不逮，俯仰愧此身。但觉秋风恶，吹我如轻尘。悠悠远别离，世事难由人。

小别已难堪，况复有远行。从兹远父母，卫女同伤情。我意诚惻惻，大义岂不明。此身不自主。万感中怀生，天心无两全，垂袖重吞声。

相见知有日，曰归难豫期。罔极恩未酬，立世将何为。恐添堂上愁，有泪惟偷垂。当归何日寄，远志难为移。春花歇秋日，根落名将离。愿言松柏心，长祝亲期颐。

自我之出矣，手足毋参商。加餐各努力，云路同翱翔。晨昏赖弱妹，珍重娱高堂。上慰双亲心，下减余愁肠。行矣何可言，问天殊苍凉。

## 哭旅儿

早慧物所志，汝质乃近愚。独喜性静默，嗜好与俗殊。家贫无长物，所有书五车。喜汝能博涉，六籍供田渔。汝爷笑谓我，此吾行秘书。每当下学归，兄弟相晤于。作字亦不丑，簪花善临摹。书成请评鹭，含笑牵娘裾。我老百无欢，见此颇自娱。此景今不再，回首悲何如。

汝生岁甲戌，我时方归宁。咳名襁褓中，唤汝曰寄生。外祖颇爱汝，谓儿乃宁馨。十年一弹指，幸汝渐长成。可怜汝外家，门户日替零。今惟汝舅在，身世同浮萍。自恨数太奇，殷殷望诸甥。谓汝颇挺立，期汝能成名。胡汝不克副，奄忽归九京。昨来强慰我，未语先吞声。吞声更无语，使我难为情。自我归汝家，汝父贫苦累。对泣牛衣中，宁敢怨憔悴。生汝八弟兄，心力亦几殆。所冀俱有成，婚嫁事完备。迨我谢世时，送我入幽隧。了我一生事，辛苦聊自慰。此愿岂云奢，而竟未能遂。自从阿加殤，倏忽廿四载。今汝又继之，天乎我何罪。汝爷素旷达，痛极转无泪。况我多病躯，剜此肉一块。吾衰岂久存，九原汝其待。

十月有八日，儿病渐不支。宛转衾篋中，气息馀一丝。依依握母手，问爷归何迟。伏枕还和南，声声念母慈。儿身惟母爱，儿病惟母知。勿厌儿扰母，扰母祇此时。愿母强自宽，向后毋思儿。此语诚可痛，此情那可思。夜台风雨黑，儿今去何之。喧寒与饮食，谁为儿护持。呜呼我阿寄，汝当知我悲。小春有良辰，行为汝娶妇。汝母拮据筹，备此合欢酒。颇闻彼妹子，堪偶汝嘉耦。庶几小鸳鸯，婉娈侍左右。岂谓连理枝，摧折如此骤。此岂吾罪罍，致汝不克寿。抑或儿命薄，无福一消受。冥途焉可知，灵璫渺难叩。汝兄幸有子，聊使承汝后。縗经拜汝前，足慰汝心否。

书堂夜沈沈，镫火凄以碧。凉月照古苔，中多汝行迹。入室何所见，见儿几与席。是儿冠与裳，是儿巾与舄。儿书所未竟，朱墨纷狼藉。儿尝所披览，丹铅半剥蚀。为儿检篋衍，一检一於邑。凄风动尘幌，犹如儿出入。儿魂傥归来，抚几应叹息。叹息如可闻，哀蛩闇中泣。

赚我十九年，欠汝泪万行。承此万行泪，为儿奠一觞。儿生於慈湖，歿乃在金阊。中间鄂渚游，曾未识梓桑。行觅一抔土，送儿归故乡。当与汝长兄，埋骨登蒿邙。庶汝小兄弟，泉下相扶将。朝游傍青林，夕啸依白杨。傥犹恋庭闱，同来侍吾劳。呜呼我阿寄，汝今在何方。家人或汝悲，时过亦渐忘。独有汝母心，积久弥摧伤。摧伤岂能久，双鬓今已苍。老者幸尚存，少者胡遽亡。呜呼我阿寄，天意真茫茫。

## 朱清远

朱清远，字绿芙，仁和人。有《晚香阁诗钞》。

## 西湖夕泛

跳珠滴露雨初停，为爱宵凉泛小舲。青柳袅风丝细细，白莲扶月玉亭亭。依微烟抹山坳树，散碎镫摇水面萤。诗就长吟殊自得，游鱼几队出波听。

## 春昼曲



帘钩微上帘旌飘，明窗净几殊清寥。眉子砚开墨新试，耳彝炉烬香先烧。兰阶细细和风动，一桁幽香鬓边送。朱啄轻圆语慧鹦，粉腰婀娜飞玄凤。幽居空谷日迟迟，倚竹拈花足解颐。乍可湖云丝柳抹，频经山雨锦苔滋。宜书宜画还宜绣，取次安排消永昼。筍香茶味足清娱，镜中诗里从消瘦。

#### 游韬光寺

万山环拜人，人出万竹上。湖绿江光白，海气黑潏荡。回顾所来径，苍翠列步障。绝胜理安寺，松巅游目放。何况住小楼，奚数浮画舫。流览尚未足，逸兴盘空王。仙台上一层，寰瀛彻万状。

#### 秋湖泛月歌

疏星落落银河空，纤云碧宇盘秋容。湖光月光一气化，双舳呕轧摇烟中。莹然一镜玻璃豁，千山倒涌千芙蓉。中流照影影溶漾，心胆魂魄都玲珑。两鬓幽兰花怒放，露华微浸芳馨浓。萤点晦明水纹逗，柳阴淡荡风力慵。晚荷夜香转清绝，天香僥共飘璇穹。微尘大千界远隔，清气卅六天应通。珊珊顿欲翫仙骨，广寒即此疑仙宫。独惜冷泉亭咫尺，隔山未得洄溯从。不然乘兴遂幽讨，梯云直上飞来峰。秋心上诉嫦娥下，携我入月凌罡风。却从月中看湖月，定如玉泉一掬青濛濛。

#### 渡江中流作歌

吾乡钱塘江水绿，深或及寻浅一掬。扁舟曾作严陵游，照影中流波绉玉。大江今日放楼船，洪涛无岸包长天。风帆瞬息百余里，飞行绝迹如飞仙。咫尺妖氛缠北固，铁骑水犀都却顾。愤深郎主粉榆乡，亲看发竖冲冠怒。南宋当年战两雄，此江有女在军中。输他桴鼓能亲执，坐想英姿起敬恭。

#### 彼美篇

酒食是议妇人事，车挽庖春并高致。此犹贫贱扬芳徽，椎髻案眉随所遇。夫为司徒妻赴薪，彼美风节何清真。道蕴咏絮馀事耳，寻常摘句何足云。

#### 舟中望衡岳

万朵金芙蓉，璀璨破空见。瑰奇魏夫人，阴阳态千变。欸登天柱峰，三湘俯匹练。篷窗隐几卧，飞行疾于电。忽闻款乃声，梦觉目犹眩。一瓿君山茶，从容望九面。

#### 川江志险

侬家西湖若仙沚，拏舟打桨图画里。平流容与随閒鸥，蹁跹裙屐仙游拟。长江洞庭从宦游，虽涉浩荡同安流。鱼龙不惊桡楫驶，天日朗照蒲帆遒。黔阳千里云山度，绝险奇危经几处。足蹶俊鹳还行吟，輿舳飞猱了无怖。川江此日浮大航，仲冬江水消汪洋。不风不浪舟震动，相持相顾人惊惶。仿惶良久榜人说，此是名滩最奇崛。荡析倾履无时无，吾徒到此

心胆惜。少焉遄行舟渐安，推窗十二横峰峦。且看奇峭云鬢斗，莫怅归来蜀道难。

赵纯碧

赵纯碧，字粹媛，武进人，同县诸生李岳生室。有《微波阁诗》。

西河晚望

帘动晚风侵，秋花红一亭。残阳照溪水，烟柳锁秋屏。树远前村绿，檐低晚火青。归来仍独立，凉露忽飘零。

岁暮怀妹

锦瑟年华似水流，惊人青鬓判成愁。枉教别梦依芳草，多半相思对玉钩。见说天涯原有路，不应沧海竟无舟。伤心莫把瑶琴抚，手撚秋棠独倚楼。

春阴

漠漠盈盈奈尔何，漫天飞絮卷横波。抵催蝶梦迷芳草，颠倒花魂绾女萝。纤月未窥愁雾重，珠帘深押怨思多。尽教明镜留香雨，九十韶华恐易讹。

储慧

储慧，字啸凰，宜兴人。有《哦月楼诗存》。

哀痛辞

驾兰拥兵日，睢阳杀贼时。明知力不敌，一死完伦彝。吾父本儒生，未遇特达知。毁家亟纾难，拒贼麾义旗。一战贼竟却，再战贼复披。僥得一旅援，天威仗王师。人心激义愤，云谷响应随。随在皆挾贼，贼势安能支。愤彼大帅懦，令我鲜民悲。战守三日夜，坐视全军摧。壮哉父被执，烈烈身骑箕。先是予避兵，还家伸孺思。仓皇闻警出，一舸浮鸱夷。提携赖慈母，抚抱怜娇儿。烽火隔重湖，望断情如痴。比归得凶问，马革已裹尸。家破不成丧，百物无一遗。哀哀念衰母，膝下已无儿。干戈苦未平，患难身倚谁。女无荀灌勇，救父围城危。又无北宫孝，养母守深闺。有女竟无用，安能作门楣。

哭墓

一丘封草蔓，千里返蓬根。不尽伤亲泪，难酬爱女恩。孤忠完大节，薄俗藐衰门。未护馨香报，何人告至尊。

归梦

云山迎我画溪隈，暮被流莺唤醒来。不识晓风残月里，梦魂真否渡江回。

龚静仪

龚静仪，字藁仙，江宁人。宛平工部侍郎龚自闾子妇，光禄寺署正家祿室。有《绛云楼诗草》。

渔人

日斜风定数峰青，白鹭冲波掠翠萍。独倚垂杨竿不动，蓑衣飞上几蜻蜓。

晚眺

野色苍茫欲暮天，几家茅屋起炊烟。日斜唤渡人声急，浅水芦花泊钓船。

冬夜

入室岩威冽，冬闺蜡炬残。香浮梅影瘦，云冻雁声寒。指冷抛棋久，愁多借酒宽。深宵清不寐，拈韵坐更阑。

张瑞清

张瑞清，钱塘人。江宁姚庆恩室。有《绣馀吟馆集》。

秋声

闻根蓦地爽秋宵，断续寒砧诉寂寥。何拟扬州好风景，二分明月一枝箫。

冯兰

冯兰，字仲襄。镇洋毕荫笏母。有《远香榭稿》。

行春桥串月歌

湖水清，湖月明，长虹耿耿从中横。下有十八洞天在，牟尼一串光晶莹。底事天公弄狡狴，明珠十斛波心倾。琼楼玉宇纷无数，三千世界琉璃成。天开异境谁消受，历劫共仰诗人名。诗人小筑烟霞窟，珊珊别具神仙骨。个中意味谁解得，为爱湖光兼爱月。君不见，百东坡，三李白，诗人化境何活泼。余生素有耽诗痴，瓣香拟向崇祠谒。

邵匹兰

邵匹兰，永嘉人。王德馨室。有《针馀集》。

束马莲玉女士村居

幽绝村南路，双扉昼亦扃。人行穿竹过，犬吠隔花听。夜月当窗白，春山抱室青。

此间尘不到，合自诵金经。

姚玉芝

姚玉芝，字漱芳，钱塘人。张渊室。有《漱吟楼诗草》。

祭诗

年年诗思费推敲，呕尽心肝不忍抛。酒脯横陈低首拜，祝他新意上眉梢。

新秋病起有感

辜负新秋到，浑忘溽暑阑。金风欺幔窄，玉露怯衣单。薄病拈红豆，微凉摘素纨。比来眠不稳，倍觉夜吟寒。新月初生处，银河淡碧空。梁间巢客燕，塞上念征鸿。细草千丛碧，秋花一捻红。夜来凉似水，不敢坐庭中。

王珍

王珍，字麦秋，衡阳人。有《麦秋诗钞》。

春归

青皇整驾欲何归，满苑残红蝶已稀。恼杀无情春又去，空留莺语怨斜晖。

秋夜吟

夜静镫犹晴，更深月倍明。秋风吹雁过，忍听两三声。

梁霭

梁霭，字佩琼，一字飞素，南海人。番禺潘飞声室。有《飞素阁集》。

别曲

昨夜曲阑春，飞花映人面。明月入兰闺，轻颺扑绡扇。阿姊归鹅湖，平明设离宴。迢迢江上波，目极双飞燕。

朱梁泛月

登舳此清夜，凉月来随舟。素练澄方铺，银云平不流。结想丛桂树，相思兰杜洲。桥梁记凤梦，烟水招重游。秋华自可爱，境峭难久留。渺渺鸳鸯清，回歌生远愁。

效玉台体

春水绿摇天，春禽破暝烟。吟成花绮思，梦对镜台圆。钗背香犹腻，琴心远莫传。浣衣愁粉脱，扫径惜红嫣。小极不辞醉，幽居得自怜。韶华终共保，纨扇忍秋捐。

#### 梦从姊佩湘

神女玉卮娘，偶然归碧城。隔窗见冰骨，袅娜犹不胜。濯魄玉蟾蜍，扑影金蜻蜓。此地绝尘壒，得非游玉京。姊妹本同心，欲语难尽情。拟逐秦娥凤，莫叩琳宫扃。惟有青鸾思，飞上瑶台层。银汉冷皓月，绣户明秋星。楼镫度寒碧，枕畔风泠泠。

#### 南墅夜步

汀洲吹夕蘋，乔松落秋色。萧萧修竹间，萤火出深碧。不见泊渔舟，何处闻长笛。且叩萝门扃，焚香坐筠席。

#### 池上书寄兰史

水日作清游，爱此一湾玉。五月怯薄寒，微风动疏竹。白荷吹雪入晶窗，挹露烹茶注玉缸。落花欲涨池塘晚，帘外鸳鸯飞一双。

#### 兰史自暑蝴蝶洞主制印置闺中言将偕隐罗浮也为赋长句用东坡松风亭下韵

罗浮山麓梅花村，十载结想萦梦魂。麻姑仙蝶出深洞，双栖万古晨与昏。夫子前身句漏令，拟寻丹灶如家园。移家即在白云里，上界那复知寒温。三峰夜弄铁桥月，五更晓看扶桑暾。种秫诟劳客辟穀，补萝可呼鹤守门。柴桑陶翟本仙侣，丹砂葛鲍参名言。头衔相颺足清绝，祝君展卷开瑶尊。

#### 题兰史诗草

文采佳人擅，千言下笔轻。琴心笑秣冶，剑气倚纵横。爱国同工部，陈书慕贾生。牛衣休下泪，戒旦正鸡鸣。

#### 七夕

绮席铺深院，秋河近曲屏。烛光防睡鹊，扇影怯流萤。良会期偏短，离忧岁又经。庭阶风露冷，珍重语双星。

#### 春阴

瑶窗几日不通曦，黯黯春随镜里枝。做雨天疑烟暝夜，倚栏人似梦回时。花阴匝地凉如水，柳色遮帘淡入诗。晕碧楼台成画本，独怜风峭燕归迟。

#### 雨后遣怀

雨后芭蕉绿上檐，晚凉新喜夹衣添。花因欲睡频依槛，月为怜秋故恋帘。午夜无眠

供茗碗，半年多病谢文旻。偶乘清兴烧银烛，独自繙书号玉签。

写意

江云不在树，春浦远无舟。悟得天然意，花飞水自流。

春愁

芳草一千里，琼楼十二层。春愁都不见，寒雨黯孤镫。

读离骚

陈辞敷枉太忉忉，《天问》翻怜《九辨》劳。千古蛾眉招众嫉，美人心事易《离骚》。

鶉鴂鸣时失众芳，婵媛犹称芰荷裳。春兰秋菊伤零落，欲补梅花殿楚香。

越华书院呈叶兰台先生

翠屏锦幔绕书帙，问字人来水竹扉。三十六陂秋色满，白荷花里鹧鸪飞。

后堂丝竹夜传歌，红烛金钿照绿波。檀板恰翻廉氏曲，萧萧凉雨打新荷。

## 【卷一百九十一】

孔祥淑

孔祥淑，字齐贤，曲阜人。保山浙江巡抚刘树堂室。有《韵香阁诗草》。

读史

鸿蒙判天地，清辉并日明。仪型孚万国，端由内化成。早朝警永巷，失德误倾城。法戒昭古鉴，尚论贵持平。燕私苟不忝，千载流芳声。诞降开王业，瑞纪《生民》诗。绵绵承世德，三后助鸿基。艰难知稼穡，动静慎容仪。胎教更太任，鸛鷥鸣西岐。有归信天命，蒙难晦明夷。作孚同服事，不使臣节亏。家国通一理，端为百世师。

一片骊山火，良由百媚生。艰难祖宗业，累洽启昌明。牝鸡鸣旭旦，禾黍满镐京。祸生於所爱，损积於多盈。致令千载后，殷鉴难为情。

淖齿乱齐国，君走不知处。端赖王孙贾，讨贼声威著。袒右驱市人，难其在急遽。藉无倚阊训，何能起衣去。虽非纯臣节，罪得就斧钺。大义伸慈母，全国有令誉。

晏安岂可怀，先贤譬酖毒。况在世禄子，怙侈恣所欲。朝日而夕月，孜孜惟不足。劳心与劳力，贵贱各有属。所以文伯母，勤事自检束。教子多义方，不才由土沃。岂独鲁邦瞻，永作保家策。

法律为诗书，周召尽刑馀。汉兴承秦弊，罗织不遑居。邈哉隽子母，好生复太初。闻狱多平反，言笑始自如。秋肃布春阳，讼理永终誉。执地尽若此，囹圄庆空虚。

大孝通神明，甘泉涌其舍。当姑未谅时，姜诗难宽赦。斥流汲江水，轩然风涛作。鸡鸣空往还，姑渴愁难破。夜纺市珍羞，下堂犹参佐。使无邻母对，翻益贤妇过。至诚感姑心，仪型远迩播。

画虎状狰狞，遥望犹悚惧。况在小儿女，何敢与之遇。父为虎所曳，杨香赫然怒。奋臂不顾身，搏虎如搏兔。搯颈虽靡牙，俯伏驰若鹜。笑彼逐虎者，色变失故步。善攫如冯妇，负嵎犹四顾。

纲常弥宇宙，惟孝为至德。慨世巧趋避，灵府尽茅塞。表表叔先雄，伤父尸未得。矢志殉中流，号泣废寝食。岂无弟与夫，永诀良恻恻。亦有子与女，割爱靡姑息。梦告后六日，同浮江之侧。鬼神为呵护，蛟龙为藏匿。大节光天壤，丰碑彰奇特。

淮寇一窠蜂，所至无生理。詹女诱甘言，贼反任驱使。父兄脱兵刃，过市跃於水。暂屈非偷生，完贞得所死。骂贼岂不烈，族赤门闾毁。济变策万全，愧此詹处子。

君子不知命，势利相奔竞。贤哉於陵妻，尼夫却楚聘。食玉岂不美，衣锦岂不盛。君臣虚以听，况执国之柄。相视若浮云，琴书怡天性。千载仰高风，安贫良非病。

牛鸣马不应，由其非同类。嗟齐孤逐女，自媒近於戏。经曲为大防，守礼德始备。三谒王之门，所论皆正议。配相而尊贤，齐国赖以治。其如女道亏，才辩何足异。兢兢深自持，无为盛德累。

大节不可夺，精诚能格天。比翼申凤志，连理结后缘。青陵筑层台，张罗思高骞。水深日当心，匪石难转旋。虽贵不慕贵，轻之若云烟。虽贱不辞贱，重之若冰渊。

爱极翻成怨，情溺转相仇。夫妇道不终，无礼节其流。却缺耨大野，妻饁进穀羞。献酬如宾客，所慕起道周。观人必微忽，外敬知内修。百行端有本，舍此更何求。

习惯若性成，疾难破沈痼。有汉桓少君，闻义顿改素。鲍宣淡纷华，美饰触其怒。毁妆富不骄，守约穷能固。提瓮汲清泉，挽者著短布。即境以炼心，随遇安常度。士志虽足多，妇行良可慕。

名遗珠崖令，空将二义传。感人犹馀事，慈孝可通天。臂珠误入关，坐法难两全。母女争就义，闻者涕涟涟。吏劾不忍决，援救珠尽捐。风教起闺闼，此美洵当先。相隐复相让，后母尤足贤。

先民询刍蕘，故能成其大。管子天下才，改容谢少艾。齐桓勤求士，甯戚歌诡怪。

奉迎忧不知，妾倩适逢会。白水识贤心，修宫速反旆。佐齐国以治，赖此一夕话。人无忽於微，虚己超物外。

淑德伊云逝，陈篇寄赏音。穷通端有道，常变不移心。师法班昭诫，难为《女史箴》。内修勤自省，怀古一何深。

#### 剑州道柏

绝壁过云天宇辟，盘拏两行森战戟。行人指点不敢攀，云是桓侯手植柏。经霜傲雪风骨遒，绿柳红花皆避席。落落丹崖虽自赏，终造凤楼高百尺。斡旋造化天无功，扶持千载寿金石。根深叶茂多庇荫，树比甘棠犹爱惜。

#### 雨后即事

雨歇杨林渡，东郊尽把犁。青溪千鹭饮，红杏一莺啼。树色随帆近，波光入户低。三春无限好，两岸夕阳西。

#### 华阴道中

柳拂秦关道，云山过几重。前村知不远，花外一声钟。

#### 途中偶成

云霞出海最鲜明，其奈辞家万里程。别绪顿随流水转，离怀时与故山盟。重帟定省朝朝梦，两地怀思暮暮情。待到杏开春雨后，好随樯燕趁风行。

#### 留别

携手河梁上，滔滔水不波。盈觞愁未解，折柳劝徒歌。红日离时短，青山别后多。相思期努力，莫负夕阳过。

#### 夔府舟中

江水滔滔去，春来景倍生。帆从天外落，人在镜中行。黄鸟含烟嘤，青畴带雨耕。长途千里别，不尽故乡情。

#### 三峡观瀑布

奇峰秀削插当面，晓起凌虚天一线。轰轰震谷雷乍鸣，重岩陡转飞白练。如烟如雪势奔腾，大珠小珠满地溅。碧潭千尺窈而深，响滴铜壶漏传箭。蛟龙不作尘不染，皎洁水光澈底见。静观顿使道心清，日暮云封犹眷恋。

#### 巴东舟中



猿啼两岸夕阳催，江上何人赋落梅。山影漫随烟霭去，钟声时杂雨风来。鸟穿叠嶂阴云合，舟入重岩石壁开。到此蓬莱知不远，我今新自蜀东回。

#### 汉江舟中

荆门三峡尽，万里送行舟。帆急山俱动，江平水不流。柳舒桃叶渡，花隐夕阳楼。回首碧云暮，开尊对月浮。

#### 春日偶成

春来无事小窗前，手弄瑶琴已暮天。一曲未终花影上，碧栏杆外月初圆。

#### 偶成

芙蕖带露满池开，金井梧桐点翠苔。无限云山刚过眼，碧纱窗外燕双来。

#### 江韵梅

江韵梅，字雪芬，钱塘人。直隶井陘知县、常熟言家驹室，河南知县有章、大名镇总兵敦源母。有《梅花馆诗集》。

王父雨园宫詹官京师所居西园桃花最盛王母潘太夫人常开吟社幼侍游宴俯仰今昔追忆成咏

真珠帘子卷东风，乍暖微寒二月中。犹记故园当此际，小桃含雨放新红。

#### 效义山离思并用原韵答外

聚首不知乐，离怀寄短歌。当君情意切，使我泪痕多。客久增秋感，愁深奈病何。风尘辛苦甚，无日稳烟波。

#### 别夜

昨日天津有报书，鲤鱼风起病相如。非关怜婿偏忘母，急棹归来类绝裾。

临歧难禁泪如丝，不易相逢易别离。君是事亲依作妇，此中甘苦有谁知。

#### 井臼

井臼亲操强自持，囊空如洗少人知。最怜儿女同时病，药石温凉独主持。

惯坐愁城日似年，一寒至此倩谁怜。无台避债追呼急，儿女犹争压岁钱。

#### 望月

湘帘卷处月当天，爱看清光此夕圆。碧落《霓裳》歌宛转，玉关秋思致缠绵。娟娟素面盈三五，穆穆金波印大千。寂寞小庭群动息，今宵为尔更迟眠。

#### 红豆

绮窗红豆记相思，宛转柔肠十二时。春到苔钱圆处绿，个侬心事少人知。

#### 和外

举头喜见婵娟月，宝镜盈盈透蟾窟。姮娥起舞寒簧歌，涌出银光夜飞越。芳草天涯年复年，晚风吹醒酿花天。凭遍阑干十二曲，弄花拜月爱迟眠。

#### 题来禽仙馆稿

红牙拍处句清新，绝妙词成绝代人。分得西湖灵秀气，梦窗片玉是前身。

#### 两女知仲媳能诗争相倡和喜示仲媳

威姑诗笔名江左，自愧无能步后尘。喜尔随肩互酬唱，吟坛薪火有传人。

#### 和外秋日游玉峰山韵

石磴崔峨庙宇齐，凭高四望水云低。何须风雪添诗思，一抹明霞送马啼。

#### 题先妣邹太人味蔗轩遗集

《国风》采歌谣，不因巾帼弃。闺阁多贤媛，岂仅酒食议。吾母幼淑慎，不为儿嬉戏。绣馀读诗书，四德悉纯粹。随宦游齐东，孝友两无愧。作嫔於先公，敬戒主中馈。吾祖瘁文衡，节冷滇闽使。家门盛科名，同怀奋鹏翅。威姑年正高，妇职益周至。勉力奉晨昏，典衣供药饵。吾父捷贤书，礼闱伤十趾。皋比隆赵州，名动公卿履。桃李溥春风，刀尺撷闺思。苜蓿盘终虚，悲生展禽谥。予雁序五人，抚育皆亲累。茕茕藐诸孤，惨惨呼天泪。阿干送棹归，烽火江乡悸。补屋惟牵萝，长安居不易。婚嫁得粗完，两荆枝又萎。世胄竟凋零，津门寓嫠稚。苦节天所褒，乃为造物忌。茹荼四十年，蔗味痛难遂。平生真性灵，景物自言志。愁来付短吟，信笔记时事。即此一卷诗，颇为精神寄。如见呕心血，如见貌憔悴。身世历诸艰，十只道一二。余也恐散佚，敬谨为编次。萱荫北堂摧，劬劳犹可识。书成付阿咸，濡翰泪痕渍。

#### 寄大儿

又看中秋月，良宵别思纷。苕溪嗟远嫁，梁苑阻归群。薄宦猪肝累，长邮马足分。军咨真祭酒，退食更论文。

#### 浮云

浮云变幻太无端，岂易优游菽水欢。最是幽禽飞已倦，秋风萧索得归难。

自井陘僦寓获鹿

十年前踏晓霜寒，华首相将席未安。久阅世情尝冷暖，本来治理尚和宽。琴弹《流水》知音少，曲谱《阳春》属和难。行矣堕甑莫回顾，鹿泉权作鹿门看。

丁毓英

丁毓英，字蕴如，宜兴人。常熟言敦源室。有《喁于馆诗草》。

寄外

木叶萧萧下，閒阶秋色催。衣同寒到否，半臂手亲裁。

霜信催碁急，寒闺寄远时。料应孤客梦，付与枕函知。

别后情无限，离怀托短歌。辽西无梦到，更柝恼人多。

似水流光远，年华去不回。笑君如燕子，一岁一归来。

庚子中秋

夜静空庭雁唳群，商声偏送枕边闻。无家正值沧桑变，有泪难禁骨肉分。极目乡云依陟屺，惊心烽火婿从军。那堪又到中秋节，寂寞兰闺万绪纷。

傅梦琼

傅梦琼，字清漪，贵筑人。河南按察使寿彤女，开州朱庆墉室。有《紫荆花馆诗》。

寄外

家山烽火路艰辛，红豆相思梦最真。临别赠言君记否，春来莫作未归人。

夜坐

新月如钩半未明，楼头忽听玉箫声。春光满目无游处，一片烽烟绕郡城。

送杨剑昙先生北上

风雨潇潇又别离，残绒唾上柳丝丝。蓬莱七字他年约，先绣天涯感旧诗。

路秀贞

路秀贞，字春波，毕节人。洛阳知县璜女，修文江苏候补道袁照藜室。有《吟荭馆遗诗》。

#### 白莲

雨过暗闻香，凌波试淡妆。珊珊仙袂冷，鸥梦伴银塘。

#### 自汴入都綈侄送至道口

欲别难言别，登舟意黯然。多情惟骨肉，往事等云烟。岂有花常好，重逢月几圆。归家慰尔祖，或恐废餐眠。

#### 运河道中

有子方三岁，相从便北征。如何成远客，强半为浮名。岸曲帆随转，波澄水渐平。邻舟闻笑语，都是异乡声。

#### 喜雨

漠漠云阴合，长空送雨声。为霖三日愿，望泽万家情。红润花光活，青浮麦浪平。丰年真可卜，大野庆秋成。

#### 古剑

沈郁丰城久，霜锋半藓侵。凌空腾虎气，挂壁作龙吟。玉匣封何古，银花蚀已深。一朝逢薛烛，拂拭愜雄心。

#### 听琴

众籁尽岑寂，凉宵露气清。松风听一阕，万物化和平。

#### 扫花

瞥眼春将晚，飞花满碧苔。倚阑呼婢扫，风过却吹回。

#### 胡云琇

胡云琇，字冰心，永康人。湖北粮道凤丹女，香山盛文霖聘室。有《冰壶馆诗剩》。

#### 思亲

望远人千里，思亲字两行。休因怀弱女，憔悴鬓成霜。

有悼

一现昙花二九年，飘然撒手判人天。玉楼想少修文字，召去人间旧谪仙。

怀诸弟

鹄原一别怅经年，海峤苍茫别绪牵。今夜西楼明月好，几人联句斗清妍。

龄文

龄文，字竹友，库雅勒氏，满洲旗人。口北道吉顺母。有《絮香吟馆小草》。

冬初将晓枕上感赋

初回残梦远钟轻，竹影摇窗月尚明。寒埭鸡啼催曙色，遥天雁唳断秋声。半生身世馀残局，百岁光阴悟晓檠。聚散悲欢知有定，牢愁无那此中情。

姚若蘅

姚若蘅，字芷湄，号沅碧，桐城人。江阴永年知县夏诒钰室。有《红香阁诗草》。

憩园秋兴易州署中

园林雨后聚秋光，花影还依月影长。小沼水清蘋叶老，曲栏风暖桂枝香。野云行尽生岚气，山鸟飞来话夕阳。种秫公田多逸兴，固应人境两相忘。

挹爽楼眺雪次韵

一夜虚窗朔气吹，朝来世界换琉璃。楼头顿失青山影，林下联吟《白雪词》。冻雀无声花自落，寒梅有梦月应知。眼前竹石皆图画，欲假毫端试取奇。

泊渡口驿感怀

风风雨雨新霜候，一点秋镫旅思凉。松菊未营陶令宅，琴书犹拥陆生装。时闻犬吠知村近，渐少更声觉夜长。莫向扁舟怨飘泊，连宵儿女和诗忙。

兴济镇

大旗摇曳出疏林，寒垒荒屯傍水浔。却忆承平廿年事，军门细柳已成阴。

过静海县

水城百堵见廛闾，鱼米生涯乐有馀。渐觉津沽风物近，青红儿女钓人居。

何福骏

何福骏，字君粲，灵石人。直隶按察司经历辉绅女，江阴光绪壬辰进士、编修、湖州知府夏孙桐室。

涿州道中

帝城行渐近，驰道带长河。寺古红门黯，山秋黄叶多。客心惊落雁，边色见征驼。笑我闺中语，何知燕赵歌。

自题蕉窗肄书图

绿天便拟借名菴，湘管茆笺俗虑戡。静里清阴分砚北，画中秋色忆江南。诗成题叶香犹润，墨可磨人味自谙。最是羊裙增旧感，《芬陀》遗集护瑶函。

秋夜寄外

凉鐙清漏隔屏山，人自关心花自閒。今夜长空闻雁过，明朝应有羽书还。

俞绣孙

俞绣孙，字彩裳，德清人。樾女，仁和赣州知府许祐身室。有《慧福楼幸草》。

游天宁寺

东风吹絮暮春时，客到禅扉有鹤知。松树两行青嶂立，藤花一架紫云垂。无缘福地生欢喜，但祝人间少别离。归去也应更回首，暮钟声里意迟迟。

许禧身

许禧身，字仲萱，仁和人。祐身妹，贵阳直隶总督陈夔龙继室。有《亭秋馆诗词钞》。

并蒂莲

平明信步绕芳塘，傍柳随隄过曲廊。湖比鸳鸯还共泛，亭开荷芰自相庄。出尘不染双心洁，并影同看佳兴长。我本爱花花对语，频将佳兆祝祯祥。

许之雯

许之雯，字修梅，仁和人。祐身女，王孝亮室。有《绡芸馆诗钞》。

小园

雨过苔痕涩，云来花影迷。水平双燕掠，风暖一莺啼。亭小随池曲，山低共树齐。

春光何处最，红杏女墙西。

### 拟古出塞

饮马青海头，弯弓长城北。不取燕支山，恐君重颜色。

秦地旧山河，汉家新戍卒。照彻玉关寒，一片闺中月。

射虎李将军，斩蛟周孝侯。数奇辜利器，未获月支头。

将军犹转战，宰相莫和亲。投笔男儿志，羞将托妇人。

### 咏蓼主人秋风失意书以代柬

休将得失感生平，花样更番学未成。黄卷青镫仍故物，白衣苍狗是科名。驹光有限宜同惜，蜗角无多莫苦争。他日得营三径业，肯从浊世问前程。

### 孙镇

孙镇，字慧贞，玉田人。道光庚子进士，翰林院侍读晋墀女孙，攸县知县光燮女，范履福室。有《清风楼诗存》。

### 秋夜曲

秋镫耿耿凉宵永，玉露无声下金井。空山野鹤忽飞来，踏碎庭前松月影。

### 高阁

高阁霭春晖，幽居山四围。风梳杨柳瘦，雨润豆苗肥。树色侵书幌，江光漾钓矶。地偏心自静，相赏欲忘机。

### 葛远

葛远，字香根，自号惜芳痴人，湘潭人。利川女，同县诸生杨昺炎继室。有《评梅阁诗词集》。

### 雨后看花

一夜雨淋漓，花开几枝亚。嫣然色更娇，未逐东风谢。

### 寒食

山村初听杜鹃声，日暖风和一晌晴。寒食有诗春意足，不闻天子召韩翃。

家大人命咏见志勉呈

几人代父走征鞍，远戍远城胜克汗。一骑明驼辞火伴，木兰犹是女儿还。

垂钓

林塘一曲偶凭栏，试问清阴把钓竿。瞥见浮个下深碧，鱼游萍底不知寒。

春晴

小阁帘高卷，时还鹊噪晴。春花争灿烂，池水最澄清。燕啄香泥暖，蜂驮翠絮轻。倚窗收绣谱，扫几设棋枰。听野农歌接，看山画本成。分题诗未就，催卷有新莺。

制椒枕寄外

孤镫静坐巧安排，锦字回文花样佳。一握椒聊寄珍重，此中芬馥是依怀。

旅馆凄凉动客愁，邯郸未到梦难休。凭将一瞬黄粱熟，无事痴情叹白头。

送六该弟之黔

年少初为客，焉知行路难。黔山二千里，湘水万重澜。且听骊歌悄，翻怜雁影单。家书宜早付，长铗莫轻弹。志大须鹏展，枝栖愿莺安。前途殷御李，名士喜瞻韩。笔札从容出，诗书蕴藉看。寓公防落魄，游子恐孤寒。堂上缝衣密，闺中织锦宽。得如青眼愿，毋遣白头叹。恋栈犹凡马，抟空要健翰。田园未荒芜，知倦及时还。

李端临

李端临，号更生，乌程人。承基女，德清傅云龙室。有《红馥籀室吟草》。

梦归

尺鲤东流雁北飞，椿萱风景话依依。八千馀里须臾到，梦里还家也当归。

偶题

诗思水犹浅，花容人更癯。蜨衣和粉晒，鹦母隔帘讌。石篆半红藓，春阴满绿芜。借閒补诗句，何事唤提壶。

初夏

花饶午韵鸟声碎，柳曳晴丝蜨路迷。独倚阑干春影里，一帘红透夕阳西。

清秋



清秋明长江，残蟾窥芸窗。梦穀不可极，栖鸦鸣一双。起坐有诗思，宿墨饱著字。苦吟羞消蛩，声乾叶满地。

### 即事

矮纸墨花凝，秃锋毫不棱。劲风飏积雪，斜日堕檐冰。薊北迟归鸟，窗南击冻蝇。夜分群动息，诗思一铎青。

### 且月二十九日览玉泉山昆明湖

远山抱城转，傍晚翠云横。禁树蝉争噪，垂杨莺一鸣。旧桥经雨断，斜日就烟明。呼艇前溪去，荷花香乱生。

### 读岱山姊遗诗

於兹廿载死生离，亚字阑干独立时。赤鲤不传泉下信，红镫忍读旧存诗。频逢梦里浑如昔，每到花时不减思。愁听子规声断续，暝烟疏雨一帘垂。

### 感怀

翻澜不在多，涓滴成江河。滋蔓不在天，茁芽缘高柯。如何断不断，机见独蹉跎。

菖蒲遯蚤虱，蚰蜒引可忧。奇香衣恣薰，损肺毋乃疾。如何顿忘损，而云岂无益。

苔城蛾子出，馱粒课时术。鷦鷯微乎微，营巢借枝一。如何耽食眠，虚此难再日。

草木有本性，扶幹自然直。鸢鱼有天机，何处著智力。如何矫揉者，门内亦粉饰。

### 小园

树静云流绿，墙高日下迟。竹篱香雨后，萍沼薄凉时。花丛蜂寻蕊，叶摇禽上枝。眼前无此景，梦里故园窥。

### 送外遵朝谕游历日本美利加等国

片帆飞去海山秋，好向扶桑作壮游。七万鹏抟真快事，天风吹送转星球。

记睹十洲未足夸，水蒸舟更火飞车。丈夫四海平生志，莫向临歧感鬓华。

### 有感

繁枝删向碧芙蓉，霜幹作虬青古松。黄叶半山斜日静，浮云偏蔽最高峰。

### 寄外

寄书万里祝加餐，又展君书月下看。一片离情清影里，何时同照泪痕乾。

身同蠅屈住长安，别后人情倍觉难。静掩重门浑似隐，北风吹雪上雕栏。

### 红馀

红馀仍握管，日影上帘钩。宿雾随风散，春冰逐水流。轨涂半庐墓，柔舳满沧洲。此处人家少，溪边一钓舟。

### 思亲

津门月里步篱边，仿佛当年问寝天。昨夜梦回离别处，子规啼断一溪烟。

### 微雨

策雨两三点，蛙鼓不能声。半篙海河水，九里苇根城。暑重风仍湿，月圆潮倍生。柳阴到窗隙，花气满帘旌。

### 村居

拂墙杨柳碧丝丝，已折杨枝活旧篱。双涧水閒鸥梦稳，一天风静燕归迟。新花好借朝云护，矮竹权乘微雨移。不信村居少诗味，卷中羞靡热官诗。

### 闰月七日观水

不系舟如是，举家今一行。桥腰野人语，树顶乱泉鸣。落日嵌汀岸，归艘沿柳城。剧怜千亩地，都作怒涛声。

### 为夫子董理图籍有感

鐙味难忘昔，戎曹廿二年。图书千万卷，买自卖文钱。

### 傅范淑

傅范淑，字黎痴，德清人。云龙女。有《小红馀籀室吟草》。

### 小园

江南草长六朝地，蓊北春寒二月天。花睡红犹云影护，柳迟青未雨丝牵。沁脾新汲烹茶水，买醉不抛沽酒钱。裁报东风生浅渚，小园争擘衍波笺。

### 春日行

海棠渍露杨搓烟，何似霜叶红秋边。仓庚紫乙花中天，啁啾声来圆复圆。如歌互答如管弦，妙手偶得诗自然。

### 忆览昆明湖

回首玉泉下，白莲十里花。扁舟载落日，欹柳锁流霞。断续蝉声噪，参差鹭影斜。隄边诸钓叟，艳说驻龙车。

### 夏凉

千柳万柳风丝柔，五月六月荷塘秋。雷声僻地醒睡鹿，月影一天凉眠鸥。池蛙夜静鼓吹起，十二栏干花雨收。

### 秋

客里秋光又一年，拈题分韵坐鐙前。风敲霜叶漏初永，月上窗纱夜未眠。骂鬼诗成删草稿，惊人句欲写花笺。谁家砧杵惊寒起，况是南楼雁过天。

### 晓起

丝丝绿柳绾朝烟，燕子衔泥去复还。花外白云呼不起，日高犹抱石根眠。

### 金芳荃

金芳荃，字畹云，秀水人。平湖候选知县陈景迈室。有《绚秋阁诗集》。

### 敬呈厚斋伯父

凤池旧迹剧堪怜，零落朱门锁晚烟。静夜挑鐙论家世，秋风汨洒断肠篇。

玉树摧残感易生，倦游湖海掩柴荆。遗珠不遇犹堪慰，定许龙头属老成。

### 鐙下老母述旧事

云黯苍梧日，凄凉忍细论。慈乌怜弱羽，小草托孤根。频寄鹪鹩迹，难招杜宇魂。茹荼廿馀载，肠断未酬恩。

### 刘韵

刘韵，字绣琴，一字赠梅，南丰人。奉化知县国观女，鄞县黄家鼎室。有《红雨楼诗钞》。

## 书福山王婉伧夫人列女传注后

更生西汉儒，举行冠群彦。立朝遇闇主，宫寝恣荒宴。戒昧司晨鸡，谣起涎尾燕。忧深诤讽谏，表进《列女传》。精胜匡衡疏，谲异谷永谏。七篇举其纲，百人萃厥选。王政首母仪，阴教系治典。其次及贤明，家国佐安奠。仁智德乃尊，贞顺性斯善。处变重节义，遴才取通辩。有功必有赏，孽嬖居其殿。徽音慕肃雍，容饰薄盼倩，上白翠翟贵，下逮荆布贱。众■既毕陈，四德亦备见。肇鉴昭千秋，搜讨信云遍。谁欤续补辑，两京厕名媛。纵增彤管辉，未免时代舛。昔闻大家注，训故藉排纂。又闻《长康图》，丹青妙独擅。恨生千载下，古本失流转。东海有女宗，观书目如电。徵诗订三家，集解编八卷。残文补阙漏，奥义畅推衍。同时得梁氏，振绮罗文献。笺释足并行，汉学留一线。披函日循诵，淑范生敬羨。颇思绘屏风，遗像识真面。联代铸金事，朝夕薰香荐。远愧孙夫人，列传系序赞。三复中垒书，述古发长叹。

## 侍姑冯夫人游石鼓山

佐俊得馀閒，游山觅幽赏。晨兴奉板輿，意在怡色养。出郊二十里，境渐异墨尘块。奇峰迎面来，松筱密如幌。穹窿大石鼓，擘自巨灵掌。鸟道盘一线，螺屏列万丈。輿夫作蛇行，蜿蜒陟林莽。古刹峙山椒，结构极閼敞。衣钵五代遗，榱桷普陀仿。登攀劣崱峰，白云任俯仰。岩洞探灵源，仙踪殊惝恍。翼然水云亭，愚斋署诗榜。寺门涌泉出，有池数弓广。久旱从不枯，佛法现龙象。寺左喝水岩，壁鏤大士像。活活龙头泉，激轮钟自响。右瞰达摩洞，幽僻莫可状。面壁悟禅机，眼底颈明朗。纵无换骨丹，颇萌出尘想。慈姑困步履，扶掖代藜杖。不愁暝色催，愿睹白毫放。停车为少留，归路月已上。

## 陪王霽斋夫人登钓龙台

鱼舄揽胜得追从，遥指高台是钓龙。出海烟岚迷树色，摩厓碑碣剔苔封。久销霸业沈枯井，平挹秋光接远峰。眼力尽时转空阔，待看健笔写云松。

## 暮秋病起

年来多病少欢愉，离得绳床若梦苏。理鬓漫将尘镜拂，添香犹倩小鬟扶。懒收红叶题银管，爱折黄花插玉壶。惆怅寒窗风雨夜，书帙照影一灯孤。

秋光黯淡透虚棂，石鼎香飘药火青。听雨梦回惊蟋蟀，临风身怯颤蜻蜓。久疏井臼惭梁案，苦忆乡园隔谢庭。且对高堂说强健，亲携菊酒慰衰龄。

## 寄外子海上

萱闱日日盼归槎，腊鼓声中未到家。曾约秋窗评菊谱，翻劳烟驿翦梅花。

## 将随外子南游留别红雨楼

绡桃压檻绿阴稠，妆镜安排是此楼。琴簟将移花似泣，珠栊欲卸鸟知愁。凿楹万卷留纱护，黏壁千篇启篋收。默祝慈姑春不老，年年海屋数添筹。

上海城隍庙有园一区花木蓊翳流水萦带颇饶幽趣俗名小西湖秋日与外子过此作歌纪之

小西湖，湖水清，沦涟一勺分仙瀛。有亭翼然如建瓴，文阑百摺环螺屏。疏莛断蓼映秋色，此中可寻鸥鹭盟。小云台，山石叠，奇礪竦削苔翠积。腾空恍挟怒猊舞，卧云似作蟠龙蛰。剔透玲珑无傍依，此中疑有神仙窟。我来海国游，秋光满林圃。树头嘒蝉静，池面喁鱼聚。霜枫落叶任低昂，篱菊延芳作宾主。宛延山下径，回环湖上隄。登临既乘兴，吟眺几忘疲。小桥长廊缓缓步，行尽湖隄觅山路。山颠风景无限好，一览吴淞雪树渺，归来好趁夕阳时，山渌湖光黯相照。

#### 送外子于役秦中

壮矣此行役，横腰佩太阿。探奇历西岳，陟险渡黄河。风雪关前重，豺獭塞外多。归期宜早决，堂上鬓双皤。

#### 携忠儿归甬上别外子

自睽慈姑侧，五历暑与寒。宦辙随闽峤，攀陟恒苦艰。睠念姑恩重，昕夕愁眉攒。纵有淑贤娣，耿耿心未安。君也为贫仕，还里良亦难。显扬志犹沮，待时振羽翰。吾病亟思归，且得共馐餐。有子甫八龄，可博含饴欢。中馈付姬媵，传舍影不单。功业君自勉，井臼吾当殫。偕隐俟异日，临别增辛酸。

#### 白云寺

寂寞白云寺，当门好鸟鸣。日高山雾薄，风定树烟横。岩底闻人语，墙头落涧声。飞仙渺难即，何处学长生。

#### 楼居即事

开轩俯瞰尽桃花，映带衣裾灿晓霞。雨后收花待春雪，为儿赝面作妍华。

#### 程淑

程淑，字绣桥，休宁人。有《绣桥诗存》。

#### 漫兴

吟情游兴向谁论，到处登临酒一樽。漠漠青山云外塔，萧萧黄叶雨中村。凉秋似水寻无迹，好梦成烟散有痕。底事清愁忽桎触，数声啼鸟又黄昏。

#### 送侄女之鸳湖

呕哑柔橹划波轻，水驿江村路几程。木落寒山秋色远，云开断塔夕阳明。寄书恐阻

天边雁，折柳愁听笛里声。此去胜游应记得，一楼烟雨暗重城。

待绣玉姊不至

闻说云輶降，先期扫敝庐。足音偏寂尔，目望竟劳余。天末鸿飞渺，檐前鹊噪虚。  
閒庭明月夜，伫立尚踟躇。

徐熙珍

徐熙珍，海宁人。有《华蕊楼遗稿》。

晚眺

倦鸟飞还日已斜，残霞绮丽映窗纱。停针无事拈帘坐，閒看游鱼唼水花。

远眺

浮图高处望依稀，海阔天空兴欲飞。万顷稻田桑柘外，遥山遥水接烟霏。

题吟红阁诗钞

泪洒优昙一现来，夜阑开卷几低徊。愧他裙屐诸年少，谁似西泠咏絮才。

归自鸿印轩

春暮池塘夕照时，峰回路转步迟迟。绿油晴泻三篙水，红杏香凝万斛脂。趁暖燕泥黏柳絮，怜芳蛛网罩花枝。兴阑归去篮舆速，刻烛联吟七字诗。

感怀

平安淡泊足娱情，学问还从阅历生。暗卜鱼仙参仰覆，共猜瓜战判输赢。当车量力螳撑臂，未雨知机蚁罢兵。欲步性灵诗不易，摹唐仿宋两无成。

郑业禄

郑业禄，字淑荃，长沙人。安化华容训导陶煌室。有《云璈阁诗稿》。

初冬晚眺

黯黯荒郊欲暮时，朔风摇飏酒家旗。数声村犬吠行客，几处归鸦争晚枝。楼小先迎新月上，林高独下夕阳迟。霜馀木落群峰出，松柏凌寒独未知。

思亲不寐口占一绝

思亲眠不得，起坐夜三更。月照一庭白，慈乌故故鸣。

易繁

易繁，字南蘋，湘乡人。山西岢岚知州吴光熊室。有《景惠室诗存》。

山居遣兴

器境何如静境栖，长吟人坐小窗西。地偏时有閒车马，客至犹能具黍鸡。四面松疏蟾送影，半沟水浅燕衔泥。谁知领取幽居趣，合计诗坛细品题。

哭二弟信臣华臣

吾家近事不堪闻，雁序伤心两失群。白发孤灯悲寸草，青枫落日哭双坟。萱花冷淡怜亲老，菽水艰辛赖子勤。识破彭殇同一例，拭乾泪眼看龙文。

梦中得四绝句醒后祇记其一

庭花倚月落无声，澹澹秋云夜气清。一点诗心无管束，随风化作万松鸣。

岢岚州署

山为屏嶂石为台，活水都从云际来。万壑松涛清夏雨，一帘岚气暗春雷。寒鸦古树围官舍，澹月中庭老鹤胎。车马不喧城郭静，天教吏降占蓬莱。

次夫子罢归原韵

大好怡情地，天然小隐居。山围陶令宅，树拥子云庐。薄醉孙扶杖，论交友寄书。归来梅鹤吏，相守复何如。

包兰瑛

包兰瑛，字者香，一字佩棻，丹徒人。如皋朱兆蓉室。有《锦霞阁诗集》。

读放翁集

秋灯耿遥夜，下帘听疏雨。一卷《放翁集》，古秀照眉宇。平易似香山，忠爱匹老杜。石湖帅两川，先生居幕府。雪中草军书，下笔龙蛇舞。宝鸡达长安，旦暮可立取。奈何小朝廷，甘作湖山主。坐令龟堂诗，苦语泣肺腑。晚境封渭南，渭南渺何处。九州几时同，寸心千载许。馀情狎花草，亦与《离骚》伍。大雅逝不作，遗编互今古。久读忘睡眠，远寺动残鼓。

纳凉

夜凉挥麈谈风月，清兴真教俗虑删。银汉不流星斗转，一天秋思满人间。

#### 登狼山支云塔

支云高塔走嶙峋，肯为裙钗渺此身。但觉天光俯银海，不知人世有红尘。二分垂足疑仙境，万事扪胸仗佛因。笑语同来诸女伴，此行奇绝胜飘轮。

#### 咏史

千古牛衣肯死忠，直臣折槛亦奇功。诸儒杜谷真无赖，谏表区区说后宫。

此公佞佛久无灵，妖梦迷茫死未醒。谁为练儿编本纪，年年祇载老人星。

虬髯十万拥戈船，一见龙颜意惘然。海外真王君莫笑，胜他褒鄂上凌烟。

衣白披裘总出尘，一眈泉石一经纶。官家同学知何限，千古流传祇两人。

老泉潦倒布衣终，方叔台卿感遇同。却怪季奴署函面，一枝铁槩便称公。

一幅《流民》郑侠摹，方田保甲罢追呼。詎知护法沙门在，又进《朝端莫助图》。

江河万古盛文章，历圣相承宝篆长。我爱金家小尧舜，不烧书籍学秦皇。

廷杖初收谴诏来，国家元气久摧颓。不须苦说茄花酷，璫萼当年是祸胎。

#### 夕照

参差茅屋晚烟微，麦陇风清乳燕飞。夕照邮亭渔唱远，绿杨桥畔一僧归。

#### 送咏春弟赓僖之皖江

亲老不谋学，将如仕进何。趋时新法捷，得路故交多。红叶数行雁，黄山几点螺。瞻云知不远，暇日眺松萝。

#### 秋意

惨澹诗人笔，秋清诗益清。月扶花影起，风定竹阴生。砧杵谁家怨，关山万里情。梧桐疏叶落，河汉寂无声。

#### 除夕寄外

光阴同是异乡过，两地怀人意若何。万里音书中道阻，一年情绪此宵多。梅侵腊雪香犹敛，诗得春风韵更和。守岁不妨吟到晓，锦笺椒颂共谁哦。



侍大母小饮作

春日暖桑榆，重闱晋一觚。鸳针閒处握，鸠杖醉时扶。梨枣孙牵袂，盘飧母戒厨。花前叙家庆，此乐即蓬壶。

毗陵游天宁寺舟中偶成

溪添新涨碧流清，春泛兰桡趁晚晴。日薄片帆移淡影，雨馀修竹滴残声。林边寺近红墙露，天际云连白塔横。梵阁疏钟传逸韵，柳莺犹对夕阳鸣。

渡江

长空雨过彩虹明，艤艫迎潮自在行。烟树数峰团画稿，风帆十幅破云程。沙边鸥鹭盟秋水，江底鱼龙睡晚晴。且喜舟轻人意健，开窗时复对楸枰。

望焦山

昨为金山游，岩壑称奇遍。虽然足壮观，终嫌金碧炫。意欲陟焦山，幽秀窥层巘。无奈波澜险，惊涛驶如箭。今晨渡江归，舟发心仍恋。放眼眺佳处，遥青如匹练。颇似香炉峰，停帆几回见。坡公薄江潭，舶舟卓风云变。我独挝回帆，奇境慳一面。准拟今宵梦，篮舆入葱蒨。

睡起得句

杨柳阴阴日未西，落花如雨溅春泥。春风一枕潇湘梦，时有流莺窗外啼。

昨日微薰今日寒，铜螭漏静篆烟残。隔花鹦鹉声声唤，料峭东风莫倚栏。

辛丑迁居杭城珍珠巷留题旧宅小米峰

峰峦小米巷真珠，同此杭州宅一区。机杼乍分蛟客慧，烟云犹忆虎儿母。敢偕白傅夸新第，未免青山恋故吾。惜别不须深感慨，总相宜处是西湖。

喜外书至

风尘惯适旅怀宽，去住知君随遇安。临镜读来花共笑，背灯展处月同看。

移竹

园地三弓馀，梅柳栽无数。有竹二百竿，梗塞清风路。呼僮移植小池东，祇要成行不要丛。笔端疏散气乃古，此竹亦与文心同。果然解箨春雷快，新绿森森换世界。君子从来挺拔姿，看渠玉立青天外。

自题锦霞阁

落落幽人志，云霞自卷舒。敢云真福地，到此即仙居。商定名山区，珍藏异代书。玉台今韵事，惭愧女相如。

#### 题京江鲍氏三女史诗合稿

璇闺三秀冠当时，赋茗才华并擅奇。韵洽埙篪成合璧，光辉花萼缀连枝。清娱楼阁开诗境，绿饮山堂醉酒卮。更有烟波同泛乐，雁行鸥侣总相宜。

#### 钱淑生

钱淑生，宁乡人。光琢女，巴东知县渠妹，湘阴李祖芳室。有《桂室吟》。

#### 自湘阴归省

初四发湘阴，初五泊新康。初六到长沙，初七下西乡。百数十里间，行李殊周章。逶迤入家门，再拜上北堂。老父出慰劳，老母问家常。弱妹供盥洗，嫂氏备茶浆。弟侄各欣喜，喧笑绕匡床。饼饵堆盘匱，枣栗盈筐篋。屋后枫叶丹，阶前菊花黄。至哉天伦乐，慰我长相望。所嗟时地异，抚己暗悲伤。昔时千金子，今成人未亡。不敢自流露，恐伤老人肠。黽勉膝下欢，鸠杖双扶将。幸此春日晖，椿萱正康强。相从北堂下，载奉称寿觞。

#### 悲怀

苍苍岩际松，青青岭头柏。青苍互相映，不为岁寒厄。哀哉泉下人，此间卜幽宅。人生野马浮，光阴过驹隙。一杯酹荒芜，祝君且安适。毋为儿女悲，毋任狐狸迫。相从会有时，遗君寸心赤。

#### 梦感

昨晚梦亡夫，飘飘步烟雾。握手不得语，凄然忽惊寤。膝下鲜儿女，祭扫阙供具。哀哉未亡人，欲往无由赴。且复遣僮僮，奠汝荒丘墓。

#### 三兄归自新疆过湘感赋

人生苦远离，况复经岁年。悠悠日复日，时事多变迁。自从阿兄出，亲戚俱完全。前年妹夫死，幼子旋弃捐。嗣后祖翁姑，高年不复延。未几二伯翁，复表《泷冈阡》。我家伯父死，长兄自陇还。二嫂忽遽逝，家书言惨然。今年三伯母，又复归黄泉。老父悲亲戚，小病长纠缠。老母稍旷释，右臂病未痊。归省此其时，高堂望已穿。勿复滞归期，勉撑湘上船。再拜北堂人，四女未寄笺。为言人事事，修短自有天。悲吊苦无益，且自宽食眠。飞鸿倘有便，遗我书一篇。

#### 堂上

堂上奉盘匱，堂下执箕帚。且复手纺绩，且复躬井臼。妇职有当然，非以悦人口。

所嗟命不犹，齐眉失白首。念彼泉下人，身死骨未朽。恻恻摧心肝，孤灯十年久。

### 归舍

柴门故依然，老槐覆溪水。乱石砌作隄，苔藓成纹理。经年不归来，归觉心可喜。入门见閒花，枝叶相依倚。翩翩梁上燕，呢喃初引子。好景在故园，非关自夸美。怡怡菽水欢，敬慎将杖履。

### 回湘阴晓发輿中口占

东岭延朝晖，西峰挂残月。牧牛亦已出，鸣鸡犹未歇。凄清重凄清，此心独兀兀。回首望门闾，迢迢隔林樾。

### 归燕曲

玉露零零金风冷，梁燕归飞已无影。回首乌衣春梦长，伤怀红缕秋心警。今年已过又明年，啄草衔泥亦可怜。谁识楼中建封妇，死心还在落花前。

### 慈乌曲

慈乌哑哑枝上啼，乳乌拍拍高复低。乳乌飞起慈乌喜，乳乌堕地慈乌止。乌飞乌止各有心，团团且绕栖巢林。一乌远出衔虫豸，一乌守巢护乌子。何时乳乌毛羽成，反哺酬恩见物情，人生抚儿亦如此，抚儿望儿良有以。哀哀惟我独虚生，累亲无计徒吞声。感此慈乌坐无语，心酸骨折泪如雨。

### 阶下梧桐忽然半枯感而有作

百尺高何用，枯枝不识春。汝为半死树，我亦未亡人。无复阶前荫，惟堪爨下薪。《南华》齐物我，相对独伤神。

### 江天晚眺

泽国苍茫里，风平水不波。江空来雁少，山远夕阳多。渔艇数行集，征帆几阵过。白云亲舍在，归信待如何。

### 和三兄游桃花灵云寺元韵

数声钟动下遥岑，知是桃花古寺林。溪水消馀半篙浅，春云浓起一峰深。茶烹雀舌留新味，树拥龙鳞接晚阴。为问游人诗思好，清吟可有出尘心。

### 夜坐

雨细愁难洗，风寒夜未眠。坐听更数转，烧烬博山烟。

忆母

频将思母泪，早暮洒湘阴。极目江天远，白云何处深。

即景

东风犹自作春寒，日暮何人翠袖单。一树梅花数行行，清吟能得几凭栏。

晓起

一半山岚一半烟，晓星寥落破霜天。忽闻古寺晨钟发，回首西山月尚圆。

周桂清

周桂清，字稚嫻，歙县人。芳三女，合肥诸生阚濬鼎继室。有《缥緗馆稿》。

与姚氏三妹谈吴门名胜口号纪游

绿水桥西泊画船，垂杨倒影入沦涟。人人都上生公石，几辈曾参不语禅。

古桧清奇邓尉寻，石楼探遍早梅林。還元阁下湖如镜，洗涤尘凡一片心。

清钟夜半寒山寺，不到枫桥估客船。安得檀施金布地，精蓝重睹大康年。

灵岩山色香谿水，日日横塘渡口迎。若向震湖重把棹，莫釐峰下一帆轻。

朝天万笏山容古，一线攀登饮钵盂。似燕身材與妇喜，每因肥瘠哭啼殊。

维舟味爽等花开，花气因风四面来。谁谓无声方入画，亲闻甲坼隐春雷。

行春桥外秋光满，满汉菱窠信手牵。摇舫不知鐙火上，城中又见月华圆。

光绪乙亥铎儿始生时寓盘门开窗正对瑞光寺塔诗以勖之

浮图涌现如文笔，界破青天任尔书。屋外高林通古寺，座中修竹认吾庐。清池日涤端谿砚，陋巷时来长者车。姑藕之无正蒙养，鲤庭方盛祖庭馀。

阚寿坤

阚寿坤，字德女間，合肥人。奉贤知县凤栖女，同县诸生方承霖室。有《红韵阁遗稿》。

虎丘

剑池风冷石陂陀，断塔荒凉一再过。闻道开元全盛日，夕阳箫鼓画桡多。

冯畹

冯畹，字我素，祥符人。甘肃典史炳枢女，蒙自光绪己丑进士、新疆阿克苏道杨增新室。有《吟兰轩诗草》。

关山月

关山月，关山月，山月高高漏未歇。城头一夜戍角鸣，大帅平明大纛行，寒沙万里晓光白，斥堠千山烽火青。昨从都尉下三山，复逐轻车出汉关。三边积雪埋头白，五夜胡风彻甲寒。月色营前凝望久，重窥记自葱岭首。多情不舍出塞骑，犹为离人照刁斗。关山月，愿分一半清皎光，为照闺中望月常如此。塞上征人行未已，醒时惆怅月照席，梦里空迷塞烟紫。

寄大兄

离怀渺渺一缄书，寄向春风且任渠。何限洮河东去水，此中无处著双鱼。

春日离咏寄夫子

宵柝声声夜未央，博山红烬玉烟凉。麝煤兰篆休重炷，不是君来便不芳。

银烛斜临倦眼明，坐来转觉不胜情。忽然忆著相思句，正是销魂第一程。

吟怀无那觉肠乾，为乞松萝助洒翰。扶得几分诗力起，好将新句寄君看。

相思只隔两三程，写尽吴笺寄不成。却忆小窗前夕雨，为依揠梦到金城。

茹水西为风物新，韶华著意饯离人。离人今在千山外，寄语河边桤柳春。

张仲肃

张仲肃，华阳人。刘明曦室。有《张仲肃女士诗存》。

晚泊峡中

泊舟临绝壁，倚舵一开颜。山势趋三楚，江声走百蛮。冻云生峡口，倦鸟没林间。孤艇寒风逼，巉岩未可攀。

汪清

汪清，字湘卿，东台人。训导永祺女，同县光绪庚寅进士、编修夏寅官室。有《求福居诗钞》。

寄怀云珠五姊

薰风别后又飞霜，一度思量一断肠。只道相逢秋月白，那堪空对菊花黄。纵多儿女添新爱，何似茱萸插故乡。况复高堂思念甚，倚门终日盼归航。

寄怀许玉清

尺素裁成倩雁驰，聊将心事报君知。家无长物愁难遣，病为痴情悔已迟。偶借新诗消俗虑，自怜瘦骨异当时。半闺珍重休惆怅，好寄平安慰所思。

许月芝

许月芝，字玉清，善化人。江都王存继室。

寄和汪湘卿

犹记临行曾语我，教将近况报君知。药垆为伴还如昔，书卷相亲未觉迟。已分微躯终似此，那堪病骨更难支。深情独有闺房秀，驿使梅花屡寄诗。

俞庆曾

俞庆曾，字吉初，号琴愔，德清人。上元光绪戊子举人宗舜年继室。有《绣墨轩遗稿》。

春日偶成

紫燕衔泥报早晴，黄莺出谷啭新声。春风乍拂长隄柳，吹到花前分外轻。

待月

碧汉迢迢夜气清，疏星几点映窗明。冰轮欲上还留恋，閒倚雕阑听雁声。

过旧居有感

儿时记得此曾楼，故迹重游路已迷。拾翠阶前烟漠漠，寻芳亭畔草萋萋。空庭燕去巢犹在，小院人归鸟自啼。追忆十年浑似梦，不堪再问旧芸闺。

山居

把卷松阴镇日眠，浑忘三月落花天。子规夜半啼明月，细雨清晨润绿田。涤砚偶寻山曲涧，烹茶每乞寺僧泉。心如止水原耽静，不问人间扰扰缘。

清明日湖上书

稚柳秣桃我亦怜，新茶采得煮新泉。扁舟更爱春莼美，寒食侬家不禁烟。

踏青偶过小桥西，绕树雏莺恰恰啼。独坐斜阳看归鸟，不随画舫到前溪。

#### 山行

閒步横桥载酒行，垂杨叶底暗闻莺。溪边小艇人争渡，树杪斜阳鹊噪晴。迎客野猿频献果，催耕山鸟不知名。晚钟何处随风落，我亦思归踏落英。

#### 即事

乍寒乍暖熟梅天，自检新茶煮惠泉。棋为息机甘袖手，琴因识趣不张弦。閒阶雨过蜗涎积，深院风来芡影联。静坐芸窗无所事，唐诗细诵绿阴前。

#### 閒坐和阶青弟

烛翦红纱幕，茶烹碧玉瓿。柳疏寒月漏，雨霁湿云留。遥忆三春日，曾同一叶舟。年华惊逝水，忽忽已新秋。

#### 岁暮书怀和弟韵

渐次东风长绿苔，已看葭管动飞灰。慢惊邓禹封侯岁，不羡相如作赋才。安卧一丘馀老屋，待开三径种寒梅。芸窗岂有穷能送，柏叶聊倾酒一杯。

#### 题阶弟小竹里馆诗后

慢向西窗感鬓丝，墨花开到谢家池。羡君生有空灵笔，湖海风涛腕底诗。轮蹄三度走燕南，遮莫骊珠颌下探。壁有龙泉犹待价，夜深风雨啸江潭。因风柳絮愧虚名，青草池塘梦里生。鹤静琴寒诗一卷，称他修竹月三更。

#### 夜坐忆家偕子戴作并索阶弟和

帘外西风透绮寮，背镫拥髻坐寒宵。儿时滋味从头记，别后情怀借酒浇。茗碗熏炉同寂寞，瑶琴宝瑟懒勾挑。朝朝一纸平安信，分付胥江早晚潮。

#### 寄弟於衡阳

红树青山放棹行，潇湘雁影伴长征。慈亲频为褰帷望，怕有西风阻客程。

#### 敬步祖父大人原韵

浪说天涯若比邻，花前负却艳阳辰。心因望远情何极，身未能归梦转频。桃萼红时莺出谷，杜鹃开处雁辞宾。兰闺旧日芸窗下，手种朱樱可放春。

### 寄子戴京邑

当时曾踏软红尘，茅店荒鸡送客轮。锦瑟年华东逝水，银缸风雨苦吟身。天涯杨柳初匀碧，江畔蘼芜已换春。不说相思深几许，平安聊慰远游人。

### 閒步

亭亭落日晚烟收，指点遥山翠靄浮。千里瓠江波浪阔，乱云何处认苏州。

### 咏老榕树

落叶辞柯下碧池，春风嘘植占当时。他生纵有灵根在，莫作人间连理枝。

### 闻雁

风清月瘦露华白，但闻寒虫啼切切。徙倚红楼看暮云，鸿声嘹唳来天末。影落潇湘杜若洲，天涯何处稻粱谋。玉门秋色羁臣感，归梦刀环少妇愁。银屏烛暗凭阑立，炉鸭香销莲漏咽。一声叫破万家秋，河汉无波人寂寂。伊人消息远长安，迢递关山路渺漫。无语举头天际望，暗将离思寄霜翰。

### 寄弟

风前帆影梦归艖，天末还怜雁字双。自翦秋镫无一语，愁云如梦锁寒窗。

### 书示抱珠妹

当时情味了无痕，此后思量总断魂。画尽寒灰书恨字，种来湘竹是愁根。那知身世安排错，如此华年岂忍论。扑面西风禁不得，残阳影里闭閒门。

### 俞玫

俞玫，字佩珣，德清人。光绪戊戌进士、翰林院编修陞云次女，仁和壬寅举人、军机处章京许宝衡继室。有《汉砚唐琴室遗诗》。

### 消寒分咏

片石访严陵，江云路几层。冰花寒可拾，残柳贯难胜。雪浪催今古，沧波阅废兴。荒台遗迹在，风雨共谁登。

风递数声长，征人凄断肠。无功羁绝域，有梦隔殊乡。白发人千里，黄沙雁几行。客愁消不得，锦字盼流黄。

冻断梨云路，閒庭乍雪天。风棖光闪烛，箫局暖偎烟。湘女凌波伫，嫦娥抱月眠。



罗浮如可到，梅折数枝妍。

#### 乙巳腊月二十九日为先慈四旬仙诞敬焚一诗

风雪逼岁除，称觴又今日。泉壤去不返，十载梦魂隔。随侍安可期，顾复悲畴昔。常闻儿初生，每拟堪巾栉。设帨非悬弧，颇觉期望失。郁怀谁为宽，劳瘁易致疾。晨夕已减餐，提携仍恳切。最小偏垂怜，寝食依亲侧。长往遗孤儿，雏发犹覆额。岂识罔极恩。但苦音容没。千行赤子泪，何补春晖德。一樽长跪奠，芳草墓门碧。

#### 柳枝词

处士高风恋五株，清溪吾亦爱吾庐。苔矶软覆渔人钓，贯得江鱼上市初。

宫样眉痕占早春，伤心南内更无人。灵和最是新栽种，只解风流不解颦。

湖山风雨系归心，新绿帘栊画阁阴。此日苏隄重倚棹，酒痕未抵别愁深。

春色平分百卉先，黏天又见絮飞烟。凭谁画出娉婷影，数笔晴江夕照边。

#### 落叶

楚江波冷下纷纷，消息玄机静里闻。此日霜华随逝水，当时风概想凌云。行吟楚客怜孤蹠，话旧胡僧吊夕曛。极目郊原渺如许，天涯能不怅离群。

千林一夕换空枝，天意分明未有私。淡日无聊还照影，石阑何处更题诗。步兵歧路悲身世，永叔秋镫感鬓丝。賸有后凋数竿竹，青青长伴岁寒时。

杂遯浑疑万骑催，夜寒齐卷朔风来。黄榆影落长城暗，紫塞声和画角哀。怀国易添苏武感，无家莫上李陵台。生原大地阑珊质，甘作乾坤废弃才。

一转商音万象乖，寓形身世费安排。萧条枯管兰成赋，潦倒生涯杜老怀。烟雨几回三月暮，文章终古一丘埋。枫林薄晚停车处，莽苍重阴接断崖。

#### 戏题落叶诗后

策策西风警暮鸦，自倾残墨写轻纱。不辞憔悴如郊、岛，吟瘦寒镫一穗花。笔床启处砚田荒，馀韵寒犹逼绮罗。莫负因君三复咏，为侬好补屋牵萝。

#### 成堃

成堃，布库鲁氏，字玉卿，蒙古旗人。广西浔州知府固鲁铨女，诸生守典室。有《雪香吟馆诗草》。

#### 留别舜华二姊

生小离家国，天涯十六春。明朝挂帆去，又是异乡人。

#### 秋夜

西风催木落，何处不秋声。我是无愁者，閒阶爱月明。

#### 古意

新月明如镜，镜复如明月。愿作明镜圆，莫作月常阙。

#### 任丽金

任丽金，字璇池，高密人。鸿胪寺卿兆坚女，莒县诸生庄畴室。有《得月楼诗》。

#### 夏夜露坐

偶傍疏篱坐，罗襟怯露滋。时将团扇隔，不许月明知。

#### 月夜闻雁

独坐南窗下，初晴月倍明。云中新雁唳，却作故乡声。

#### 题家书后

一别双亲半载馀，平安只接数行书。离怀欲向花笺写，写到相思字却无。

#### 记梦

梦绕双亲膝，牵衣话正长。鸡声惊觉后，依旧在他乡。

#### 庄湘泽

庄湘泽，字素筠，莒县人。诸生畴女，安丘诸生赵录彝室。有《籁声阁诗词集》。

#### 感怀

憔悴已如此，何堪丛百忧。对愁犹有影，多病不宜秋。骨肉他乡梦，年华逝水流。诗书且自遣，世法等浮沤。

淡月濛濛夜，黄昏独坐时。镫残闻玉漏，烟断冷金猊。生死岂能隔，梦魂无见期。秋来摇落意，不复理琴丝。

#### 秋夜

独立空阶净，秋光和月微。莲房惊鹭梦，竹径乱萤辉。俯仰百端集，思量万事非。夜深浑不寐，冷露欲沾衣。

独向东篱下，潇然酒一尊。日沈暗蕉影，风静妥花魂。久客渐成故，旧书还复温。徘徊未归去，新月又黄昏。

#### 雨夜读杜诗感作

凄凄风雨夜，閒读少陵诗。展卷思今古，闻笳感乱离。平居多寄慨，世事有同悲。何日烟尘息，天心若未知。

#### 秋日寄妹

极目明湖景物非，天涯有客泪沾衣。闺中望断南来雁，到得秋来犹未归。

#### 与漱芳孝谅两妹夜话

冻云笼月月笼霜，冷逼鐙魂暗吐光。玉漏滴残寒夜永，围炉且莫话沧桑。

#### 王芬

王芬，字漱芳，蓬莱人。候选知县梓贤女，荣成京卿孙葆田子妇，江苏知县昌燕继室。

#### 寒食

无边红紫斗芳妍，却是清明雨后天。满地柳阴啼杜宇，隔墙花影落秋千。青帘几处飘村舍，荒冢连阡化纸钱。野外难禁三日火，飞灰乱袅夕阳烟。

#### 春闺怨

宿雨开晴晓，轻寒懒酿花。无如旧时燕，犹恋故人家。

#### 秋日

肃杀秋声里，幽怀感百端。蛩啼露华重，萤度月波寒。竹外疏花瘦，廊腰败叶乾。独怜三径菊，冷节未阑珊。

#### 旅夜

旅馆羁身苦寂寥，西风庭树响萧萧。秋砧廿五寒声碎，何处高楼起洞箫。

#### 咏菊

傲骨清标满路开，何年陶令赋《归来》。暗香盈袖风帘卷，自向东篱酹一杯。

感时

世乱年荒何处家，陶轮浩劫涌尘沙。玄黄血染龙蛇起，谁倚危楼听暮笳。

赏雪

乾坤不夜月无光，万壑群山尽玉妆。驴背诗翁去千载，雪中冷落野梅香。

赵录缜

赵录缜，字孝谅，安丘人。河南知县芳畦女。有《天凉室诗略》。

有感

皎皎旧时月，照我前庭除。天地同一色，悲欢境各殊。忆昔兄妹四，谈笑共宴居。此景不易得，思之竟何如。两兄宦京国，秋风思莼鲈。仲兄成永诀，忽忽七载馀。死别求梦寐，生离凭雁鱼。百感填膺满，拈毫苦难书。伤哉闺中子，日与愁病俱。耿耿不能寝，风露沾衣裾。

骤雨忽零星月娟朗徙倚庭除即景赋怀

蒸人烦暑郁中庭，参差树影清蝉鸣。晚云忽压雷声起，雨势倒挟沧溟倾。微风袅袅吹银河，明月盈盈扬素波。碧天澄鲜靚如洗，谁倚高楼发浩歌。

夏夜即事

空濛香雾合，人立小斜廊。顿觉罗衣薄，微微生夜凉。流萤度水阁，冷露下莲房。何处箫声咽，哀音一断肠。

秋日卧病焚香礼佛甚萧寥也成四韵

渐觉流光暮，萧条倍惨然。秋心最摇落，病骨况缠绵。奉佛三生石，焚香一缕烟。药炉伴禅榻，消尽菊花天。

雨夜读楚辞

破闷无繆读《楚辞》，愁心宛转病支离。自怜已抱秋情绪，况复深宵夜雨时。

题绿窗诗草

兰心蕙质雪为姿，意气横飞足振奇。忧国如焚托讽谕，蛾眉真个愧须眉。

方毓昭

方毓昭，字云轩，自号烟霞内史，怀宁人。钱楠母。有《陟斋诗集》。

怀古

《长门赋》与《白头吟》，怨悱凄凉变雅音。毕竟古人恩义重，挽回犹可借文心。

閒咏

无聊时复耸吟肩，笔砚常堆短榻前。偶忆《毛诗》心恍惚，呼儿代记在何篇。

刘文嘉

刘文嘉，沧州人。南皮张文襄公子妇，光绪戊戌进士四品京堂权室。有《然藜阁诗钞》。

谒三君祠

三君祠外啼鸂鶒，三君祠前路盘纡。妇孺瞻仰官长拜，千秋俎豆虞韩苏。昔日天涯叹沦落，天遣先生为木铎。不教廊庙展经纶，却向蛮荒兴礼乐。党祸无人鉴覆车，石工姓字不忍书。汉庭指佞无屈轶，岭海尊贤有鳄鱼。致君尧舜古难必，蛾眉谣诼偏多嫉。百年荣瘁总成尘，一片浮云能蔽日。当时行迹没苔钱，此日崇祠锁暮烟。应羨山堂阮太傅，圣朝际遇胜前贤。

板桥垂钓

红桥几曲照湖明，十顷琉璃镜样平。香饵不施竿在手，悠然物我两忘情。

大雪送式三弟沙市归省用东坡郑州别子由韵

别酒欲倾愁兀兀，客子听鸡待月发。陟屺无辞行路难，肯使倚闾悲寂寞。咫尺天涯言笑隔，行迹旋看雪花没。严冬于役愁衣薄，舟楫马蹄销岁月。行人嗟叹农人乐，雨雪载涂寒恻恻。从来志士耻温饱，转眼百年易悠忽。起登高阁望归人，人去江空景萧瑟。莫因惜别惨离颜，早去娱亲供子职。

村居大雪

雪拥柴门未扫除，朝来更值爨烟虚。且拈冻管亲冰砚，学写平原乞米书。

村居杂兴

万方正多难，玄黄战未已。长安不易居，鹿车返田里。廉吏子孙贫，家风旧如是。

茅檐三五椽，门前一泓水。烟树拥柴扉，清旷颇可喜。良人素乐道，固穷孙叔子。儿童习礼让，诸弟事经史。夜绩与晨炊，同心有妯娒。菜根风露香，真味土膏美。布衣足温暖，適体胜纨绮。寒夜一樽酒，家酿甘且旨。长物有琴书，意境无尘滓。倦鸟暮投林，於焉知所止。穷乡人迹远，当可免倾否。晴窗释砚冰，兴来书一纸。緘札报吾儿，无劳歌陟屺。

### 读书

吾年日衰老，复值离乱世。穷居人迹稀，白昼柴门闭。从来腐儒状，自不厌粗粝。晨起摘园蔬，晚菘颇甘脆。饱食无所为，摊书喜晴霁。清兴曾不孤，同志有吾娣。奥旨共钻研，道义相砥砺。为日苦不足，夜夜鐙膏继。童孙侍隅坐，似解闻孝悌。家法守一经，长为子孙计。可奈纲纪颓，邪说众为蔽。六经将灰埃，把卷时陨涕。

### 知命

明年五十二，太岁在壬子。尝闻星家言，吾年止於此。人生如朝露，早晞亦常理。儿女各长成，向平愿粗已。先为同牢人，入穴驱蝼蚁。奉匱侍舅姑，次媳具甘旨。长男賁志歿，恨不如汪錡。小姑最同心，情话石投水。我生即鲜民，望云陟岵岵。先陇亦非遥，归宁无百里。重泉聚骨肉，乐事从兹始。其言若不讎，幸存亦可喜。馀生皆傥来，此身即敝屣。春草满阶除，春花艳红紫。夏木择榆槐。秋圃蒔菊杞。冬雪掩关坐，万树梅花里。眼前有生意，一一出琴指。偕老歌负戴，归来乐耘耔。鸡鹜足稻粱，儿孙抱经史。行乐贵及时，上寿百年耳。贤愚总一丘，知命静以俟。

### 早春喜雨

墙头柳色见微黄，门外清溪碧玉光。已觉东风到穷巷，一畦春雨野蔬香。

### 弹琴

良夜调素琴，弦和指复柔。一弹声泠泠，再鼓心悠悠。缓若片云停，急如三峡流。雍雍和鸣雁，泛泛不系舟。松风起深谷，修篁响清秋。飘然凌云思，恍挟飞仙游。聊以自怡悦，何必知音求。信哉欧公言，可以瘳幽忧。

### 初夏即事

閒与邻娃共治麻，茅檐晴日响缣车。忽惊篱角如堆锦，新绽几丛君子花。

### 落花

天涯芳草绿初匀，肠断庄周醒后身。寂寂小园空有恨，茫茫大地竟无春。斜风细雨过三月，浅白长红隔一尘。紫玉成烟丽华死，三生何处问前因。

### 乱后喜见诸弟

相看悲喜集，未语各潸然。聚首忽今日，惊心忆去年。人情秋后叶，老景夕阳天。

世乱归难必，生逢亦可怜。

### 漫兴

人海风波无定时，沧桑过眼几更移。忤除结习花难著，脱尽眉毫句未奇。养得幽兰胜娇女，长亲书卷对严师。青镫尚有儿时乐，竟夜长吟子美诗。

### 江岸步月

信步微吟度浅莎，夜深形影独婆娑。天高云让团团月，江净秋生渺渺波。千古兴亡蕉下梦，百年哀乐隙中过。不须更为湘娥吊，孔、跖同归一刹那。

### 番禺梁节菴先生贻外子崇陵雪一罍因煎茶荐先太保文襄公

崇陵飞雪点茶汤，亲奉栖桡荐影堂。故国歌声遍禾黍，老臣心事识冰霜。每陈手诏开遗篋，屡见头纲赐上方。今日分尝犹侍馐，清芬彻骨起悲凉。

### 孤竹堂读魏果敏公诗

昨登孤竹堂，得观魏公诗。肃然再拜读，向往兴遐思。公诗若元气，能入人肝脾。丹诚所团结，挥洒何淋漓。从来忠直士，最难逢主知。公生当圣代，鱼水遇合奇。宜其独对日，感激涕泗垂。悠悠三百战，仿佛见须眉。空堂剩遗墨，鬼神为护持。羨此苍髯翁，亲见留题时。

## 【卷一百九十二】

### 曾懿

曾懿，字伯渊，一字朗秋，华阳人。太仆卿咏女，宛平光绪己卯举人、湖南提法使袁学昌室。有《古欢室诗词集》。

### 魏小兰姊邀游桂湖谒谢公遗像

湖上随肩步，春游景物鲜。露花红蘸水，丝柳绿搓烟。径曲疑无路，山回别有天。空亭聊小憩，把盏听流泉。

轩窗开四面，陡觉薄寒侵。桂树连城暗，松涛压殿阴。山川馀霸气，风雨壮诗心。谒罢谢公象，怆然感古今。

### 浣花诗社歌

浣花溪水何洋洋，绕溪珍木郁苍苍。楼阁瞰流各低昂，湘帘十二卷夕阳。中有诗人

清且扬，芝兰竞秀雁成行。明月为裾云为裳，高谈妙语翰墨香。依依梦锁春草堂，笔花灿烂生辉光。丽句争传碧琳琅，浣溪风月富锦囊。松篁敲韵入潇湘，波光云影皆文章。染墨绮靡不可忘，诗情遥共海天长。诗万卷，酒千觞，吟咏之乐乐未央。但愿人生欢聚永无荒，千秋万岁，合与骚人共草堂。

### 莲花曲

水榭帘栊人如玉，鸣桡轧轧春波绿。昨宵酒醉各题诗，今朝都赋《莲花曲》。粉痕欲坠红妆浅，清露如珠垂欲散。翠澈清风荡融融，参差绿影云塘满。莲子花开水槛东，重叠掩映蛟绡红。秋罗拂水水纹绉，香飘四座生荷风。碧塘摇荡多芳草，白蘋断处生红蓼。紫鳞水面吸莲花，池边日日来青鸟。遥遥柳绿锁湘烟，莲根莲叶相钩连。素藕丝柔情不断，露珠摇荡非真圆。银浪金光荡晓日，绿萼半掩桃花色。帘波隔水夏云生，千里轻风总无力。杜宇啼残春已归，交交鸂鶒芳塘飞。愁煞江干采莲女，软风吹香香著衣。青丝系船茱萸湾，重开新筵不忍还。侍女低鬟进美酒，坐中酒后皆红颜。月明满地遥相望，鱼戏莲叶吸细浪。佩环初解舞衣轻，荷叶罗裙色一样。归来玉婢捧花蕊，采莲夜夜得莲子。一身花露湿云衣，回首胭脂红十里。

### 秋夜

萤火依人点点飞，轻寒料峭不胜衣。纸窗月上玲珑影，画谱新添墨紫薇。

流云卷月镜开奁，閒咏新歌《昔昔盐》。秋兴撩人眠不得，时闻蕉叶打虚檐。

### 送孟昭大姊归新都同游桂湖时值中秋桂花正开

秋风一夜来桂湖，天香馥郁飘云衢。虹桥跨水水飞动，湖光如练烟中铺。烟中词客数来往，三尺绿波摇画舫。双桨划破碧琉璃，白鹭惊飞时三两。半山偃蹇露华滋，峭风吹花浮水面。游鱼吸水并吸花，树影亦为鱼吞咽。桂树转东舟转西，树梢直与城堞齐。金粟飘香气郁葱，归鸦如墨酿霜啼。桂叶冷云苍且碧，斜阳穿树红於血。花光黄晕真珊瑚，衬以粉墙成五色。色映亭台生辉光，鸣笳深护清晖堂。阑干倒影池清浅，枯荷数柄留古香。记得去年嬉好春，芳草如茵蹋软尘。风光转眼千万变，人生聚散等浮萍。新诗吟罢酒频倾，与君小别心绪萦。不知明月几时有，冰壶一洗襟怀清。

### 忆梅曲和慈亲韵寄仲仪三妹

霜满檐牙蟾魄冷，碧梧飘尽冻金井。角声吹断陇头云，惆怅江南芳意迥。曾记閒庭春夜春，月温花暖人同影。一声长笛落纷纷，扫来葬向孤山顶。而今芳信天涯远，人瘦如花花不管。几度巡檐几度思，醉吟击碎琉璃盏。昨宵梦入罗浮里，香雾朦胧迷芳芷。溪南溪北尽是花，一片香魂飞不起。翠羽啾啾窗月白，栩栩仙梦酣成蝶。残灯一点可怜红，魂黯黯兮情脉脉。

### 园中海棠盛开招静专从妹小饮

几日春阴浓，海棠睡已足。和风洒然来，花气蒸入幕。开帘惜无香，秾艳早夺目。



绛萼含葳蕤，清影颤扑簌。宛如红霞红，不枉绿章绿。容颜本无偶，观者苦多俗。幸有故人来，相与诉衷曲。握手谈新诗，开樽倒金谷。对此良辰景，惟有醉醺醺。君醉傥欲眠，抱此花魂宿。

#### 病后忆季硕五妹

扶病褰帷步，微吟养性真。秋花閒似我，新月瘦於人。炼药烧红叶，焚香倚绿筠。不堪回首处，离绪满江津。

#### 旋闽别亲

生小依依骨肉亲，天涯忽已转雕轮。明知久聚愁言别，故作欢颜强对人。燕寝何时承色笑，鹿车从此历风尘。亲心更比儿心切，隔夕先看泪满巾。一曲骊歌百虑攒，思亲容易侍亲难。夔关雪冷魂先怯，巫峡云深梦亦寒。雁影无端重聚散，鱼书从此望平安。临歧无限伤心泪，忍到鸳舆细细弹。

#### 舟过大佛岩

山头一雨作膏沐，洗出千重万重绿。林容灿烂江声高，古刹庄严枕山麓。系缆凝碧湾，石润青苔斑。款乃一声山谷应，千帆影落夕阳间。仙人低鬟静相对，但觉扑面皆青烟。青烟飞不断，石磴石镜互回转。碑披蝌蚪奇，树种菩提满。忽然万壑奔惊雷，青天倒挂银河来。飞流直下一千丈，晴雪滚滚晶帘开。枯藤浓染赤龙血，古楠亘合逕作人立。暗涧风号虎气腥，深箐暮卷猿声急。前山嵌古亭，后嶂开锦屏。扁舟一叶泛萍梗，大江日夜无留停。宛疑人在镜中坐，相对共讶鬓眉青。我今随君掉客帆，行程始至大佛岩。明早挂席东南去，一片疏钟送过山。

#### 舟过巫峡见十二峰高插霄汉神女峰尤为纤丽峻峭神女庙在山之巅

琅琅天风壮，嵯峨十二峰。飞云翔婉变，悬瀑响琤淙。景富诗遍迥，愁多梦亦慵。纤秾宋玉赋，千古忆仙踪。

壁立双峰合，真成一线天。烟鬟浮翠黛，霞彩媚华巅。人语隔山应，江流急箭穿。楚王今已渺，神女为谁妍。

#### 即景

梧桐庭院碧阴满，桐花香扑幽人馆。幽人养疴意态慵，罢妆镜掩青芙蓉。迢迢长昼漏频转，悄倚疏帘品茶笋。一阵凉风送雨来，搅碎炉烟和云卷。

#### 英山道中

晓发仙人山，山高风似虎。月落东方明，雾气蒸成雨。风卷暝色开，曈曈日初吐。林麓喷彩霞，朝阳散平楚。偶闻鸡犬声，人家隐桑坞。登高望八荒，苍天如覆釜。杜鹃红满冈，开落无人主。贪看山林景，不觉征途苦。茫茫尘世中，何如鸳鸯侣。朝聚沧浪烟，夕宿

蓼花渚。得失不关心，翱翔时振羽。

季硕五妹以诗见示题其卷后

人生处世苦局促，惟有新诗可傲俗。摇笔长吟天地宽，放怀何必争荣辱。吾家季妹诗最豪，百篇挥洒才弥速。哀艳应教谢、鲍惊，苍凉直使韩、苏伏。长途千里历风尘，牢愁欲效穷途哭。阅历因知世路艰，翠袖单寒频倚竹。遨游湖海衣化缁，陶铸江山字凝绿。松压严霜挺秀姿，梅含古雪得奇馥。清烈如闻越石笳，激昂疑听渐离筑。扫除俗艳与凡音，开卷琳琅先豁目。忆昔故乡聚首时，推敲共翦西窗烛。裘葛回环逾十年，吟囊早已盈千束。自惭随宦走皖江，尘海羁縻总庸碌。披卷真同《下里》音，挥毫难奏《阳春曲》。今君征棹赴姑苏，一路溪山诗料足。酒酣落笔凌沧浪，别绪忽忽梦魂逐。宛转相思何处寻，临风遥指君山麓。

九日登楼望迎江寺塔

斜阳明灭鸦对语，白杨萧萧作风雨。孤城寒瓮大江声，一塔巍然涌过城。二龙山高百仞，恍若玉山遥相并。人影微茫落半空，足底白云送清磬。

六安阻雨寄高蔓华如姊

敲篷一夜雨，衾薄晓寒添。千里舟车苦，经旬愁病兼。风涛惊断雁，雾气隐凉蟾。秋水人何处，离怀满绿蒹。

舟行阻风雨杂书所见寄叔俊四妹寿州

惊涛卷长空，气势来东北。密雨抛散珠，油云张重幕。琴书颇繁重，汉港复幽僻。草深蚊蚋骄，潮急鱼虾掷。回波迟双棹，暝我欺行客。嗟我尘世劳，言念保身哲。遥睇景转韬，养静神逾寂。指点来时路，迷茫芦花白。

冬夜玩月偶见南园梅花微绽与外子尊酒赋此

鸳瓦粼粼霜似雪，池冰坚结琉璃碧。巢枝宿鸟冻无声，一轮寒月东方出。冰壶月曜澄清华，沆寥天气迷寒鸦。众卉纷纷争摇落，惟有梅萼霜中花。铁骨冰肤呈綦缟，苔阶叶落愁慵扫。冷香菲菲暗袭予，心迹双清同怀抱。春风二月随南征，梅花如雪扑帘旌。椒陵小住将一载，赢得风霜两袖清。金貂换得梨花春，寒梅香里倾千尊。醉后谈诗诗愈巧，披衣起舞挹星辰。玉堂夜静月逾皎，碧天如磨青无云。不如且向酒中住，与月为友花为邻。高谈久坐灯花灿，墙外传来数声柝。霜气浸空月欲斜，诗魂冷共梅花宿。

夏末秋初炎蒸未退病起无聊作此以示诸子

病起苦炎熇，郁纡意不适。乘晓临前轩，冷冷蕉露滴。苔藓缘阶绿，败叶扫还积。昨夜西风来，吹梦落天末。眷念宦游子，天涯互相隔。章江波溶溶，蜀山青突兀。长歌《行路难》，栈道历冰雪。几行万里遥，母心随征辙。愿儿志四方，云程奋六翮。仲子依帝都，圣恩美嘉节。弱冠金闺彦，辞亲远行役。护犂去复回，衣黑宛边尘迹。愿儿俪璠玕，匡君并

辅国。愿儿如阳春，随时布德泽。霭霭出岫云，瞳瞳浴海日。勉哉为霖雨，努力同修德。

#### 曾彦

曾彦，字季硕，华阳人。太仆卿咏女，汉州光绪甲午进士、改庶吉士、大荔知县张祥龄室。有《桐凤集》、《虔共室遗集》。

#### 郊居新筑溪流夹园乔木嚶鸣杂花春发

结构南山阳，嘉木绕原隰。况复值初春，万物皆芳泽。园柳发青柯。山桃含丹实，好鸟扬欢声。幽禽展丰翼，虽无华京盛，足以肆怡怿。君子既高蹈，诸姬亦乐职。载理欢相迎，敦义怨易释。既感朱绿施，能不自彫饰。

#### 观潮雨

曾颺转朝雨，清冷天半来。始集璿铺蕙，末涤玉阶苔。纷糅如累霭，漉奕似纤埃。凤兴振容仪，重闺扇未开。恬然绝尘虑，感古忽增哀。戢羽思云举，奋鳞虑波颓。进退难专志，素丝戚中怀。从欲讵能极，终蹈箕山隈。

#### 游南池作

秋日县清郊，寒蝉改故音。展怀游广园，凄恻发微吟。池藁陨清波，丛菊媚高岑。览枯惜嘉卉，睹茂悼残林。郁与陶俱集，怜共爱相寻。兴衰各应节，诂解起悲歆。嗟彼穷达士，胡为劳素心。

#### 秋夜月怀叔俊四姊

秋月流光薄，凄凄上阶苔。阶苔故人迹，一一存我怀。音容渺不见，情思应往来。情思长相接，无庸动息偕。伊余素修达，诂为岁寒摧。养疴忘悲惊，寡欲鲜违乖。况乃侍君子，礼仪良不亏。愿言寄赏心，战胜靡所哀。

#### 泛湖登南山瞻眺

朝发南山阳，夕息北江湄。舍舟登高隰，辍策步郊岐。曾岩既明媚，曲汜亦涟漪。俯聆虚壑籁，仰睇崇冈枝。清泉漱积石，珍木列平陂。高下竟何辨，丰茂皆欢怡。幽兰发素采，丛桂含丹姿。鲜鳞萃芳沚，好鸟逐轻飏。鉴彼富春物，眷恋感予思。岂惜违君子，但伤莫我知。操持信难固，孤游良可悲。

#### 咏怀

独坐苦无惊，摄衣登高台。曾飘从东发，凄怆入我怀。遥聆丛悲积，远瞩百忧来。悒悒枯桑折，恻恻孤鸿飞。寻欢弥起思，为乐更增哀。安得驾云螭，逍遥游蓬莱。不辞道路远，但伤莫与偕。谁怜西颺日，复值野风吹。

### 答兄旭初定襄

凤凰翔高冈，众雏相追随。一雏羽毛弱，不得与之俱。号泣堕沙渚，索侣鸣声悲。岂不恋骨肉，奈何雨雪霏。行行一反顾，飞飞复迟回。惻惻入云汉，凄凄竟孤遗。饥乌绕我啼，缁纹向我垂。徬徨失所依，空巢独自归。托身高梧中，常得露华滋。饥不食梁稻，渴不饮江湄。韬精复潜声，鹰鹯不我疑。荏苒畜道义，六翮先光辉。当待风云会，奋翅同来仪。

### 从子馥还汉州作

从君还旧邦，仲春善游适。繁英缀柯条，芳草被阡陌。华日动通津，轻飙荡丰麦。华宗申笃好，耆艾叙畴昔。芳醪勤酬献，嘉肴充瑶席。达人隆德辉，夫子继宏绩。高情属华岳，抗志蹈云霓。天姿美无度，茂德难匹敌。明哲自有经，贤达岂今识。嗟余菲薄质，芻蕘翳松柏。永得亲光仪，偶怀共芳洁。

### 答子馥

达人贵无忧，智者多玩世。忘形与物齐，损益焉足计。当荣不骄矜，处苦岂忧惧。盛衰固表里，否泰信崇替。草木有荣枯，取怨朔风厉。日月有明晦，敢怨浮云蔽。托身宇宙中，霜露皆恩惠。神宁礼自舒，欲止欢来遇。翱翔游太清，逍遥度年岁。偕时进德业，崇礼期昌世。感君笃道义，努力自勗励。

### 滞雨不发隔舟贻易玉俞

谁云相离远，咫尺江波中。音容旷不达，所托心与胸。心胸既默感，渐别亦愁充。矧乃过三朝，何如九秋终。理棹朝夕欢，系缆复分踪。嚶嚶鸣思鸟，翩翩飞别鸿。春雨润兰皋，轻烟媚远峰。缠绵怀茂德，寤寐忆仪容。岂无偕游览，温仁诚可从。今彼性惋恋，兹情应与同。

### 苏州七夕同子馥泛湖

客情眷佳节，理棹泛江阴。遥波澄夕霁，霞彩媚枫林。城阙霭暮光，长烟引岖嵚。芳甸散兰息，高树噪栖禽。皦皦河汉辉，脉脉双星临。眷恋隔年思，孀婉今夕心。泠泠仙风过，时闻清吹音。曾楼设华宴，皎月堕芳斟。明镫粲飞阁，列坐理瑶琴。纤纤素手弹，凄凄《白头吟》。繁华当此夜，欢乐轻千金。如何穷达士，独抱忧思深。即事感我怀，慨然念古今。悟彼山阿人，玄默诚可钦。

### 吴趋行

惊飙薄丰林，夙夕成枯枝。百草芳初兴，鸚鵡胡不迟。哲人期佐世，愚者亦深思。婉恋辞乡邑，翱翔吴江湄。山川何温媚，名都信威仪。层台通天汉，飞宇贯云霓。峨峨阊门开，蔼蔼骈奸驰。朱轮王侯女，翠盖尚书妻。天冶倡家子，联翩游侠儿。百两嵌宝钿，千金缀珠衣。清浊不异源，贵贱同一涯。踟蹰大道傍，邂逅通言辞。入门不相识，列坐传金卮。清歌共酬唱，和好无偏私。夫婿居上头，顾盼矜妍姿。日午眠重闺，深宵宴曲池。华镫蔽星月，薰香烧兰芝。哀哉莱氏偶，躬耕蒙山基。蒿蓬结为室，藜藿持作糜。靡靡《黍离》叹，

绵绵《葛{卅晶}》悲。王风化难周，人情多乖违。圣心岂不怀，此邦非吾资。潜龙有时升，雄性谁能移。

### 杨花篇

阳春三月清明天，杨柳千条拂玉关。玉关送别多凄苦，况复杨花飞无数。飘泊初辞连理枝，缠绵复上相思树。笙歌暖响风日低，烟草迷离骢马嘶。扶荔宫中莺燕少，披香殿里鹧鸪飞。游丝有意欲牵住，蛱蝶多情还自随。可怜游丝空萦绕，可怜蛱蝶空颠倒。随风吹入华清池，化作浮萍覆鸳鸟。

### 玉阶

玉阶消积雪，娟娟泻琼液。春风昨更寒，为感江南客。檐前辛夷花，高枝已争发。鲜姿复先荣，婀娜诚可悦。但恐微芳衰，飘风不汝惜。

### 通州舟次

姑苏城边春早来，清溪处处春花开。北风海外变萧瑟，黄尘漠漠驱春回。枯木无枝堆残雪，白鸥沙际苍茫立。颓阳敛敛下西山，船头伫立愁将夕。横风吹波舟行艰，舟人辛苦生烦冤。

### 舟中即景

帆影入苍翠，霞光散碧霄。平沙人唤渡，高树鸟争条。古堠消残雪，寒风生暮潮。客情容易倦，莫负月明宵。

春风吹客思，高咏满山川。落日疏森木，孤帆贴暮天。潮平鸥梦稳，江静月光圆。漫说征途苦，深宵未忍眠。

### 喜弟至

闻说辽西去，相逢念已灰。孰知天意厚，不使我心摧。欢似从君至，愁当为尔裁。惊看嗟老病，感恻且衔杯。

飘泊诚堪叹，飞蓬离本根。艰危辞故邑，高逸隐吴门。闻说芳兰地，都令野草繁。何时赋归去，同醉少陵园。

细雨檐花落，华堂笑语融。飞觞春酒绿，分韵锦笺红。各述平生志，相怜离别衷。此心非旧日，愁损不玲珑。

自尔归来日，秋天景似春。檐花垂绣户，明月堕华茵。鲜洁红鳞脍，香茸碧涧莼。酒阑谈旧事，一字一悲辛。

### 前有一樽酒行寄慰子馥

前有樽酒休叹息，请君展眉听余说。自古贤豪多坎坷，济清河浊今谁识。君不见相如涤器临邛道，不遇良时亦潦倒。祇图一割愧铅刀，敢云朝野知音少。又不闻，富贵尊荣悲患多，惟有贫贱可无他。怀忧一国甘一肉，何如陌上耕桑麻。空持科第称奇才，纵使成名亦可哀。荆榛得地比松柏，蕙兰不采同蒿莱。莫言闺中无意气，蓬门投畚惊车骑。琉璃共酌且高歌，书剑苍茫动天地。停杯惆怅赋此辞，玉阶凉月萦相思。儒生得失等閒事，徙倚微吟风雨诗。

#### 赠蜀章三弟

芳草嚶嚶脊鴒语，念我与尔隔重屿。便风传缄慰相思，为问才华今几许？三郎少小心独雄，红颜如玉气如龙。盘马弯弓射明月，修眉朗朗临春风。东邻父老笑相指，云是当天庙器。骅骝不愧称神驹，英年果遂青云志。忆昔兰闺依慈亲，文歌琴酒围锦茵。当时欢乐不自足，宁知一日西南分。西南东北长怀忆，庭闱眷念谁遑息。男儿有志继先贤，女子无非勤酒食。人生得意能几回，醇醪但醉休停杯。莫向风尘叹萧瑟，好凭经术骋奇才。

#### 立秋登楼观雨

高阁沧浪侧，轩窗四面开。晚风吹涧水，空翠结庭槐。飞鸟归林急，苍云带雨来。碧梧一叶落，凉意满莓苔。

旅客漫愁思，何堪节候催。景从林际散，秋自雨中来。远树轻烟合，遥山夕瘴开。野鸦归已尽，一鹤独徘徊。

#### 严衡

严衡，字端卿，仁和人。钱塘陈元禄室。有《嫩想盒残稿》。

#### 侍子纤姑游葛岭小憩富春山馆

画船斜倚画桥西，结伴寻幽手共携。小港绿摇春水乱，断碑红出野花低。赏心旧梦邀莺语，脱手新诗待燕赉。閒拔玉钗横槛畔，他时珍重记留题。

#### 题画

远山凝翠柳毵毵，小阁分明镜里嵌。三十六陂春水绿，不知何处是归帆。

#### 连理梧桐馆夜坐

风露中宵冷，莓苔小院清。花魂扶月上，虫语叫秋生。身倦便湘簟，鬟低弹玉箏。碧天诗思远，情话欲初更。

#### 赠春声阁主

乾坤清气自嶙峋，侥幸金闺窈窕身。颇有苍生歌哭想，被人错唤作诗人。

七夕和春声阁韵

秋河如画碧迢迢，香冷云屏梦寂寥。花影低垂帘不卷，人间天上可怜宵。

春声阁主集西洲曲云海水摇空绿莲心彻底红绣山明经属朱宝瑛夫人隶书寄自山左  
戏题断句

玉腕拈毫迥出尘，兰闺韵剧清新。陈琳毕竟输朱淑，不绣才人绣美人。

苏隄春泛

湖波窈窕镜中天，画楫横飞去似仙。两岸绿杨人不见，晓莺啼破一湖烟。

皋园即事

湘波无语昼愔愔，倦梦如烟不可寻。奇石瘦於名士骨，落花红过美人心。隔帘燕影低窥镜，润槛苔痕远上琴。不是伤春情绪懒，年时多病到而今。

孙芳祖

孙芳祖，字心兰，号越畹，会稽人。知府道乾女，山阴光绪己卯举人、知县秦德埏聘室。有《小螺盒诗词》。

莲房

人爱榴房红，侬爱莲房绿。翾风作房老，绿珠胜红玉。

晓起

嫩凉如水沁吟床，未拟开奁洗晓妆。清露满阶收粉豆，玉簪花畔剂秋香。

偶成

春深风絮扑帘衣，才爇银炉篆影低。为写金经刚试手，绿阴一院画眉啼。

仲昭家薇花红出墙外

听得诗声隔绛纱，一双燕子巧藏花。玲珑莫搯胭脂雪，但倩仙人鸟爪爬。

缪宝娟

缪宝娟，字珊如，常熟人。吴县光绪癸未进士、改庶吉士、历官直隶候补道李振鹏

室。有《倦绣吟草》。

### 春柳

杨柳丝丝一望齐，和烟和月拂长隄。画楼雨细眉痕浅，绮陌风轻舞影低。金缕剪成穿紫燕，绿阴织就啭黄鹂。那堪临别阳关道，攀折年年送马蹄。

### 怀贞如姊

妆台眠食近何如，走笔殷勤问起居。秦岭云高孤一雁，卫河水阔滞双鱼。凭栏已是花开后，卷幔刚逢月上初。此际相思千里共，几番西望倍踌躇。

### 春日

千条杨柳拂檐低，十二湘帘卷未齐。深院无人春寂寂，碧桃枝上一莺啼。

### 柳萸

浅映眉如敛，浓拖眼欲迷。行人休便折，留覆短长隄。

### 送春

园林无力护芳菲，红渐萧疏绿渐肥。蝴蝶不知春已去，殷勤犹傍落花飞。

雨后残香何处来，飞花成阵贴苍苔。莺儿并坐枝头唤，底事东风竟不回。

### 伊署小园

森森修竹夏生寒，新插花枝界画栏。行到绿阴最深处，双鬟閒弄钓鱼竿。

### 秋夜偶成

满天霜气扑帘旌，秋逼人来夜更清。几点残星横汉澹，数竿疏竹拂窗经。空庭落叶因风走，老树栖鸦见月惊。何处砧声敲转急，梦阑听去倍分明。

### 归宁伊川道中作

向晓入幽谷，千岩秋气清。断崖飞瀑布，碎石咽滩声。地僻人难到，山深鸟自鸣。崎岖三十里，一角露层城。

### 洛浦春游

东风吹度洛川滨，辘轳香车碾软尘。树色含烟山泼翠，波光如镜草铺茵。漫疑渔父来秦境，拟效陈思赋《洛神》。指点扁舟来一叶，三篙暖涨碧粼粼。



### 银屏晚眺

瞥见城南列画屏，登临遥望醉眸醒。四围远树低平野，一角斜阳上小亭。古寺钟鸣僧罢饭，幽林风定鸟梳翎。归途回首苍茫里，十二峰头不断青。

### 登龙门游香山寺

揽胜偶登台，凭高眼界开。山深人不见，松静鹤初回。水自峡中出，帆从天外来。游观浑未倦，夕照漫相催。

### 雨后

雨后一凭栏，四顾天清朗。深院寂无人，明月青苔上。

### 荷镫曲

藐姑仙人斗晚妆，袜尘不动罗绮香。金釭照耀烂如昼，三十六宫春正长。儿家生小承恩日，华清浴罢娇无力。归来寂寂掩瑶扉，玉阶人静露珠湿。无端急救召湘妃，小队银镫夜打围。箔底细簪金错落，帘边亲启玉葳蕤。珠围翠绕纷迢迢，照见鸳鸯春似海。杏子衫轻偎影红，桃花裙褶拖痕紫。玉腕玲珑大小垂，酒酣零乱舞腰支。最怜袅袅杨枝细，弱不禁风欲堕时。靡曼妙态纷相扰，风鬟雾鬓知多少。唾花馀碧石华轻，化作湘纹笼缥缈。此际销魂神采飞，此时擢秀几琼枝。当筵莫怯娉婷甚，幅幅纱笼好护持。宴罢归为缀珠戏，濡毫手作鳌山记。明珰火齐烂不收，七尺珊瑚等閒碎。似闻仙乐奏《云璈》，如有衣香冉冉飘。羊侃帘前兰半烬，扶风帐外桦全烧。别有愁蛾夜妆靓，洞房深邃蛭膏冷。遥看红云捧玉皇，倚栏寂寞羊车幸。我亦青莲梦里人，苦心蕙药不分明。樽前欲借神光引，一把三生证夙因。

### 田家

数椽茅屋野人家，落落疏篱一径斜。山雨欲来林鸟寂，蜻蜓飞上水蒹花。

### 题汉未央瓦砚歌

紫云一片土花结，寒光隐隐凝霜雪。流落人间三千年，不随碑碣同磨灭。古来宫阙盛炎刘，未央宫与阿房侔。阿房一炬成焦土，汉家片瓦犹千秋。片瓦功能夺真宰，蛟龙泣罢啼痕在。质坚不为岁月磨，色古岂历风霜改。昌溪吴氏宝用之，沧桑变幻不可知。洪子嗜古有奇癖，得从古市光陆离。盛以宝盒盘蛟螭，奇气掩映珊瑚枝。岱翁铭字工刻镂，酆侯古篆形模旧。精金可铄石可灰，此物永并鼎钟寿。

### 慕昌淮

慕昌淮，字寿荃，蓬莱人。翰林院侍读荣榦女，南皮举人张元来聘室。有《古馀梦阁遗诗》。

### 早秋

风蝉鸣苑柳，薜荔绕墙翠。天空清如水，西风生爽气。池边开晚莲，阶下发新蕙。待到中秋日，延月赏秋桂。

### 报国寺看花

逍遥古寺中，斜日上林顶。禅院静无声，微风弄花影。雨过野禽寂，一树碧桃冷。徘徊幽径侧，爱此芳春景。碧草满山亭，钟歇日正永。客去晚风凉，松上鹤初醒。

### 春暮

皇州春晚柳依依，湿翠侵阶苔藓肥。满地落花新燕乳，一天疏雨晓莺飞。茶烟几缕閒留树，轻絮无声暗扑扉。历乱碧桃开未尽，幽庭犹自弄芳菲。

### 雨后即事

云开犹漠漠，雨过一鸠飞。落日长天迥，开帘双燕归。岚光团远岫，苔色上柴扉。向晚喧渔市，风腥银带肥。

### 纳凉

碧天初过雨，露坐纳凉时。夜静月光朗，风吹花影移。蛩声鸣暗水，萤火落疏篱。坐久清宵寂，荷香满曲池。

### 月夜

日落碧天暝，深树栖鸦集。开轩纳夜凉，秋虫一何急。幽庭散花影，月色皎如日。夜静竹风清，流萤飞复息。

### 雨夜读书

密雨喧苔砌，芸窗夜读书。吟声深竹里，凉意一镫馀。风起蛩鸣急，更深暑气除。流观千古事，此乐有谁如。

### 九日天宁寺登高歌

我来正值西风时，千林红叶舒清姿。禅房花木颇不俗，况复黄菊开满篱。更登小山骋远目，杈丫老树皆十围。云际阴阴日明灭，口敖々天末鸿雁飞。徘徊且倚石上酌，清霜已降蟹螯肥。茱萸满杯新酿绿，无言独自延清晖。此时微雨断复续，苍然湿翠沾人衣。落叶满山万籁寂，惟闻松间时涓滴。微风作冷客欲归，清磬一声寒烟夕。

### 上元

微风十里颿红尘，宝马香车过往频。云敛三霄捧华月，镫明万户闹重闊。纷纷丝管良宵永，隐隐楼台淑气新。游戏长衢冠盖客，不知谁是上书人。

#### 拟古诗

雄才柳柳州，文名少已擅。如何附权贵，遂令人所贱。幽兰竟遭锄，焦桐终入爨。行潦本无根，雨过即漫漫。浮游水上萍，胡为生其面。从横更不久，水涸萍亦烂。君子慎厥初，当几贵立断。秋风思莼菜，伟哉彼张翰。

群雄逐秦鹿，楚汉久相持。矫矫淮阴侯，右汉心不移。下赵威名振，定齐先声驰。嗟哉赤帝子，推食复解衣。固陵期会战，如饥望黍飴。诎意重瞳灭，伪游忽相欺。野鸡任肆毒，钟室遭诛夷。靡靡单葛衣，鲜白如凝脂。夏著何疏爽，秋著何凄其。物性岂异昔，著之非其时。器败虫乃生，恩寡才间疑。密谋钜鹿守，此语复谁知。

#### 道上即事

古道西风急，铃声自往还。孤城残雨外，落日断霞间。秋色团高树，寒流啮断山。长安回首处，千里白云閒。

#### 浣花草堂

稷契原无愧，栖栖终倦游。干戈空涕泪，诗笔即《春秋》。茅屋经今在，寒江镇日流。伊、周如坎壈，著述亦长留。

#### 题航海图

长风莽漾荒烟织，万峰倒插骇浪逼。寒星炯炯海天高，孤帆如箭接红日。

#### 夜宴外家浣翠亭

西园成雅集，清夜寂无喧。冷露团花影，寒波敛月痕。危楼倚空翠，疏柳挂黄昏。好为留馀兴，中秋结桂尊。

#### 道上

高岭簇云起，梅花将破颜。冻云寒敛日，急雨冷吞山。黄叶犹依树，征鸿已度关。人家前去近，犬吠暮烟间。

#### 蓬莱阁观海歌

蓬莱杰阁凌长空，东海名胜常称雄。俯窥沧溟渺不极，蜃市变化虚无中。我本好奇逸兴发，一尊特向高台设。是时澹日过朝晡，海云如墨浪翻雪。狂飙骤起万山昏，长天吹破青铜色。惊涛澎湃岛屿动，喧豗震裂老蛟窟。骊龙怒起战翔阳，水上浮光明复灭。大鱼鼓鬣似奔雷，百川一吸喷成沫。有如钱塘破阵舞，百灵恍惚纷出没。冯夷击鼓天吴歌，耳目慙慙

羊心惊绝。云开风静波浪恬，神山遥望青巉巉。玉妃素女向我笑，金枝翠羽藏烟岚。海阔天空万籁绝，无言独下潮海庵。归途衣袂风裊裊，好趁夕阳听水鸟。红尘回首望高楼，杨花乱舞山城道。

#### 和浣云九姑征夫之作

风高万木啸，胡笳悲清秋。临河抚长剑，慨然中心忧。忆昔虏氛炽，杀气冲斗牛。丈夫志四方，不顾儿女愁。奋志辞乡里，驱马长悠悠。名王系颈归，胡骑屡见收。清霜已满鬓，陇水停不流。一身经百战，偏裨多封侯。人生趋王事，岂为身命谋。苟得展怀抱，麟阁非所求。

#### 即目

閒看秋色到山家，几曲清溪绿树遮。惊起一双黄蛱蝶，见人飞入野棉花。

#### 忆梅

忽忆罗浮下，寒梅花正繁。祇应馀翠羽，相对语黄昏。怅望霜三径，清寥酒一樽。满天风雪里，独自向前村。

#### 冬夜欲雪柬诸弟妹

寒云欲酿雪，黯澹夜天迥。几度开帘望，疏星犹耿耿。黄叶啸空阶，霜气透衣冷。朔风号夜柝，冻鹤拳松顶。缺月露微光，寒梅瘦无影。转瞬玉花飞，待子倾新茗。

#### 严子陵

大度刘文叔，重兴汉室秋。诸公尽麟阁，有客老羊裘。流水淘荣辱，机心付钓钩。大夫如可屈，应久觅封侯。

#### 金台览古

沙气蒸云落日黄，西风高啸万林霜。金台骏骨归何处，古木寒鸱镇夕阳。聊共新诗添点缀，空馀衰草阅兴亡。燕昭身后望诸去，胜迹当时久已荒。

#### 芦沟桥

晦夜犹留月半环，应怜旅客道途艰。人来京国驰如骛，月到芦沟亦不閒。野雾浓蒸千树合，寒流倒影一钩弯。长安此去无多路，缥缈红云拥九关。

#### 梳妆台

金国萧条万事非，妆台犹说李宸妃。芳尘无复凌波步，霞绮还疑旧舞衣。细雨禁城花自落，疏钟太液燕空飞。雕栏玉砌春长在，应有香魂月下归。

### 初夏读书杂咏

湿云蒸落日，雨气润流黄。好风时入户，飒然生微凉。晚花红堕砌，幽草弄馀芳。芸编间披览，虚室澹生香。虽惭管窥豹，得失亦评量。聊资耳目异，安问兴与亡。好鸟已复鸣，相对更举觞。

深谷有枯草，阳崖茂嘉卉。兹岂物性殊，植高禀气异。巍巍卫、霍勋，赫赫椒房势。襁褓皆列侯，枝附尽高位。功成正少年，天幸易为致。谁识故将军，吞声霸陵尉。简子叹雀雉，其意殊堪嘲。初质犹不保，化生亦徒劳。如何秦、汉世，妄意希松乔。苍生力已尽，方士气正骄。秦女去不返，三山终迢遥。废书仰天叹，浮云开碧霄。

### 纳凉

避暑池塘雨乍收，芰荷香暗绿阴稠。松间老鹤眠初觉，水底疏星影乱流。夜月虚明辉万户，银河清浅入新秋。好逢八月浮槎至，泛向天边访女牛。

### 昆仑奴歌

飞宇连云列阿阁，相公卧病垂珠箔。中有佳人颦翠蛾，春愁暗逐炉烟结。千牛省疾乍登堂，杨柳风姿何濯濯。酪醢虽甘桃液酸，幽怀脉脉言不得。临别殷勤覆玉纤，含情空指胸前月。不教磨勒解疑团，月满良宵应独看。力士金椎挝猛犬，雕栏已失护花幡。逐得渔船辞洞口，一肩香雪度重垣。嗟嗟人奴技至此，惜哉未遇汉天子。戈盾林中如鸟飞，汾阳失策复何悔。安、史虽灭外夷强，胡不使之执鞭弭。他年翠辇再蒙尘，空令卖药洛阳市。

### 山行遇雨

惊风挟急雨，飒沓千山昏。黑云塞天地，陵谷茫不分。客子迷故路，四顾惊心魂。奇峰阻我前，何以回车辕。行行且复上，瘦马凌巉岏。砰訇走涧石，冻瀑如雷奔。轻冰结衣襟，山气厉严寒。远游意良苦，悲彼《行路难》。日暮念故乡，东望空长叹。

### 度韩侯岭

径仄劳车马，崎岖鸟道蟠。高皇无寸土，孤岭尚名韩。风劲汾流急，峰尖石剑攒。何须凌绝顶，转恐下山难。

### 中条山吊司空表圣

落日寒无影，层云万里阴。诗人不可见，霜叶一山深。堕笏非嘉遁，成仁悲陆沈。清风谁许并，遥对首阳岑。

### 潼关行

东走黄河西华山，屹然当险开潼关。雉堞高插青云端，一夫坚守称万全。桃林战士

二十万，谁致死之歌舒翰。三秦流血膏胡锋，长蛇封豕蟠关中。銮輿播荡身降虏，勋名百战皆成空。哥舒失机诚自辱，悲哉胜朝孙白谷。慷慨临关血战频，孤忠卒难撑全局。朝廷政事伤陵夷，乾坤坐令烟尘飞。譬如全体皆已失，咽喉虽存将安为。是知在德不在险，吁嗟关兮空崔巍。

#### 太华山闻钟

太华新晴宿雨收，清钟遥度夜天幽。一声初动三峰迥，万籁都沈孤月秋。天外微传玄鹤唳，树间时见碧云流。松风飒起馀音杳，霜气横空失斗牛。

#### 望终南

终南晴后势崔嵬，积雪皑皑万壑堆。天外奇峰连日白，山头老树尽花开。惊风摧木号阴岭，冻瀑挟冰走涧雷。晓起长安排闼望，岚光如水入城来。

#### 雨中游曲江

一天疏雨且衔杯，寒食寻芳曲水隈。江燕低随飞絮下，春帆閒逐落花来。沙蟠细草萦青带，风卷轻波泻绿醅。回首当年修禊契事，兰亭诵罢更徘徊。

#### 霸桥

几株新绿雨冥冥，玉笛吹来隔岸听。柳色不知前代改，春来还向霸桥青。初添弱线萦烟水，送尽行人过短亭。最是夜深离别处，一林残月酒初醒。

#### 送春

春光此去欲何之，好向东风问后期。币地绿阴啼鸟换，满庭风絮卷帘时。遥看别路云千叠，且尽临歧酒一卮。祇有落花不辞远，多情直送到天涯。

#### 读神仙传有感

封禅祈灵海上游，几人曾得到瀛洲。紫芝东采三山远，青鸟西飞五利愁。终古玉关秦月在，祇今汾水汉云秋。剧怜仙李蟠根大，圣祖俨然御冕旒。

#### 倚楼

远岫明楼角，扶疏草木幽。坐来微雨歇，山气澹如秋。

#### 夜闻西风大起有怀文波四妹

西风飒然至，万树动秋声。怀汝不成寐，长歌空复情。愿言生两翼，乘此便东征。细语别来事，宵深酒共倾。

### 左太冲咏史

赫赫金、张势，朱紫荣襦褌。峨峨许、史庐，高台连曲沼。扬雄独不达，著书摅怀抱。伟哉身后名，文章传八表。倚桐始生时，见困於蒿草。及其凌云霓，倾枝巢凤鸟。奇材有迍邐，天命苦不早。鲲鹏异鸢鸠，知年有大小。

### 谢灵运游山

弱冠怀微尚，复与世相逐。违志兹二纪，谢病返初服。寻异淹晨昏，赏心穷水陆。层岩备登顿，平林恣远瞩。阳葩相映蔚，幽草亦芬馥。微雨过春江，蒲稗生新绿。水流虑自澹，山深人绝俗。行从太公任，謁伐谢林木。

### 杜子美出塞

含凄别亲故，驱马度塞垣。惊风撼阴海，大雪压龙山。胡天云气恶，我行何时还。朝廷方勤远，壮士敢顾身。所怜多死亡，何以答吾君。男儿即戎事，报国当及辰。荣名患不立，成败何足论。

### 韦应物访友

言访摄生客，持榼披云树。采药犹未归，一鸟烟中度。怅望碧云深，幽人渺何处。日暮雨萧萧，独下寒山去。

### 别亲

祈招兴咏幸三思，叔世陵夷亦可悲。门户已开闽蜀洛，坡公端不合时宜。

伯道无儿真恨事，中郎有女剧堪怜。淮阴易帜原良策，急为相攸慰九泉。

谢却尘缘俗累纷，独伤白首负辛勤。此心难使幽明间，泉下还将望白云。

幻影浮沕廿八年，庭闱别处转凄然。聪明根蒂如留得，不向他生再种缘。

### 绝笔

雨中杜宇啼，溅尽一腔血。莫化断肠花，肝肠已断绝。

### 谢佩珊

谢佩珊，宜黄人。同县许汝机室。有《吟香阁诗文初草》。

### 忆母

钗裙犹未改，作妇岂忘箴。勉遂阿姑意，恐劳慈母心。晨昏知礼拙，教养念恩深。

谁谓归宁好，翻教泪满襟。

谢漱馨

谢漱馨，宜黄人。同县吴恩晟室。有《晚香堂诗稿》、《晚香堂诗社稿》。

望外信久不至

人去天涯远，鱼缄竟渺茫。春闺添怅望，旅舍谅安康。岂是音书少，知因道路长。遥思游子意，魂梦早还乡。

萧道管

萧道管，字君珮，一字道安。侯官人。同县光绪壬午举人、学部主事陈衍室。有《萧閒堂遗诗》。

春暮

春暮花飞尽，无人寂闭门。满庭苔草色，诗思在黄昏。

窗前树金银花一架

酴醾香梦何忽忽，花散天女褪紫红。天然金玉抱奇相，锦绣照耀谢化工。美人薄采不盈掬，宜田待女怨东风。烟携雪挺搴素袂，淡黄深白摇绮栊。低垂蕙帐悄然觉，蘼芜恍惚把芳丛。残蜂倦蝶不到处，无衣妆额尤玲珑。美人何日不成虹，白云黄竹逢西东。

春阴

薄帷淡如烟，春阴浓於墨。窗前倚复倚，稍觉寒恻恻。顾兹瓶中花，倍有销魂色。因思成小筑，万本会香国。南轩坐管领，红紫面皆北。太阴有炼形，暄妍未为得。

七夕杂诗仿曝书亭体

定有琼楼特地凉，银河烂熳起红墙。黄姑曝惯黄绵袄，不领天孙云锦裳。

西风不算清凉織，南阮无多黄竹箱。拥得桃笙背镫坐，月痕如水过东墙。

碧海青天几度来，媚乡缥缈指蓬莱。嫦娥懒见双星会，渐渐灵妃唤不回。依旧东西沟水流，有人为古起担忧。玉皇不付冯暖券，何处婚钱醺阮修。

秋声不起青杨巷，夜色平分黄篋楼。晒罢残书无个事，诗情伫到个萤流。

西郊上冢即目



荠麦东风绿，菜花斜日黄。郊原好颜色，生色上衣裳。

梨花零落尽，独有豆花肥。多谢东风意，微香吹扑衣。

水田真漠漠，雨后少人耕。白鹭不飞去，相随立复行。

#### 夜坐

下帘划袜移，萧寥夜又冷。窗纱灰白地，位以瓶花影。微风尔何来，欺我炉烟挺。昔年两无寐，索句银烛秉。画屏看双星，娇宠形影并。无眠更延伫，钗划月痕等。良夜去迢迢，有如兰缸耿。与君复此夕，静味当细领。宿雨响不停，谯楼静而迥。独怜栖鸟惊，踏踏怯寒梗。

#### 有所思

桔槔声里月如烟，危栏虚倚愁不眠。梦魂飞越路三千，碧云楼阁何处边。下有清影照女便娟，亭亭隐约画廊前。此时幽怨鬓斜偏，紫霄鸾凤乘何缘。西风写韵传一篇，不然湖色西子妍。波纹滑笏如春笺，飘零风露共叩舷。云鬓香雾湿可怜，弃掷宝枕梦游仙。销歇锦瑟张鹍弦，胡为落叶听哀蝉。蓬蓬蝴蝶去不还，秋更一一年复年。

#### 龙华镇看桃花

龙华桃花十五里，桃花红白玫瑰紫。游人看花兼看人，马如游龙车如水。冒枝裙衩香春风，映肉花光一何绮。游人只恐斜阳暮，照影争怜绿波美。长安水边不可见，湖西花钿只如此。明朝处处卖花声，苦报春光疾如驶。

#### 暑晚得雨

疏雨洒池竹，雨斜竹已垂。继以微风度，门馆生凉时。细点湿窗纸，馀飏颺书帷。瓶花如新润，炉烟惟清丝。於焉遂延伫，数语不成诗。

#### 秋晚

蝉声摇曳歇，庭院晚凉留。衫袖风添裊，帘栊月当钩。竹香秋梦碎，树影夕阳收。亦是诗家语，谁能刻意求。

微月澹空庭，薄云天际青。鸣蛩犹阁阁，瘦蝶已星星。曲院蕉疑雨，疏窗灯似萤。江潮少焉至，荻叶最堪听。

#### 姚倚云

姚倚云，桐城人。通州范当世室。有《蕴素轩诗稿》。

#### 偕大姊晚眺

何处钟声逐晚风，碧天云净夕阳红。渔人隔岸弄明月，白鹭衔鱼出柳丛。

#### 除夕和三弟

骨肉得为乐，聚散良有已。除夕荐芳尊，相对如梦里。承欢白发前，绕膝孙曾喜。侧听爆竹喧，坐待晨光紫。但恐开岁来，复作远游子。

#### 安福闻子规寄怀大姊

高柳依廊疏影低，碧天清夜子规啼。无端惆怅思千里，双桂楼前月向西。

#### 和夫子

文章浩浩古人长，快意雄风忆大王。黄鹄不知天地远，黑貂应觉雪霜凉。樽前丘壑资谈笑，眼底江山起病疴。隔岁离愁定无限，只今且复为君强。

#### 用欧公韵寄夫子

忆昨送君时，风光正春日。别离那可论，此心良忽忽。虽有千万言，心悲不能出。深恐扰君思，回肠忍泪没。自君远行役，承欢双亲膝。黽勉敢惮劳，夙夜怀懔懔。初来未尽谙，儿女相辅弼。慚惶提斯心，安得往时逸。风月非无趣，每每看令失。时或有佳致，十不能得一。感念高堂慈，遇事必宽恤。有时怜其长，命之和新律。亦欲博亲欢，苦思真咄咄。流光何迅速，夏去秋风疾。相思惟自知，乌能向人述。忽得桐城书，青山已卜吉。览之涕交流，岂敢望归必。老人竟颌首，许其返蓬荜。又得津门书，周旋语意密。极论劬劳恩，去日若鞭扶。汝心苟不从，遗恨当斧钺。故尔辞两亲，脱身不用乞。在道感君怀，反复视君笔。忧思安能已，徒有泪横溢。君诚不自聊，尚恐君心郁。何以报深情，珍重为君匹。倦极入幽梦，相见在仿佛。忽为晨钟醒，劳生待谁嫉。茫茫大块中，尔我定何物。好留泡影嬉，祇待白头毕。从兄复登舟，亦任风涛。万里若乘槎，苍茫近太乙。云际山迢迢，枫林秋瑟瑟。寒沙群雁口，荒渚幽虫唧。皓月一周天，片帆抵官室。悲喜涕重闾，亲情绕诸侄。旧日闺阁中，妆台尽散佚。芙蓉尚含苞，丹橘犹结实。依依我亲傍，留连复惕息。聊慰罔极思，寸心中自劾。且复爱年华，新妆待君栉。翱翔好致身，憔悴嗟吾质。不然陶翟耳，吾岂慕高秩。堂上七十年，人情三百级。

#### 聂炳楠

聂炳楠，字雉梅，宜宾人。江安光绪戊戌进士、编修、直隶提学使傅增湘聘室。

#### 送豫生七姑北上

重碧轻斟尽一觞，柳丝无力绾离肠。长安西笑谁言乐，江水深愁未可量。眉妩待传京兆笔，诗怀应满野云囊。县知燕草明年绿，定忆家山苦筍香。

#### 吴怡

吴怡，字欢佩，一字纫萱，武进人。举人广东同知翊寅女，同县广西苍梧知县庄炎继室。有《玉清馆诗草》。

游山同翰君作

落日陀台畔，晴空一雁飞。平芜迷望远，野鸟向人低。金井凄寒纒，秋砧捣客衣。故园松菊好，三径愿同归。

七夕示翰君

画屏无睡怯新凉，秋点听残夜未央。耿耿银河望灵匹，娟娟素月照流黄。星盟钿盒应珍重，石赠支机事渺茫。为恐良时容易尽，绿章愿乞此宵长。

答姊病中秋感示扁善

小山丛桂暗香浮，极目平芜起莫愁。示疾维摩时恋榻，倦游王粲怯登楼。身如客燕仍为客，心似秋桐易感秋。何日莼鲈遂归思，五湖偕隐狎閒鸥。

七夕前一日独坐简扁善

月影移花度绮寮，帘垂银蒜夜迢迢。秋萤吸雾栖烟叶，凉露侵人湿翠翘。小别漫栽红豆子，閒情且倚紫琼箫。双星漠漠秋河澹，睡鸭馀薰已半消。

和家大人上巳日作

微雨帘笼燕影斜，博山香细透轻纱。春阴十日朱成碧，幽恨频年鬓欲华。漫学参军作蛮语，且持樽酒饯飞花。比来客思颇唐甚，懒逐游人斗钿车。

九日登越秀山和家大人步东坡惠州韵

海门日落角声凉，庾岭霜清橘柚香。几处寒砧催木叶，频年倦旅怯秋光。登临朝汉荒台畔，凭吊降王废苑傍。莫问当时歌舞地，暮云愁锁绿芜长。

秋日越秀山怀古

苍茫吊古独登台，极目天南瘴雾开。一代兴亡悲黍麦，千秋霸业贖蒿莱。塍荒禁苑耕残瓦，潮落珠江冷劫灰。回首玉钩斜畔路，素馨寂寞销寒晖。

落日秋原草木彫，断垣残石楚认前朝。呼鸾道废佳游歇，戏马台荒霸气销。岭海蛮烟愁陆贾，陀城瘴雨吊任嚣。登临不尽沧桑感，怕听西风咽暮涛。

和沈季文壬子除夕感怀诗元韵同翰君作

岁去无踪杳莫寻，百壶春酒且重斟。丹颜绿鬓随年改，密咏恬吟坐夜深。六合之中皆寄旅，一杯以外听浮沈。纷纷时局方争鹿，漫诩河山似带襟。

王嗣晖

王嗣晖，海宁人。有《滋兰室遗稿》。

秋感

瑟瑟江头枫树丹，芦花吹尽笛声残。愁经病后心逾淡，诗入秋天意更寒。断续繁砧催野渡，萧疏木叶响雕栏。乱山叠叠斜阳里，剩有归鸿天际看。

明妃

雁声催向玉门关，一曲琵琶马上閒。回首汉宫三十六，独留明月照朱颜。

寄绍芬姊

静坐何寥寥，静夜何迢迢。迢迢有所思，别意岂能抛。念子不成寐，烛泪摇绮寮。从来离别心，有笔难尽描。子之趋庭日，我昔正垂髫。携书析疑义，镫下争拈毫。春来桃李发，酌酒兴自高。秋深夜雨寒，诗就共推敲。埋首闺阁里，有怀徒尔豪。今子他人妇，儿女共嘈嘈。调羹奉阿姑，妇道应自操。不复侍椿萱，惆怅关山遥。得会亦不久，得共无几朝。雁羽况沈浮，两地愁相交。春寒日益严，春雨何劳劳。夜来不可听，隔幕风如刀。念子益愁思，愁思不可销。一夜梦飞渡，月落胥江潮。

归盐官留别诸姊

如何离别意，相对转无言。回首沧江上，烟波易断魂。

离家

离家已五日，不尽故乡愁。驿树一行直，空山两岸秋。暮云依鸟没，寒角咽江流。独立一相望，苍茫何所求。

暮眺

人生有会必有别，离别何须心惓惓。秋风一夕送行舟，江水茫茫浸落日。浩然旷望天地间，去水浮云两不绝。吁嗟乎，山高兮水深，我道困兮不可行。谁是人间豪侠子，磨刀海上制长鲸。

渡江遇雨

大风起兮浪头急，天地合兮渺一色。雨丝丝兮烟纷纷，霹雳一声千嶂黑。行路难兮行路难，江上长鲸势何伋。

舟中

一年三渡此江滨，歌哭文章我更真。回首苍茫一洒泪，人间深恨著何人。

闻雁

一雁哀鸣深夜过，寒磴无奈客心何。孤飞怜尔荒江道，荆棘严霜处处多。

舟中夜坐

荒岸残宵角，孤舟不寐人。摇摇红烛尽，磊磊白波新。莫为悲身世，怜余有老亲。酒痕和泪迹，多半洗风尘。

登浮翠阁

心事萧条未可论，愁来风雨度晨昏。天涯尚有思亲泪，日暮登楼恐断魂。

仲春初十日大雪

东风未若北风冷，春日风声势何猛。大雪纷纷天外来，乾坤散作冰壶影。天公玉戏真轻匀，人间哀乐何不均。貂裘兽炭尚呼酒，岂问街头寒馥人。东家寒毡夜苦读，西家纺织一何促。公等围炉更不闻，沈沈清夜度歌曲。曲中亦有哀乐声，昨日沈醉今日醒。项王气尽乌江上，赤帝江山今亦更。可怜世上儿，复此纷相争。吾持长剑发悲啸，斗酒十千还独倾。不唱《行路难》，不求青史留姓名。但愿世间冷热不到我，长歌来去一身轻。

季秋初七夜登舟留别重闱

登程更已残，夜寒生凄恻。微风淡云月，清露孤舟夕。回看水茫茫，江影千重白。俯首一沈思，转侧愁更忆。阿爷白发多，阿母衰颜色。临别语殷殷，一步屡休歇。嘱儿勿思亲，亲侧人如积。阿姊隔无多，阿妹同衾席。阿兄将至京，有嫂能侍食。出房语复语，大母重呼入。秋尽早制衣，寒近催刀尺。今夕儿自去，儿像留吾侧。未能同色笑，聊可慰岑寂。莫为儿女态，早定归宁日。当此愁思中，转觉欢无极。人生乐莫乐，何用长叹息。

秋暮

秋暮萧萧雨，芦花两岸声。怆然一回首，残月下江城。

雨晴

阴雨连宵晨，萧萧洒庭屋。当轩坐晦暝，穿户多苍竹。幽居本绝尘，洗濯益无俗。闭门不见人，横琴只我独。临风发遐想，清绝愁中曲。吴歌日怕闻，越梦断难续。晚来雨忽霁，晴霭横崖谷。落霞暮欲销，微阳暗墙角。鸣鸟归亦尽，庭户犹无烛。苍茫一望中，万绪千愁触。天地本无穷，人愿如鸿鹄。

### 芳草

空谷多芳草，灵根得天早。幽幽深山中，风露自昏晓。待之美人采，以供骚人藻。谁知时俗人，携向群花道。馨香不足贵，桃李春情好。艳色媚繁华，啼声多时鸟。东风送晴暖，閒关音逾巧。可悯兰蕙花，掩泣以终老。

### 望月思家

秋尽江南寒气深，城高野旷急荒碁。萧然一片吴门月，尽是残宵越国心。

### 枕上偶成

倦思如尘拨不开，一天风雨锁楼台。无人院落清明后，半径残花燕子来。

### 史济庄

史济庄，字敬之，一字九畹。江都人。盐城金倬云室。有《九畹斋诗稿》。

### 京江晚泊

舟系垂杨岸，金焦正夕阳。客心秋水远，村树暮烟苍。山带鱼龙气，江涵日月光。吴歆犹在耳，明日更殊方。

### 有感

故园重返慨沧桑，屈指虚抛驹隙光。多病常教翻药谱，壮心降尽弃文章。梦魂萦绕牵南国，身世提撕累北堂。翘首云天秋色里，飞鸿万里意苍茫。

### 久不作诗偶见旧稿戏成短章

曾学坡老戒诗篇，忽见旧稿心茫然。抛残弃置业已久，阿谁呵护疑神仙。平生钝拙无所好，差喜结得翰墨缘。浅陋粗疏何足道，不为物害为物嫌。山头讴歌惟恐罔两怒，江上行吟又恐惊龙眠。岁月虚抛佳景负，缄口更比金人坚。谁知造化笑我才短不足忌，许我拙句人间小住三千年。

### 书介眉大兄纨扇

江山览胜近神都，游兴休将诗兴除。七十二沽烟景好，如何不寄大雷书。

### 杨延年

杨延年，字玉晖，湘乡人。湘阴左念康室。有《椿荫庐诗词存》。

甲午感事

群流无策可安边，促漏遥钟罢讲筵。圣孝未忘天下养，瑶池犹自进歌弦。

汉口

江城风景好，览胜一登楼。渺渺楚天阔，滔滔汉水流。钟声度烟树，樯影集沙洲。亦有思乡意，浮云黑上头。

千里千里家山紫蝶梦，九州烽火警归心。桃花流水应如旧，缥缈仙源何处寻。

○蓬莱

蓬莱自古道仙乡，焉得浮槎一苇杭。羡煞岛中千岁鹤，白云天际任翱翔。

玉阶

玉阶一叶梧桐下，落尽红莲冷香树。银河皎洁无纤云，辘轳金井寒泉泻。惊秋鹦鹉倦无言，微霜昨夜凝鸳瓦。绣帟风静炉烟袅，瑶瑟湘灵韵斯杳。洞庭水满衡岳高，归梦池塘有青草。大椿轮囷竦卷阿，棣萼花开月圆好。安得神仙驻景方，世免别离人不老。

舟行

岁暮风雪寒，江湖尚行役。劳人岂得已，郁郁萦心曲。冻云出岫忙，倦鸟依林宿。晴川烟水清，闹市飞尘浊。回首望京华，远山锁苍绿。

姚素榆

姚素榆，字蕙依，常熟人。道光壬辰进士、御史福增女孙，同县光绪拔贡宗威继室。有《联珠集》。

丹徒张孝女割臂疗亲

人间无卢扁，海上无仙方。温温药炉火，惨惨宵鐙光。斯时弱女泪，凝渍病母床。母呻何宛转，母体何羸尪。儿身即母身，中夜摧肝肠。医言不可药，呼吁天苍苍。并刀薄於纸，皓腕凝雪霜。至诚格金石，血涌如无疮。漉漉一片肉，勉进阿母尝。母女本一气，无形补膏肓。能令死者起，能令弱者强。孝哉张氏女，北固清风长。

花影

寂寞庭墀满碧苔，等閒著地万花开。霎时捧出玲珑月，夭矫繁枝入坐来。

中秋

露湿空阶翠袖寒，醉馀慵倚玉阑干。迟眠为惜清光好，此景人生几度看。

#### 落叶

秋风料峭掩紫关，小院尘氛删未删。一缕茶烟生竹外，几番霜信到林间。诗成渭北云抟树，梦绕江南雨满山。爱煞停车相赏处，等閒著地锦斓斑。

倚阑小立怕轻寒，极目长天雁路漫。古木因风秋籁急，空庭咽月笛声酸。情移故国飘零久，叶写新诗仔细看。汉苑哀蝉初罢曲，也随流水到江干。

绿减黄稀造化工，终年身世等飘蓬。霜凝衰草连天白，风撼寒林匝地红。四野秋砧紫别思，几行塞雁过长空。征人冀北音书断，日暮关山梦未通。

转瞬黄花晚节天，吴江秋老剧堪怜。乾声带雨战林表，瘦影和烟乱砌前。霜冷风高无限思，雁声蛩语未成眠。小窗镫影红摇落，月照东墙正上弦。

#### 随外之汴梁

秋风落日古夷门，历碌舟车纪梦痕。此是邹枚旧游地，可容著一女文园。梁孟当年共赁居，謁来宦海又何如。笔床砚匣无多物，位置诗人小小庐。

#### 家居

多事萧郎爱远游，半村半郭足清幽。日斜低没桥心影，风紧难维渡口舟。客路渐迷新绿草，依家旧住小红楼。等閒忽动天涯思，极目江关渺渺愁。

#### 小立

清香故故上衣襦，依向瑶台住得无。凉露三更人独立，满身月影倩花扶。

#### 写怀

帝京旅食自年年，小隐城西卜宅偏。七事安排中馈职，一囊辛苦卖文钱。能修甘旨知见大，善解心解识婿贤。为索新诗支枕待，一镫形影夜迟眠。

#### 姚倩

姚倩，字倩君，素榆妹。同县言微继室。有《南湘室诗草》。

#### 春暮遣怀

世事浮沈漫共论，萧萧梅雨掩重门。画屏病起寒犹怯，绣被香残梦不温。飞絮帘栊春寂寞，落花庭院月黄昏。比来赢得消愁法，一卷《离骚》酒一樽。



### 子夜歌

添罢博山香，笑对银缸立。珍重并头花，劝郎莫轻别。冷月出疏林，窥窗皎如雪。试取瑶琴弹，泠泠不成曲。冬夜抑何长，怕展衾如铁。独自倚薰笼，心碎铜壶滴。

### 岁暮感怀

辜负光阴感百端，多愁赢得带围宽。沈沈帘幕炉烟袅，寂寂房栊蜡炬残。为理旧词人转懒，怕翻冷被梦难安。西风和泪看鸦阵，倚遍阑干翠袖寒。

### 画梅

素缣香染黑痕新，倩影疏枝倍有神。懒向东星问消息，毫端绘出陇头春。

### 秋夜寄芭妹

无眠偏觉夜漫漫，纸样罗衾不耐寒。从古多情添恨事，本来识字肇愁端。绮窗雨过虫声切，绣帐灯昏月影残。一语赠卿须记取，秋风珍重莫凭栏。

### 春日即景

轻舟摇过板桥西，花压茅檐柳拂隄。无数落英浮水面，随波流傍钓鱼矶。

鬓簪杨柳绿堆鸦，薄薄罗衣短短钗。最爱平原新雨过，落花香染踏青鞋。

### 雨窗感赋

绣帟寂寂掩重门，倚枕閒吟被未温。半壁残灯一帘雨，纵无离绪也消魂。

东瀛寓园有松柏数十株傍隙地一弓以梅花补之

茅檐竹牖傍山涯，小住何妨便当家。侬自携锄君抱瓮，一庭明月种梅花。

### 晓起

无语坐钩帘，清气轩眉宇。花雾绿濛濛，宵来有微雨。

### 新晴

玉阶雨过净无泥，墙角依稀夕照微。却喜门前春水涨，苔痕绿上钓鱼矶。

### 陈丽芳

陈丽芳，武进人。萧山郑孝庭室。有《寿筠移诗稿》。

### 秋夜感怀时羁旅桂林

月凉如水浸窗纱，何处悲声起暮笳。欲觅迢迢千里梦，可怜消瘦半庭花。露零荒沼莲房冷，风紧遥空雁字斜。漫道莼鲈滋味好，三吴归去已无家。

### 张元默

张元默，字蕙芳，常熟人。昭文光绪甲午进士、改庶吉士、吏部主事孙雄侧室。有《双修阁诗存》。

己未六月二十一日欧公生日从郑斋夫子往游北海又至高庙访西涯故址归已薄暮夫子成五古三章命元默同作

六一先生人中龙，四十作记称醉翁。生日喜与荷花近，曲翻《金缕》杯碧筒。荷风送香气疏放，离宫小憩幽襟旷。铜驼卧棘漫生悲，玉鹭眠花不惊浪。巾车早出侍清游，琼岛春阴十二楼。金风萧飒酿秋意，一雨袪尽羁人愁。回车更访西涯迹，左徒故宅凭传述。庐陵接武有长沙，天爱名贤付仙笔。季夏生日多诗人，欧李相差仅一句。前有山谷后宾谷，西江诗派潏澜沦。笥河吟舫传诗帙。贞愍忠魂寄绡匹。更有闺媛方白莲，巧与荷花共生日。我惭郑婢略知诗，仰止前贤类管窥。嘉祐文章推雅正，贞元朝士少留遗。夫子能文射雕手，藏精养晦耽诗酒。倪教生在庆历年，及门定附苏曾后。忧患馀生阅海桑，研摩六籍法欧阳。《诗》笺《礼》注时稽古，酒冽鱼肥自引觞。前贤相业都如梦，谪宦夷陵任嘲讽。篇章元气幸长留，夜赋秋声同惜诵。西涯积水映楼台，乐府流传笛韵哀。祭酒诗龔勤啸咏，相公墓草杂莓苔。暝色催人越吟苦，归途带笠随臣甫。吾侪人海一鸥浮，惟有斯文寿千古。

### 夫子以事赴金陵旬月未归寄诗代柬

竟夕秋风怯晓寒，客中珍重卜加餐。愁心江上思何极，诗句眉边字未安。扰攘虫沙悲梦幻，纵横蠹简理丛残。秦淮风月今何似，莫向眉楼乞画兰。

### 题瓶社诗录后

鹑鸽峰高接翠微，楼台无地逐臣归。骑箕幸在昇平世，柏社迁移事更非。

官拜司农媲昔贤，龙蛇起起厄辰年。文章忠孝传千古，射羿逢蒙愧九泉。

襟袖西山爽气佳，江亭荐芷绝尘埃。瓶庐衣钵传无限，几辈伤心似郑斋。

辛酉六月十八日为完颜恂太君星联生日元默来归之年师郑夫子即以国朝闺秀正始集授之爰於中庭设瓜果陈诗以祭谨赋五古四十韵

乾隆卅八年，六月十八日，太君实诞生，婉婉秉贞质。逮归泰安君，黽勉心如一。王姑与尊女章，盥馈礼祗率。视听无形声，翱翔慎愆失。教子为国桢，提撕警纤密。聪明忌露尽，夏峰语重述。名言书诸绅，三命戒骄溢。贤嗣出临民，梦帝赉良弼。黔荆与皖豫，板

與欢绕膝。治河复明刑，慈训周且悉。才足济民物，须眉讵能匹。馀事为诗歌，锦鸡传典帙。鉅集蒐正始，表章及遗轶。周《雅》咏思斋，《郑风》薤淫佚。山河赋笄珈，葑菲采圭荇。凤翔萃雛嗜，牛毛细梳栳。有才不自矜，谦抑温而栗。懿范树璇闺，娥眉谢众嫉。二曲有遗书，校刊正屈诘。宝录绍中垒，青藜光照室。著作炳千秋，英声由茂实。悲余少也贱，流离纓疾疾。巾栉事夫子，夙夜劬佔毕。未谙九嫔学，粗解五字律。瓣香奉阳湖，冀免张目叱。温风以时至，瓜果荐芬苾。亭亭擢芙蕖，唧唧鸣蟋蟀。风琴杂象鞮，聊当舞庭佾。更忆清於君，独擅写生笔。粉墨映日光，传神呼欲出。南田有嗣音，行辈姑与侄。惲氏洵多才，诗画精艺术。艺术诂足夸，坤道协贞吉。吁嗟世泯棼，巾幗流荡佚。往哲有典型，廉隅守秩秩。余生虽恨晚，雅慕清庙瑟。敢效柳是狂，幸事梁鸿逸。遗集夙胝沫，随行执丹漆。淑灵傥佑我，诗思兰芽茁。

#### 书张樵野侍郎铁画楼诗续钞后

万里投荒去不还，竟难生入玉门关。荷戈一集声哀怨，魂魄犹应恋故山。身经九死轻戈壁，地远重边到玉河。空向岁朝占吉语，文禽终触北山罗。

#### 樊樊山先生赐题双修阁近作诗片七律一首谨次元韵赋谢

吐握常开北海尊，三吴士女昔霑恩。探骊艺苑传仙笔，化鹤桑田忆梦痕。汲古曾稽中垒传，学诗欲叩鲁班门。前人牙慧休重拾，手泽长真十卷存。

稽首慈云礼世尊，我闻如是莫酬恩。金鲵胡耆春难老，玉螭清游月有痕。谢韞因风惭咏絮，袁安卧雪不开门。舞雩沂水饶真契，温伯无言道已存。

酌兕思称竹叶尊，司书辟蠹学长恩。相思南国拈红豆，入望西山扫黛痕。旧稿手钞《居士集》，新庐指点大乘门。閒游古寺温诗梦，留得枯荷叶半存。

#### 秋日清晨从游法源寺归而赋此

钝根不解禅，爰游禅悦地。凌晨叩关入，松篁发幽翠。谖谖清风生，泠然有秋意。无量三昧力，功德绝思议。龙象眩耳目，虫鼠晒肝臂。略参微妙机，同证澹泊志。佛堂长明镫，白昼犹生穗。尘寰方扰扰，贪痴兼媚忌。虎豹竞噬人，九阍天亦醉。愿仗佛力宏，三灵宅澄粹。花雨散缤纷，息此曼衍戏。循廊屡徘徊，联吟触诗思。因风惭道韞，雅人发深致。丁香媚三春，花时纵游骑。隘巷苦喧阗，如琴骋六轡。今日何寂寞，启扃薜阴膩。深林静无人，隔沼馀残芰。珍禽时一鸣，竹径憩森邃。扑尽东华尘，雅宜北窗睡。静中有至乐，不须著一字。兴尽返寓庐，牢愁散羈寄。相对欲忘言。沆瀣有真契。同悟木樨香，犹闻松子坠。

#### 辛酉九月十九展重阳日从郑斋夫子登陶然亭感赋二律即次夫子重九登遥集楼韵

一角西山送晚凉，霜风飒飒倚斜阳。时逢阳九秋笳怨，节近冬初夜漏长。子美放歌非纵酒，义山惆怅是清狂。华云缙鹤论诗品，意绪萧閒接混茫。鹅鹳纵横角与张，中原龙战筮玄黄。西京文物思丰镐。东海輿图失乐浪。黯澹鞠华留晚节，丛残芦荻散幽香。《黍离》行迈《王风》降，迹熄无诗孰补亡。

玉并

玉并，字珊珊，大兴人。蒙古三多侧室。有《香珊瑚馆诗稿》。

和夫子读留侯传作

早逢黄石公，暮访赤松子。人比鲁连豪，伍无樊哙耻。英雄富贵总成空，辟穀宜从进履始。少年便学长不死，永保貌如妇人美。

自题梅花绿端砚

人住绿梅移，眉比梅花绿。不用画双蛾，写鸳鸯卅六。

红树水仙画幅并题

矗矗悬崖浅浅滩，碧藤红叶翳清寒。一双龙绡凌波鞵，来往蓬瀛不蹶鸾。

太平花

粉团黏住旧繁华，本穴徵祥竟共夸。三十六宫春自好，年年开落太平花。

北海

坐待银蟾月，来从玉蝀桥。名山呼万岁，胜地踵三朝。云树帘舒卷，风荷扇动摇。液池无弋钓，鹈鹕最逍遥。

夫子未归诗以催之

妾初入世主封侯，仍渡辽东老未休。秋柳甚於春柳绿，凝妆怕上陌边楼。

## 【卷一百九十三】

徐颖

徐颖，字渭友，一字巢父，海盐人。

见落花

流景忽西靡，芳树春易迁。落花与白发，不得相周旋。持此汲汲心，讵敢恋百年。陈酒开古书，其人已如烟。逝者勿复见，但为饮者怜。

朱太倬

朱太侗，字冲阳，昆山人。有《山居乐集》。

示人

习静歧儒俗，山居异市廛。断菲忘大欲，辟穀想真传。有著成迷妄，无心合圣贤。瘦筇兼鹤氅，随境度流年。

俞桐

俞桐，字秋亭，长洲人。

舟行

遥望炊烟处，桥阴断玉环。淡霞明到水，丛树远疑山。寂寞三春过，夷犹百里间。晚来随意泊，鸥鸟共溪湾。

张灿

张灿，字斗垣，又字斗庵，号清阳子，太仓人。有《蠹鱼粮集》。

观涛

散步平江上，涛声亦壮哉。有风时卷雪，无雨忽惊雷。璧月波心转，银河天际来。鱼龙眠不稳，俯仰一徘徊。

桃林春步

信步桃源别有天，乱江深处日如年。当时流水依然在，不见渔郎渡口船。

杨大纶

杨大纶，字心易，自号集虚道人，吴江人。住栖真道院。

喜友自南来

知君不失望，目断越南舟。急见如新友，欢然道旧愁。溪云增秀靄，坞竹倍清幽。莫动思归楫，江头惊白鸥。

斗室

迺觉天地窄，此中偏有馀。读书延古哲，修己惜璠玕。心与白云远，道偕明月虚。廓然海宇外，随寓即庭除。

荣涟

荣涟，字三华，号涧泉，无锡人。明阳观道士。

庐墓既归即用杜太史见招出山诗韵奉谢

魂梦依然在碧山，泪痕终日染衣斑。荒荒宿草依霜露，故故白云迟往还。双桨竭来烟水畔，一庄归到竹梧间。浣花有约能偕隐，参得浮生是转关。

李惠源

李惠源，字衡山，江都人。

春日东社诗成述怀

敢向乔林借一枝，天容卑隐亦吾私。桑榆嫩叶蚕娘早，巢垒香泥燕子迟。每向东邻分杏火，不随楚客咏江蓠。年来长物家何有，一瓮村醪两袖诗。

太平岁月纪羲轩，人坐东风淑气温。老去更知书味好，閒来方觉布衣尊。山光著意青依屋，溪水何心绿到门。报答春晖无一事，年年花下共开樽。

曹峻

曹峻，字维岳，无锡人，主泰伯庙。

归梅村

九峰苍翠逼眉端，楚水吴山此日还。遥望梅村深树里，白云依旧锁松关。

樊太复

樊太复，字初阳，号云林，无锡人。主元升坛。有《初阳诗稿》。

戏题妙峰庵石壁

一杖曾携到酒泉，近来偏只伴枯禅。明朝准向兰陵去，花雾濛濛稳醉眠。

酬髯翁寄怀韵

兀坐书窗最寂寥，忽闻天外度琼箫。谁将三寸生花笔，自写新诗一叶蕉。

水上善

水上善，字秋白。吴山道士。有《高隐山楼诗钞》。

### 访洞霄宫

欲访飞仙迹，閒来叩石扉。烧丹遗灶冷，捣药夜禽飞。古洞何年辟，高人不可希。相逢多道侣，指点采樵归。

洞口夕阳多，长松带绿萝。荒碑迷醉眼，欹路界残莎。修竹迎风笑，清流春碓过。几能重到此，幽兴复如何。

### 读沈道初炼师诗稿

醉后帘垂人寂静，梦馀香裊意萧骚。新诗莫与他人读，只恐西泠纸价高。

### 蔡敬一

蔡敬一，字小诞，自号葫芦道人。仁和紫虚道院道士。

金露香徐蕙唐过访不值留诗次韵奉答南岳归来日未斜，洞门寂寂锁烟霞。唤回鹤梦三千岁，手种碧桃刚著花。

### ☆黄鹤

黄鹤，字含山，一字青霞，乌程人。吴山玄妙观道士。有《云墟山房诗集》。

### 题顾菴厓山居读书图

读书饮酒居名山，何物更入胸怀间。奇书万卷酒万斛，羲皇以上同其閒。岂无野老共吟啸，每与鱼鸟相往返，菴厓先生嗜书史，非圣所著终不敢。静掩柴扉木榻穿，道人之意亦如此。浮云舒卷流水清，别有天地移人情。一编独坐太古寂，但闻谡谡松风鸣。

### 云墟山房纳凉同胡葑塘作

云生水面晴疑雨，风落松梢夏亦寒。一片蝉声无觅处，教君数尽碧琅玕。

### 雪霁呈助教先生

隔林桂馆隐，翘企晓光微。笛弄梅初绽，琴弹雪正飞。著书窥妙理，问字露玄机。脚疾时能愈，来寻叩石扉。

### 周道昱

周道昱，字静涵。乌程广惠宫道士。有《补閒吟草》。

### 秋日行谿上

常爱谿湾转竹林，了无尘事碍幽寻。随身剩有红藤杖，作伴依然绿绮琴。孤鹤自梳云外翻，小鸥不改梦中心。如何一片清寒地，装点东篱十万金。

郭长彬

郭长彬，字去胜，平湖人。松尘道院道士。

忆松尘山房旧居

门外春流碧一湾，栖真会此掩双关。十年悔插红尘脚，安得身骑白鹤还。

陈嘉宣

陈嘉宣，字戴墨，仁和人。吴山重阳庵道士。

山居

黄木为冠葛作衣，淡然无欲是玄机。茂林深处人来少，独掩柴关坐翠微。

杨通幽

杨通幽，字怀冰，号铁鉴，吴江人。有《溪山鹤唳集》。

山居

倚杖衡门下，遐观意在兹。暮山衔落日，微雨滴疏篱。市远僮归晚，溪深客渡迟。奔波名利者，此乐几曾知。

惜春

鲁戈莫挽东皇辙，春恨如尘心似雪。韶光冉冉若为留，枝头啼破仓庚舌。

刘宗玉

刘宗玉，吴山中兴观道士。

湖上春兴

今朝却喜上巳，又来湖舫高歌。仿佛兰亭景象，不开口笑如何？

吴人逸

吴人逸，字古愚，一字九閼，号侗民。海盐城隍庙道士。有《存馥轩吟稿》。



岁朝与任言九坐雪偶成

梅花雪后斗新妆，点缀山家旧草堂。却喜闭门无俗谒，三升椒酒一炉香。

雨中游云林诸名胜

昧旦寻灵鹫，山云郁不开。一蓑冲密雨，万壑响奔雷。人影穿林出，江声入寺来。祇因纤磴滑，迟我陟香台。

夏时

夏时，字白岩，号葆真。海盐斗南山房道士。有《痴吟》。

庚午初秋有鹤来集庭梧赋诗以志

碧海三山路几湾，秋风相引到人间。听经亦解蹁跹舞，影落高梧月满关。玄裳缟羽度云端，清唳时闻警露寒。尘世应知难住久，晚风留得佩珊珊。

尤西堂太史宴集楫青亭分韵

城南结隐构池亭，山色遥分郭外青。才子逼真天语重，文章巧夺化工灵。陶情诗酒来今雨，啸傲林泉聚客星。我亦烟霞游寄者，输君高枕狎鸥汀。

唐观复

唐观复，字静公，号叙庵。海盐栖真观道士。

次慧清上人漫兴诗韵

春风瑶草遍芳畦，兰若应来上士栖。点屐苍苔缘石磴，营巢紫燕啄香泥。汲泉供佛瓶光合，挥麈谈禅锡影齐。丈室慈颜如宝月，夜深同照法轮西。

竹里柴扉静不封，瞿昙向此息芳踪。三竿红日摇春殿，万里寒潮和晓钟。绕径菜花飞蛱蝶，环池松影卧蛟龙。吟来金偈凭谁问，有客穿霞度紫筇。

夏霖

夏霖，字惠霖，号兰舫。海盐桐柏山房道士。

送罗萝村

閒庭腊月梅试花，花前酌酒君还家。与君本是同心友，此日如何别海涯。轻裘遥念寒衣薄，黄金散尽呼卢博。不辞风雪掉头归，马蹄得得垂行橐。此去高堂乐未央，一杯介寿

称椒觞。怅余不共山阴棹，心在兰亭八柱旁。

#### 和吴九閼见赠诗

一夕连床话，山钟报晓时。虽无莺劝酒，便有雨催诗。爱石君成癖，栽花我亦痴。  
衡门原待客，相与共栖迟。

#### 春草和仰山弟韵

客在天涯念里门，春来草没旧隄痕。离离细雨探花径，淡淡轻烟放犊村。别浦相思  
人望远，荒亭独醉酒盈尊。谢家乐事怜兄弟，昨夜池塘入梦痕。

#### 客中寒食

漫道出门好，出门刷可怜。禁烟寒食节，疏雨杏花天。有梦思乡里，无方扫墓田。  
瀛洲知己在，我欲寄诗篇。

#### 韩承晋

韩承晋，字懒隐，号次林。海盐栖真观道士。有《水月轩续吟》。

#### 中秋喜闰

补看今宵月，平分又一秋。莫言前度雨，还上旧时楼。晚桂花重放，新篘酒共酬。  
者番良会续，不羨幔亭游。

#### 登镇海塔绝顶

凌霄耸绀塔，峻极镇龙宫。拾级偕吟客，凭阑溯梵公。镫光虚夜月，铃语杂春风。  
欲尽诸尘相，都归一望中。

#### 朱景文

朱景文，一名霞，字瞻淇，号映洲。海盐栖真观道士。

#### 晚望

徙倚板桥东，残星落晓风。霜高人影白，叶落水流红。空谷樵歌隐，丛山客梦通。  
晨炊烟乍起，暧暧还村中。

#### 翟翥緌

翟翥緌，字太音，浙江石门人。洞霄宫道士。

山楼晚晴

溪边才过雨，薄暮兴何长。曲径侵流水，高峰挂夕阳。江明帆影乱，风定竹声凉。更有怡情处，穿霞雁几行。

沈清正

沈清正，字默夫，号一诚，江南华亭人。有《鸥亭诗稿》。

题清风渔隐图为项雪村作

清溪一渔人，岂是披裘客。悄然倚孤舟，倒影寒潭碧。终日求鱼鱼不得，笑他用拙钩何直。心已灰，头半白，达观肯被一丝牵，何不将竿尽抛掷。

留别武昌潘东柳先生

旅馆消长夏，论文慰索居。秋风吹大别，落日忆三闾。天远独为客，舟孤惟载书。好尝汉阳酒，不钓武昌鱼。

喜南昀彭夫子札至

捧手知何日，离忧直到今。吴江春水阔，嵩室暮云深。魂梦三千里，乾坤一寸心。空中传尺素，珍重比南金。

同曹哲庭过蔡桐川适园

泛泛渔舟去，桃源路未赊。一双鸥立石，几点水流花。麟脯何须擘，龙团信足夸。漫论沧海事，小憩蔡经家。

登汴城楼

匹马西风立戍楼，繁台艮岳剩荒丘。蝉声咽断千林雨，雁影横来万里秋。故井梧桐寒露落，废宫禾黍暮云愁。古今不尽英雄泪，滚滚黄河天际流。

早行

沈沈箭漏月轮低，向野提鞭一望迷。鞍上续成残店梦，驿边惯听异乡鸡。寒飘露气侵人骨，暗入瓜田碍马蹄。自笑我游方外久，也来路口问东西。

晤华山王踵息於青阳道院即席限韵

当门老树饱秋霜，翠藹深深带草堂。高卧看花人独健，雄谈扞虱客何狂。百年天地诗千首，万里风烟剑一囊。快矣骚坛逢老将，今朝又露旧锋铓。

### 伍相国祠

春秋吴越不胜悲，最是伤心伍相祠。尝胆忍人窥隙始，捧心尤物欲来时。冤飞腥血鸱夷去，怒激风涛白马驰。抉目悬门何忍看，台前鹿走草离离。

### 金鼎

金鼎，字丹书。海盐三元庙道士。

### 上清宫同姜朗斋作

龙蟠虎踞拥山椒，多少琼宫姓氏标。云阙春明千树秀，雷坛夜静百灵朝。学仙且事钞丹篆，知己相携望碧霄。触景会心皆自得，逢人不待拟松乔。

### 冯敬可

冯敬可，号历山。海盐栖真观道士。

### 梅花

试镫风里送香来，檐外冰花映雪开。徙倚窗前谁作伴，一轮明月上瑶台。

### 宋昭明

宋昭明，字敏达，号梅溪，海盐人。桐柏山房道士。

### 落梅

无端飞雪点苍苔，疑是仙人擲笛来。落尽江城春不管，东风孤负艳阳才。

### 王彰

王彰，字嘉言，号半皋。吴江纯阳院道士。有《半皋诗草》。

### 题画豆玉蜀黍

雨过疏篱蟋蟀鸣，夕阳西下月初生。乡村风景秋来好，一架新凉话豆棚。罗衣初卸露黄肤，累累嵌成万颗珠。最爱佳名同菽粟，秋收满斛不输租。

### 梁清格

梁清格，字书城。锺祥元佑宫道士。

### 天台中

云从山中来，我向云中去。云飞不可留，欲访藏丹处。

王阳舒

王阳舒，号春湖。

留别高子

老梅傍屋侧，长生诀已得。一阳初发动，透骨露春色。高子绝嚣尘，今时之古人。品格与梅花，化作一时春。开轩饮我酒，挑镫伴我吟。一念成知己，千秋有同心。嗟予行路人，肝肠久不熟。方登古兰台，复欲探禹穴。把手看梅花，依依不忍别。

独立

独立苍茫表，凌虚成浩吟。春山名士画，秋水野人心。放眼空天地，雄谈笑古今。松轩茶火歇，素月出幽岑。

惠远谟

惠远谟，字虚中，号澹峰。苏州玄妙观道士。有《学吟稿》。

秋日杂感

湛湛秋露滋，开此檐下葵。清馥随轻风，丹心耀朝辉。惜哉未能久，久已成空枝。芃芃园中草，春秋长萋萋。没我阶前兰，欺我石上芝。寒霜一朝下，亦复相披离。岂如南山松，天矫挺奇姿。春风与秋霜，荣瘁两不知。

季秋霜露繁，木落山色改。天地有萧瑟，炎暖岂长在。可怜东篱花，萎落无人采。无言倚霜恨，芳心若有待。君子审进退，所贵在时宜。神龙失海水，不知尺泽鲋。猛虎陷深阱，豚犬亦得欺。晋人有冯妇，千古所共嗤。

我生若秋蓬，从风任飞止。入云畏霜寒，委路恶泥滓。孰云周道夸，吾行多倾圯。荆棘满敝衣，乱石齧双趾。狂风斗虎豹，冷月啸山鬼。君子戒口舌，小人爱萋菲。去去勿复言，世道已如此。

高天无纤云，遥夜独明月。寒影落疏檐，清光隔松叶。吾生百年内，强半在离别。美人阻山川，咫尺不可越。相思秋夜长，凉飙澈肌骨。庭阴看月堕，叶响闻落滴。仰望空云霄，何当奋双翮。瑶台执素手，徘徊终此夕。

立秋

草木欲摇落，翛然天地清。林塘消暑气，砧杵动秋声。叶不因风堕，虫知应节鸣。晚凉庭院静，新月傍檐明。

邓尉观梅用商丘宋抚军韵

千树浑如雪，无花可并香。低回松下径，斜掩竹间房。蕊密春寒劲，枝空夜月光。  
還元高阁望，胜绝是渔洋。

问讯昙山路，言寻石壁花。数枝寒寂历，万木冻槎丫。砌下湖波汹，岩前野雀哗。  
精蓝芜废尽，犹自发奇葩。

最爱紫藤坞，苍松翠柏閒。人家倚石茷确，鸟语送绵蛮。清兴为花发，馀香拂袖还。  
一枝斜插鬓，应笑傍衰颜。

龙虎山归次答周晚香楼字韵

千里云山一棹收，西风拂面早知秋。望回彭蠡烟初合，路入严滩境转幽。世味可能  
成腐鼠，海槎终拟问牵牛。松窗落月微明夜，梦绕神山十二楼。

重到山中怅然感旧次壁间韵

故人松竹问初盟，流水行云笑此生。解语老猿曾识面，试飞雏鹤未知名。银笺剩有  
牢愁句，玉笛偏多感旧声。振翮凌风吾已倦，漫劳九万说鹏程。

夜占

明月入小窗，竹影画几席。谁家人未眠，声声送长笛。

铎花落夜阑，寒影动虚壁。谡谡松间风，鸣涛伴幽寂。

题画

抱瓮城南学灌畦，绿蓑黄犊草萋萋。一鞭残照柴门底，又见前村月满溪。

身是田间稼穡民，数家茅屋自成邻。但知牛背一犁雨，不识马蹄十丈尘。

施远恩

施远恩，字鲁瞻，法名冲皞，仁和人。吴山长生房道士。有《环山房诗钞》。

秋兴

愁破方知酒有功，酒杯尽日不教空。飘萧败叶千山雨，零乱寒花一径风。小摘晚菰  
含露碧，试尝新橘带霜红。閒中自有消閒趣，底事矶边理钓筒。

龙虎山早秋

上清苑木记深幽，老桂婆娑报早秋。露冷草虫鸣四壁，月明桐叶坠层楼。雷坛树色当窗出，丹井泉香绕石流。林壑寂寥龙虎伏，岩前惟见紫云浮。

#### 老桂行

阶前双桂高百尺，势凌霄汉根盘石。露染鹅黄一片秋，枝头簇簇团香雪。不随桃李斗春工，玉缀玲珑荫瑶席。花时供我日日吟，剥啄寻香有来客。一从访道西江游，梦绕吴山怅睽隔。忽忽烟霞十六更，树影健在人非昔。去秋赋归来，喜见旧标格。花繁料料金，叶展重重碧。一樽浓醪酹花神，与尔周旋仍日夕。桂兮桂兮誓将相守不相离，老向山中甘遁迹。

#### 老朴行

环山百年树，其名曰沙朴。婆娑烟雨姿，分荫到邻屋。具兹千霄材，应入工师目。托根不得地，远弃在南服。绳尺恐难施，拥肿更蜷曲。鸱鸢巢其巅，蝼蚁穴其腹。生意良已尽，雨露非不渥。未充梁栋选，颇避斧斤劓。安知终天年，非以不材福。至哉庄生言，宁甘老荒谷。

#### 山居即事

秋声动岩壑，爽气满柴关。红叶高低树，白云远近山。肩因长病耸，发为苦吟斑。宠辱浑閒事，浮名似可删。

#### 大光明殿步虚词

巍巍金阙耸瑶天，羽盖朱轮满大千。惭愧野人樗散甚，侍香亲到至尊前。

诵彻琅函玉笈文，月华如水夜初分。琉璃世界通明殿，香气蒸成五色云。

五铢衣覆九霞裙，上界颁来十赍文。何处飞翔双白鹤，夜深还拜玉晨君。

洞阙玲珑网户开，金虬导我玉京回。道人报国无他愿，只祝风调雨顺来。

#### 张云龙

张云龙，字出渊，号石礪，吴县人。斗坛道士。

#### 晚眺

霁烟稍尽见斜曛，极目长空似锦文。绀碧缥黄看不尽，一重天间一重云。

#### 画兰

此是幽贞第一花，不侔桃李只云霞。采香或可通来径，更写春山一片遮。

陆自逸

陆自逸，字含虚，号蘋渚，昆山人。穹窿山道士。

晓登鍾吾绝顶

石径扪萝葛，来登千仞巔。钟声催海日，帆影破湖烟。远岫云端列，残星树杪悬。  
长歌归院客，鸡犬下方传。

苍坞晚眺

古藤垂峭壁，坐久烟岚滴。野寺隔林钟，夕阳牛背笛。

贺炳

贺炳，字松庵，自号云涛散人，德清人。海盐东岳庙道士。有《拾古吟》、《月轩存稿》、《南村草堂集》、《杖藜集》。

访褚敏元不遇

不见神化象，翻怜浪子游。山光衔晓月，云影罨江楼。殿角钟鸣午，林边叶报秋。  
孤帆天际出，或恐是归舟。

陆宣公故宅

松竹繁阴处，萧条野老家。蜂房悬夜月，蛛网吸朝霞。苔滑云根乱，檐疏燕子斜。  
人传内相府，风雨泣黄麻。

登金陵报恩塔

去国山河在，登高入望新。只今烟树色，无复旧时春。

云岫山漫兴

翠岫排云出，支筇绝顶看。树深山寺还，泉咽石林寒。草近秋逾碧，枫兼霜更丹，  
不生摇落感，但觉此心宽。

王衡

王衡，字湘草，号鹤巢，嘉兴人。居灵观道院。有《湘草诗稿》。

送春



丽日红霞烂锦茵，浓和花气欲熏人。声声鶗鴂催归急，止剩今朝一日春。

#### 春日幽居书事

野岸横桥是我家，疏枝墙角老梅遮。贫时过午方炊饭，倦到抛书且灌花。水长菰蒲藏睡鸭，草深阶砌出鸣蛙。身閒自喜浑无事，一枕羲皇日未斜。

#### 黄宽

黄宽，字鹤堂，番禺人。住罗浮冲虚观。有《自然堂遗诗》。

#### 寄友人

早春同一别，尽日掩柴门。好句有时得，穷愁无复言。晓迟江上棹，夜宿月明村。未必不相忆，往来劳梦魂。

#### 鸣谦堂雅集听友人弹琴

我心寄山水，何处忆高人。不觉虚堂上，玄音倍入神。泽龙吟正歇，巢鹤倦方伸。物理通幽意，相期若比邻。

#### 上元日集草屨菴望大通寺東镜波上人

不争绮陌逐飞尘，云水偏留此日身。只履何年遗古迹，一镫彼岸忆传人。青消烟雨蘋非远，绿泛溪桥柳渐匀。顾我倦吟归尚早，欲将片舸问前因。

#### 夏日集五松堂观邻寺菩提树影

灵根千载忆传镫，片影移来暑化冰。说有还无终不著，似空无色亦何凭。墙东席地分吟客，树下蒲团入定僧。留得浓阴长落此，青松白石即良朋。

#### 拟筑别业先柬陈元孝先生

花满名山渐渐阴，久拌生计任浮沈。一樽美酒供清夜，几度疏风寄短吟。身隐已忘天子贵，交疏总得故人心。谁云兴尽山阴道，共纪桃源岁月深。

#### 董白

董白，字守素。青城道士。

#### 赏菊和查心穀韵

一弓书屋十分秋，闻道群贤逸兴悠。共赋新诗花假宠，更斟佳酝客消愁。幽姿带露重阳近，爽气浮香几日留。笑我九还丹未就，金英满地若为酬。

贝本恒

贝本恒，字常吉，淮阳人。馮杭洞霄宮道士。

游大滌洞天和同人儒韻

沿溪傍谷尋幽去，同訪栖真謁洞天。瀑布白拖秋水遠，層巒青與暮霞連。千村禾罷  
稴黃初熟，一徑玲瓏碧自穿。宮觀傾頽嘆非昔，敢期重為辟荒烟。

## 【卷一百九十四】

李芳

李芳，字華黍，號蘭谷，錢塘人。

春日久雨寄沈桐谿

東風料峭鎮關心，霪雨連朝思更深。乳燕怯飛巢冷院，流鶯無語坐空林。不因翠減  
三分色，却恐春過一片陰。且恨山行苔蘚滑，背關寂寞自長吟。

招桐谿游天竺諸蘭若

入山深不厭，勝日快同游。梵放僧歸院，歌歡客倚樓。回風撩鐸語，曲水咽溪流。  
莫謂春將老，春濃桑更稠。憶昔東臯侶，頻嗟會面稀。懷人悲遠道，論事覺前非。我未徇塵  
轍，君能脫世鞿。浮生真幻夢，行樂莫相違。

劉敏

劉敏，字昆培，號伴霞，青浦人。萬壽院道士。

早發西塘

空江無月北風涼，萬里吹秋上野航。夜半櫓聲聽不斷，早潮隨雨到西塘。

靜岑夢到山與余同宿俄聞風雨得句云斜風細雨不須歸醒而作詩見贈和答

豈更勞清念，悠然款我扉。迹疏翻得夢，吟健却投機。草榻留雲宿，蓬窗聽雨飛。  
無端雙劍合，臨覺轉依依。

張士達

张士达，字德孚，号芝台，海盐人。斗南山房道士。有《效哦集》。

岁寒和紫田居士韵

阅尽芳菲岁已终，闭门如在万山中。居心自比青松劲，题句难赅白雪工。远岫云回南至日，长江风送北来鸿。梅花驿使传春讯，莫负消寒绿酒筒。

吉潮

吉潮，字亮初，号星槎，长洲人。天后宫道士。有《一鹤堂吟草》。

秋夜偶成

开轩坐清夜，河汉影濛濛。凉气镗前雨，秋声叶上风。观心参物我，守拙任穷通。何限乘除事，都消一醉中。

登文星阁怀二林居士

竹径松门积翠攒，岩峣飞阁耸云端。一声清磬随云度，数点遥山卷幔看。问字客来虚讲席，悟禅人去冷蒲团。苍茫诗思凭阑处，落日归鸦暮色寒。

缪鹤鸣

缪鹤鸣，德清人。上清宫道士。

除夕

年华荏苒又残冬，云水为家事事慵。酒债虽无诗债逼，俗情渐淡道情浓。霜天一字还乡雁，烟寺三声报晓钟。问我金丹真口诀，庵前笑指岁寒松。

李柱

李柱，字擎苍，号赤城，海盐人。

十月见桃花

刘郎去后无消息，暖信先从岭上回。蹊下惜无仙李伴，一枝寂寞带霜开。

严克真

严克真，字公超，号退谷，海盐人。桐柏山房道士。

游天台山还里

山灵笑我寸心违，未结茅蓬在翠微。双阙思寻丹药去，一肩挑得白云归。天台道出抛游屐，海国人还坐钓矶。回忆嫦娥多福地，尘缘终觉世情非。

周望

周望，字渭澈，号纶仙，娄县人。有《樵唱轩稿》。

徐稼翁移居

羨君新卜鹿门居，岸帙高吟处士庐。留得春风花下酒，课存秋雨案头书。轩窗岑寂心无竞，竹石经营意有馀。惟惜旧朋相隔远，幽怀渺渺独伤余。

送慎言弟还武陵并寄子靖南宫昆季

弱冠相逢志激昂，即今重晤鬓俱苍。侧身天地容鸠杖，弹指光阴老雁行。数日言旋期太短，一尊道故话偏长。西还寄语诸昆弟，诗酒情耽较昔狂。

钱凝烟

钱凝烟，字紫山，江西人。上海水仙宫道士。

秋燕和曹春浦韵

清秋燕子故飞飞，惨淡离情语落晖。我亦故山归未得，不禁残泪欲沾衣。

隋鹏

隋鹏，自号云云子。诸城道士。

寄赵壶石

见说高阳侣，潜居一亩宫。春残杨柳月，秋老蓼花风。习懒因常健，佯狂故自雄。不知燕市里，买醉许谁同。

曹志道

曹志道，字端中，号寄庄，秀水人。成真道院道士。有《假鸣集》。

登黄鹤楼

不见仙人黄鹤归，白云江上弄斜晖。谁吹玉笛阑干外，恐有梅花五月飞。

张远

张远，字行之。秀水市曹庙道士。

自题山水画册

烟岚浓冷雨初晴，人在翠微深处行。云气湿衣风透骨，隔林犹听乱泉声。

锺正修

锺正修，字心求，号琴台。海盐斗南山房道士。

观泉

扶筇雨后过前川，石磴声喧泻涧泉。流出小桥江上去，桃花浪里一渔船。

俞中楷

俞中楷，字方怡，一字宁素，号拓湖，海盐人。斗南山房道士。有《星南小草》。

送伯兄之江南

不多聚首别思长，把臂谈心对夕阳。此去吴江好风景，山花踏破马蹄香。

钱一清

钱一清，钱塘人。吴山喜神庙道士。

洞霄宫怀古

落日照松竹，山中风气寒。我来凭吊古，谁与共还丹。抚掌泉心涩，舞蛟亭翠残。可怜为圃客，当日尽仙官。

邓志喜时出，陈君鋟板勤。地灵原首望，天柱更三分。没骨难寻箬，无心且看云。大丹如易与，妙道不传文。

张学景

张学景，字企和，号元斋，丹阳人。居茅山宫监斋院。

登积金峰

石磴半空上，松涛万壑吟。偶因寻药至，不觉入云深。树密藏丹室，泉飞挂碧岑。始知仙境静，终古涤凡心。

王至淳

王至淳，字朴山。住江宁隐仙庵。有《清凉山房诗概》。

晚吟

散步平湖岸，烟波浩渺中。月明天在水，云断树浮空。吹笛惊山鹿，弹琴送渚鸿。  
时来坐幽阁，孤寂与谁同。

书兴

重重云树四围遮，心喜年来远世华。饮酒须寻陶令宅，读书思向邺侯家。雨馀破屋  
生秋菌，风过閒塘落野花。信是幽人清兴好，又随农父话桑麻。

刘虚静

刘虚静，绵竹人。住玉京山。

八月十六日自怀

夜静虚堂寂，林深鹤自閒。风声喧远水，月色冷空山。独坐长松下，悠然修竹间。  
红尘心不恋，瑶岛尚容攀。

朱福田

朱福田，字乐原，号岳云，江宁人。

题自写山水箴寄怀胡古泉

有客迢迢隔剑关，相思无计慰离颜。却从鸟道干盘外，写寄江南平远山。

秦淮吊古

淮水遥通江上潮，金陵王气此中消。祖龙一凿关何事，直遣繁华送六朝。

板桥豆花庄晤马菊村

言寻板桥路，喜过豆花村。老屋恰临水，故人方倚门。欣然具鸡黍，相与论田园。  
何日南山下，同君避市喧。

喜晤栖碧上人

与师一别三年久，忽地相逢贺监家。我自夜深扶病骨，忍寒同对白桃花。

宿鍾山白云菴

晴看日向海中出，雨觉云从足底生。唤起江城六朝梦，天风吹下木鱼声。

#### 早春山斋即事

山斋兀坐久忘机，镇日閒吟客到稀。花气一林初过雨，春寒二月转添衣。浴波水鸟破烟立，断线风鸢掠地飞。目极平原芳草色，东风绿遍钓鱼矶。

#### 游雨花台过武南冈处士别业留赠

空台寂寞久，日日满残阳。不见雨花迹，时闻丛桂香。冈头望深竹，幽处有茅堂。长揖就处士，别来颜鬓苍。

#### 松寥阁海峰上人招饮同韬菴

斜阳虚阁敞松寥，阁下寒江万里潮。山木叶稀苍鼠窜，海门声起大鱼骄。百年几度双丸速，一霎閒愁万古消。安得此间容我隐，沧洲无事狎渔樵。

#### 十一月十五日夜鸠江桃唐隄上独步

桃唐烟水正迷离，几处亭台入画时。岸上谁家夜吹笛，一轮明月照鸠兹。

#### 题杨体之明府担稻图

寸田可治生，一粒固为宝。苟能悟其微，仙圣域皆造。先生旧宰官，现身自担稻。治民如治田，借稻以喻道。一发圣经蕴，閒复穷释老。使有二顷田，退耕固为好。顾抱经纬才，催科甘下考。苍生待作霖，日望卸肩早。

#### 秋暮杨体之明府过麦浪舫雨中盘桓三日

清白子孙强项令，罢官来叩野人居。闭门三日潇潇雨，黄叶林中读道书。

#### 周曙

周曙，字闻曦，号松隐。住仙源道院。

#### 赠圣因上人

即此隔人世，何须更买山。犹嫌云水竞，独自闭寒关。钟响空明外，莺啼杳霭间。毒龙思听法，隐约出溪湾。

#### 吴浩

吴浩，字拙存，元和人。

月夜弹琴忆汪一江

有怀不可见，秋阴生茅茨。坐久见明月，如与幽人期。写我琴中意，诉彼明月知。夜半松泉落，泠然天风吹。

俞体莹

俞体莹，字锤吾，号萍舟。苏州穹窿山道士。有《萍州剩草》。

红梅

不羨隋宫翦彩枝，丹砂变尽雪霜姿。罗浮仿佛桃源境，驴背诗人知未知。

虎丘怀古

花宫幽处阖闾坟，过客登临日半曛。宝气久消金虎穴，雄图空练水犀军。苔寒古甃深千尺，春老青山又十分。惟有高情王短簿，荒祠岑寂倚閒云。

宿栖霞岭金鼓洞赠蔡尊师

石洞最幽寂，从师养静根。清閒十二月，《道德》五千言。云懒长依岫，泉流自到门。山房客信宿，玄理共探论。

山观即事

落日空林散紫烟，满阶瑶草碧芊芊。梦回虚阁云侵榻，诗和高僧鹤寄笺。列岫当窗开画嶂，双流合涧奏冰弦。凭栏极目层峦外，采药馀风未渺然。

送陈静岩师入都

空山无计挽君留，高挂云帆蓟北游。明日春寒江上路，满天风雨一扁舟。

豫让

知遇恩深一死轻，击衣溅血足心惊。龙门取合荆轲传，孤负千秋义士名。

张复纯

张复纯，字健修，号巢云。杭州金鼓洞道士。

乙丑十月望前一日同人小集赋诗

古洞何年凿，吾家几叶传。招来云外侣，都是酒中仙。清兴殊无敌，清诗会有缘。



迟迟下山去，谷鸟破轻烟。

仰衡

仰衡，号青屿。杭州玄妙观道士。有《蕉叶山房吟草》。

思天台歌

思天台，巍巍高矗四万八千丈，直接青天何高哉！气象磅礴倾五岳，烟云缥缈连蓬莱。岩坳涧曲著我一茅舍，吾将绝俗长往啸咏而徘徊。跨石梁之天矫，睨瀑布之喧豗。但见叠翠层青。远近相拱揖，奔虹走雪，高下争流急。琼台斜通双阙道，瑶峰远映赤城色。夜半天鸡鸣，沧溟日欲出。光芒万缕朝曦升，颓然一醉扶桑霏。山中胜状难穷搜，仙之居兮神之游。司马一去已千载，瞻白云兮心悠悠。人间不觉羲娥迅，灵境千年才一瞬。君看刘、阮出桃源，世运几番更正闰。玉京有洞迷荒榛，中藏日月秋复春。石扉訇以乍启，仙都迥以无垠。紫鸾吹笙玄鹤舞，银堂瑶室多宫府。神苗异药葱蒨连陇畦，人家花竹相望成村坞。愿向真官乞取閒，田圃灌木耘芝终此土。遐游物表以忘情，出入有无一今古。我思天台心魂劳，往往飞梦凌霞档。何当践莓苔援萝葛，一瓢一杖手自操，探幽访邃穷嵯峣。

冬日偕王凤鹤登凤凰山访胜果寺展眺山顶探岭峪诸胜而归分韵得栖字

世网苦自缚，胜事恒多睽。幸兹及冬暖，欣与朋俦搗。汗漫何所之，言指城南谿。寒晖照霜岫，晓风犹含凄。兴来詎怯远，纵步凌丹梯。迢盘木末出，下临飞鸟低。回环众峰合，中隐一招提。倚岩结危构，崑岷干云霓。寿藤走长蛇，怪石蹲勇猊。古刻蚀苔藓，欲读奚由稽。绝顶得快意，刮自开金镳。江流浩东注，湖水横其西。远舟竞荡漾，泛泛如凫鹭。俯仰尽八极，顾我真醺鸡。岭云转深奥，树■杂町畦。樵唱互响答，花木多幽蹊。行行遍搜探，得得杖一藜。但嫌腰脚弱，胜处莫穷跻。怅焉觅归路，回首苍烟迷。终应结茅宇，深託岩峦栖。

冬日返语溪舟中即景

水落清溪一棹过，西风杨柳尽婆娑。野禽飞去斜阳外，惟有寒烟衰草多。

几点栖鸦缀老桑，数丛枯苇映寒塘。一年又是冬将尽，风送孤帆到女阳。

首夏诸客见过山房次项丈秋子韵

从教庭草翠如葱，闭户惟依一亩宫。池水乍添鱼意乐，林深未密鸟声通。茶烟著竹成轻霭，琴响和云入远空。喜得联翩词客至，好追莲社结山中。

徐本衷

徐本衷，号虚庐，崇宁人。成都武侯祠道士。有《香叶亭诗集》。

由都江堰至上元宫

一径穿云去，松间鹤自翔。小桥支古木，敝屋隐崇冈。樵斧丁丁凿，山花细细香。仙都看不远，晴翠染衣裳。

由石碑铺至常道观

十里入云峰，步步超尘表。松桂似幽人，空谷环相绕。略约驾危岩，小憩入遐想。不闻人语声，万壑松涛响。

初夏过友人新居

爱閒此物最怡情，竹屋绳床午睡清。除却酒瓢无长物，满帘新绿雨初晴。

将抵灌口场口占

沼溪幽径曲，雨止讶新晴。石峭云犹住，峰回路忽平。牧童驱犊饮，老树集鸦鸣。遥望人烟集，逢场酒已倾。

陈敬

陈敬，字月坡，海盐人。斗南山房道士。有《餐玉庐诗存》。

秋感

大地风霜催岁暮，碧天星斗淡凉宵。千家砧杵声哀怨，一室篝镫影寂寥。壁下吟虫何唧唧，枥中鸣马更萧萧。遥知长胜幽燕将，偃月榆林正射雕。

海国孤城夕照残，独依牛斗望长安。乱山落木秋声静，细雨疏镫客梦寒。天地苍茫离思迫，关河辽阔寄书难。请看梧竹栖鸾日，高举凌云振羽翰。

万家水阔送朝凉，竟日城楼望大荒。烟外月生全海白，沙场日落半天黄。陆机早岁能工赋，阮籍穷途更放生。惟逐少陵徒结纳，掩关谁肯聚萤囊。

枉说鱼盐富东海，频年水旱少丰登。民劳土瘠艰禾稼，野廓城荒蔓葛藤。磷火几家山鬼语，飓风永夜海蛟腾。江亭萧瑟闻哀雁，昂首高吟曲槛凭。

浪迹乾坤一马鞭，丈夫意气畏人怜。猿声朗啸千山月，鸿影孤飞万里天。陈箠苏秦方发愤，题桥司马未昇仙。振衣直上高丘望，吴越川原起暮烟。

夜坐

凉风生海国，万树动秋声。野阔星华地，潮平月上城。穷通知有命，贫贱恐无名。且学欧阳子，携书就短檠。

潘鸿

潘鸿，号云谷。秀水翔云观道士。有《来云阁小稿》。

嘉兴道中

泽国春阴重，掀篷纵远眸。烟笼三塔寺，云罨百花洲。出世空成愿，劳生尚未休。试看青草岸，閒极有沙鸥。

柳渔

柳渔，字一琴，号涵虚，海盐人。斗南山房道士。有《一琴诗钞》。

山行

雨后秋山翠满坡，行行翘首望嵯峨。斜通线路人踪少，饥下巉山严虎迹多。万树声乾黄叶堕，一筇影曳白云过。天将薄暝思投宿，喜听归樵隔水歌。

于芳洲

于芳洲，字簠村，德清人。吴山清秀山房道士。有《松山乡人诗草》。

醉歌

夷齐死於名，跼蹐死於利。一笑古来人，多为名利系。古人已矣醉埃尘，不如饮酒全吾真。酒酣梦入醉乡去，忽复捞月沧江滨。觉来不问此何日，一声长啸通天津。

谢文节公号钟琴歌为吴素江明经作

信州兵败公潜踪，随身长物惟号钟。垂帘卜肆一再鼓，惊猿唳鹤凄心胸。东山桐，西山梓，发露精诚声变徵，几时流转入燕京，跣足麻衣抱琴死。沧桑变易五百年，断丝枯木若为传。自来神物久必显，岂肯灭没随秋烟。吴君嗜古兼尚义，铭刻摩挲叠山字，解囊土裹漆郁苍凉，斑斑尽是遗民泪。遗民泪竭东海枯，冬青树老啼哀乌。请弹丞相《松风曲》，再访闽中《何氏图》。

王毓

王毓，字梦池，苏州人。藏书庙道士。

山居杂咏

随分栖迟十亩宫，此身幸喜免飘蓬。醉醒久已闻渔父，得失终期学塞翁。肯使壮心惭刻鹄，漫将清兴託雕虫。世机祇觉从兹息，坐对秋山落照红。茅檐习静坐高春，仗酒浇平磊块胸。终日守株宁待兔，三年学技笑屠龙。閒愁似草经霜减，野兴如花著雨浓。试上山头

寻故事，读书台畔暮云封。

吴教一

吴教一，字秋舫。杭州金鼓洞道士。

晚春

且向烟霞寄此身，一瓢一钵许相亲。柴门花落馀残梦，草阁云深殢晚春。差喜地偏心更远，尽教时过局翻新。年来自笑生涯足，满砌苔钱孰道贫。

黄合初

黄合初，字超然。成都武侯祠道士。有《听鹈馆诗钞》。

飞云洞

路入东坡道，玲珑古洞幽。云飞山欲动，雨过瀑争流。峭石撑孤阁，苍松倚小楼。文成遗碣在，读罢暮烟浮。

诸葛洞

满耳滩声吼，轻舟不可留。为收诸葛米，来拜武侯侯。洞古千年雪，林深五月秋。此间结庐住，补种竹清修。

龙马潭

访胜逢迟日，春风拂面生。浮舟经古渡，倚树听流莺。地僻人踪少，云深石径平。仙源何处是，一水绕蓬瀛。

丈人观

万山环绕白云封，古树盘空鸟道丛。我叩仙坛清昼寂，倚阑时听一声钟。

由上元宫之赵公山访丈人村

云烟面面出层峦，结伴寻幽叩石坛。水送桃花溪几曲，苔封石室路千盘。未逢常偃心先醉，欲仿荆关下笔难。咫尺会须凌绝顶，相逢一笑海天宽。

泰清宫观云气烹茶放歌

泰清仙界云轮囷，群峰滉洋悬无垠。呼朋拂袖历磴上，万象一白迷鸿钧。麻姑池畔鸳鸯井，泉香而冽汲修綆。携来古鼎试烹茶，雀舌乳花泛清影。我亦自信有仙缘，几番杖策来层巔。餐霞吸露润诗腑，吟破白云枕石眠。挂瓢久熟胡麻饭，食之能令筋骨健。五体清凉

百病除，何须八石经时炼。白云涧内白云深，云静天青涧壑沈。茶罢天风吹飒飒，好听松梢万叶吟。

#### 灌口场望迎仙阁

已近迎仙阁，滩犹斗石鸣。停琴招白鹤，回首望青城。云护岸难数，山空雪有声。重来学观化，万物尽浮生。

#### 入山

半日峨眉道，扶筇意洒然。片云飞绝壁，夜雨长流泉。偶憩三生石，来探小洞天。疏钟何处发，馀韵袅林烟。

#### 春日过万里桥

万里桥边路，春来几度过。柳阴新水活，云意远山多。幻质非金石，閒情寄薜萝。偶逢江上侣，招我著渔蓑。

#### 赠琴吟

我有空山侣，响雪与流泉。相随经一载，何处寻成连。君是河阳辞赋手，奇书满架无不有。况擅史笔称三长，文献徵搜志不朽。汉家陵庙武乡祠，《蜀志》遗文时见之。典章金石详考订，非君博雅其谁为。羽流何幸附骥尾，一脉薪传继遗轨。小草药物收笼中，下里之词惭众美。书成直欲驾前贤，蜀中快睹珍珠船。祠堂永作琅嬛笈，顿教纸贵钞流传。愧乏琼琚何以报，流泉好奏《高山操》。安雅堂中持赠君，君应对此欣然笑。芙蓉开处试一弹，行看花县麋同调。

#### 许湘

许湘，字潇客。嘉善瓶山道士。有《翠竹山房诗集》。

#### 瓶山

瓶山虽小山，寄迹聊高吟。清风徐自来，一枕长松林。有时北窗下，悠然复鸣琴。惜无锺期遇，奏此《流水》音。怪哉襍襍客，溽暑犹招寻。不知静者意，有傲羲皇心。流光亦何速，绿树皆成阴。寄言林宗子，就我来登临。

#### 十月十日与频伽丹叔退庵霁青诸君驯鹿庄看菊

城中二郭颇閒放，骚坛久已推飞将。今晨一纸偶然来，约我清游共酬唱。小舟低著六幅篷，打桨竟过东城东。水花溅衣凫鸭乱，一篙刺入芦花中。晚来舍舟急登岸，寒花正值开其半。主人好事正候客，篱角柴门启一扇。欣然置酒命开筵，挥毫觅句争留连。待得明春好风月，再赏梅花歌《白雪》。

重阳

年华弹指又重阳，此日登临兴倍长。风急雁行频聚散，霜高树色杂青黄。林间夕照明如画，篱下幽花晚更香。几度阑干凭眺望，暮云秋景太苍苍。

赵莲

赵莲，字凌洲，平湖人。海盐栖真观道士。有《画梅庐吟稿》。

过富香吏茂才村舍

村舍拟柴桑，门临碌碡场。野花人不识，山果鸟先尝。琴韵随流水，书声出短墙。浑忘茶话久，归路满斜阳。

孟夏访香吏不值用皎然访陆鸿渐韵

苍然天欲暮，一路见桑麻。密树藏栖鸟，空潭聚落花。问奇频载酒，独往竟忘家。叩户无人应，柴门傍水斜。

山中春暮

涧草岩花入望齐，绿阴浓压画檐低。道人终日静无事，高枕白云听鸟啼。

张谦

张谦，字地山，号云槎，海盐人。桐柏山房道士。有《补梅居士诗选》。

述怀

一粟乾坤泡影微，苍松翠竹自相依。冰霜寒甚无椒酒，刀尺声催尚葛衣。小有才华非至理，绝无闻见是玄机。古今不少高贤传，毕竟柴桑似者稀。

西水驿

停桡西水驿，击柝已三更。野阔诗怀壮，天寒酒力轻。雁声惊别梦，月色鉴离情。江上多渔唱，征人睡未成。

高士湖

凉风瑟瑟起菰蒲，九十九峰青此湖。高士不来鹤飞去，沙隄剩有月轮孤。

过友人旧宅

旧板桥边处士家，三间老屋自欹斜。野风忽送香过涧，开遍墙阴■字花。

王至甸

王至甸，号徙南，静宁人。

画梅一枝题赠潘恂九还巴陵

秋风满襟袖，归棹洞庭阴。一醉写疏影，岁寒盟此心。

杂录道藏因以自嘲

《五千言》亦归无极，三十年来访太初。今日定教蠹鱼笑，又繙绿字写仙书。

过惠阳花隐洲

曲曲林亭澹澹春，水声花影四无邻。明年石上寻鸿爪，谁识玄都旧道人。

秦淮秋感

翩翩野鹤无归处，五岳云烟脚底生。飞落江南人不识，春潮犹打石头城。

劫后楼台感不胜，卅年如梦数中兴。红桥西去垂杨老，照尽沧桑几处镫。

旧院风流尚管弦，黄冠云水亦华颠。卧吹横笛淮波晚，一舸重来自在眠。

江花暮合水烟疏，门绕青溪认旧居。醉眼迢迢凝望久，夕阳多是六朝馀。

水云亭

爽气忽无际，水云如许青。松高荫萝幄，塔远戛风铃。

将往金陵留别鄂中诸友

虚舟原不系，来去只随缘。惜此苔岑好，要之金石坚。东风白门柳，斜日汉阳船。一别情何极，相思鼓七弦。

种松图陈雪盦属题

雪盦先生今之豪，须眉奇古声价高。一枝铁笔铁斯相，贫老但爱听松涛。清风明月不须买，突兀双龙知几载。自言手种向空山，一醉松阴化云海。虬枝压檐青复青，毛公服松能变形。他年袖石乞篆刻，荷锄还从掘茯苓。

赵季和刻青田石章见赠时将归蜀因为诗以报之

法古以神不以迹，赵君篆入斯冰室。十年悬腕如拨镫，一刀凿透青田石。翩翩野鹤初飞回，脱手赠我疑琼瑰。自嫌雕刻壮夫耻，笔力真可回云雷。文三桥，王山麓，当年此技称绝工。江山跌宕有寒饿，而君莫叹相如穷。叙州风，雅州雨，临邛垆头酒如乳。还家一醉对文君，却胜黄冠作羁旅。此别重逢复几年，相看黯黯俱华颠。倪思老朽诗情苦，乞与巴东十万笺。

赠友人冯集梧

春风吹我过君家，门外人惊三朵花。一笑不知谁醉醒，相携重与数年华。松窗对酒听新雨，蜡屐寻山入晚霞。拟抱青琴鼓招隐，知君久已厌箏琶。

秋夜读道藏有作

探得玄珠道眼醒，庚申空守只劳形。忽然虚室夜生白，自诧灵台火养青。大月危楼堪独啸，天风高笛落残星。无人解我还丹诀，试取微吟记画屏。

张永亮

张永亮，字恒斋。成都二仙庵道士。有《来鹤亭诗稿》。

秋江晚步

缓步秋江十里隄，閒吟古寺夕阳西。同人共酌黄花酒，谷口寒鸦傍晚啼。

谿柳

迢迢山光接，烟迷柳一谿。临风谁弄笛，喜雨自听鹈。樵斧隔深谷，渔舟系短隄。顰眉送行客，不尽夕阳西。

郭恩孚

郭恩孚，字伯尹，号蓉汀，濉县人。有《果园诗钞》。

次陶先生以自题王廉生祭酒遗墨见示敬赋长句

无为斋墙土花碧，悲风飒飒响通夕。墨耶泪耶不可知，白头老儒对镫泣。金茎兰畹楚臣骚，丹凤城中鬼夜号。翠华西幸华山高，孤臣之魂安足招。

郊行和蔡大令三晋韵

沙漠穷荒地，春光也自妍。花明新戍垒，人辟旧耕田。远树宜新雨，平畴迓暖烟。村醪何处贳，空挂杖头钱。



## 【卷一百九十五】

智朴

智朴，字拙庵，徐州人。有《盘谷集》。

盘山

苍松乱插连云石，石上苔痕虎行迹。拄杖来从飞鸟边，下视苍茫远烟碧。

今释

今释，字澹归，杭州人，本姓金，名堡，字道隐，号卫公。明崇祯庚辰进士，官礼科都给事中。韶州丹霞侍僧。有《遍行堂集》。

人日龚芝麓邓孝威垂访海幢寺

胜流坐对即空山，未碍梅花笑任还。风雨杂陈今昔梦，松筠长护死生关。珠川空写何年泪，玉竹犹分一样斑。此去相思无远近，曹溪元不隔人间。

无题

老怕应休学少年，忧时成结喜成颠。无弦得弄琴三叠，有伴裁看石一拳。闭户钞方偏伏枕，因人博饭愧栽田。杨花又现浮萍相，水泛风飘不异缘。

戴菴

落叶平坡外，骑牛古寺还。一回风雨过，几幅米家山。

弘智

弘智，字无可，别字药地，桐城人，本姓方，名以智，字密之。明崇祯庚辰进士，官检讨。初为报恩寺僧，后开法於青原山。有《浮山集》。

独往

同伴都分手，麻靴独入林。一年三变姓，十字九椎心。听惯干戈信，愁因风雨深。死生容易事，所痛为知音。

乙酉腊月二十四夜

故乡风俗重今夜，儿女班班列堂下。今当树折巢破时，羽毛零落怜枯枝。旅舍檐前一回首，上有白发下黄口。望空翦纸告坟墓，两眼泪接三杯酒。难道年年坐死苦海中，愿为

落叶随飘风。

#### 听黔调山坡羊

调自边关到石城，此方弦管更多情。游人借得东风力，吹入江南后一声。犹忆秦淮赛《竹枝》，青楼沈水易相思。眼看到处生离别，何故多弹《子夜》词。

#### 宏仁

宏仁，号浙江，歙县人，俗姓江，名韬，字六奇。明诸生。

#### 题画

茅屋禁寒昼不开，梅花消息早先回。幽人记得溪桥路，双屐还能踏雪来。

#### 南潜

南潜，字宝云，一字月函，一作月岩，乌程人，本姓董，名说，字雨若，号侯庵。贡生。灵岩寺僧。

#### 宫人入道和唐人

听断昭阳鼓吹声，道家衣向御前更。已抛团扇三秋怨，却胜琵琶万里行。留锦祇谋装秘笈，买丝还拟绣飞琼。天家异日赍香使，白发宫奴记旧名。

#### 读彻

读彻，字苍雪，呈贡人，本姓赵。长洲中峰僧。有《南来堂稿》。

#### 别吴中诸子

相见了无意，临歧还黯然。回看吴苑树，独上秣陵船。春老还山路，江昏欲雨天。白鸥颇怪我，聚散绿波前。

#### 中峰喜逢白公夜集法公方丈

久别几於消息断，重逢犹记道途閒。两山相忆秋同老，一夜刚随雨到山。故旧何人堪共话，林峦有主暂投閒。乱流落叶声兼下，听彻寒扉不上关。

#### 送友之敬亭

君读书，我拍歌，留君不住奈君何！閒者孤云飞者鸟，我山我水何曾少？独怜知己是敬亭，开门终日双眼青。安得秦王驱出边，芙蓉一片当我前。君亦不须去，山亦不须住，竹月松风对床语。

白云栖过湖上杂咏

春水平湖绿映隄，六桥芳草正萋萋。东风不为游人待，催尽桃花衬马啼。

实讷乃

实讷乃，字可南，吴县人。

石公山

湖上山忽起，突兀孤云中。洪涛日相击，飞雪洒晴空。悬崖疑欲堕，怪异由天工。雨晴苍翠湿，水落根玲珑。时有好事者，閒来穷鸿濛。

江楼望月

江村犹不夜，月已到高楼。碧瓦光相射，虚檐影自流。山山皆在水，树树尽成秋。天迴空无著，西风一钓舟。

夜同凝父宿元朗斋头有怀秋潭

帘外丝丝雨，因风亦易晴。孤灯照清话，一钵了浮生。野鸟不依树，閒云偶入城。悬知溪上意，流水是经声。

月夜过元宏山房

忽动幽人思，昏黄过草堂。江明初上月，地白已凝霜。相见更何事，岁寒心不忘。石床终夕语，松隙又晨光。

炤影

炤影，字指月，吴江人。住梅里江枫庵。有《镜斋集》。

题顾茂伦村居

持竿傲楚使，长啸将何之。人生各有志，与世无心期。卓哉顾夫子，隐耕东皋菑。卷书挂牛角，冲烟出茅茨。幽禽啜高松，望空宏遐思。时呼渔人饮，问月来何迟。回眸瞻北斗，阴云凝天池。放歌忽挥涕，今古事如斯。且复倒金樽，生涯何足知。

吴茂申见过感赋

秋风飒飒独相过，说尽艰辛鬓已皤。莫道故乡烟火少，祇缘江岸鼓鼙多。江山万里看黄雾，松竹荒园坐绿莎。冠盖寥寥休问讯，五侯茅土近如何。

## 函昱

函昱，字丽中，别字天然，番禺人，本姓曾，名起莘。明崇祯癸酉举人。己卯落发，甲申后避地雷峰。历华首、海幢、丹霞诸刹。有《瞎堂诗集》。

## 春佃

幽谷逢春至，蔼然鬯予情。江流日以长，山鸟时一鸣。重云蔽群木，冥蒙遂所生。斯人独不然，耳目馀聪明。万物纷其前，安得返无名。役役百年中，毁誉争虚声。何不乘青阳，优游同耦耕。旷观古与今，贤智多无成。惜此荷鋤人，来往空生平。

久雨不敢厌，有事在西畴。戴笠随人行，望望荒山丘。春风吹我衣，飘然忘去留。爱彼绿遍野，远近驰双眸。试问往来者，知我心中不？与尔情均同，所异能不忧。饱暖百念灰，饥寒岂无求。

一身寄天地，生事随人间。山泽吾自为，勤苦有馀閒。乐道当如是，名誉匪所干。招隐愧郑谷，矜贫薄袁安。饥渴苟可支，泉石足忘年。春林生意满，心逐禽鱼欢。种蔬不待暖，布穀畏犹寒。去年瓜豆迟，野羹良辛酸。万事须及时，岂但耕鋤然。

新晴喜见日，微风荡青林。弱柳未成条，雏莺试好音。和气彻上下，奇怀发良晨。挈象观初苗，终岁赖不贫。所欲亦易足，俯仰无馀心。倦归茅檐下，读书思古人。黄虞诂末世，安知不如今。出户望空远，高山临星辰。

谷风寒不栗，山日多所欣。泉声远近别，深浅绿畦分。燕归寻先巢，去雁不成群。大小农事忙，谁与观斯晨。好事悦予怀，閒情惭昔人。自知景物同，老兴聊云云。莫言世如幻，幻中良有真。澄江摇古木，怪石冒春云。

甲子行当健，今春逾往年。日食几一升，颂诗尝百篇。措心无他营，所慕维耕田。贫贱固其分，亩犬亩诚多贤。燕逸岂不娱，揣己难为安。迺因老且病，众务惭身先。徒以口舌劳，兀傲谁与怜。君子贵自处，吾亦非苟然。

## 过泐山

寒山有佳色，理策临清漪。倚棹过绿玉，将以观冬犁。舍舟登古岸，仿佛玉渊时。所异谷与川，动静各有宜。停步稍顾盼，抚景心相随。遥遥望石门，双峰一径微。梯穷万山出，忽然就长隄。土屋三两间，依岩缚茅茨。爨烟穿石窦，云影随高低。下有丹溜潭，水落松风吹。泠泠潭上人，分明见须眉。乐此毕生平，耕鋤复何辞。古者食其力，辛苦当为谁。日暮且归去，明春予再来。

## 沈秀才融谷入山

何人江上来，面目清如水。遥遥向石门，寻我万山里。岩前青林舒，衣上白云起。读书破万卷。相对难为似。岂不释世纷，渊明曾一仕。但存霜雪心，迟尔十年耳。张镫酌流泉，寒焰入杯泚。杯影与壁光，毕竟何者是。言穷神自会，他时须记此。

次韵答杨伊水

竹院逢君处，相看古道存。从来无剩法，惭愧独称尊。新月窥人影，寒鸦代我言。更寻晴雪夜，移榻破云痕。

晚登风幡阁

望处江山旧，凭高独怆然。曾随章贡水，直抵秣陵天。六月溪楼上，三年樵舍前。风光今昔异，抚景倍流连。

出诃林闻罗季作讞

别子方三月，倏然成古人。谁知昔日诺，空结再生因。侠骨终难副，诗情孤绝邻。穷交看欲尽，横洒独沾巾。

王园长侍郎入山

破寺寻僧至，呼名尚俨然。座中今日意，石上旧时缘。楫桡烧寒雨，蓬菰坐暝烟。干戈犹满目，珍重惜余年。

归过石涧

别有一天地，巉岩路不穷。白云扶怪石，碧涧浸寒空。杖屨虚无际，林峦杳霭中。归途情更懒，习习起东风。

九日登三老峰

叶落万山紫，披云信短筇。恰逢重九日，独上最高峰。海色连秋汉，风声杂晚钟。黄花今又醉，犹是去年依。

转禅病出诃林

久病伤为客，寒虫候月艰。三冬诃子舍，八载荔枝山。始觉浮生促，深知平日閒。近思芦服味，念汝海云间。

示阿字

大道无人识，微言为尔开。白云将眼去，明月照心来。坐落西风夜，行冥古径苔。嗒然天地外，相见一悠哉。

闻秋风寄即觉

六月秋风起，行人知不知？何须梧叶尽，方觉雁声悲。北地稻粱草，南湖菰米迟。

归山霜未降，更勿滞佳期。

#### 悼袁特丘中丞

凶信疑难定，书来始觉真。十年师弟意，一旦古今人。老死非所讳，因缘不可陈。精魂何处觅，未易忆前身。

易别成辜负，多时恨未收。匡山从昔峙，楚水至今流。我隐何曾隐，君休竟不休。此生堪几误，惭望武昌楼。

长生不可学，但愿莫长离。解语人难再，多情我易悲。遗怀怜旧好，悼往惜今时。相续他生事，论因亦自知。

而媳师吾妹，能参出世禅。及门多割爱，歧路叹前缘。任运元无住，千生总偶然。忧伤惟我佛，底事未堪诠。

#### 与角子夜话怀姜山江宁

相对复何语，镫摇此夕情。无心居野寺，有梦到江城。恩在身名重，缘抛道谊轻。谁当信畴昔，期尔尽生平。

未尽今宵意，难为千里心。残莺啼短烛，细雨滴离襟。旧话怜当日，新愁起夕吟。白门何处院，笠影动城阴。

#### 悼旋菴湛都寺

不敢为人累，心孤意自阑。谊衰知道丧，时迈觉情寒。社燕辞霜白，秋鸿叫树丹。每因朝露委，都作暮龄看。

华陀不可学，把药泣涟洏。尽意起遥夜，论心限此时。达生嫌世薄，问卜爱人痴。门外西风急，披襟信步迟。

人情今古尽，夕月与朝烟。好客常终日，挥金信一拳。岂堪分水乳，容易论因缘。已矣真风邈，予当远石泉。

万里秋山好，凋零逼岁除。晴空填翠黛，碧汉挂蟾蜍。草树无常色，光辉亦暂舒。悠悠尘世里，谁独爱吾庐。

#### 辛酉元夜吟

世上真如梦，兴来閒一吟。明镫过午夜，独坐拥寒襟。大泽龙蛇蛰，高峰霜雪深。峯阳有孤树，爨下亦成音。

#### 郭无伤邝无畏见过

金粟如来是后身，澄潭孤月净无尘。看同镜里人何似，话到声销道易亲。铁树开残寒腊焰，雪花藏得旧年春。水云上下深深意，鹤影松虬好结邻。

#### 尹恒复中秘见过

频年转战知交尽，相对真疑梦里人。心淡自应廉吏后，时危曾现宰官身。趋庭有子能娱老，避世寻僧得正因。开士渐推莲社长，罗浮今亦有遗民。

#### 望长老峰

万丈孤危在目前，亭亭不与众山缘。但看八面无行地，相见中峰直到天。远近云峦供怪石，浅深沙磧绕晴川。宝华王座当空倚，路滑还他长老禅。

#### 忆过姑苏

西风散发阖闾城，回首姑苏泪暗生。孤客不知他日恨，旅怀空怆昔人情。秋高叶落吴门冷，夜半潮生海月明。三十年来吟望处，江湖缭绕暮云平。

#### 寄熊内阁齐云山中

富贵功名梦里人，谁知苦乐正相邻。回头大有甘心处，须信身贫道未贫。

#### 入齐云

深山高卧白云屯，閒听林莺尽日喧。不为痴呆宁有此，肝肠空向石头论。

#### 光鹫

光鹫，字迹删，号东樵，番禺人，本姓方，名颢恺，字麟趾。明末举人。晚主大通寺。有《咸陟堂诗集》。

#### 过羚羊峡

上峡上峡行不休，一夫力挽千钧舟。船头刺篙后摇橹，长徽短纆举如组。牂牁乃是百谷王，端水作腹洧水肠。画山习坎为束峡，譬则咽喉司吐纳。昨宵峡口闻风雷，耳长目短心先骇。今朝峡中豁烟雾，山色水声浑不住。此时此景堪语谁，当境不觉旁得之。上如龙伯大人抚长剑，截取方舆作天堑；下如任国公子垂钜竿，坐临砥柱观狂澜。前如五丁凿破蚕丛道，金牛奔入西山草；后如祖龙东面挥神鞭，众石俯首争相先。左如维摩一榻一方丈，金毛狮子纷相向；右如陀罗各手千芙蓉，三十二相填虚空。入如有穷射天弹九日，郿屋宵中见营室；出如瞿昙夜半睹明星，扶桑浴日天鸡鸣。天鸡鸣，我当去，行遍千山万山路。风顺顺水下峡船，相逢莫问曾经处。行路难，行路难，莫难於瞿塘之滟滪。何如羚羊古峡澈底清，照见行人不知数。行人照水水照人，形影奔波漫相遇。当从旧路复归来，石出水枯山骨露。顺流东下会有时，回首唤山与山语。

寓龙池庵日显师以风雅相质赠此以广其志

读书万卷无一得，寻行数墨知何益。丈夫耻作文字禅，怕与时人号诗伯。不见黄梅春米卢，胸中一字全不识。腰閒石烂骨皮穿，倩人夜半书廊壁。祖翁田地坦坦平，儿孙更莫栽荆棘。我在罗浮古洞来，蒲团坐老青山色。焚尽诗书始出门，门前大道如弦直。南行取路过龙池，龙池之水清且碧。春风菡萏次第花，赤梢鲤鱼长八尺。眼中明月夺鲸鲵，夜光照见池头客。相逢知我老诗僧，舍却摩尼问沙砾。笑倾栲栳掷还君，莫昧圆明缀衣袂。掀转前车戒后车，少壮及时须努力。扑破奚囊未了缘，斩断葛藤千七百。老僧拭目池上看，雨似盘倾雷霹雳。金鳞透网出重关，方笑蠹鱼心眼窄。

送卢雁林归里

卢生手抱玲珑玉，目送飞鸿理新曲。日暮乡心归兴催，十指沈吟写幽独。深情远韵谁得知，曰有东林方老师。闻所未闻见未见，此声不似平居时。昨日君心如止水，今似行云日千里。止水清冷有浅深，行云去住无端倪。卢生大笑释玉琴，曰公知我真知心。明朝孤棹乘风去，云水迢迢何处寻。

蜃楼歌

天空海阔波不兴，沐日浴月百宝生。海滨老人双眼明，昨宵仰见营室星。帝命海若修乾城，六丁六甲胥效灵。骑箕传说版筑鸣，吴刚伐柯声丁丁。扶桑若木为栋楹，龙宫珊瑚装画屏。天孙云锦交疏棂，空中楼阁随目成。千尺百尺通杳冥，瑶台璇室差中京。玉堂金马意所轻，便欲埃风予上征。排闥直入掉臂行，云霞接足飞腾腾。俯视下界如苍蝇，终朝仆仆昏不停。随人啄腐还吞腥，焉知大鱼化为鹏。六月一息九万程，何时与尔徙南溟。伫立久视中屏营，天门乍阖乌西倾。繁华寂寞如转晴，重楼复道归太清。中星熠熠云英英，谛观乃是大蛤精。鼓吻吐气成幻形，老人自歌还自听。鼃鼃睡熟唤不醒，醒来但见桑田变沧海，高岸为谷深为陵。迷楼绮阁今何在？铜驼荆棘分纵横。乾城终古长如此，何须东海访蓬瀛。

留别庞西牟

举世尽行役，出门胥问津。蹉跎百年内，离合暂时人。几欲成高蹈，今来愧隐沦。山中有茅屋，弃置勿重陈。

东林折梅送周大尊归里

与子同枯槁，花时共入林，一枝聊折赠，相视意何深。去住本无著，繁华岂有心。故园春信近，行矣莫沈吟。

响石

偶因传语者，识得点头谁。真宰互相答，太虚原不知。求声出函谷，闻籁忆南箕。此意难为赠，潮音长与期。



白云洞雨后观瀑

曾听樵僧说此奇，今游果尔弗吾欺。百千亿眼观不足，七十二峰来悔迟。喧寂解当同体处，身心方是得閒时。一条白练从何去，惟有云山严静者知。

募修海潮山严

祖公一片閒田地，付与灵泉自主张。天遣五丁开半壁，谁教七日凿中央。上方钟鼓潮音应，万里风涛海印光。欲识普陀真面目，逢人惟劝解空囊。

北山探梅与社中诸子订买山之约

东林满林花尽开，北山之北何如哉。故人留客不归去，许我买山方到来。茅店板桥好乘兴，冻云老鹤休相猜。明年此地有宾主，一日往还能几回。

将入丹霞留别同学

名山说著便精神，夜束腰包晓问津。老去尚能夸健足，从来不信有閒身。岭梅开日忽忽别，岳雪消时处处春。我自不留君不去，中间得失问何人。

赠刘旗峰明府

多生慧业宰官身，神武抽簪著幅巾。北面曾为强项令，西方甘作折腰人。俸钱买鹤清还白，净食调猿躁亦驯。抛却簿书期贝叶，心空从此不忧贫。

弹子矶

薄暮轻舟过石矶，重寻金弹没苔衣。而今大地无征战，不用阳戈返落晖。

欲买丹青写十洲，谁知荃草即琼楼。真山真水无人量，笑煞当年顾虎头。

识得山中更有山，点头顽石未曾顽。修罗钻入蜗牛角，碧藓苍苔处处閒。

答关茂才子璿

之子信殊众，飘飘琼树枝。相逢端水上，不觉还山迟。独鹤下高树，怒蛙喧一池。嚣尘满天地，何处可扬眉。

峡江如净练，明月近中秋。舍此不肯住，无人堪与游。遣愁凭笔研，借梦宿渔舟。梦起各挥手，白云天际头。

送智峰禅者还丹霞

年来慧命似悬丝，鼠啮枯藤信可悲。老我无缘方退院，怜君有志乃工诗。相逢不枉

花前约，后会难寻石上期。想到丹霞冰欲泮，试看岩桂几生枝。

#### 通容

通容，字费隐，福清人，本姓何。杭州径山寺僧。

#### 游鼓山喝水岩

岩上草色肥，岩下水流急。策杖上岩颠，山空人独立。

#### 听月

听月，佚其名，海宁人，本姓{大且}，名继薇。杭州法相寺僧。

#### 登天目遇雨

荒山无道路，云气随我身。渐觉笠檐重，沾袂细如尘。幽花齐吐艳，仙鸟群相亲。泉石自太古，耳目愈清新。银河忽倒泻，云际垂天绅。可望不可即，对立峰嶙峋。阵云如滚马，归云如悬鹑。身立云气上，看云态弥真。下山脚下袜，细草藉如茵。尘世日方杳，阴晴气不均。试将山中景，说与山下人。

#### 函可

函可，字祖心，号剩人，博罗人，本姓韩，名宗騄。浑阳千山僧。有《千山诗集》。

#### 春雨

春日无不可，倏忽易晴阴。春晴送远目，春阴生静深。垂帘据半榻，群动不得侵。残卷落枕头，默默横素琴。檐雷发奇响，欲洗无尘襟。风铃湿不鸣，禽鸟息高林。耳目乃森肃，今古同幽寻。孤吟从中来，古木助清音。雨止籁俱寂，悠然获我心。我心岂由物，遇物屡悲欣。起觅已无端，微云散遥岑。

#### 夜坐

久病长宜静，山中静有馀。况当深夜后，积雪在庭除。风枝寂不鸣，四壁虫晏如。星斗宿檐际，微月淡空虚。其时心腑澄，泰然廓吾庐。云影暂舒卷，荡涤返太初。天地化为水，何处觅吾躯。

#### 山境

山境只如此，一一皆可悦。有石无不松，有松无不雪。日夕众烟空，微钟上初月。禽各静其枝，虎亦安其穴。千峰一皓然，竟与人寰绝。仁义属荣华，道法徒铺歎。我舌久已焦，我心久已决。安得一二人，把臂不须说。

### 连雨

顽云重雾裹城郭，旧民新民惨不乐。田中有黍谁能获，山中有木谁能斫。盘翻灶冷守空橐，檐溜虽多不堪嚼。老僧一钵久度阁，出门半步泥没脚。紫蛇有光蜗有角，抱书昼卧肠萧索。庭边杏树惊摇落，燕巢已破子漂泊。眼前大地何时廓，辽海浪高势磅礴。愿浮我尸填大壑，毋使蛟龙终日恶。

### 忆东南

江南高座寺，前对雨花台。台上春风拂面来，参差杨柳花竞开。黄莺百啭我心哀，忽忆故山村底梅。今年绝漠冰雪堆，发白面皱骨欲摧。村底无梅不归去，却忆高座听莺语。

### 初释别同难诸子

终岁愁连苦，生离且莫哀。问人颜尚在，见影意犹猜。佛道千秋重，汤仁一面开。明知予未死，好去勿徘徊。

### 初至渾阳

开眼见城郭，人言是旧都。牛车仍杂沓，人屋半荒芜。幸有千家在，何妨一钵孤。但令舒杖屨，到此亦良图。

### 寒宵

岂必缘乡国，啾啾闹肺肠。天当愁处窄，夜向醒边长。海水流何极，朋情散未忘。以兹难得晓，星月共苍茫。

只是不能寐，寻思总莫干。何人甘自溺，于我竟难宽。照雪一镫白，迎风双眼酸。强眠仍反侧，非是畏衾寒。

### 丙戌元旦顾家楼

多难还馀善病身，栖栖终不怨风尘。挈瓢戴雪逢遗老，著屐寻诗有故人。夜雨暂将山色改，年光又逐泪痕新。遥知乡国东风早，花信凭吹薄海春。

### 生日

当年坠地即严冬，怪得边城霜气浓。孺慕终身思墓草，君恩累代听山钟。褰鞋独羡陈尊宿，飞锡真惭邓隐峰。四十已过能几日，一生心事倚孤筇。

### 皇天

皇天何苦我犹存，碎却袈裟拭泪痕。白鹤归来还有观，梅花斫尽不成村。人间早识空中电，塞上难招岭外魂。孤雁乍鸣心欲绝，西堂钟鼓又黄昏。

李公贲陈氏为尼

学士行歌续妇吟，惊回春梦起乡情。解将腰带文犀重，添得空门水月清。云鬓已随秋雾散，舞衣应逐雨花轻。翻怜冢畔青青草，不及红莲磧上生。

闻钱君至尚阳堡死

相逢不禁泪淋浪，忽讶音来我自伤。一片心肝还日月，五更风雪裹文章。黄沙随梦归香阁，白水招魂入宝坊。莫为中原难侧足，故将残骨掷龙荒。

赠赤公

几年辽海自依依，华表惊添一鹤飞。瓶钵已非形更瘦，须眉犹在事多违。长边无地容行脚，尽日微天幸掩扉。韎韐未裁磨衲破，梦中还著老莱衣。

题铁岭燕巢

巷口荒芜旧路迷，移巢将馥傍山谿。未能仙峤同高翮，敢向穷檐恨落泥。似惜衣冠惊避远，难忘恩谊故飞低。门前便是鹰鹞集，纵有雕梁未可栖。

寄讯堡中吴子

莫为饥寒瘦不禁，三人惟尔绝来音。孤僧有梦还应入，辜负寒镫夜夜心。

重入千山

偶然飞去复飞还，几见云能离得山。旧路依稀犹可认，石桥流水第三湾。

万壑千峰是旧知，这回相见异前时。寒鸦亦似曾相识，两两飞来低树枝。

雨中听打铁子唱吴歌

孤寺沙四围，曲声从中起。初发雨霏微，须臾忽滂沛。飘风绕屋梁，遏云云欲坠。鸾吹与莺啼，化作清商意。神女朝暮愁，鲛人深下泪。半夜弹箜篌，河流终瀰瀰。此地多野干，镇日鸣不已。愿借清绝音，一为洗烦耳。乍听疑广陵，又疑秦淮汜。试问歌者谁，云是打铁子。少小学闾门，随飙度辽海。无食涩歌喉，挥锤涕如雨。再请歌一曲，未歌先掩袂。宛转更悲凉，增我流离思。

涌狂

涌狂，辽东人。千山僧。

寿北里先生

短发投荒又一年，每逢山寺便留连。远公自爱寻陶令，吏部曾无识大颠。一片钟声和骨冷，半边月色可人怜。文章节义浑閒事，何日还题到白莲。

寿盭■大师

土床閒坐啜黄齏，得句时翻经背题。义胆久拚沙暴骨，禅心不学絮黏泥。难期苏子看羝乳，长伴支公听马嘶。塞外无花拈雪示，何人微笑各凄凄。

大铃

大铃，浙江人。医巫闾僧。

寿盭■大师

终年长许傍孤筇，翘首云飞第一峰。瓶汲几乾湘水浪，鱼敲欲起鼎湖龙。既收残骨埋花雨，又召游魂听雪钟。五岭三山当此日，清泉共酌祝寒松。

正羞

正羞，辽东人。塔寺僧。

寿北里先生

竹杖方袍久不疑，萧然茗碗雪来时。枯桐未卖宁堪爨，古墨多残足疗饥。已过虎溪难强笑，欲投鱼腹亦成痴。但将泡影看身世，海角天涯月一池。

止崑

止崑，字豁堂，馀姚人。杭州净慈寺僧。有《同凡草》。

田家

田家无他望，所望在平畦。但恐终岁力，不得遂其私。何哉造物者，亦得厚我施。夜来微雨过，使我菜麦滋。登丘一凭眺，秀色远参差。此时桃与李，岂乏好容姿。愿予朴野性，独与此相宜。及时务耕作，那敢贪天时。

黄岩小橘甚佳喜题一绝

橘花如雪忆长洲，橘子黄时到古瓯。多谢吴天怜梦远，飞霜酿出洞庭秋。

济日

济日，字句元。西溪僧。有《逸庵诗稿》。

寄啸翁

毛子称方外，西溪两大家。尔诗应不忝，吾愧实无涯。踪迹溪山杳，音书岁月赊。相思一回首，寒月在梅花。

显鹏

显鹏，字彬远，一字秋蟾，号啸翁，永嘉人。杭州东郊栖禅院僧。有《村居诗》。

题曹将军水庙

断碣依江口，荒祠落照平。人烟双径出，古木一桥横。水国蛟龙气，灵台鸟雀声。千秋功业在，庙貌独峥嵘。

寄紫凝

参差亭榭岁华新，湖上幽居傍水滨。词赋终能为弃物，桑麻自可作閒人。林光不断飘残雪，草色无穷望好春。婚嫁少完儿女事，早来东郭结比邻。

序灯

序灯，字奕是，杭州人。有《啸隐偶吟录》。

九日吴山宴集值雨次韵

吟怀未许老重阳，霜雪无端入鬓长。几度白衣虚令节，致疑黄菊是孤芳。野心一片湖云外，灏气三秋海日傍。山阁若逢阎伯屿，方君诗思敌王郎。

海遐

海遐，字介旭，宜兴人。

送友之吴门

东风吹柳拭烟轻，折赠柔条空复情。一望吴山千万叠，知君只在此中行。

同揆

同揆，字轮庵，吴县人，本姓文，名果。大理文殊寺僧。有《寒溪诗》。

鼎湖篇赠尹紫芝内翰

鼎湖龙去秋溟溟，惊风吹雨秋山青。白头中翰泪凝霰，叫霜断雁栖寒汀。烈皇御宇

十七载，身在深宫心四海。一朝地老与天荒，城郭依稀人事改。当年删定《南薰曲》，内殿填词徵召促。琴张好学直乾清，先公屡赐金莲烛。雅乐推君独擅场，望春楼下拜君王。《高山》一奏天颜喜，奉敕新翻旧典章。昭仪传谕何谆切，予赍先颁女儿葛。上林避暑抚丝桐，温语贞娥遵秘诀。流泉石上坐相邀，薇省风清玉珮摇。神武门前轻执戟，永和宫里薄吹箫。如意初殇泪沾臆。那堪又报河南失。钿蝉零落葬田妃，池水苍茫尚凝碧。寒食花飞不见春，冬青冢树斫为薪。煤山一片凄凉月，犹照疆场血化磷。世閒万境须臾梦，老臣剩有西台恸。四十年来寄食艰，何人再听《高山弄》。鉴湖南去云门外，古寺松篁景掩霭。维舟无意忽相逢，恍惚梦魂同晤对。夕阳影里话前朝，天寿诸陵王气消。留得閒身师白足，满头白发影飘萧。

#### 大灯

大灯，字同岑，嘉兴人，本姓项。洞庭西山僧。有《洞庭诗稿》。

#### 秋夜宿八峰山房

黄花篱下乱蛩鸣，古寺秋高岭月明。夜半石床清睡去，不知枕上落泉声。

#### 荫在

荫在，字香谷，号桤庵，吴江人，本姓皇甫。诸生。妙华庵僧。有《香谷集》。

#### 渔村

枯藤络危石，略约不可渡。渔路淡如烟，烟中有人住。忽闻款乃声，长短自成句。棹入明月湾，幽村隔云树。芦花风萧萧，秋水飞白鹭。

#### 访隐

问尽采樵者，无人知隐君。万山最深处，相随惟孤云。

#### 本源

本源，字兀庵，湖州人。

#### 过王瞿庵旧居却寄郡城

菰城摩诘在，久不住岩阿。白日携筇到，青山送客多。林空一片月，涧落万重波。知我无如子，秋深几度过。

#### 大宁

大宁，字石潮，钱塘人。

寄胡柏菴

时有渡江梦，孤怀历岁深。澹云归鸟意，春树野人心。岸草青连屋，山花红满林。好知千古事，明日几回寻。

大成

大成，字笠庵，醴陵人。

山居

一株两株老松青，松下结个小茅亭。三日五日来一次，肩荷榔栗手持经。读经读到山月出，听松听罢天落星。適然抛卷松间卧，梦与松根乞茯苓。

雪峰

雪峰，青浦人，本姓沈，名浩然，字东生。诸生。

春日访超果青壁禅师赋赠

步■重来此，幽期隔岁年。梅香寒雨尽，竹密碧云连。窜迹沈痾里，开襟老宿前。春星今夜黑，不觉烛花偏。

元志

元志，字硕揆，号借巢，盐城人，本姓孙。历主禅智、宝、轮、三峰、径山、灵隐祖庭。

送钱圣楨赴佟方伯楚幕之招

江月照孤舟，有客鸣素琴。天风指端起，调高思何沈。借问所念谁，楚国有遗音。庾月南楼好，陶柳西门深。羊公岷山顶，今有谁登临。思欲一相访，芳踪何处寻。寻此亦云易，远行难为心。

玉

玉，字祖珍，号石堂，别号古翁，又号菊林。主白云、普照、资庆诸寺。有《石堂集》。

次官雪眉刺史韵

投老归丘壑，竹中门懒开。岚光扫不去，云影拂还来。花发蜂争蜜，斋馀鸟下台。层岩怀故旧，日上两三回。



### 游范靖赤南庄

曙色践云背，乘驴下岱岑。为寻南郭子，偶度北城阴。相见忘宾主，倾怀恣笑吟。素磁传棗竹，共慰出尘心。

### 天河

谁向青天建禹功，一河高凿势沈雄。两崖星似人竞渡，万里光如练扫空。静对霜庭思汗漫，偶逢月夜影朦胧。灵槎何日重相访，独指仙源一放篷。

### 偶成

住山不得意，多为山有名。安得无名山，寂寞终此生。

行到无人处，山深云更深。一泉藏众石，悠然见古心。

### 蜀乔

蜀乔，斗山僧。

### 咏史

花尽春阑闭草庐，从容论古寸阴馀。汉朝兴废凭三杰，楚国存亡出二胥。有客逃名身似叶，何人弹铗食无鱼。安贫老衲忘年月，一枕松风梦亦虚。

### 道贤

道贤，字放眉，号寄庵，徽州人，本姓苏。兴化黎庵僧。

### 访蒋虎臣居士

孤亭云外落，坐拥万山秋。海色连京口，江声过石头。何人成隐遁，与子独相求。古寺多红叶，谁能无事游。

### 性休

性休，字尺木。明宗室后人。

### 渔父图

东西南北任遨游，万里长江一叶舟。梦里不知身是客，醒来大地忽新秋。

## 【卷一百九十六】

元璟

元璟，字借山，号晚香老人。初名通圆，字以中，平湖人。化成庵僧。有《完玉堂集》。

武塘吴文昭为余写行脚图戏赠

人物名家旧姓吴，一枝神笔近来无。赵州故事谁相委，写我青山行脚图。眼看青白面无文，鹤骨何妨瘦几分。竹笠芒鞋多逸韵，超然一片入山云。霜华欲白月轮低，隔水思君玉观西。哦就小诗聊作答，争如孔雀换山鸡。

送顾云驭广文之太平

绛帐南行吾道东，钱塘江上鲤鱼风。百年儒雅推名世，三绝风流属老翁。天姥闲游听虎瑟，石华戏采蹑蛟宫。来春拟著谢公屐，华顶同看初日红。

黄鹂二首似杜湘草

新晴碧柳著烟轻，并坐交鸣最有情。记得酸风吹箬笠，段桥阴里两三声。桃花如雨草如烟，第六桥边剧可怜。分付江南飘荡客，不须更唱《鹧鸪天》。

西溪结茅奉酬蛰图翁先生

入山愧未入深山，黄茅一把丛翠间。扫花饲鹤起我早，了无别事分馀闲。西溪溪水白於絮，旧是先生垂钓处。茶烟竹粉满溪香，不碍轻鸥自来去。

惠山寺品第二泉

山水洵有缘，兹行爱风便。帆峭五两轻，百里如劈箭。爰访惠山泉，先游惠山院。惠山青崔嵬，泉声绕殿转。华楠吐云霞，朱甍映藻茜。古树发新绿，竟体里苍藓。径造泉上亭，鉴斯癯仙面。淳泓窈方满，小汲瘦瓢溅。碧乳花尚浮，寒玉香不卷。一酌已洒然，再漱冷然善。平生淡泊肠，尽化为冰霰。昨过扬子江，中泠浑莫辨。僧寮曾淪试，虚名怪独擅。鸿渐昏老子，舌本何其謏。错品落第二，千载徒扼腕。况我枯槁人，回首重眷恋。定携折脚铛，住老龙山堦。竹炉煮松风，雪瓯点秋片。月取三百斛，日与诗魔战。

西湖竹枝词

段桥一段可怜春，草似裙腰柳曲尘。明镜不流山色去，画船多载醉归人。

鄂王祠上夕阳西，于公墓下杜鹃啼。莫话南征与北守，云消雨歇两峰齐。

红桥曲曲放生池，春水初肥春日迟。何事系人情最好，金钱买饼饲鱼儿。

烟紫莎青风力微，红镫水面酒船归。阿谁好唱伊凉曲，惊起鸳鸯相背飞。

喜黄梨洲徵君过鹿峰

诸生方扫讲台花，更舁篮舆到若耶。正是可怜寒食后，乌巾白发倚风斜。

华亭杂感

木落霜清白苕城，暮砧才动旅魂惊。揽衣力尽秋星影，访旧听残邻笛声。画手有神同鹤瘞，诗坛无主散鸥盟。青溪一曲红桥路，今日何人肯好名。

不见风流柯九思，周郎词曲惯传奇。人情未必皆如此，吾道纷然孰可为。蹋月偶寻黄犬冢，临波难辨赤乌碑。菊花亦似多愁物，一夕催人上鬓丝。

莼丝菰米及时鲜，便拟吴淞买钓船。唳鹤滩声来枕畔，横云山翠落檐前。谈谐名理青松尘，钞借奇书白玉笺。閒到四贤祠下坐，竹风青冷月孤圆。

一片孤云何所依，梦魂只向越山归。千盘涧道雪浮屐，十里松门翠扑衣。霜栗遥知猿采熟，肉芝怕被鹿衔稀。自嗟踟躕风尘久，不耐登高送雁飞。

买山计左愧支郎，一笠重来二陆乡。秋后云林多瘦碧，愁边烟月易昏黄。催诗叶落梧桐井，搅梦虫依薜荔墙。圆渚沧波真浩荡，归心轻逐白鸥翔。

题画酬朱雪田

松云杳霭水潺湲，绝似云门深处山。从此把茅吾丧我，懒骑白额到人间。

得山同门五十

阿兄苦行如迦叶，重整青莲古道场。说法肘悬三要印，卷帘风散四花香。曾原好梦称鶖子，多分前身作雁主。夏腊数来刚半百，未妨小弟学韬光。

漂母祠

漂母祠堂古尚存，萋萋衰草带城根。汉家斗大黄金印，争及当时一饭恩。

邓尉探梅舟中同惠仲儒程筠轩作

婀娜轻帆日载阳，灵岩山翠接横塘。与君约束红藤杖，饱领梅花廿里香。

撰取良时作胜游，三人同载木兰舟。东君作意加装点，柳色鹅儿水鸭头。

横塘西接采香泾，三面都围苍玉屏。要与松枝了公案，先吟诗句报山灵。

夕阳明灭乱山椒，水畔寒香阵阵飘。何必更寻花处看，销魂只在虎山桥。

#### 登天封塔

雄镇东南一柱存，凌虚日月手堪扪。天开地扼山形壮，风吼潮来海气昏。寫下神龙无数绕，钟前怖鸽几双翻。蜺帆珠舶苍茫外，认取青尖入此门。

#### 磐陀石

击出波心手掌平，我来趺坐证三生。善财参后无人到，閒杀峰头雪浪声。

#### 南渚画扇三桥索题

病里心情尽自闲，碧云红树掩双关。瘦腰一把凭乌几，只写元人没骨山。

#### 寄松云菴主

无端鹤梦隔松风，黯黯孤镫缀玉虫。万种愁丝人在北，一腔情事水流东。花前顾曲何曾误，月底连吟每许同。安得碧天云卷尽，药船倒泻落霞红。

#### 英德道中

倚舟应接不能闲，变化新奇在两间。说与画家多不信，英州山胜米家山。

#### 晓青

晓青，字确庵。主苏州华山方丈。有《高云堂集》。

#### 宿东山

东山何幽深，草木抱奇秀。古柏动蛟螭，奔湍两崖吼。敛履入茅丛，石嶮步难骤。盘曲上青空，冷风满怀袖。柴门望中开，篱疏犬忽逗。斯须逢一僧，貌古鹤怜瘦。蓬檐就地形，剝竹通泉溜。落英走庭隅，池沫鱼吹绉。磁盂饮菰糜，齿向冰潭漱。客欢主益恭，无乃过予厚。主曰岂其然，予心如在疚。苟不恚粗疏，庶可寡其谬。玄言互酬咨，妙理绝肤受。中夜溪鸟飞，天空月当牖。

#### 拟寒山子一首寄姚芬若

别君未月馀，情思一何渺。两夕频梦君，宛在松门道。花雨昼濛濛，深绿莺啼小。於时见君来，坐石漫倾倒。赠我以加餐，劝我归必早。予即前致辞，为言山水好。感君促归期，常恐及秋老。有身难奋飞，却羡空中鸟。遗书慰高堂，镫前复草草。枕落忽惊翻，千峰月初晓。

### 拟孟东野

露寒月色苦，夜静秋声急。客子隐不眠，中心万端集。饥乌亦知啼，枯鱼亦知泣。今古无真情，黄金铸颜色。

### 山舫吟

狭路忽相逢，欲让如何得。彼此各争先，必至同倾侧。于中有一人，退步行几尺。不惟他跃然，己亦成让德。苟能持此心，远足行蛮貊。是以读书人，理胜则明白。愚贱好用专，悻悻不能释。格斗起微嫌，诤论级胶执。天下互纷纭，周道何曾直。翻思古之人，感慨今之日。

### 狼山观海

一片濛濛太古色，翠凤青鸾开羽翼。扪萝蹑屐步步奇，天地文章入胸臆。松桧森凉鸟道悬，凌空素手挥云烟。僧伽塔中悄无语，缥缈风铃时一喧。楼台炜煌逼天阙，近海犹疑蜃气结。洄混灏溃穷秘区，此中洲岛难分别。天水微茫古至今，飓风涛滚当昼阴。却瞻向望两失据，骇慄胆魄神駸駸。蓬莱仙山渺何许，我欲从之学轻举。长揖尘氛谢世人，眼前齷齪将辞汝。

### 雨后漫兴

云山一段画，秋雨来夺之。模糊米家村，墨汁方淋漓。老颠瞥然见，狂叫叹绝奇。使我有意为，必不得如斯。跃然攫之入怀袖，黄金白璧不肯售。造化小儿真幻师，换人双眼当晴昼。

### 古店晓发留赠主人

晓行残月在，杨柳数家村。远客怀乡邑，孤舟漾梦魂。曰归仍泛梗，所适定谁门。不厌频来过，知君雅道存。

### 山行即事

意欲穷幽趣，聊为野外行。远烟难辨树，斜日易催耕。倚杖观泉脉，穿林得鸟声。断隄回首处，一带暮山横。

### 过落木山人荒冢有感

芒鞋湿寒翠，拄杖下层巔。所至亦随意，相逢皆暮年。冢存三尺土，松作万家烟。道殣仍相望，踟蹰欲问天。

庚申元旦 又是从头起，无端笑一新。盛衰何预汝，冷暖亦随人。有面将迎壁，忘言莫问津。祇宜梅与石，同伴寂寥身。

○过尹山访王咸中

咫尺东皋在，怀人正夕阳。微茫山色远，咿哑橹声长。短鬓惭鸥白，圆沙聚鸭黄。年来漂泊惯，客路似家乡。

舟中晓起望洞庭山翠

月出五更初解缆，起看苍翠满船头。漫嗟白发随年长，更觉青山似客浮。橘柚有香清接路，烟霞无迹冷涵秋。近来我亦思归隐，欲访毛公结伴游。

南峰石门

寒翠撑空劈一门，细藤丛竹互生根。虚亭吐纳云霞气，古篆销磨风雨痕。照影野堂垂废井，无情芳草上孤坟。於今谁复怜神骏，惭愧支公迹尚存。

送陆企苏入都

雄谈满座尽倾听，独拔词锋近发硎。漫请丸泥实函谷，争看联璧重华亭。几丛烟树天边绿，一簇云山雨后青。此去层霄宜自奋，直教鹏翼化南溟。

舟泊汉阳凭栏眺望问鹦鹉洲所在乡人云久已不可问矣愁对烟波漫成近体

芳草仍留鹦鹉名，千秋遗恨实难平。江摇隔岸红镫影，舟集通宵白浪声。冷暖自知孤客意，阴晴叵测上天情。无聊咄咄书空坐，怪事浮云污太清。

过水绘园留赠冒辟疆

澹荡园林水绘成，天光溪影弄新晴。主人领得春风意，小牖沿花趁晓莺。

出水芙蓉映绿波，清凉台榭晚香多。胸中自信无烦热，门外何妨有雀罗。

平居至性爱孤寡，几拟为文吊屈原。欲采芙蓉秋水阔，褰裳仿佛到湘沅。

何须别置小山幽，身世俱成不系舟。花似美人怜月色，引人清梦到罗浮。

德元

德元，字讷园，长洲人。有《来鹤庵诗草》。

题沈别山园居

种树绕溪头，为园就山足。夜静月上扉，春深花履屋。幽情既满抱，采香自盈掬。主人乐偃眠，床头酒新漉。

月

月色浸虚窗，梧风乱湘帙。果落岭猿争，草深水萤入。爱此一轮好，相看如旧识。披衣下庭除，独傍松根立。顾影还自怜，人苦不努力。览此盈复亏，方之得与失。况我岩栖者，於中本无得。

送杰上人归四明

天台最奇峭，不与人閒通。崖断涧千尺，石梁架虚空。群峰发云表，如涌莲花丛。鹤巢古松顶，龙吟阴涧中。招提结微翠，钟梵随溪风。花木四时变，岩谷千秋同。君将归草庐，乃在赤城东。相送出林麓，晓日初瞳矇。矫首吴江头，越岭青无穷。傥或遇寒、拾，为余谢二公。

寓秦对岩先生园

江接伍胥水，山围泰伯城。芳园丛木暗，细路野花明。客到溪云合，吟成春水生。名泉携汲便，日日听茶声。

送王次令入都

青嶂一回别，黄河千里程。念君临远道，何日到神京。暮霭群鸦集，西风只雁鸣。天涯离索恨，吹入晚潮声。

送白上人还越

君将归旧隐，相送出东林。一锡几时到，千峰可处寻。云门溪路远，天竺冷泉深。若渡钱塘水，双鱼慰好音。

送介上人别

几人称避世，羡尔独弥天。漫拟青莲作，还参黄檗禅。鹤迎过岭锡，龙护渡江船。他日蜚声在，新诗次第传。

送孟德懋

四海无家者，惟吾与使君。已怜成浪迹，岂忍复离群。驿路兼秋雨，关河隔暮云。前途逢九日，最忆孟参军。

过旧游有感

奇石尽良友，好山皆故乡。见时应下拜，去后总难忘。残日染寒翠，秋风吹古香。昔游空剩迹，尘佛闭虚堂。

### 送朱有枚之金陵

玉勒萧萧践绿芜，王孙游骑出姑苏。黯然欲别看长剑，行矣当歌击唾壶。禅室自开欢喜地，画船争渡莫愁湖。江南处处花如绮，一路春风听鹧鸪。

### 胥江春暮

萧萧乡路往来频，一度看花一度新。病里无端过好景，客中又复送残春。苏台歌舞销魂梦，茂苑芳华付劫尘。只有隄边杨柳树，年年长拂渡江人。

### 元度

元度，歙县人，本姓王，名尊素。主江都福缘庵。

### 平山堂看荷

云水无消歇，平隄尚芰荷。棹歌随意住，鸟语不能多。山远迷秦望，天低近汨罗。老僧如旧燕，补屋又来过。

### 八岩关

天险因时设，居然百二同。六师才出牧，一旅漫言功。草木愁烟里，车徒楚雨中。茫茫孤戍意，不敢泣途穷。

### 髡残

髡残，字石溪，一字介丘，号电住，又号白秃，自称残道者，武陵人，本姓刘。住江宁牛首寺。

### 怨歌

春风吹绿草，草绿伤人心。残花落便落，琐碎霑衣襟。

寒食清明前，开门不敢觑。虽非桃李花，正是伤心处。

### 重寓松涛庵

荻花袅袅隔村烟，秋水柴门半暮天。何意我来重话旧，叶舟横渡雁声前。

### 古意

瘞琴峨眉巅，知音何寥寥。埋骨易水旁，侠士魂难招。物性不可违，岂必漆与胶。常恨士不遇，白首空萧骚。



## 道济

道济，字石涛，号清湘老人，又号大涤子，又号苦瓜和尚，又号瞎尊者，又号石公上人。靖江后人，明楚藩后。

舟至八闸为友人作画 舟行将八闸，湖水荡无涯。渔艇千家岸，芦花一色沙。

## ○临清过闸口号

地倾水泻须凭闸，千里雷车信怒嗥。卷浪抛开珠散彩，崩空舞碎雪分涛。七十二门向北牢，东归此去渐凭高。锦云旋绕织秋袍，仙障中分虎势绦。鸣锣击鼓壮滔滔，行人驻看跃渊舳。飞帆拥簇驾图旄，推窗卷幔得挥毫。

## 故城河口号

千回百折故城河，东倾西长分嵯峨。白杨灌木参天柯，处处成行古道磨。古冢荒碑庙逶迤，水流浪打雪狼窝。行路之人嗟叹多，峥嵘斧削飞岩坡。楼船画鼓快如梭，锦缆人来寸寸呵。归空粮艘争天摩，歌声歌彻青云和。

## 与友人夜饮

忆昔相逢在黄蘗，座中有尔谈天舌。即今头白两成翁，四顾无人冷似铁。携手大笑菊花丛，纵观书画江海空。镫光晃夜如白昼，酒气直透兜率宫。主人本是再来人，每於醉里见天真。客亦三千堂上客，英风竦飒多精神。拈秃笔，向君笑，忽起舞，发大叫。大叫一声天宇宽，团团明月空中小。

## 为友人写春江图

书画非小道，世人形似耳。出笔混沌开，入拙聪明死。理尽法无尽，法尽理生矣。理法本无传，古人不得已。吾写此纸时，心入春江水。江花随我开，江月随我起。把卷坐江楼，高呼曰子美。一啸水云低，图开幻神髓。

## 宗渭

宗渭，字筠士，又字绀池，号芥山，东南华亭人。有《绀池小草》。

## 横塘夜泊

偶为看山出，孤舟向晚停。野梅含水白，渔火逗烟青。寒屿融残雪，春潭浴乱星。何人吹铁笛，清响破空冥。

## 次韵酬九来

风急树萧萧，思君梦易销。鸟啼黄叶时，僧语夕阳桥。得句霜钟度，安禅佛火烧。

十年诗律苦，珍重贮山瓢。

#### 重过海印庵

三年重向虎谿游，石路依然碧水流。鸟背斜阳微带雨，寺门衰柳渐迎秋。弟兄谊重难为别，师友情深竟莫酬。叹息此身閒未得，天涯明日又孤舟。

#### 宗元

宗元，字扫叶，江都人。清凉山僧。

#### 束魏惟度

小雨山楼不断飞，问君何事掩双扉。少焉雨歇钟初起，送得书声过翠微。

#### 然修

然修，字桐皋，长洲人。

#### 金山

苍茫落日下藤萝，身在荆关画里过。飞去断云双白鸟，浴残寒浪一青螺。蕲王有庙疏烟冷，郭璞无坟乱石多。千古寂寥俱莫问，且听江月送渔歌。

#### 大悲庵僧

#### 绝笔诗

道我狂时不是狂，今朝收拾臭皮囊。雪中明月团团冷，火里莲花瓣瓣香。好向棒头寻出路，即从业海驾归航。满炉榾柮都煨烬，十字街头作道场。

#### 超际

超际，字衍鐙，通州人。西陀岭僧。有《烟波阁江梅诗》。

#### 马鞍山过寒岩大师

携筇独入翠微閒。老树青山愧此颜。倚槛静看花落去，听泉常趁月明还。鹤归峰顶松涛寂，磬出孤云石洞閒。欲访远公成夜宿，寂寥清梦绕禅关。

#### 超群

超群，字紫仙，号雪堂，徽州人，本姓程。天宁寺僧。

### 扫先慈墓

慈母多笑容，至今不敢忘。岂意拜墓时，松柏参差长。遥忆儿嬉日，瞪目徒心伤。一思分我食，载思缝我裳。昊天宜罔极，延伫何徬徨。挂纸聊复去，落日沈高冈。

### 九日

佳节偏多雨，翻增旅客愁。高堂虚白日，空谷自清秋。世上无相识，天涯亦浪游。故园今日菊，谁插老亲头。

### 际智予

际智予，字愚庵，江西人。祇山宝林寺僧。有《茎草堂集》。

### 咏新竹

此君志欲擎天碧，耸出云头高百尺。只恐年深化作龙，一朝飞去不留迹。

### 重游回澜寺

百里支筇再到游，诗人元自爱探幽。不须买得村头酒，醉杀满庭黄叶秋。

名山自古号回澜，信是铃阳第一观。上下蒲帆轻若叶，游人好作画图看。

### 游朱陵观

洞天三十六，於此最称奇。高阁飞云入，断桥流水澌。鸟鸣谈道处，花落炼丹池。仙去多遗迹，低徊动感思。

### 庭芳同学受法诗以寄之

自从合派泉边别，地北天南各一方。仍向龙须同法乳，新诗特寄两三行。

### 明愚

明愚，字憨初，一名栗隐，别号放憨，嘉兴人，本姓陈。天台山僧。有《结茅集》。

### 山居

参到真空妄始删，此心犹未尽缘攀。潺湲涧底仍知水，层叠云中尚见山。世有万般趋热恼，我惟一味向清閒。两头坐断中何立，方契宗乘最上关。

### 到天居偶作

卷上疏帘便见天，用心多错悔从前。是山是水原如此，非我非渠总湛然。宿业销除尘不染，新机显露理俱全。光阴真叹如驹驶，一瞬忽忽六十年。

寂鐙

寂鐙，字天放，凤阳人。明楚藩后裔，住仪徵东园十笏庵。

葛洪洞

山色摇光入袖凉，松根风细茯苓香。局残柯烂人何在，深洞寒云锁夕阳。

上睿

上睿，字浚潏，号目存，又号蒲室子，吴县人。少脱白瑞光寺，后居东禅寺。

题簪花图

莫摘浓香压鬓鸦，懒将时势斗铅华。他年得入维摩室，不许簪花许散花。

生庵

生庵，字合虚，丹阳人。

出家时答伯兄见虚

辽东白鹤归来日，不记人间几岁华。庭内已分连理树，堂前须种解忧花。相思频寄云中雁，得句空镂江上沙。欲觅当前乾淨土，可知安养是吾家。

慈际

慈际，字阿际，号笠居，一号不庵，又号井人，福建人。住江宁碧峰寺。

忆洞庭吴不官

贫贱亦行役，风尘了不关。心如太湖水，家在洞庭山。作客有时倦，吟诗无日闲。泉台遇同调，曾否忆人间。

通琇

通琇，字玉林，江阴人，本姓杨。

江行

天地本无碍，乘风且浪游。岸疑随舫动，星故逆云流。小憩闲临水，高吟晚上楼。

宁知人代里，不复有丹邱。

通际

通际，字山茨，号钝叟，通州人，本姓李。

除夕

半生理涧壑，幽事逐清真。煮雪消残夜，推窗见早春。得教双眼阔，不厌一身贫。坐拨炉中烬，红轮特地新。

通问

通问，字箬庵，吴江人，本姓俞。主金山龙游寺。

周逸休鸿胪见过

庞眉不减鹿门风，杖履欣从世外通。共对落霞追野鹭，正宜秋色醉冥鸿。一泓未发机方息，万梦俱醒劫始空。把臂莫辞烟路远，好山青送夕阳中。

通忍

通忍，字朝宗，常州人，本姓陈。主西江宝华寺。有《自白》、《指迷》、《迅论》诸集。

赠倪端甫

处士高风山并高，浩歌多半是牢骚。可怜冠盖今何在，剩得南村一布袍。

通门

通门，字牧云，号樗叟，常熟人。住秀水古南院。有《懒斋集》。

怀州隐

落花寂寂鸟双双，新竹成阴绿满窗。梦听潮声来枕上，几年不得到娄江。

悟持

悟持，字允修，吴江人。住持无碍寺。有《竹窗诗钞》。

遣意

小幄灯翻夜影寒，年来已泯旧悲欢。事无过望心常稳，世可相忘梦亦安。插架任教

千卷破，囊空何用一钱看。衡茅拟筑枫江上，吟尽西风万木丹。

大健

大健，字蒲庵，江宁人。有《花笑轩集》。

见远山残雪

已觉寒威去，犹瞻雪在山。清深通竹路，虚白映松关。片石能相偶，孤云无此閒。  
好将寥落意，指点到人间。

杜茶村见过

芦荻晚苍苍，烟岚在下方。兰舟维此际，萍迹任他乡。风浪矶前大，僧衣世外长。  
艰辛今夕会，江海意难忘。

显谟

显谟，字言成，吴县人。

山房同端日迟兰公不至

林下掩荆扉，白日忽已暝。松风阴壑生，淅沥寒秋听。相对澹忘言，诗成禅侣定。  
期子不我来，寂寂孤云径。

柬陆长卿

为别亦何易，山山尽是秋。曾期过一夜，不见到孤舟。风劲叶离树，月寒人在楼。  
所思湖水阔，清梦得同游。

超源

超源，字莲峰，自号紫衣道人，钱塘人。主长洲怡贤寺。

梦故友程风衣

春雨何淅淅，春云更沈沈。程君已隔世，宵梦来相寻。自言身朽心不朽，象外风月  
皆吾友。从前胶扰海天空，祇是泉台无美酒。斜阳烟柳门前溪，欲别不别重牵衣。寄语淮阴  
小儿女，我今野鹤同翻飞。

友人枉过开化寺

青眼多情客，携朋问暮秋。人同山共瘦，时与水俱流。黄叶迷村路，清风满寺楼。  
荒凉郊外景，肯向锦囊收。

### 题画

春浦风生柳岸斜，好山何处著人家。白云遮断桥西路，不许渔郎问落花。

### 登昭阳拱极台

寂寞昭阳客，时登拱极台。故山何处是，孤雁带霜来。羨彼收纶者，悠然鼓棹回。城头秋草路，蛩语为谁哀。

### 宿长安乾明寺

湖村开晚霁，绀殿露秋林。鼓棹沧波远，到门黄叶深。茶烟禅榻静，松月客堂阴。一宿乾明寺，空诸万劫心。

### 超净

超净，字晓堂，无锡人。住持古洞庵。

### 洞庵杂咏

枝柯挺秀势参天，耐雪经霜不记年。试部当初谁种得，翛然一鹤古巢边。

### 超拳

超拳，字艸山，无锡人，本姓周。有《梧影山房诗》。

### 山居杂兴

鸟宿依窗树，云生对户山。机忘心自远，境寂意俱閒。花落门常掩，苔深径不删。松风连暮雨，双涧瀑潺潺。

### 香岳庵落成

万山深处卧烟霞，收拾閒身老岁华。晴日晓开云岭树，清泉夜走月滩沙。工诗愧我非齐己，学道何人是永嘉。从此罕闻尘世事，编篱绕屋种梅花。

### 明中

明中，原名演中，字大恒，又字■虚，号啸岩，桐乡人，本姓施。尝侍世宗讲禅学，雍正乙卯放还。晚年住持杭州净慈寺。乾隆乙酉南巡，赐紫。有《■虚大师遗集》。

### 宿万峰精舍

我身如孤云，去住在空谷，偶来万峰头，意倦便一宿。水凉山影沈，树暝人烟簇。夜静冷吟虫，秋声散丛竹。爱此风味清，得句一烧烛。

#### 题画

黛色连修林，春晓破烟霭。时从湖上看，偶与幽意会。白云何娟娟，奇姿不可绘。遐思辋川人，展卷坐相对。观妙各有得，喧寂两无碍。聊以物外心，参之画三昧。

#### 篆玉

篆玉，字让山，号岭云，仁和人。西湖南屏万峰房僧。有《话堕集》。

#### 自西泠至东湖夜集张徵士艺舫

吾杭饶野趣，平远逊东湖。海控天为岸，星繁水弄珠。昏黄城不禁，酣畅话多殊。明日迟归棹，留诗待补图。

#### 祖琴

祖琴，字古音，安东人。

#### 过披云室赠李公

半亩松筠半亩溪，茅庵背结板桥西。听钟夜坐山前月，汲水晓浇屋后畦。野客不来云转静，秋花况发路还迷。石屏一曲和烟绿，还拨苍云觅旧题。

#### 雨后待汪扶苍啜茗不至有怀

草色青青门未关，茶铛閒煞曲廊閒。应知不下松边阁，坐看江南雨后山。

#### 兴机

兴机，字震岩，太原人。住江宁天界寺。

#### 辞云门梵林禅师徵诗入选和元韵

孤踪只合孤峰老，纵遇花时不去探。狐首死惟甘向北，雁声悲是悔来南。已将名共颠毛削，肯把诗同里巷谈。多感殷勤诗入选，宁知遯义少人耽。

#### 德晖

德晖，字潜谷，吴县人。

#### 探梅



老恋绳床懒出村，偶携筇杖破苔痕。到来晴雪迷岩谷，卧入寒云冷梦魂。目既成馀惟有笑，心当醉处欲忘言。一瓢此际真堪挂，拟翦茅茨覆华门。

德新

德新，字懒牧，无锡人，本姓朱。

乃奇禅师约同臞庵先过楚禅即事

几竿修竹一泓池，陇畔柴扉片石支。有客未来茶已熟，閒将蕉叶写新诗。

然明

然明，字昭雯，无锡人。有《丛桂斋集》。

答宝臣冬日见怀韵

太息才华合最难，予归林下汝江干。绿萝院里看花落，红豆村前听鵙残。摇笔题诗过雪夜，拥貂暖酒入春寒。何时再画炉灰坐，话尽生平瞰芋团。

广济

广济，字白拈，海门人，本姓崔。如皋僧。

过访生庵访古愚上人

古公栖隐处，极目似天涯。出郭不多路，沿村无几家。因君留午饭，啜茗看秋花。不觉忘归去，溪西日已斜。

赠张瑶星先生

山上孤峰山下溪，北窗高枕白云西。南溪处士多瓢笠，东郭先生只杖藜。避世拟凭僧出没，逃禅不仗佛提携。灌园种竹疏篱下，独酌深林听鸟啼。

海岳

海岳，字菌人，号中州，凡徒人。

访友不值

寻君复不见，寂寞出林閒。落叶溪边路，浮云海外山。午烟桑柘隐，秋色户庭閒。爱尔幽栖好，归来亦闭关。

德溥

德溥，字百泉，通州人。有《腰雪堂集》。

望庐山

楚山秋霁后，突兀望匡庐。瀑布云开处，香炉雨过初。双溪才咫尺，五老在空虚。欲问远公迹，苍茫指点馀。

送汪卜三归淮南

喜色眉端见，知君赋曰归。几回萦别绪，无计挽征衣。楚雨片帆下，淮烟一雁飞。何时重舫艇，还款老僧扉。

别孙雪棹

忽忽判袂各天涯，君返龙城我骥沙。料得湖园春尚在，小红开到米囊花。

黄山慈光寺

群峰围拱妙莲台，鸟道云梯十里来。山径曲随云脚转，寺门高压树头开。游人蜡屐攀初倦，佛子蒲团定已回。一笑相逢同领会，三生石上不须猜。

行宏

行宏，字四不，号介山，四川人，本姓李。住瓜洲总持庵。

春日送希公上人

浮玉同分榻，临风思不群。我怀无可赠。只有半山云。寒雁横春雾，江梅老夕曛。杖藜回首处，何日更论文。

行湊

行湊，字法音，号远峰，兴化人，本姓彭。

琼花观

曾是随炀驻蹕来，琼花何处观犹开。昔年古径生芳草，此日残碑长绿苔。寂寞笙歌游客少，凄凉风月为谁哀。蕃釐一去无消息，惟有閒禽噪石台。

同臞庵居士过董公祠访邓孝威

一杖出萧寺，荒祠比邓林。楼高云影近，井久石痕深。掩卷生禅悦，焚香静客心。

我来同孝穆，户外听微吟。

### 三师石塔

潭北湘南六百年，只图无缝塔中圆。祖翁血脉今何在，老树乌啼月满天。

### 枯榦开梅

谁种窗前腊月梅，霜姿铁榦一枝开。百花与我无交涉，独许寒香到枕来。

### 行悦

行悦，字梅谷，太仓人。住理安寺。

### 村院秋居

鸡犬不时闻，村深俗亦淳。道情亲易久，乡语译方真。田坂斜阳淡，枫林秋色贫。因恩在庐岳，冰雪早侵人。

### 行定

行定，字巢庵，兴化人，本姓陈。

### 喜仙裳先生过访

柴门常自掩，有客叩方开。因得支公语，遥知叔度来。风高披竟日，情洽竟忘杯。独愧东林远，相携去复回。

### 行演

行演，字隐峰，宝应人。主罗汉寺。

### 夜泊话旧

曳衲西风古渡寒，一帆落日问惊湍。不愁暝色横天外，为有钟声出树端。相得自忘村野僻，频来转觉道情宽。当年禅学同烟水，更向镫前叙夙欢。

### 行荃

行荃，字竺兰，吴江人。

### 偕指月云岸一晓访顾茂伦

云水才栖息，南林复送行。只因尔我意，互作主宾情。远树迎风冷，虚舟载月明。

已知寻梦趣，渡口暮烟横。

行泰

行泰，字云雅，丹徒人。有《二居集》。

宿焦山绿雪庵

朝朝江北望江南，欲解愁怀复一探。夜静钟声沈竹榻，月明禅语出萝龛。

行遍

行遍，字云父，湖广人，本姓姜。主淮安东山寺。

挽元植居士

知己非难遇，钟期后有谁。至人元不死，大造总无私。秋雨竹痕重，凉颼月魄移。诃词空自发，三哭欲何为。

行照

行照，字破有，号惟安，密云人，本姓司马。

平山堂

广陵山阁好跻攀，放眼乾坤夕照閒。十里松涛传石磬，万重云树接江关。雷塘尚积千秋恨，法海旋偷半日閒。幸得有人同此意，五泉亭上竟忘还。

梵阁

凭虚梵阁倚晴空，无限伤心一望中。六代繁华浑已尽，塞鸿犹叫五更风。

行鉴

行鉴，溧阳人。

过优昙禅院

为访优昙遗迹来，碑残零落杂莓苔。三春腊月犹多积，二月梅花尚未开。紺殿虽经新匠斧，老松还是昔人栽。祖师面目依然在，了了分明不用猜。

超慧

超慧，字霞隐，吴江人。

题芦墟泗州寺

泽国芦花满野霜，寺桥寒月照苍苍。不堪夜泊钟残后，落尽秋声雁几行。

名一

名一，字淳牧，号田衣，海盐人，本姓印。嘉兴珠明寺僧。有《田衣诗钞》。

秋晚登弄珠楼寄怀舒云亭明府

轻桡棹出郭门东，绕郭平畴粳稻风。孤塔倒撑深水碧，小楼斜倚短墙红。潮生向夜渔初动，珠弄乘秋月未空。枫叶芦花烘落照，旧情无限画亭中。

【卷一百九十七】

实乘

实乘，字诵茗，无锡人。主惠照寺。有《蔗查集》。

阳山结茅杂咏

群峰炫苍翠，变化非一颜。我屋苍翠中，真可忘其年。但观心似云，岂知身在山。清机发深省，谷响为吾宣。

微云度秋河，细雨不成阴。幽人望明月，一叶下空林。抚景生太息，凉飙动商音。因观岩上松，证我岁寒心。

初夏山中即景

芳春景已移，且试山中乐。孤筇步幽厓，新林荡寂寞。清和景物佳，掩映朝岚薄。岩栖已岁馀，相对俨如昨。何从寄雅怀，於此契酬酢。鸟逐岚光散，花随磬声落。为言素心人，遐赏愿有作。

忆旧隐

孤馆静无人，飞花竞狼藉。阳春忽已徂，愁思起日夕。念彼远峰青，面此浮云白。苍苍屋后松，巢鹤待归客。

陈遇

陈遇，字感通，号碎琴，番禺人。恭尹孙。江宁僧。

### 岁暮感事

打头矮屋自欹斜，容膝真堪处士家。藓径人稀来往屐，纸窗梅放两三花。稻粱谋比  
衔芦雁，岁月忙如赴壑蛇。好听瓶笙啸清昼，炉烧柏子自煎茶。

### 超普

超普，字融峰，号萍寄，兴化人，本姓李。主栖贤庵。有《禅馀集》。

### 秋杪归瓢建隆本师晤臞庵先生

山空本落雁横天，渡水穿林到法筵。废寺清钟风外杳，疏篱丛菊雨中鲜。漫将意气  
夸元度，自有才华并皎然。安得寿宁秋色永，时来酬倡月明前。

### 超睿

超睿，字壁观，一字韶山，徐州人，本姓杜。主慧济庵。

### 山居

五十年来出此山，那知又逐从风还。雷轰电转浑如梦，销尽尘缘顷刻閒。

### 超凡

超凡，字雪堂，号铎夫，金华人。江都僧。

### 迷楼怀古

君王台榭结层阴，竹树迷离伤客心。只有寒鸦啼废冢，绝无萤火照空林。二分明月  
留天地，一派烟波自古今。六代繁华空极目，杖藜从此罢登临。

### 广彻

广彻，字豁庵，彭泽人，本姓叶。主江都天宁寺。

### 宿山寺步壁间韵

独宿云堂一磬深，空山莲漏滴沈沈。月临绀殿浮松气，风动金铃落梵音。永夜禅镫  
悬客梦，高秋旅雁动乡心。虚窗渐觉晨光满，惆怅行歌别旧林。

### 宗智

宗智，字圆明，号竹溪，江都人，本姓蔡。住瓜洲闻思庵。有《坐花轩集》。

对月怀陶景成茂才

夜月澄寒辉，居然入深院。修竹相参差，浮云忽隐见。十里澹秋烟，匝地开匹练。独坐谢纠纷，灵禽下荒甸。渺然等予怀，孤飞无眷恋。西邻有老人，隐居足欢宴。况兼南窗南，明月照渠面。放却掌中杯，焚却案头砚。安得乘仙槎，共造清虚殿。玄关君独窥，词源谁敢擅。予性懒是真，行吟颇忘倦。

偕夏靖九过夏元长炼室同次殷雨苍韵

秋爽借虚度，寻君聊遣閒。舌端穷易理，身外得玄关。众木脱霜叶，高窗见远山。宁随天地老，莫漫说人间。

除夕同盛子嘉限除字

风雨催残腊，高眠任岁除。寻梅双屐静，留客一樽虚。检篋焚诗草，挑镫阅道书。飘蓬同十载，赢得鬓毛疏。

问水庵次锡山华凝修韵

帆樯指故里，信宿藕花村。境静秋先冷，情空花欲言。裁诗消野兴，问水得真源。明月知人懒，依然下竹轩。

严勉斯徐楚涛殷雨苍夏靖九周天池见过共用闻字

嘉客偶相集，秋山满白云。弹棋松有韵，论道佛无文。机息同鸥侣，身閒与鹿群。无端促归棹，疏雨隔溪闻。

怀郑蕃修

云流三更月，天馀几夕秋。呼童煎石髓，放眼上蓬楼。况有黄花对，安知白发羞。所嗟人异水，不向故园流。

显应

显应，字密慈，号玉垒，武昌人，本姓纪。天宁寺僧。

过建隆寺访友

鹿苑凋残久，登临法界宽。孤云穿竹细，宿鸟出林寒。井废泉何在，花深露未乾。断碑横蔓草，剥落有谁看。

秉正

秉正，字止一，号止庵，丹徒人，本姓杨。住瓜洲青莲庵。

和惠山华凝修先生宿问水庵韵

扣舷歌复罢，散步入效原。树暝林疑雨，山空鸟不言。几人探竹屋，一水隔桃源。归路饶清兴，新蝉在北轩。

隔水寻开士，还应鼓枻来。那知秋未到，已觉暑全回。花竹有馀色，山林良可哀。四方兵甲后，吟眺一徘徊。

九日过慧照庵

精蓝在城市，幽趣入林泉。草白知秋晚，苔青是雨前。云生窗外树，霞污水中天。纵目有如此，还应放钓船。

性本

性本，字野夫，丹徒人。

看瀑

山桥独立竟忘归，贪看悬崖瀑布飞。苍翠重重得刹隐，轻风送出磬声微。

圆显

圆显，字一性，号樗巢，无锡人，本姓陆。忍草庵僧。有《樗巢吟稿》、《忍草庵剩略》。

赠别客愚兄

已驻湖干棹，知君未可留。乡心明月夜，归梦白云秋。挈钵投江郭，携筇向石头。半生行脚惯，不解说离愁。

上思

上思，字雨山，号雪悟，泰州人。

登圖山绝顶

极目微茫接远天，山光水色两悠然。风尘不到烟萝里，云月时来梵座前。僧影独依幽涧树，钟声疑上夕阳船。相看举世同蕉鹿，三叹孤峰仰昔贤。

上慧



上慧，字天觉，号觉庵，南城人，本姓吴。主松江蒲溪七宝寺。

次牧园潘先生晤阆堂和尚韵

柴门寥寂甚，徙倚望遥天。却喜香山老，论诗妙入禅。席移花外月，帘动柳梢烟。幸有牛头月，光华得洞然。

上映

上映，字临陶，宜兴人。

野望

垂脚岭边震泽西，暮烟销尽风凄凄。孤村隔水苇花冷，群雁横天落月低。客子棹舟黄叶岸，渔师夜宿白蘋溪。生涯似我幽居志，瓢笠轻装任所栖。

上崇

上崇，字石灵，泰州人，本姓宗。

读黄仙裳秋槎唱和诗

建功何似建言奇，老将殊勋有了期。不及先生拈好韵，乱离直到太平时。

本照

本照，字彻也，号天谷，兴化人。

震居山访姚氏隐居喜晤苍碧陈山人

商阁层轩尽日开，秋风秋雨入帘来。仙家自有胡麻饭，公子何须竹叶杯。对局无心闻鼓吹，看花随意破莓苔。共知良会诚难得，更上吴山第几回。

天定

天定，字双溪，武昌人。

涵师峨嵋游归因赠

峨嵋西去似登天，见说亲行到顶边。古木千年都化石，衲衣六月总装绵。阴风昼洒岩端雪，急雨宵闻洞口泉。袖得图归夸示我，芒鞋踏破意忻然。

超远

超远，字心壁，云南人。

铁锁桥

万山谁划断，一水界东西。地旷风逾急，天低云易迷。半空横铁索，千尺跨虹霓。  
我欲桥边宿，江猿休夜啼。

古奘

古奘，字愿来，广东人。

山行

山门无定所，一路乔松阴。流水道人意，青山太古心。偶然乘兴往，不觉入云深。  
独立发长啸，萧萧风满林。

寂琇

寂琇，字乃奇，汉川人。主无锡一梅亭。

山居秋夕

不学骚人意思深，閒情祇许寄知音。枕边忽得新奇句，又被秋虫夺去吟。

处洪

处洪，字迂公，太仓人，本姓江。开法保安寺，主席灵岩，退居宝华庵。有《山居杂咏》。

春日过一梅亭访乃奇师

道人庐舍白云封，日日携琴过听松。香雪一窝明月夜，吟声遥度九龙峰。

悟开

悟开，字豁然，吴县人。荆溪显亲寺僧。

蜀山花神庙

小小园林倚碧山，万花攒簇翠微间。世人只解求神祐，也要花枝耐驻颜。

元奭

元奭，字百恬，兴化人。

### 九月八日送友之越

江边杨柳正萧条，游子秋深放小舠。故国明晨空对菊，他乡何处独题糕。寒潮带雨催兰桨，霜叶随风恋布袍。此去不须寻往迹，越王宫殿总蓬蒿。

### 溥畹

溥畹，字兰谷，如皋人，本姓顾。居昆明法界寺。

### 剑阁

险绝惟双剑，迢遥一线通。水分巴之峡，山接汉王宫。梯石来天上，穿云入地中。无知怜李特，漫欲寄蚕丛。

### 元龙

元龙，字牧堂，江南华亭人，本姓李。

### 秋胡行

养蚕胜养儿，养蚕犹吐丝。养儿防亲老，而乃离亲闱。君怜采桑妇，不念桑榆人。桑榆景苦短，桑妇时悲辛。还君相赠金，请君断诸妄。君意在桑间，妾情非濮上。攀条谢郎君，倚门人久望。

### 乞食

林间才定起，洗钵出门行。童子亦知善，设斋非爱名。说经酬饭价，回施合凡情。果腹便归去，寒山万木平。

### 大宁

大宁，字石湖，桐城人。

### 杂韵

峰顶屋三间，松边石一片。早晚云飞来，只有樵夫见。

### 岑霁

岑霁，字樾亭，长洲人。有《柏堂集》。

### 柏堂对月和周昇逸

柏堂今夜月，云物不能侵。对此碧空净，闻君白雪吟。入帘明鹤发，绕树见禽心。坐觉清言久，疏钟报隔林。

#### 自龙泉关过岭宿白云寺

万丈雄关到始谙，空中斗插五浮岚。白云僧下山头寺，黑雨龙飞石上潭。冰雪百层寒代北，波光一线认江南。閒身随处堪投宿，直上诸天是蔚蓝。

#### 露筋祠

沙草凄迷烟树昏，荒祠寂寞托贞魂。灵旗高卷秋风晚，惟有清淮照墓门。

#### 蘋花

翠叶金花杂杜衡，湘湖千里最知名。秋风飒飒过南浦，乡思无端一夕生。

#### 德亮

德亮，字雪床，长洲人，本姓陈。

#### 孤花

一点出尘绿，春情仍自深。香微怜土薄，开晚少人寻。雨渍犹堪赏，风吹略不禁。翛然苔石畔，谁为表孤心。

#### 智豁

智豁，字宏鉴，句容人。有《旅山集》。

#### 题方坦庵太史白宛山语石

撑云吸露貌奇峰，声借流泉色借松。昔日点头今日语，生公应让海门龙。

#### 智潮

智潮，字香水，号北麻，吴江人。永乐寺僧。有《归来堂稿》。

#### 归后

拂袖青山后，锄茅绿水前。草深三月雨，柳暗一溪烟。形迹从今世，情怀只昔年。故人心不负，期泛五湖船。

#### 一斑

一斑，字定宣，吴江人。主席古南、石佛等刹，退居一螺山房。有《耕烟室诗草》。

#### 闻思庵纪事呈莲社诸君

雨港烟村容散人，菱池蔬圃少风尘。过桥一径见城郭，沿水数家成比邻。性懒便教  
栖易稳，慎真反讶句难新。破除陈迹君知否，影动碧潭杨柳春。

#### 昭吉

昭吉，字圣宣，无锡人，本姓赵。崇安寺僧。

#### 名山纪游

杖锡清凉道，五峰净如沐。飞翠入青宵，云霞起平陆。地菜产灵岩，天花满空谷。  
伊彼长松子，纷纷落山曲。

#### 野楫

野楫，字梅岑，江宁人。

#### 江上送客

隐隐孤城暮，茫茫寒角闻。异乡重见面，落日又离群。是我还家路，如何复送君。  
斯须帆影没，祇见隔江云。

#### 佛旻

佛旻，字旭昙，江都人。

#### 建隆寺题壁

建隆何代寺，彰武旧招提。一径秦松里，孤云蜀岭西。台荒花落去，客至鸟空啼。  
落日江峰远，微吟过小溪。

#### 宿陈氏庄园

去郭息尘事，支筇原上村。言寻太丘长，得过辟疆园。竹影半塘水，秋声午夜猿。  
凌朝登小阁，山色在前轩。

#### 月夜过雪塘道中

谁唱吴歌古渡头，一声清怨过迷楼。凄凉满地芦花月，撩乱连天鸿雁秋。寒树著霜  
犹是绮，废塘埋玉问名钩。道人不为繁华感，午夜行吟别有愁。

妙复

妙复，字天钧，无锡人。有《石林吟稿》。

两鹤

昔年两白鹤，巢我青松林。夜寒时警露，众壑流清音。一鹤恋故栖，孑焉守云岑，一鹤忽遐举，天路探幽深。神山境恍惚，浩浩谁能寻。惊飙吹未息，素羽愁难任。故林遥待汝，贞此岩阿心。

律然

律然，字素风，常熟人。有《息影斋诗》。

落梅

和风和雨点苔纹，漠漠残香静里闻。林下积来全似雪，岭头飞去半为云。不须横管吹江郭，最惜空枝冷夕曛。回首孤山山下路，霜禽粉蝶任纷纷。

悼鹤次蒋迪甫太史韵

病久胎禽剩瘦形，朝来羽化竟冥冥。孤情望断林间影，秃笔书残石上铭。苔径忽空新印迹，松巢忍见旧遗翎。高人从此添离索，哀怨还如失一丁。

口占与西涧金宪

汀南庵北往来频，臭味何如支许亲。相对莫教分主客，何人不是客中身。

炳宗

炳宗，字慧谦，泰兴人。有《竹院集》、《树下稿》。

春日游邓尉山

万峰深处有流泉，松径藤萝杖策穿。十里梅开香到寺，洞庭犹隔太湖烟。

梵音

梵音，江苏通州人。古音静室僧。

留别

一一横担任所之，秋风秋雨是行期。去时莫定来时约，山水留人未可知。

戒显

戒显，字愿云，号晦山，太仓人，本姓王。诸生。有《匡庐集》。

五老峰坐夏

五峰绝顶缚枯禅，静夏何人叩榻前。忽地雾来山尽缟，半空泉落屋如船。朱曦气散松杉国，白日寒生洞壑天。缥缈万层尘望断，那知僧定万松颠。

金陵怀古

石头城下水淙淙，西望江关合抱龙。六代萧条黄叶寺，五更风雨白云钟。凤凰已去台边树，燕子仍飞矶上峰。抔土当年谁敢盗，一朝伐尽孝陵松。

印耀

印耀，字伟灵，上元人。

登清凉台

不尽登临兴，登临欲二更。塔镫红到寺，江月白连城。我独邀幽赏，人多限俗情。迟迟未忍下，数遍夜钟声。

妙信

妙信，字山愚，号诗禅。瓜州僧。

九日酬诸子

不负东篱约，携尊过草堂。远天连树杪，高月薄衣裳。握手经年别，惊心九日霜。诸君才绝世，独步许谁强。

雨窗

云暝虚窗静，新篁别有情。烟云清古壁，风雨壮江声。有癖酬山水，偷闲断送迎。萧疏且高卧，无意问阴晴。

广閒

广閒，字竹忘，吴江人。长寿寺僧。

寒食雨窗偶书

去冬犹作省亲诗，诂料今朝只有儿。记得桑条如此绿，年年阿母浴蚕时。

方璿

方璿，字睿石，太仓人。

登穿山

颓然石磴草萋萋，客里重登旧迹迷。海气暗吞山顶寺，钟声高落洞门溪。秋来有月台堪倚，春到无花鸟自啼。欲谒桑公不可见，苍苔断碣暮云低。

明际

明际，字沧洲，无锡人。住吉云庵。有《吉云诗稿》。

清明后一日诸友社集

一径寒烟锁，幽人曳杖寻。临流开白社，听雨坐香林。共惜残花落，独怜芳草深。故山归未得，虚负白云心。

元祚

元祚，字木文，云梦人。西洞庭山寺住持。有《鹤舟诗草》。

寄高澹游

卖尽青山说买山，高年正好学偷閒。洞庭尽有梅花屋，何不携家住此间。

达瑛

达瑛，字慧超，号练塘，丹阳人。主席栖霞。有《旃檀阁诗钞》。

喜看云见访

渺渺秋江阔，劳君破浪寻。双峰今夜月，一片故人心。云淡天河迥，窗虚海气深。只缘明欲别，翦烛动长吟。

同王梦楼太守高旻寺看菊

何必东篱采，山房菊已开。无端诗思发，有约故人来。冷艳依黄叶，幽香上绿苔。白头怜晚节，勤护晓霜催。

次安心见寄韵

托足双峰猿鹤亲，水晶宫殿净无尘。日将好景归诗卷，天许名山作散人。岩草碧销



三径雪，寺梅香破半江春。西风记得莼湾别，夜夜相思入梦频。

#### 登海云楼怀莼湾清凉主人

退院僧同岭上云，凌江小阁一炉薰。窥人鸥鹭当窗立，出寺钟鱼隔水闻。仍有青山常我伴，纵无明月也思君。临风欲跨扬州鹤，海气微茫望不分。

#### 次古岩见过河亭韵并寄借庵

小院临池无路通，道心常与竹心空。幽扉半掩林间雨，清磬遥传渡口风。折苇客来青嶂外，隔江人卧白云中。莫言世外甘岑寂，杀贼论兵烛影红。

#### 同洪稚存太史王柳村秀才暨令嗣小村借庵主人登月波台看潮同赋

为逐丹崖客，层台试一登。山随诗思转，风挟海潮腾。树抱花閒路，门开竹里镫。笑余多懒散，米熟愧南能。

#### 新柳

东风青旆亭中酒，小雨红阑桥外人。无限销魂看不得，鹅儿黄样可怜春。

#### 与宏

与宏，号■香，浙江山阴人。小云楼僧。有《懒云楼诗钞》。

#### 梅山

汉吏逃名姓，而今地尚传。泉疑流夜雨，山欲锁春烟。脱屣离尘网，裁云补水田。老僧消受得，梅子熟多年。

#### 次洪稚存太史见赠韵

八千里外归来客，不为探奇也打门。愿见已经过半世，相逢何幸在荒村。只身湖海飘零久，百卷文章慷慨存。煨芋分尝坚后约，更须米汁沃灵根。

#### 天台万年藤杖歌

昔年曾作天台游，一瓢一笠挂杖头。玉霄峰耸万螺髻，石梁瀑卷双龙湫。翠微几折入古寺，禅堂钟磬清且幽。苍藤夭矫挂石壁，疏花红缀空岩秋。老僧知我惯行脚，呼童截取千岁虬。携归早夜每拂拭，肌理细腻骨节遒。瘦圆瘤古色苍润，桃枝筇竹非其俦。平生梦寐在丘壑，要蹶五岳凌九州。随身自有瓶钵在，住山任尔猿鹤愁。杖兮杖兮肯相助，出门从此吾无忧。

#### 书怀

皎皎月正白，悠悠云自行。以彼一点滓，掩此千里明。人心如镜台，洁比秋水清。一念不肯息，万虑遂交萦。老以静而治，庄因达乃成。非儒亦非释，无为了平生。

#### 登焦山绝顶和借庵韵

扪葛攀萝上碧霄，百盘千级路迢迢。披襟我又登蓬岛，放眼人多看海潮。东汉此山才有姓，西江无水不来朝。褰衣直扣双峰阁，认得华阳旧鹤巢。

#### 清恒

清恒，字巨超，号借庵，桐乡人，本姓陆。主焦山定慧寺。有《借庵诗钞》。

#### 同程荫堂登海云楼分韵即送之邗上

日落小楼红，高吟雅兴同。凉生潮影外，秋在叶声中。箔卷双峰雨，窗开四面风。明朝分手去，惆怅海门东。

#### 过宝莲庵

小阿兰若瓮城边，门径依稀似辋川。书画一房云外室，江山半壁水中天。生来竹叶皆成字，修到梅花即是仙。曾与维摩谈不二，夜深明月挂松巅。

#### 和赵瓯北观察见赠

树里禅关昼不扃，隔江无数晚烟青。西风有意留仙侣，著屐同寻《瘞鹤铭》。

楼台无地接江涛，客喜诗锋疾孟劳。吟到夜深秋月冷，一天星斗雁行高。

诗名海内达遵三，拟筑莲花聚一龛。若肯停车容问字，那能不借与茅庵。

#### 访宋虞允文三宿处

天下势若常山蛇，赵家已失中原脊。北人大举向南侵，一旦雄兵临采石。岂知江上有儒生，提师一战功便成。南人已胜北人北，三军只听波涛声。西风猎猎吹玄纛，归傍卢龙山下宿。至今石上见题名，雨洗莓苔痕自绿。

#### 妙詮将南归即寄海昌诸旧好

沈沈起视夜何其，风动琅玕月乍移。兜率有天应待我，庐陵无米更思谁。从来衲子轻漂泊，自古诗人重别离。汝到故乡凭致语，诸公且莫问归期。

#### 瓜洲遇洪稚存即次见赠韵

东风吹我过茆湾，邂逅先生水石间。不系身同江上艇，无家梦绕越中山。经翻贝叶人将去，衣拂梅花客乍还。准拟故乡栅筍后，归来共逐野鸥閒。

#### 朱研庵司马过访山中

十里松阴径转微，探奇客至款荆扉。泉声入户晴犹急，峦翠如烟湿不飞。妙语欲争山影秀，钝根恐落箭锋机。相期再过披云室，宝镜光寒薜荔衣。

#### 送月堂之云门扫古岩塔

风斜雨细一帆轻，又向山阴道上行。若到香炉峰背后，伤心莫听杜鹃声。群山秀簇古云门，佛阁镫微影渐昏。知否故人头尽白，不谈往事已销魂。玉笥山空宝镜寒，无人击竹笥栏干。惟遗挂锡松千尺，化作蛟龙月上蟠。

#### 过丁若亭可以栖书斋兼赠卯君秀才

簪水可栖迟，秋高月满帷。谈经服子慎，好客郑当时。我亦曾相过，心常系所思。若论羲与献，那得外人知。

#### 题丁仑峰洗鹤图

一双皎皎瑶台鹤，欲飞不飞如有约。老去长存万里心，碧天冲破秋寥廓。每一招之鹤自来，鹤虽不语容颜开。呼儿洗之复更洗，本来洁白无纤埃。一鹤先飞松顶立，若与主人高下揖。世上纷纷那得知，主人亦是瑶台客。还留一鹤临清泉，若有所思衣飘然。记向瑶台曾洗过，已经一别三千年。

#### 重登摄山寻练塘墓

江左诗僧有墓田，最高峰后许庄前。名称歿世知何用，祭到无入亦可怜。六代云山遗旧迹，一生风月付寒泉。多情还是南徐客，岁岁春风泣杜鹃。

#### 重过茆湾即用刘松岚观察吊练塘韵

茆茆湾锁薜萝烟，渡口无人晚泊船。风撼塔铃空自语，门开江月为谁圆。经翻贝叶窗恒闭，诗刻旗檀阁已传。我比孝威情更重，几回来觅旧花砖。

#### 答韬庵击竹山房见怀

雨洗花阶露洗苔，正当新月照经台。山高岂定留三宿，地好何妨住百回。胜友世间非苟得，奇峰天际忽飞来。知君竹里门常闭，不是寻诗总不开。

#### 清江晓发

古井烟飞玉带环，西风送我过淮关。江南此去无他事，先看青青万垒山。

### 次韬庵见赠韵

年来事总学模糊，却喜登临兴未孤。脚底但愁千嶂少，胸中翻怪一尘无。难消结习冰藏壑，顿扫疑团雪见炉。心迹惟君知我久，三年前写《退居图》。

### 湛汎

湛汎，字药根，丹徒人，本姓徐。有《双树堂诗钞》。

### 明妃冢

空恃朱颜惜饼金，独留遗恨到於今。琵琶一曲和番泪，芳草千年望汉心。自是美人多命薄，非关天子不恩深。孤坟三尺丰碑在，环珮春风未易寻。

### 菊花

萧疏几本是天留，洁白纯黄讵地幽。种者自知甘苦味，赏心不作绮罗秋。一枝敢在霜前折，九日应从篱下收。我有孀慈今鹤发，年年益寿向伊谋。

### 题方可村先生梦游出塞图

短榻蕉窗绿影肥，凉云一枕梦依稀。班生未老庄生老，匹马沙场胡蝶飞。

### 舟中同秦西岩

千里荆湘共此行，布帆风饱向南征。怜君亦是初为客，未惯江湖一片情。

### 际醒

际醒，字彻悟，一字讷堂，又号梦东，丰润人，本姓马。历主京师广通、觉生寺、红螺山资福寺。有《梦东禅师遗集》。

### 山居

为爱林泉趣颇饶，市廛隔绝路迢遥。千重竹树居幽僻，一个蒲团坐寂寥。昼静窗中山色澹，日高帘外鸟声娇。定回满目皆生意，乘兴扶筇过小桥。疏拙难堪应世情，馀生赢得寄柴荆。且无活计卷唇饔，尽有家私折脚铛。亭畔开池宜浣月，篱边种菊喜餐英。敢云野况齐安养，差胜人间閒利名。

### 明印

明印，字九方，一字雪瞳，晚号紫藤主人，常熟人。吴中怡贤寺住持。

秋日过王冈龄山斋次韵赋答

良辰赴幽期，名园散清步。黄菊未辞秋，霞鸿正横曙。逍遥玩泉石，参差数药树。主人出卷轴，精力所凝注。六法韵俱流，五字神或助。把玩愧不如，爱极翻成妒。

陟级已梯空，登兹江畔楼。取适那在高，聊足恣冥搜。虚檐仰晴穹，疏槛临平畴。西山送遥青，风前上帘钩。趣以淡为赏，情以忘转投。寒城送暝钟，一笑还淹留。

登香岩一览楼

底处堪舒野士眸，松陵南寺倚层楼。檐虚遥挹金庭翠，树老平分笠泽秋。千里烟瓢从踯躅，十年萍迹漫淹留。若无友道谈空语，顽石何能更点头。

慈海

慈海，京师拈花寺僧。有《随缘集》。

夏日山居

淡泊何干世，无求孰侮予。窗明蜂作鼓，花静蝶成间。地僻能逃客，天长好读书。性灵随处养，绝妙是山居。

张毅夫弟西川硕学近闻落发五台口占以坚其志

业火心薪昼夜煎，无常自古不知怜。汉家得鹿今安在，陆氏如龙亦枉然。碧眼胡僧九载坐，白衣大士一经传。洛阳春满花成锦，终对斜晖泣杜鹃。

韵珂大弟近不言诗

曾从禅内悟清吟，此道难言古至今。季札已悬枯树剑，昭文不蓄有弦琴。皎然未必非前习，白也原来证后心。极地弥天方寸里，云何门外觅知音。

邹颖峰先生秋夜过谈

萧瑟秋声不耐闻，故人望外喜同群。明星落地一湾水，怪石投天几块云。拊掌新诗工笑客，填杯凉月可邀君。相期更刮来朝目，应有清奇欣赏文。

翠微山龙王堂

小亭池畔碧琅玕，坐纳春阴昼不寒。得失风闻皆入幻，是非云卷怎相干。波平浅水鱼游乐，声静高枝鸟梦安。领受个中真快活，进山容易出山难。

世惺

世惺，字愁幢，芜湖人。主慈济寺。

游龙门寺同友人作

迢递龙门寺，萦回路几盘。虬松夹幽径，修竹隐飞湍。偈与閒官说，诗呈古佛看。  
地炉煨芋火，虚室不知寒。

本白

本白，字楚衡，号漱冰，嘉善人。有《二竹轩集》。

春寒

病里年华草木知，孤云来去更无期。等閒清兴难消却，忍冻开窗看竹枝。

悟成

悟成，字方聚，号石谷，寿州人。主高明寺。

春日怀岷山

柴扉终日掩，高卧翠微閒。春树雨中寺，夕阳江上山。身閒肩早息，吟苦鬓全斑。  
欲买扁舟去，携筇一叩关。

定志

定志，字鹰巢。主讲江宁承恩寺。有《竹香楼集》。

石城望雪

回看处处白云生，下有孤篷打桨行。前路何人长啸去，鸭头江水冻无声。

默可

默可，字杲堂，号芋香，又号牧石，吴县人。住海会庵。有《牧石居集》。

怀罗浮山人

我昔五岭南，曾见岩居客。松风四壁寒，萝烟满衣碧。厨中所有者，清泉与白石。  
白云四十年，山外无履迹。

与明

与明，字月参，宜黄人。石义泉寺僧。

游如意古寺

曾访眉公室，春云满故山。野田千百顷，流水两三湾。坐爱潜鱼戏，行看独鹤还。祇今戒坛树，高出翠微间。

清月

清月，又名律月，字品莲，号耦船，江都人。杭州云林寺僧。有《品莲吟草》。

钵池庵留赠玉公

支公习静处，幽寂绝尘氛。野鸟啼深树，山花澹白云。相违将半月，重见便论文。好待秋生竹，携琴再访君。

晚步

晚步入空翠，微茫望不分。水声流合涧，山色断归云。尘外昏钟彻，林间清籁闻。移时星月上，万木荫纷纷。

达航

达航，字雪帆，号云樵，泾县人。绵远渡茅庵僧。

送赵南英

大蓝山上雪初晴，小幕溪头月正明。恰是溪山两佳处，梅花一路送君行。

性恬

性恬，字悟开，一字碧溪，江都人。有《倚桐阁集》。

喜汤秀谷自鄱阳归

知交共喜故人回，都为寒暄慰问来。小阁梧桐依旧绿，野塘菡萏未全开。平章花鸟增诗稿，消受云山费酒杯。明月悄然生树杪，一天风露净无埃。

啸颠

啸颠，盐城人，本姓秦。居庐州冶父山中。有《古树轩集》。

秋杪怀郭明经子涵

怀人望谿云，云飞渡谿去。云去无还期，之子渺何处。寒花谢遥汀，暝烟敛高树。

念往悲时序，感物伤情素。岂无新交者，新交不逮故。

宏度

宏度，字渊如。住淮安篆香楼。有《昙香精舍集》。

怀夏补山琴师徐州

风急雁声遥，怀君酒一瓢。吟情临皓月，离思压秋潮。大泽书来远，丹台叶乱飘。云帆三百里，夜夜梦难消。

逸云

逸云，一名正感，字念亭，长洲人。住支硎中峰寺。有《啸云山房集》。

省斋上人雨阻中峰

锡驻近云霄，中峰一径遥。林花经雨润，岩雪到春消。风竹频萧瑟，烟峦自暮朝。不知溪畔路，新涨夜平桥。

悟帚

悟帚，字扫叶，宜兴人。住龙池，有《还云集》。

不得公执稚威信

计竭惟行耳，艰难我早忧。百金支万里，尽室在孤舟。老幼应无恙，风波亦可愁。荆蛮炎瘴地，相忆数回头。

昌立

昌立，字小支，江苏甘泉人。主建隆寺。

焦公祠题壁

人间原有少微星，高卧蜗庐户不扃。清梦觉来江月白，红尘隔断海天青。鼎留鹤院山尤重，碑夺龙宫字亦腥。试问烧丹井何处，春深我欲鬪松苓。

相润

相润，字琇琳，一字竹菴，广东海幢阿字和尚七世孙。

渡白鹅潭步黄蓉石韵



牂牁一万里，海国势偏长。日落天无色，晚来山更苍。百蛮馀壮气，九月下严霜。击楫乘风去，长歌自笑狂。

实雄

实雄，字独峰，吴县人。主资福寺。有《典云集》。

送张蕉衫返鸠江

破寺君归更寂寥，新诗记取雪中蕉。但将肝胆酬孤鹤，不惮风霜敝一貂。帆影逼天横落日，钟声催日下寒潮。独留泪洒梅花句，传遍扬州廿四桥。

行吉

行吉，字远村，江都人，本姓曹。主平山堂。

送王贺堂之海州

别离时候熟黄梅，岑寂山楼永昼开。莫谓海滨孤讲席，须知草莽有奇才。春残风雨田横岛，日落波涛韩信台。想见悲歌兼吊古，扁舟维处独徘徊。

行葺

行葺，字伟然，号介庵，全椒人。主承恩寺。

过海粟庵访学文和尚

扁舟乍过小桥东，得得精庐问远公。春院鹤归松桧老，晓堂龙出水云空。霏衣细湿花朝雨，渡海虚传飓母风。准拟狂澜深处去，行装检点日初红。

登金山作

海门曙色射东溟，晴日和烟染翠屏。山势平分双练白，天光倒浴一螺青。塔含舍利云俱活，窟近蛟龙水亦腥。笑指老僧乘舸惯，怒涛深处汲中泠。

禅一

禅一，初名法喜，字心丹，号小颠，桐乡人。杭州净慈寺僧。有《唾馀集》、《随便集》。

中丞阮公书七代诗僧额为赠拈此奉谢

七代传衣翰墨缘，新标斋榜有高贤。文如北斗珍韩子，集少红楼愧广宣。新涨拍隄初过雨，妙香浮槛乍开莲。万峰深处光华甚，不让题梁玉局仙。

### 筑墙围雷峰塔诗以纪之

五季纷纷首朱梁，乘时割据钱镠王。此塔肇建自忠懿，依稀记得妃子黄。去今八百有馀载，中遭劫火烧積唐。剧中靓妆妖蛇出，众目争看窈窕娘。法胜有如鬼子母，战退揭谛走金刚。金山高擎一盞罩，不能跋扈恣飞扬。此妖亦是有情种，轻身失志为高阳。黄乃对白是寄托，以伪作真骇众盲。乡愚不喻窃砖去，将去磨刀切柔桑。妄言此砖镇妖孽，蛇蝎永不来蚕房。从此剔出有万万，古塔势欲倒高冈。十景之中少一景，於是山僧为主张。若云鼎新工浩大，且围八尺黄泥墙。斯举傍人皆赞叹，保护塔身计最良。我闻兴修也生喜，作诗记美助宣扬。

### 夜雨不寐

秋晚空山冷闭门，湿云时复起岩根。大都诗思因禅悟，一半钟声带雨昏。短榻横眠聊自适，孤灯枯坐向谁论。毕生消受清閒福，惭愧难酬出世恩。

### 秋雨写怀

云山望里半模糊，夜气迷濛尚有湖。事去徒劳千日忆，老来为惜一身孤。竟无旧雨能分供，剩有荒田畏索租。看取淡妆浓抹态，米家难自泼成图。

### 啸溪

啸溪，杭州南屏僧。有《口头吟》。

### 芳草词

漠漠平芜一望齐，画楼东去粉墙西。落红三月飞如雨，软衬香尘送马蹄。

### 秋草

王孙归后客心惊，牧马长嘶望去程。丘陇泪枯朋友恨，池塘梦老弟兄情。荒烟冷露痕犹在，野店斜阳路已平。剩有隄边衰柳在，暮蝉相对乱蛩鸣。

### 际祥

际祥，字主云，仁和人。住净慈寺。

### 题画

路绕西湖西复西，夕阳红树板桥低。秋风记得春归日，花落柴门雨满溪。

### 达澄

达澄，字如鉴，号古光，上元人。住高旻寺。

#### 夏日放生河亭与王太守梦楼纳凉

竹密烟深一径虚，桐阴如幄复阶除。庭前时有窥帘鸟，池内应无避钓鱼。南浦潮随明月上，西林钟带夕阳疏。人閒莫漫愁烦热，好共临流此卜居。

#### 悟霈

悟霈，字古岩，丹徒人，本姓黎。主云门寺。有《击竹山房集》。

#### 翠屏洲为王柳村先生作

汀洲一带横沧江，势如翡翠屏开张。三山怀抱涵青苍，吞吐岷流万丈长。海潮呼吸通扶桑，百川争汇河汪洋。谁能障此波澜狂，天教镇锁江中央。白沙晦靄青笈笏，烟雨晦暝疑潇湘。江南佳丽多水乡，此中直疑辋川庄。风光宛转蘅杜香，篱门水次深夕阳。此中有客咏沧浪，何必当年华子冈。右丞才思超三唐，褰裳千古相颉颃。苏公米公灵皇皇，好与揖让凌茫苍。手持玉笛骖鸾凰，我来钓月歌鸣榔，蒹葭露白秋风凉。

#### 新雁

征鸿天外到，云路独悠悠。露白江南夜，霜清蓟北秋。平沙琴弄月，古塞笛横楼。谋食何须切，菰蒲正满洲。

#### 书感

巢枝不过一枝安，何事尘劳放下难。饱露自应蝉有腹，摩云肯信鹤无翰。本来莲子心中苦，到底梅花骨里寒。负我住山真面目，许多感慨岁华残。

#### 补陀山

东南地陷海天深，突起芙蓉万仞青。寺辟烟霞通鸟道，风回岛屿带龙腥。大红毛国瞻金界，小白华山译《贝经》。水激三千堪一笑，鹏飞今已到南溟。

#### 和枕石邗上看花韵

一帆烟雨出蛟门，肯信浮萍有定根。今日花前重把臂，拂衣请看海涛痕。

#### 竹楼同王柳村作

搀云万竹锁山楼，浓绿阴阴夏更幽。海气逼人凉似水，不关风雨亦成秋。

#### 书感

折脚铛犹馀活计，无弦琴岂觅知音。若教一苇江湖去，恐负春晖寸草心。

赠顾子馀

山楼帘卷黄鹂雨，江店樽开白雁天。不向春风佳日醉，直教孤负此华年。

柳枝词

频年游子唱《骊歌》，杨柳其如送别何。毕竟不知攀折苦，长条更比去年多。

馀姚山中

小艇轻於叶，春流任溯洄。云横孤岭断，水划两峰开。鸣橹惊猿啸，游人被鸟猜。  
转疑仙路近，溪面落花来。

达真

达真，字雪斋，号竹屿，泰州人。

闻雁

山暝夕阳尽，寻幽倚石楼。忽闻新雁至，又报故园秋。积雨催黄叶，怀人欲白头。  
多情江上月，偏照望乡愁。

自如

自如，字月潭，号剑堂，六合人。

听琴

何人坐危石，为奏七弦琴。碧水落空谷，清风生远林。由来上古调，能静世间心。  
曲罢更回首，梅花香满岑。

明修

明修，字可尚，号东悟，常熟人，本姓高。维摩寺僧。有《鉴云留迹》。

泊舟

渔火村镫两黯然，暮云空隙见长天。波平江面光微动，瑞靄轻摇不是烟。

张济

张济，字浮海，仪徵人。

江村

放下蒲团心自安，木樨影里月生寒。金风一夜芦花白，秋在渔翁棹外看。

閒潭

閒潭，字南枝，上元人。

将近重阳不闻雁至

侧耳几回听，哀音尚渺茫。已经虚八月，莫更负重阳。碧落寒无影，秋江夜有霜。  
稻粱连岁苦，恐不度南方。

贤岩

贤岩，字天成，昆山人。主甫里海藏寺。有《续莲集》。

送孙山人之古瀛

吴淞江口放扁舟，江水随君入海流。一望烟波千万里，孤帆不见使人愁。

端文

端文，字道揆，海宁人。建隆寺僧。

凌江阁

夜枕时有声，乘月披衣起。江空寂不闻，芙蓉滴秋水。

宏范

宏范，字禹畴，号药山，六合人。

宁波道中

放怀不管古今愁，暂向天涯作浪游。吟到夜阑惊短烛，海风吹月入孤舟。

济乘

济乘，字绎章，号栗庵，吴江人，本姓章。主海云庵。

赠沈振伯

篱门小筑绝追攀，慷慨悲歌《行路难》。玉洞寻仙终是幻，且来萧寺一盘桓。

显朗

显朗，字秉先，号晦堂，高淳人，本姓徐。有《古柏堂集》。

中秋坐月

月月有明月，中秋分外奇。人閒金气满。天上玉轮移。寒色迟歌笑，清光恼别离。望中丹桂影，隐见尔谁欺。

本齋

本齋，字大渊，晚号钓雪翁，茶陵人，本姓陈。主松江普照塔院。有《邻虚阁集》。

山行

春风记得过西泠，涧草溪花列翠屏。路曲不知归去晚，夕阳影里乱峰青。

天重山中夜坐次韵 民更阑不禁冷烟浮，竹磴松亭倩客游。最爱碧池明月下，霜鸿写出一天秋。

☆普震

普震，字智周，别号南耕，江宁人，本姓赵。

赠人

白屋深居兴自豪，竟无书札致山涛。花边丝竹留词伯，天下文章重布袍。南国才名应不愧，东吴门第向来高。幽怀已是凌秋月，况有馀光上彩毫。

达宣

达宣，字青雨，海宁人。杭州净慈寺僧。有《茶梦山房吟草》。

王竹屿太守招同人集饮南屏听松楼即席口占

曲径通幽草不删，风枝替客叩柴关。诗非本色难成佛，客有閒情总爱山。小醉未嫌村酒浊，朗吟聊趁瓦铎閒。伊蒲馔且加餐饭，听遍残钟莫便还。

癸卯冬日蒋生沐招同沈烛门潘葦卿两广文费晓楼赵次闲两处士雅集湖舫次元韵

西泠西畔足勾留，岚影波光霭暮秋。霜叶黄飞临水榭，夕阳红衬远山楼。座逢知己

皆名士，酒御轻寒裘敝裘。所惜汪伦迟未至，清樽不共画船游。

达受

达受，字六舟，又字秋楫，海宁人，本姓姚。白马寺僧。

海昌学庙古井歌

我州金石多未彰，补志窃愿搜罗详。遍寻城阙兼桥梁，觐辄手拓声琅琅。揭来论古广业堂，好古人遇甘泉乡。导余周视循宫墙，门内有井六角方。石围覆如摧倒缸，质虽粗顽形异常。制度仿佛侔李唐，石颈有穿力可扛。其上字迹留八行，倩亟拓之墨汁香。义泉大字书端庄，如蔡君谟笔老苍。馀惜残损惟偏旁，年代莫辨空思量。题名仅识为高阳，当时凿此因荐亡。报妻胡氏七二娘，此意无愧良人良。历今不知凡几霜，食者甘之犹琼浆。吴中古井石放光，载顾氏志流芬芳。老夫之称识不忘，是井功德堪颀颀。姓氏未泐待表扬，幸逢椽笔志海昌。与钟并拓璧合双，一金一石真相当。鸿词况诵长短章，塔铭显不殊药王。续貂我亦搜枯肠，寒泉酌胜亭沧浪。

题查叔羽罗浮梦梅图为周梅坪作

江店酒初熟，亭皋鹤未还。谁家一声笛，吹梦落空山。梨云澹若烟，雪月寒于水。中有看花人，几生修到此。

余藏丁龙泓诗谢南屏五世法祖■老人送檀香米之作即次原韵题其上

无边世界此中藏，日月还应赋就将。短札有人曾乞米，旃林何处尚留香。佛从舍卫城中过，我向沿门钵里尝。记得青精容一饱，当年笔墨喜逢场。

法乘

法乘，字洞闻，号雪柏，吴江人，本姓李。

乙卯移锡破山步常少府韵

寻幽迷远道，入寺喜高林。古木虫文遍，荒苔鹿迹深。寒云斜岭脚，白日冷潭心。终岁人稀到，同谁赏梵音。

清镜

清镜，字担云，海宁人。主焦山。

晚步山麓

幽径行来密，重重覆绿阴。岭云閒鸟性，江月浸人心。得句烟光净，含虚妙悟深。豁然忘往事，天地入虚襟。

复显

复显，字梦因，号雪庐，海宁人，本姓张。主扬州建隆寺。有《雪庐诗草》。

登金山

一叶乘风破浪开，登山更上妙高台。乱云时复生虚壁，疑有苍龙听法来。

秋夜闻雨

暗虫绕壁怨残更，镫影幢幢半不明。秋雨自凉人自卧，萧萧一夜打窗声。

夜宿朴树湾

夜阑天水共澄清，月落参横正五更。愁到枕边眠未得，晓鸡声里听潮生。

性仁

性仁，字慈桓，海宁人，本姓陈。主扬州建隆寺。

松亭药根两上人集桐柏轩用襄阳游景空寺韵

犬吠秋阴夕，细听人扣关。雨驱残暑去，秋放小庭闲。诗思碧梧外，客怀红蓼閒。  
荒厨有烟火，煮茗话空山。

慧琳

慧琳，字寰宗，泾县人。平山堂僧。

过出海庵访元济上人不值

地僻径纡回，深林有禅室。乘兴独来兹，云与僧俱出。炉冷篆烟消，庭空落叶集。  
坐久默无言，空山下斜日。

望海

澎湃汇群川，苍茫一片烟。浮槎怀此日，鞭石自何年。有岛多藏国，无涯恐堕天。  
曾经三浅后，待尔作桑田。

可庵

可庵，字懒云，丹徒人，本姓谢。



雨中过王柳村宅

不为泥泞苦，时来一避喧。清风生讲席，积雨暗郊原。花院棋声静，苔阶屐齿繁。主人情未已，相对坐晨昏。

祖道

祖道，号竹溪，如皋人，本姓范。江都秋雨庵僧。

秋日过宝轮寺沛霖

契阔高禅久，今朝诣竹林。门回秋水远，径折白云深。自得定中趣，因成物外吟。夕阳发归兴，何日再相寻。

喜晤须爱楼即送之淮阴

一别三年久，邗江得暂留。艰难才握手，风雨又离愁。梦逐长淮水，烟昏古渡舟。高楼送君处，终日此凝眸。

春日谢泽和见过

门掩东风雪满枝，幽人来访夕阳时。空亭相对清吟久，只有花前一鹤知。

送吴楚江之吴江

片帆已买自难留，楚水吴山两地愁。莫为梅花留邓尉，故人多半在扬州。

如震

如震，字慧安，号禹门，高邮人。有《桐花馆集》。

赠郭来澄

仙翁高卧乐清虚，百二春秋尚有馀。曾共白猿论剑术，还从黄石授丹书。谿边药采云深处，洞口琴张月上初。我亦乘闲时过访，碧沙瑶草到山居。

【卷一百九十八】

野蚕

野蚕，字梦绿，合肥人，本姓宋，名启祥。开封相国寺僧。有《梦绿诗钞》。

### 晚坐

地荒增寂静，人老减聪明。酒断江湖兴，诗牵畎亩情。山泉清似野，乡月大於城。晚会幽篁里，茶烟缕缕生。

### 上厚菴太守

不为寻京尹，谁轻千里来。河声天上落，山色镜中开。气节标南岳，词华光北台。政閒公府静，棋局与茶杯。

记取论诗处，窗明霍六山。眼青千里外，头白十年间。鹿苑应相忆，龙门许再攀。彭城风俗美，禅坐欲忘还。

### 春草

绿浅香柔绝点尘，乱如丝缕叠如茵。阅残野火千秋劫，斗尽东风六代人。池上有谁还得句，江南无此不成春。和烟和雨年时路，知否王孙最损神。

### 登三汊河口浮图

千寻如涌出烟汀，绝顶奇搜入杳冥。天到润州连海白，山从建业过江青。层层梯折疑穿洞，面面门开好摘星。欲与老僧论下界，六朝宫阙一浮萍。

### 留别张锦溪老人

芦帘不下锦溪东，瘦绿肥红一万丛。种豆诗吟山色里，换鹅经写水声中。隐居绝似凌风鹤，过客还如踏雪鸿。明日一帆江上挂，相思千里暮云空。

### 还山后寄张北干洛下

一叶风帆两地分，新诗高唱许谁闻。雪荒江月都成水，山老梅花欲化云。稚子那知朱亥里，酒人争问信陵坟。旧愁销歇新愁起，三夜西窗梦见君。

### 由下关复之广陵

风落寒潮塞雁横，严关重泊一篙轻。人间诗草无官税，江上狂徒有酒名。几点塔镫离建业，半钩沙月又芜城。不知何处潜吹笛，夜雨潇潇十载情。

### 江上寻屈徵君斯斋

乘兴双桡驾碧浔，水烟遥抹树森森。园中种菜英雄老，江上披裘岁月深。三径草连沙屿满，六朝山护席门阴。等身天厚虞卿意，一锺无殊五岳吟。

慧霖

慧霖，字梅龢，新建人，本姓李。有《松云精舍诗录》。

栖贤寺

五老云中唤不■，名山从未要人称。虎头写出庄严相，舍利光分大小乘。三峡波涛惊过客，一龕风雨定诗僧。昔贤跨鹿来栖止，深夜摊书借佛灯。

小孤山

卓然空倚傍，高放出云头。吴、楚分中界，金、焦截下流。荡摇空水国，孤秀矗僧楼。来往风帆利，何人据上游。

次砚生雪夜见怀韵

僧家随地置蒲团，雪夜遥知忆懒残。孤鹤梦归双脚冷，野梅花孕一身寒。穷年真觉读书好，连日应歌《行路难》。我未出山频打坐，笑将饶舌教丰干。

舟中感怀叠前韵

一叶蒲帆挂向东，旗亭西望忆诸公。新愁似水浮天外，旧梦如云到客中。太白才名因酒重，杜陵老病坐诗穷。夜来湖上才摇笔，便有鱼龙唤雨风。

纤拽篙撑各自谋，舟师努力向滩头。江山对面迎残客，花鸟多情劝小留。上水太难下太易，顺风何喜逆何愁。此行堪把邮程计，卅六湾过到信州。

严滩过子陵钓台

自著羊裘老富春，画工辛苦绘功臣。先生到处堪高隐，天上宵来卧故人。七里江声终不断，四围水鸟亦相亲。利名淘尽尘中事，留得乾坤一钓纶。

西湖放歌

曩闻西湖景，奇胜甲天下。今年六月始来游，所闻不及所见者。西湖山，如画图，楼台缥缈开蓬壶。西湖水，清见底，净碧荷花香卅里。若将西湖比贤士，光风霁月何清美。若将西湖比西子，澹妆浓抹洵如此。白公苏公两仙才，为政风流先后来。酒魂诗魄在何处，夜深飘渺云车回。表忠旧迹祠宇在，苏小坟头春似海。英雄事业儿女情，俯仰千秋发深慨。金牛之湖尚可游，销金之窝安得留。吁嗟乎！人生到此亦快意，何必五岳名山一一穷搜求。

冬夜独坐

我本无为者，端居一室中。孤灯空照雨，四壁冷栖风。交以性情合，禅因文字通。法云何广大，弥布十年功。

### 平山堂

平远楼台据蜀冈，三峰起伏万松苍。风流太守开公宴，江上诸山到此堂。曾制荷觞倾碧酿，似甘棠。醉翁之意髯翁得，同爇文忠一瓣香。

### 闰中秋玩月

禅边风味客边愁，馈我清光又满楼。一月可曾閒几日，百年难得闰中秋。菊花信待重阳久，桂子香闻上界留。遮莫圆明似前度，不知谁续广寒游。

### 遗怀

云自高飞水自流，清风拂拂拟仙游。寸丝不挂真行脚，长物全无且掉头。未到百年空万想，能超一劫已千秋。前因后果分明在，欲唤山猿与唱酬。

### 翼日坐雨

阴晴莫定花朝去，风雨飘萧社令来，人是陶公还乞食，世无鲍叔肯通财。古今商略书千卷，天地苍茫酒一杯。春在江南谁问讯，莺飞草长任徘徊。

硯生太史將入都同人於重陽於三日就菊設餞以屋小於舟人澹如菊分韻得屋字

桂石已无山，松云尚有屋。君还玉照堂，不羨王官谷。索笑春寻梅，撷芳秋摘菊。离怀託篇什，共向篱根读。送酒劳白衣，敲诗翦红烛。更偷半日閒，相劝一杯足。公等文字豪，我惭笔花秃。愿随江月行，扣舷和清曲。

太史倚装待发连日枉顾话别恳恳无已叠韵奉简

北风江上来，寒月照野屋。荐士有昌黎，爱僧如郑谷。拟上北阙书，还对南山菊。花不受人怜，诗成招我读。临别重论文，夜游期炳烛。於意究云何，幽情畅未足。傥逢笑口开，无碍吟髭秃。行行重行行，为君歌一曲。

### 庚申正月十三夜立春

笑语东风解冻迟，立春翻在试镫时。老年无伴惟亲火，佳节能閒且赋诗。乞米书多因酒券，买花钱半是香资。诸天雨洒莲台净，开到寒梅第几枝。

痴未能除早绝贪，此生端合住茅庵。岂无松竹梅三友，祇有诗书画一龕。瑞珮昙花都是幻，味寻谏果要回甘。今宵谁共谈风月，默数星辰看斗南。

### 嘉平月十九日寄怀竹庄观察

一剑光寒山外山，半空星挂斗牛閒。江分九派东南去，云在双孤大小间。风雪更番

传岁暮，梅花消息动乡关。石钟曾有髯翁记，可为参寥选韵还。

李莲生茂才以长句为题小草依韵奉谢

修竹心虚坚有节，老梅骨瘦硬如铁。乾坤清气得来难，一卧空山休漏曳。是空是色年复年，空中幻出云霞烟。不恨生在千年后，但恨生不千年前。有诗可吟酒可醉，菩提即是逃禅处。一朵梅花一首诗，万个吟身万梅树。李侯生有冰雪姿，倾心为我题长句。李侯李侯歌漫夸，请将此笔凌云霞。不然署作护花使，愿与仙人扫落花。君不见仙骨珊珊身落落，举头一拔红尘脚，定有清风振河岳。

答和李晴川宗伯见赠原韵

半生多愧一无能，况是云堂退院僧。花径得閒仍自扫，诗坛相望几人登。但教心地明如月，何碍头衔冷似冰。曾制荷觞邀竹醉，名山风雨话传灯。面壁能参文字禅，一花一石总清妍。法云珍重开初地，香火终须赖后贤。自有洞天藏白鹿，本来居士属青莲。投桃报李吾何敢，且结三生未了缘。

端阳前一日送官城太守之蜀仍步前韵

一官筹画百重城，锦里犹来早著名。骑鹤未缠腰万贯，听猿先下泪三声。且将酒醉端阳节，难得诗传蜀道行。傥是淮南遥问讯，为言我辈独钟情。

庚午三月三日招诸大雅松云精舍修禊 契集兰亭字

契合形殊坐品贤，临风感事亦欣然。一春流水怀今日，万古人生骋少年。有管无弦幽静室，左兰右竹盛阴天。清游长在初修地，此外林亭况已迁。

题云谷上人梅花帐额有罗浮清梦四字

少年上人号云谷，不独修慧还修福。四大床参明月禅，一团瓢借梅花宿。梅花之气清且幽，无端思入罗浮游。罗浮有约不能到，佛在心头莫远求。精蓝曾是将军宅，何不种梅伴老柏。暗香浮动影横斜，梦魂一觉东方白。

觉诠

觉诠，字性源，上元人，本姓王。主焦山定慧寺。

人日雨用曾宾谷中丞为扬州都转时人日游焦山唱和诗韵

人日登高阁，窗含碧海烟。雨留花外客，春入水中天。树隔层岩峭，山开一洞圆。蜗牛庐尚在，高卧有焦仙。

观音崖晚眺

悬崖峭壁石玲珑，入竹穿云一径通。行到别峰回望处，半江潮带夕阳红。

显清

显清，号谨庵，天童寺僧。有《禅馀吟草》。

黄叶

连宵旅馆听秋风，起卷疏帘眼界空。一径淡烟山寺外，数峰苍霭夕阳中。始知世态随时变，看到秋林岂昔同。若过圣湖新景地，何须重问梵王宫。

了亮

了亮，字智水。洛阳寺僧。

松芝图

悬崖一株松，经霜复经雪。倚涧五茎芝，日月精华结。生成栋梁材，品格自高洁。异草本灵丹，服之增颜色。援笔入丹青，足称两奇绝。

刈麦行

来牟异地穀，种之在秋时。历冬复历春，刈当仲夏期。雨雪倪不足，荒芜致农悲。今年尚丰稔，始得疗岩饥。田家贵勤俭，天公不我欺。

写兰石有寄

一片空山石，数茎幽谷草。写寄风尘人，莫忘林泉好。

性慧

性慧，字炳一，号幻云，赣州人，本姓黄。主泰州光孝寺。

寄刘石池

碧水情千里，青山隔万重。故人栖隐地，遥忆白云封。雪后应锄药，春来好课农。相思託明月，常照汉阳峰。

送佛镫上人之南海

自携瓶钵去，万里涉川程。雪岸依帆转，春潮破浪行。岭云寒殿影，海气湿钟声。遍礼名山后，应知世念轻。

圆能

圆能，字西林，号香雨，兴化人，本姓张。主光孝寺。

#### 送宝林回里

秋风瑟瑟启行装，相送归帆下楚阳。出郭四围芦荻远，到城十里芰荷香。孤村野水添新涨，细雨青镫入晚凉。客里閒情俱莫问，好凭诗思寄沧浪。

#### 忆又儒弟

野水新添曲槛多，无端世事怅蹉跎。西风万里归人少，明月遥天一雁过。祇为壮游羈瘴海，不堪老眼盼山河。心情已逐秋容减，何日相期话薜萝。

#### 明德

明德，号在堂，秀水人，本姓吴。江都秋雨庵僧。有《二六閒情集》。

#### 喜晤董海南

岂必曾相识，新知即旧知。却宜明月夜，共读谪仙诗。话到三乘法，称予一字师。来朝别君去，再订菊花期。

#### 定源

定源，字自律，号乳秋，别号又禅，东台人，本姓黄。有《乳秋集》。

#### 焦山同王柳村先生哲嗣小村作

策杖登峰顶，天高秋气清。云山相别久，花鸟不知名。木落江楼耸，潮来海月明。竹窗留客处，四壁响蛩声。

#### 觉灯

觉灯，字秋屏。主焦山定慧寺。

#### 自题小照遣怀

昔为行脚客，负笈辞故乡。三参海门国，一度莲花洋。莲花洋接光熙顶，去寻梅福烧丹井。绿摇海水与天浮，一洗年来诗梦冷。携筇复向双峰来，楼阁不劳弹指开。夜有鱼龙妒高卧，洪涛激石如奔雷。我住焦岩今五载，杨岐事有几人解。江头孤月此心明，苍狗白衣时见改。远公净业与谁修，空山独立愁复愁。流光似水去若此，渐觉霜花白上头。

#### 祖观

祖观，字觉阿，元和人，本姓张，名京度，字莲民。诸生。住通济庵。有《梵隐堂诗存》。

#### 鄮山育王寺度岁作

簪船载雪渡江行，一路看山到四明。闻道甬东真佛地，试寻哑女话无生。鄮山顶涌法王台，宰堵光明宝藏开。识得摩尼本无相，尘尘刹刹见如来。遍界香云雨宝华，吉祥胜地布金沙。神仙只有陶贞白，亲向云台受木叉。白牯狸奴语太颠，今朝头痛怕谈禅。谁将庞老西江口，吸尽岩前妙喜泉。石门文笔费才思，五字寒山是我师。一瓣旃檀一杯水，长明镫下祭新诗。

#### 答胡子莹见赠次韵

为道无近效，立志当远期。一念不自觉，流浪遂及兹。迅风鼓识浪，苦海浩无涯。勉修嗟吾晚，力学如君希。索居苦无侣，怅怅将何之。相期神明閒，道合无睽离。念念薪火改，步步人羊悲。孤明众垢蚀，独往群挠随。无为撻埴者，冥行失所依。

#### 金山杂诗

享尽清闲卖尽颠，两年未算草鞋钱。残书破砚参堂去，我是穷酸杜撰禅。

歇得狂心便了因，谈玄说妙亦欺人。众中谁是元枯木，万仞悬崖忽放身。

未了丛林粥饭缘，生涯分付镬头边。担柴运米寻常事，压损诗人山字肩。

打头黄叶湿禅衫，梵放寻秋百尺岩。日落高台数飞鸟，红泥殿角过风帆。

满堂龙象足■资，世外论交喜可知。最忆焦山借庵老，荒年忍饿坐谈诗。

孤鸿嘹唳宿汀洲，衰火星星辨客舟。夜半风铃凄不语，江声吹月下僧楼。

笛咽离亭断客魂，峭帆东望海天昏。老僧笑指风涛险，坐看江山不出门。

#### 胡子莹同赵艮甫过访金山艮甫有诗见赠次韵

我爱浮玉山，秀出瞻部洲。萧然寄瓶钵，转瞬夏已休。滔滔大江水，日夜东向流。潮来塔影动，孤根势欲浮。故人白下归，暂聚忘宿忧。浮生旦宅中，出没等海沤。一器集蚊蚋，六窗唤猕猴。此身不自有，微名复何求。江楼过鸿雁，起看天地秋。纷纷孝廉船，出外帆初收。

赵君不羁士，词坛推宿学。胡子旷代才，妙语超等觉。嗟予如钝金，久已退芒角。面壁楞伽台，龕经注梵轴。岂能绝形累，聊以洗心浊。悠悠身后名，腐甘同草木。良朋聚首难，欢谐谢拘束。邈哉独鹤声，安用候虫续。挥手问归程，离愁满林麓。江天万里秋，孤舟何处宿。



春日即事

江边新涨没渔矶，满路杨花扑面飞。海燕初来风渐暖，河豚欲上水添肥。西山游骑青丝辔，南陌春人白袷衣。只有枯禅爱闲寂，寻芳无客叩柴扉。

神仙

丹篆荒唐下玉京，九霄鸾鹤几时迎。山中宰相言符命，驴背神仙话太平。游戏金门空作达，摩挲铜狄未忘情。侍郎碧落头衔重，天上人閒尽好名。

赠王子春

乱离踪迹各飘零，山寺重逢鬓已星。醉后谈兵双刃白，愁来说鬼一镫青。侧身人海成孤往，触目狂泉笑独醒。寂寞草玄嗟岁晚，问奇谁过子云亭。

赠顾菡塘

笑傲山林远市城，翛然物外世缘轻。绳床经案王摩诘，僧帽儒衣顾阿瑛。满院樨香无隐尔，一池水皱不干卿。何当饱吃黄精粥，茅屋三间了此生。

钱水西藕花香里读楞严图

茅屋三间净扫除，药炉经卷老僧居。自从一见《楞严》后，不读人间糟粕书。

萧然一衲坐绳床，虚室常明海印光。选罢耳根参鼻观，木鱼风定藕花香。

自笑

自笑平生半点痴，观河羞见鬓如丝。乱杂始识承平乐，少壮何知老大悲。避世桃源彭泽记，感时天宝杜陵诗。五湖不少闲田地，一棹烟波信所之。

了禅

了禅，字月辉，盱眙人，本姓雷。主定慧寺。有《留声阁诗钞》。

赠九华山几谷上人

上人高卧处，不与众山齐。庭树啼归鸟，岩花献野麝。泉从檐际落，月到榻前低。妙悟禅那意，青云自有梯。

再寄九华山几谷上人

九子山头月，双峰顶上云。清芬同一派，孤静两无分。画笔超流俗，诗才迥不群。

我来应下拜，古佛最能文。

### 感成

本是无心客，缘何百感生。不空人我见，难断俗凡情。旧雨愁中散，新诗梦里成。莫言书懒寄，十月未休兵。

未识乱离苦，先惊魂梦安。亲知存海内，孤立在江干。恋敢轻三宿，斋难饱一餐。饥寒余领惯，蒿目泪空弹。

似我抽身早，还遭寇盗侵。度人无妙术，济世负初心。恨心横江锁，惭无布地金。应须修净土，结社继东林。

### 客中寄本山诸友

上方借得一枝栖，云自相依鹤自随。见月未忘禅在指，谈经想像佛低眉。骚坛白雪容赓和，故国黄花怨别离。参透乾坤同一粟，蒲团独坐夜深时。

### 小云山房与祇菴长老夜话

金镫一盏傍维摩，此夕欢迎老丈过。初地烟霞知己少，五更风雨落花多。江山如画诗难续，医药逢缘病可瘥。我是黄梅门下客，敢将衣钵问如何。

### 自成

自成，号莲溪，江都人，本姓方。翠屏洲获秋菴僧。

### 登瓜洲彤云阁追忆王汉标先生

窗俯大江流，西津入槛流。山光来蒜岭，树色入瓜洲。百战人何在，千年阁尚留，临风怀子晋，应跨鹤来游。

### 横桥

横桥拂柳丝，春在画图里。终日送行人，只有桥下水。

### 大须

大须，字芥航，盐城人。焦山僧。

### 暮雪

日夕北风紧，寒林噤暮鸦。是谁谈佛法，真个坠天花。呵笔难临帖，敲床且煮茶。禅关堪早闭，应少客停车。

寄怀蒋宾梅先生

明月照空廊，思君夜正长。遥知百里外，同此九回肠。淮浦何时去，天涯有客望。好诗须寄我，旧约莫相忘。

退院口占

十四年来了宿因，扪心尚不失天真。徜徉山水成初愿，守护烟霞得替人。百八摩尼无量佛，三千世界自由身。寄言江上乘风客，莫待昏黄始问津。

圣教

圣教，字友藁，号寄岩，甘泉人，本姓卢。焦山玉峰庵僧。有《懒馀吟草》。

步东昇楼壁间韵

信有离尘境，登临共把杯。潮平江水阔，日出海门开。胜地多名迹，君生愧不才。偶缘寻道侣，鸿爪印楼台。

东洲秋夜

寻诗随步出前楹，寂寞空斋欲二更。皎皎袭人寒月色，潇潇似雨暮秋声。西风落木愁偏起，永夜鸣虫感易生。小住庄庐动归思，双峰咫尺梦难成。

彻凡

彻凡，字寄云。有《募梅精舍诗存》。

次韵东沔太史雨窗寄怀

秋风起江村，秋渐满庭户。幽人生还怀，寂坐一窗雨。掌中杯未斟，膝上琴先抚。目送天际鸿，飞飞没云树。

题画兰

彼美在空谷，离立含冰霜。地幽作花早，春风生古香。盈盈一涧水，孤客遥相望。不采何忍舍，采之用无方。愿得赠之子，佩以罗绮裳。中道勿捐弃，千载留芬芳。

和季貺寂寂原韵

林坳深树不知门，寂寂斋居避客喧。贫到乱离都作达，道能忧患更称尊。住山长策书千卷，遗世高怀酒一樽。除是纵游岩壑兴，行踪不出水云村。

偶成

饱吃香厨嫩蕨芽，也凭无事读《南华》。纸窗一线春风入，吹落瓶中供佛花。

昌仁

昌仁，字一庵。劳山华严院僧。有《唯心集》。

寻梅漫兴

指月拈花总是禅，悟来原不落啼筌。有人问我西来意，花在枝头月在天。

闻钟

但听云外钟，不见云中寺。松下问樵人，遥指云深处。

含澈

含澈，字雪堂，新繁人。龙藏寺僧。有《绿天兰若诗集》。

螺园访林涛如适梅花初放有诗见赠次韵

螺园冬日我来频，绛帐梅花报早春。寒气化为香雪海，高风清似玉堂人。言欢有累煎茶碗，感旧无烦漉酒巾。寄与程门诸弟子，莫将熟客认嘉宾。

灵照

灵照，嵯县人。本姓郑，名淦，字淼泉。光绪戊子举人，官和州州同。永嘉头陀山妙智寺僧。

答昌鹤庭

随缘披剃礼空王，顽壳犹能自主张。我祇爱尝蔬笋味，人偏疑恋蕨薇香。向生游岳从凭吊，杜老忧时念拜扬。隐显胥关天位置，世间何事苦评量。

耻学乡贤梅市卒，懒随丹士葛仙翁。爱佳山水来名郡，称老苾刍作寓公。贪懒谋新符俗谚，度生术乏负宗风。斋鱼粥鼓还朝夕，惭与当年窃禄同。

敬安

敬安，字寄禅，号八指头陀，湘潭人，本姓黄。湘阴法华寺僧。后居京师法源寺。有《八指头陀诗集》。

泊空舫岩上杜公亭

杜老留题处，征帆又此停。水痕侵岸白，岳色向人青。樯燕飞何处，江猿不可听。  
謁来一凭眺，落叶满空亭。

#### 暮秋偕诸子登衡阳紫云峰

紫云最高处，飞锡共登临。秋老山容瘦，天寒木叶深。西风孤鹤唳，流水道人心。  
坐久林塘晚，寥寥钟梵音。

#### 答尹和白

镇日焚香礼翠微，松花落满水田衣。柴门寂历生幽草，除却孤云客到稀。

#### 送海峰上人行脚

南询从此始，烟水浩漫漫。一钵飘然去，千山次第看。江云春树碧，海月夜钟寒。  
处处随缘住，无求梦亦安。

#### 将之南海赋别

旧院安禅处，经年锡一临。欲辞溪涧水，去听海潮音。白发怜师老，青山怅别深。  
空门本无我，那有去来心。

#### 玛瑙寺怀古

地僻云深少客来，梵王宫殿尽尘埃。凄凉一片西湖月，犹照生公旧讲台。

#### 访育王心长老作

行行不觉远，入谷已残曛。松翠近可掬，泉声咽更闻。水清鱼嚼月，山静鸟眠云。  
寂寞双林下，烟霞长属君。

#### 与与了上人话旧

当时楚水岳云间，持钵从游鬓未斑。一十二年如电拂，白头相对话岐山。

#### 过徐酤仙故宅

门巷萧条长绿芜，流莺犹似劝提壶。野棠含雨梨花白，不见高阳旧酒徒。

#### 送元松上人还日本

沧海渺无极，乡关何处边。归帆遥向日，岛树远含烟。洗钵鲸吞水，窥斋鸟入船。  
此行应不负，了悟大乘禅。

自海上归与本师云和尚夜话

不侍巾瓶侧，忽忽已十年。早知布毛意，何用草鞋钱。夜雨谈诗坐，孤镫对榻眠。别来多少事，语罢欲潸然。

喜曾重伯陈伯涛见过用伯涛见赠原韵

茶话日将夕，虚堂闻梵音。道根俱不浅，静理亦何深。贻我郢中曲，劳余尘外吟。谁能一弹指，了悟去来今。

是法无高下，谁分大小乘。水云天漠漠，身世日腾腾。白发愁难却，青山归未曾。聊将松顶月，分作佛前镫。

幽寂雨华寺，禅宗众所归。云生游客屐，花落讲僧衣。大觉看身妄，玄谈入理微。上方钟磬里，惜别语依依。

秋夜怀王伯諒

秋夜不能寐，秋虫鸣砌间。疏钟云外寺，落叶雨中山。以我意不適，想君情倍艰。何时复相见，一笑破愁颜。

碧湖亭晚眺

会春园里乱栖鸦，佳宴堂前日影斜。洗尽繁华一湖水，野风吹放白莲花。

赠璧臣居士

繁华事散鬓如丝，万里青山独往时。一种风情谁得似，岭南争唱荔支诗。

登金山留玉阁

高阁一凭眺，苍茫太古情。天疑入海尽，潮欲挟山行。芳草金陵渡，斜阳铁瓮城。乡关杳何处，向晚客愁生。

赠吴雁舟

独有延陵子，精庐每见过。禅机信敏捷，绮思未销磨。偶看杨枝舞，争传桃叶歌。天花纷落处，谁识病维摩。

春草

年年原上望，惟汝独先荣。已入西堂梦，重伤南浦情。烧痕看渐没，屐齿踏还生。春色又如此，王孙尚远征。

四月十六陪茗香翁湘绮先生泛舟碧湖

胜侣忽相引，扁舟泛碧湖。江山今古在，身世水云孤。法乐自清妙，禅心宁有无。  
爱兹泉石好，还约饭秋菰。

登空冷岩和杜工部次谢灵运七里瀨韵

舍舟运神游，登栈眩奇眺。洲渚屡旋复，岩石咤危峭。云窦滴馀润，洞隙纳微曜。  
凿险若神工，履阴疑鬼啸。遗物奏元功，观空得要妙。既惬青霞心，岂顾白衣诮。黄屋罗英  
灵，沧洲隐渔钓。取舍各有宜，殊首自同调。

舟中呈宝觉居士叠前韵

运心态冥游，流自纵远眺。浮杯历滌洄，攀萝陟奇峭。客尘方外遗，神光发内曜。  
既杜毗耶口，亦薄苏门啸。辩河息诤讼，理窟得玄妙。南岳为我涌，北山岂余诮。四海纳微  
沓，六鳌归一钓。请谢河伯言，为君弹此调。

清凉寺呈本师

达人贵宏道，独觉非所论。觉花馥心地，智水湛灵源。誓然大智炬，永破尘沙昏。  
拂衣舍卫国，开讲给孤园。岂不疲津梁，弥悯四流奔。乔岳蕴灵异，中有甘露门。非贤岂能  
主，惟德众所尊。人天一忻悦，花雨何纷繁。迦叶信小果，庆喜惭钝根。荷法各有任，嘉会  
何由敦。聊勉自化志，庶用酬慈恩。

山行

松风始微动，山鸟犹未鸣。有客资神往，高咏发幽情。荒涂莽荆榛，樵牧亦罕经。  
灵源穷欲尽，忽闻鸡犬声。道人欢客至，伫立候柴扃。设食罗野蔬，志意殊真诚。暧暧阳已  
微，皎皎月孤明。心境两俱寂，泠然契玄冥。

谒黄庭观

偶乘独往意，来谒魏元君。谷黯松杉合，天清鸾鹤闻。灵芝含秀色，仙色绣苔纹。  
坐久诸缘息，晴空生片云。

望庐山

纵棹随神风，浩荡洪波间。引领望庐岳，悠然开心颜。秀色信难名，灵气吐自然。  
五峰媚云表，巉绝谁可攀。缅怀远法师，高步太元年。陶谢尚返驾，澄什宁比肩。千载沐馀  
润，犹能洗尘缘。瞻霞想神足，临流哀逝川。玄栖讵可必，妙蕴当能宣。

九华山

九华实仙都，重岩蕴神宅。弭棹倦惊涛，瞻云慰良觌。远抗庐霍高，兀若星辰偃。霜壑流晓丹，秋峦散遥碧。远近生异容，天山共一色。伊余慕肥遁，逢山惬幽寂。徒眩耳目奇，未就烟霞息。思欲御冷风，曷由生羽翼。玄关宁我扃，灵境冀孤历。

中和日与程睫园过东洲讲舍邀雷小秋罗云岩廖卓夫姚瑞麟游小罗汉寺作

春风一微扇，草木含新萋。佳兹微雨晴，复与赏心携。鼓枻溯洪流，扬帆便轻飏。洲渚绿方盈，霞彩垂光仪。讲肄集群彦，矫矫鸾凤姿。兰蕙馥其馨，德义为之基。洙泗若可接，孔墨道宁疑。共美绀园游，同礼天人师。明镫皎智焰，觉树耸高枝。境幽性所惬，理胜情无疲。良辰勿可谖，倾耳希新辞。

梦登岳阳楼观湖中大雨作

天地忽异色，元阴合一湖。迅雷翻地轴，高浪蹴天衢。风雨作还止，鱼龙喘未苏。但令膏泽遍，何敢怨泥涂。

雷池晚眺

层峦忽已暝，稚子语烟深。欲问入山路，惟闻流水音。閒云不出岫，倦鸟自投林。万古雷池月，泠然鉴我心。

赠漱石和尚

漱公法门旧，头白卧青岑。借问看云意，能无出岫心。烟萝身外满，岁月定中深。不动广长舌，松杉演妙音。

高台寺观念庵松

高台寒雪晓相过，爱看松枝挂碧萝。珍重枯禅勤护惜，念庵手植已无多。

谒裴公墓

裴公冢对南轩墓，祇隔秋云一片山。松径岩扉俱寂寂，几回萝月怅空还。

汾山水牯牛颂

识得汾山牯，林閒任自然。身毛亦将白，鼻孔也曾穿。牧笛斜阳里，閒情野水边。一犁微雨足，不负祖翁田。

咏白梅

了与人境绝，寒山也自荣。孤烟淡将夕，微月照还明。空际若无影，香中如有情。素心正宜此，聊用慰平生。



赠尹山人和白即题其阴符经注后

胸中丘壑一尘无，人海茫茫意自孤。门巷萧閒苔藓碧，满庭风雨注《阴符》。

霞外神情谁复知，苍苍须鬓已如丝。春风落魄长沙市，错被人呼老画师。

送陶观察森甲之姑苏

春波如镜草萋萋，十里垂阳绿映隄。借取祝融峰上月，送君直下洞庭西。

忆明州皈依长老太白峰前听法回，寒梅二十度花开。何时七塔桥边寺，重礼明州布袋来。

## 【卷一百九十九】

神一

神一，字荆隐，一字龙隐，华亭人。原名淑吉，字美南，明吏部考功司郎中夏允彝长女，嘉定侯洵室。有《龙隐遗草》。

悼亡

萧萧鉴玄夜，幽室生微凉。眷言念君子，沈痛迫中肠。音徽日以杳，翰墨犹芬芳。灵帷空萧条，斋奠直荒唐。举声百忧集，泣涕不成章。

梦游天台

石梁飞度接花茵，殿阁经行覩胜因。香气入衣初不触，钟声到耳迥无尘。木童石女宾中主，翠竹黄花觉后身。忆旧临风三叹息，碧潭明月影磷磷。

二月雨雪同静维招南楼至曹溪忽得嚆城家信即事感怀兼寄再生

尺素频传慰草莱，榭亭非复旧池台。彤云未许蛟龙奋，琪树宁辞鸾鹤来。黄竹歌声遥仿佛，玉壶风色好徘徊。落梅深处无人到，脉脉心期更几回。

忆王庵旧游寄再生

人生聚散本浮沤，回首苍茫感昔游。晓露未收花力重，午阴欲定鸟声幽。闻香小坐忘尘世，步月清言扫旧愁。梅影横斜应似画，残英满地有谁收。

重过横云山怀静维

翠竹丹崖倚碧流，轻桡重拨意悠悠。山灵未许同招隐，画栋飞云锁上头。

闺思

碧天明月影迟迟，翠袖轻寒香露滋。海内风尘劳客梦，江东罗绮擅文辞。频惊桂棹回前渚，时整花钿立小墀。子夜明镫犹未寝，鱼笺珍玩感婚诗。

六姊孙俨箫没於丁亥家难为赋一诗

忆昔于归纨绮丛，郎家声誉擅江东。肃雍自叶房中乐，散朗仍归林下风。日暖画楼彤管丽，春深珠箔麝兰通。彩云散后空凭吊，野哭荒郊恨几重。

玉京道人

玉京道人，号云装，上元人，卞氏女，原名赛。

题自画小幅

沙鸥同住水云乡，不记荷花几度香。颇怪麻姑太多事，犹知人世有沧桑。

曙光

曙光，上元人，胡氏女，原名朝霞。有《红于词》。

送人

秋风江上送君舟，落叶江枫总别愁。解缆不知人去远，凭阑犹倚夕阳楼。

曹素侯

曹素侯，长洲人。

秋日

梧桐一叶早惊秋，鹤梦留人尘梦收。情逐绮云飘玉宇，心随碧落荡银钩。浪游清院难消日，偷上层楼未敢愁。空忆旧时衣带缓，不胜遥夜泪重流。

草衣道人

草衣道人，字修微，扬州人，王氏女。有《远游篇閒草》、《期山草》。

重过雨花台望春江有感

春姿静东岑，云影结遥灿。坐觉高台空，不知翠微半。落花自古今，啼鸟变昏旦。

抚花良易迁，即事聊成玩。况乃晴江开，绿波正拍岸。

#### 舟次江汜

一叶浮空无尽头，寒云风切水西流。蒹葭月里村村杳，蟋蟀声中处处秋。客思夜通千里梦，钟声不散五更愁。孤踪何地堪相托，漠漠荒烟一钓舟。

#### 冬夜

独坐浑无语，含颦应有思。私心自不寐，何事倩君知。

#### 春日閒赋

露寒残月上蒹葭，近日离魂未有涯。寂寞经年人不见，空房夜夜数归鸦。

#### 昙道人

昙道人，字静婉，金坛吴氏女，苏州木渎人。女真祠女冠。

#### 别思

西崦雨未收，东崦风又作。留住绿蓑衣，莫与篙师著。

#### 岳莲

岳莲，一名净莲，字韵香，无锡人，王氏女。有《清芬精舍小集》。

#### 自题画兰

十分珍重护芳丛，意在忘言淡荡中。尘外天然见标格，肯随桃李嫁春风。

#### 静照

静照，字月士，宛平人，曹氏女。

#### 宫词

到面东风只自知，燕花牌子手中持。椒房领得金龙纸，敕写先皇御制诗。

一树寒花冒雪开，幽香寂寂映妆台。女官争簇传呼近，知是鸾宫选侍来。

宝妆云髻弹金衣，娇小丰姿傍玉扉。新入未谙宫禁事，低头先拜段纯妃。

只敕宣传幸玉熙，乐工先候九龙池。装成傀儡新番戏，尽日开帘看水嬉。

阅遍司农水旱书，君王减膳复斋居。御厨阿监新承旨，来日羹汤不进鱼。

俭德慈恩上古稀，他方织锦尽停机。赭黄御服重经浣，内直才人著布衣。

道元

道元，陈留人，王氏女。

禅坐书怀

碧云静锁梵王宫，犹似明霞拱禁中。玉树旧枝归净业，内家新调擅宗风。三千里外肠堪折，十二年前泪暗红。欲悟无生何处是，禅镫移照镜台空。

再生

再生，长洲人，姚氏女，原名妘，字灵修。有《再生遗稿》。

早春即事

烟锁虚窗展素绡，微风吹到落梅香。孤怀待月惟枯坐，馀恨添眉却晚妆。旧事不堪重省忆，新词漫自费平章。黄粱一梦从今觉，愿息尘机礼法王。

不寐

残镫一点熬孤檠，门外萧萧落木声。风动庭梅疏影乱，露凝修竹暮寒轻。支离瘦骨惟供病，牢落愁怀岂为情。此夜酒醒魂断处，半帘明月梦无成。

仲春十五夜大人山中言旋即别写怀

白云天末和愁低，无限离怀怨曙鸡。烟柳河桥残月少，疏钟古寺晓风凄。百年幻影花枝老，二十浮生草路迷。一苇江头如可折，竺乾西去待相携。

寒夜书怀

寂寞青镫夜未阑，半生心事独盘桓。烟波缥缈魂非远，人事悲凉岁欲残。素志应同明月皎，离情还共白云漫。良宵翦烛歌行露，松竹萧森起暮寒。

来季奴

来季奴，萧山人。海宁白衣庵尼。

同洵芳航海作

浊浪翻天地，微躯付海风。恨他精卫鸟，衔石竟无功。

无垢

无垢，江苏通州人，陈氏女，原名洁号石香，同州孙安石室。有《茹蕙集》。

书怀

青翠入帘栊，永日驻幽阁。愁萦芳草生，静觉桐花落。奁镜网蟭蛸，庭柯巢鸟鹊。梦去不关愁，晓来心自恶。独坐只书空，微雨益萧索。

雪后登山

滕君似妒青山翠，万里峰峦铺玉碎。苍凉四望野云低，江天静与茅亭对。此时谁是景中人，王恭鹤氅难为绘。我爱江天积雪幽，朗吟《雪赋》寄中流。长江寂寞鱼龙没，坐向孤寒月影浮。

扬州早雁

才离塞北忽江东，岭岸萧疏树未红。数点云间谁系帛，一行天外自书空。安栖邗水犹乡土，远过迷楼感故宫。别有孤鸣沈别浦，高风欲借起泥中。

秋柳

弱不禁风素自怜，黄昏细雨断疏烟。楼头指冷谁吹笛，塞上身单欲寄绵。一任啼乌翻子夜，直须飞雪送穷年。攀枝信堕英雄泪，残照萧条灞水边。

悼小婢素梅

年只十龄馀，幽花色亦如。怜伊明慧甚，独遣理琴书。

以疾性逾洁，时时拂卧床。犹然觅芳卉，斜插髻云旁。

每识予悲叹，温言慰寂寥。深期共朝暮，何事彩云飘。

玩月

秋气晚馀寒，清光万里宽。天风如可惜，吾意欲乘鸾。

春闺

院冷梅花玉翦流，晚风偏助落花愁。侍儿知我无情绪，不把珠帘上玉钩。

法鉴

法鉴，杭州人。自署西泠比丘尼。

丁未仲冬携钵渡江喜过深翠山房巢民先生出小影索题赋赠

人龙文虎玉精神，写出当年抱膝身。李郭久知天下士，卫荀重见六朝人。花藏僻巷车常满，竹引仙斋鹤自亲。最爱白云无世态，我来亦为一通津。

德容

德容，嘉善人，朱氏女，原名又贞，同县张我仆室。有《璇闺诗》、《猗兰》、《幽恨》、《归云》等集。

泣怀四言诗

魏里我朱，世称名德。父举孝廉，仪型南国。先慈割股，善为内则。八兄二弟，甲科连捷。犹子繁衍，勤书晨夕。父半百年，始生又贞。弱女非男，训护慰情。稍读经史，志古闺英。十五而笄，清河于归。十五遵教，姑女章是随。操持佐饔，夙夜无违。熊罴三梦，今始一垂。绿林不靖，湖渚锋镝。囊为盗赍，牛衣相泣。良人砥志，下帷屏迹。瑶章珠赋，声动都邑。戊子之秋，幸宴《鹿鸣》。长歌远寄，郑重前盟。壬辰登第，筮仕廷评。继美释之，张先后称。丁酉维夏，泛舟来都。相敬未暖，旅魂乍苏。忽令分闱，校检群儒。维我夫子，能文有耻。秉矢公明，冰寒立志。上严功令，下畏多士。勤慎勿懈，月馀竣事。岂知同案，贪心败类。庸违象恭，实怀狂悖。群凶飞语，如霾如彗。缇骑在门，去不及诀。五毒倍至，百喙莫雪。事若风影，罪不例律。严行示惩，西市引决。祸起党同，古今一辙。余念致命，割血流裾。九阍间隔，囚安上书。七人同尽，遑辩真虚。家产寥寥，鸡犬尽没。桑榆老亲，亦旦暮活。相逐边塞，念此神夺。求荣反辱，遂付剃发。绣衣永诀，袈裟相接。拔幽报存，叩金经力。嗟乎薄命，家乡万里。身独羈囚，饥寒泣涕。南望白云，泪零待徙。不如鸟雀，去来迤邐。我思刑书，国之钺斧。虚实按情，轻重有故。雷霆振声，顷刻雨露。同罪诸臣，悉蒙恩宥。嗟我所天，先受刑苦。圣人刑法，万世则祖。雷不崇朝，岂忍终怒。用法有律，手足仍措。皇皇百执，矫矫直臣。一夫不获，亦疾于心。有此沈冤，充耳不闻。折槛回天，祐我后昆。夫纵有罪，死即平允。老亲梵独，周文所悯。茫茫寒北，坎坎艰屯。行同飘蓬，到亦颠殒。枯穷至此，死之安忍。

惜笼中鸟自喻

千里朝凰唱和遥，谁怜孤鹭禁樊牢。贞心甘守笼中日，再世齐鸣共九霄。

梅花

蝶梦三春泪落花，风飘馀粉谢铅华。天生玉色菩提片，疏影幽窗独自夸。

茉莉花

冰姿玉骨净尘烟，南国携来种自妍。花史高名空第一，只今谁识藐姑仙。

对良人小像泣感

对影依稀恍若君，欲言不语况殷勤。称觞举案惟形笔，赖是相逢画里人。

七夕

玉露金风报素秋，穿针楼上独含愁。双星何事今宵会，遗我庭前月一钩。

织女牵牛送夕阳，临看不觉鹊桥长。最伤今夜离愁曲，遥对天涯愈断肠。

秋色有感

征帆湿泪带秋风，客路愁思旅况同。无限忆君传织锦，有情长寄白云空。昨别离魂不觉愁，钟催残月忆悲秋。思君空馆应无语，南望多情似水流。

忆母

拜别慈帏一月馀，堪怜弱质远驱驰。北堂萱草今安否，但愿棠荆好护持。

忆兄

蛾眉愧不列须眉，未得吹簾洽古徽。况复孤舟人万里，脊令原上白云飞。

忆姊

姊妹花开种绣房，徐娘空复字秦郎。愧从四女祠前过，膝下而今少一行。

忆儿

坐忆雏儿泪满裳，天涯一望水茫茫。临行珍嘱休悬念，多识之无字几行。

超一

超一，扬州人，殷氏女。

遗诗

静中无个事，反复弄虚空。地老天荒后，魂飞魄丧中。有诗开道统，无法度愚蒙。忽底虚空碎，夕阳依旧红。

看花

土来浇灌水来栽，颠倒工夫任我来。满院春风花自语，不将颜色向人开。

安生

安生，吴县人。洞庭山水月庵尼。

咏蚕

瓮茧空传异，人衣岂诳天。只应方老病，未合喻参禅。死去悲丝尽，甦来羨翼全。本无鳞角势，雪覆亦徒然。

朱夫人惠碧螺春

绿润涵灵气，清芬带露华。翠微新雨歇，云窦古根斜。沸鼎看鱼眼，擎杯吸乳花。多君緘赠我，应自胜流霞。

挽旃那

玉容从此谢空华，小阁游丝护碧纱。宛转曾遮松下扇，清幽谁供佛前花。蒲团初撤怜春月，贝叶空遗映晚霞。几处香温悲手泽，青鞋倚壁冷袈裟。

介石

介石，上元人，尤氏女，原名瑛，字鍾玉。有《春水舫残稿》。

朝来剩得好春阴，芍药屏花岁岁心。解作流连是啼鸟，一行茅屋绿阴深。

清明

桃花雨过菜花香，隔岸垂杨绿粉墙。斜日小楼新燕子，清明风景好思量。

性道人

性道人，吴江人，周氏女，原名琮，字羽步，一字飞卿。

和韵留别

易水兴歌泪欲弹，孤舟残烛梦阑珊。篷窗寥落凭谁慰，歧路萧条强自宽。碧草寒烟江上画，野蔬村酒客中餐。更怜此夜溪前月，愁杀离人不忍看。

秋怀

朔风哀角起孤城，强就东篱对菊英。侠气驱愁存傲骨，诗怀借酒出奇兵。碧云黄叶清秋色，蒲枕青镫旅馆情。敝葛何堪当此际，新凉渐向永宵生。



### 秋夜感怀

风凄霜重叶初稀，孤客无家雁亦归。往事易悲休记省，壮心难遂且忘机。深秋小院人愁坐，澹月疏林鸟乱飞。远戍城高残角冷，砧声处处理寒衣。

### 赠冒巢民

天涯浪迹几年春，此日何期青眼频。赠药为怜司马病，解衣应念少陵贫。惭非骏骨逢知己，羞把蛾眉奉路人。听雨不堪孤馆夜，感今追昔倍沾巾。

### 留别吴蕊仙

一身飘泊御风游，岭上閒云水上鸥。锦字怕随江雁断，诗魂还逐晓莺流。野塘孤棹黄花晚，香谷寒窗杂树秋。只恐重来仙路迥，烟迷露阻武陵舟。

### 春居

小榻参差竹影斜，衡门芳草锁烟霞。棱铮傲骨诗为友，淡泊禅心画作家。暖日不须来燕子，春风争肯逐桃花。凭阑细雨潇潇夜，慷慨悲歌抚镢耜。

### 清明感怀

积润侵阶碧草生，杏花寒食半阴晴。一帘细雨迷归燕，几日东风度老莺。泪眼看花如有恨，旅怀中酒似多情。何时十亩偕贤侣，箕踞空山啸月明。

### 将归江南次答邓孝威

扬袂狂歌《归去来》，五湖烟月冷苏台。遥怜竹屋分题处，花落重门草似苔。

懒向人间道可怜，古来倾国尽婵娟。花飞不煮胡麻饭，静里閒参柏子禅。

野草菰蒲一径通，短篷江上趁春风。乱鸦惊起投巢去，人在遥林落照中。

几许关心总不平，飘然湖海托馀生。閒云好伴孤帆去，祖道何人唱《渭城》。

### 赠范洛仙

黯黯销魂独倚楼，登山临水又逢秋。檐前垂柳丝千尺，只系柔肠不系舟。

### 赠苏贞仙

一架蔷薇满袖香，同行谁不羡红妆。平生最爱清幽事，肯惜凌波绕曲廊。

### 寄怀洛仙

萧骚越客独淹留，汗漫西风柳岸秋。安得东风解我意，好吹此恨到扬州。

#### 上鉴

上鉴，号辉宗，长洲人，吴氏女，原名琪，字蕊仙，一字佛眉。有《香谷焚馀草》、《佛眉新旧诗》。

#### 山中早梅雪后喜闺友任归见访

与君别江树，十年滞行迹。忍使田园苑，可怜秋水碧。道远梦何繇，雁促音难绎。一朝顾柴关，白云惊艳客。涧松青若故，野人贫似昔。午饭供新葵，晚香论《周易》。早梅覆屋红，积雪映峰白。一溪鸟语溶，四壁琴书泽。任运有虚舟，放閒无火宅。相对绿樽开，起舞南山石。

#### 题画

江树迷离鸥自浴，江云飘尽春山绿。渡头小艇卖鱼归，月映斜扉满篱竹。读书楼静倚栏杆，一望烟霞碧落寒。奇幃插天藏古寺，危泉悬壁露岩滩。玉笙声断莺啼处，狼藉落花飞不去。将身欲置画图间，相与神仙觅往还。

#### 送别

雪意满芳洲，屏山引去舟。霜花吹客梦，笳月起边愁。万里从军急，孤身倚剑游。家园落日里，莫上最高楼。

#### 幽居志兴

戢影衡门下，悠然物外身。择林知鸟异，藏尾识龙神。山静云光活，溪閒草色新。废琴兼病鹤，相与得天真。

#### 村居

贫家风物厌铅华，波影浮来尽落霞。梦里青山閒岁月，镜中人面想桃花。秋镫病后惟馀砚，春水愁多未浣纱。枕上片魂谁唤起，夕阳烟树几归鸦。

#### 西山访隐

人远山深云景新，青溪石落画烟晴。飘残絮影遥知柳，啼遍桃花不见莺。沓嶂开天春一线，危岩飞瀑雪千层。野猿见客如相识，为叩松关鹤自迎。

#### 感怀

鹤煮琴焚事已赊，不堪回首数年华。愁来有句留残叶，梦去无人问落花。鸟惜晚香

窥槛镜，婢怜新病锁窗纱。柳枝剩有苏台曲，未审春风忆若耶。

#### 闰友见访感旧

蓬门来访碧山秋，别久相逢放更幽。红叶隐镫疏雨乱，白云堆榻晚风留。自埋书剑新篁寺，谁倚琴樽旧画楼。料得百花洲畔月，年年长照水空流。

#### 寄龚静照

诗狂生性与君同，遗世搜奇兴不穷。见说绿窗娴剑术，白云深处礼猿公。

#### 秋蝉

咽柳鸣槐较恨多，一声声送夕阳过。朱楼尽是笙歌地，不解悲秋奈若何。

#### 吴氏

吴氏，济宁人。

#### 辞世偈

风卷云雾散，明月碧团圆。了然无罣碍，池内现金莲。

#### 行刚

行刚，字祇园，嘉兴人，胡氏女。伏狮院尼。

#### 孟夏关中咏

百结鹑衣倒挂肩，饥来吃饭倦时眠。蒲团稳坐浑忘世，一任尘中岁月迁。

#### 德隐

德隐，苏州人，赵氏女，原名昭，字子惠。有《侣云居稿》。

#### 新秋晚眺

山中多晚凉，清风厉秋节。遥瞻四五峰，壁立皆奇绝。修竹傍林开，乔松倚岩列。黄菊散芳丛，清泉凝白雪。对此怀素心，千里共明月。愿保幽贞姿，岁寒双皎洁。

#### 种竹歌

南山南，北山北，其中有竹人不识。托根数茎临严霜，虚心愿并幽溪柏。秋深草木零落尽，此竹亭亭终不易。

### 春日泣怀先慈

兰闺仪范廿年馀，德耀神葩玉不如。坐帐每教吟五字，遗奁亲自绘双鱼。最怜辛苦怀兰佩，犹忆提携载鹿车。风木有情肠欲断，梦中空自学牵裾。

### 当湖文园闻已填茂草慰外君

遥望残阳落故墟，更传烽火遍州闾。绿沈渭亩临溪竹，香散文园满架书。钓艇苍茫浮少伯，琴台寂寞忆相如。多君腹笥依然在，词赋翩翩好似初。

### 祀寒山先墓

一天风雨倍伤离，回首寒泉曲涧西。伯道祠边猿独唳，中郎墓上鸟空啼。尘飞台阁书还在，雪压松筠鹤自栖。从此素丝凭世染，漫怜志与白云齐。

### 皆令黄夫人过寓山闺即事

吟得新诗子夜残，银缸点点照花栏。须臾小婢来相报，深竹乌啼月满滩。

### 美人

眉锁春山鬓点鸦，莫将桃李斗芳华。无心去逐风流队，閒向雕阑数落花。

### 维极

维极，馀姚人。仁和雄圣庵尼。

### 题莲花

幻出是毫间，休作《爱莲说》。花叶不沾尘，从今莫饶舌。

### 超越

超越，仁和人，武昌同知林杞女。雄圣庵尼。

### 忆维极师

冰雪家风古，萧然丈室中。当年亲教诲，数语发愚蒙。生死恩难报，箕裘愧未工。妙峰还掬土，道范邈何穷。

### 明萱

明萱，字悟真，仁和人，蒋氏女，原名宜。有《蕊阁偶咏》。

### 秋夜

忽见梧桐染淡黄，更闻鶗鴂叫秋霜。不因白发催明镜，且抱红心寄上方。就竹开窗通海月，当庭种桂散天香。閒来拥衲凭高坐，静听疏钟万虑忘。

### 落叶

消瘦寒林意自凄，可怜零落任东西。妒风何苦相凌逼，眷恋枝头不忍离。

霜染千秋色不同，纵然娇艳也成空。凭风分付东流去，耐等寒枝春不穷。

### 题英石

寂寞东山草更萋，孤峰独立绝恒蹊。年来不与人相见，风雨萧萧鸟自啼。

### 元端

元端，字御符，嘉定人，卢氏女。长洲尧峰尼。

### 书斋偶咏

榻寄閒窗下，相携话昔游。烹茶成雅集，开卷足清修。宿雨花生润，微风鸟自讴。留将残照影，静拂素丝幽。

### 石岩

石岩，仁和人，蒋氏女，原名薜英。辟支庵尼。

### 燕

满院晴光好，穿帘小燕纷。数声惊午梦，双翦碎春云。戏水香泥湿，冲烟夕照曛。参差频上下，红嘴掠青芹。

### 春夜与阇音师咏月

皓月轻飞处，经堂寂不哗。碎光穿竹罅，圆影架枝叉。露湿巢喧雀，风梳草乱蛙。与师清课后，相对理袈裟。

### 晓起遣兴

风扫云残霁色开，松根驯鹤舞苍苔。蚁拖榆荚缘墙去，蜂抱花须扑槛来。一雨绿盈分竹院，四山青压鼓琴台。悠然独立斜阳下，结阵乌鸢噪古槐。

### 忆梦

蕉团稳坐好安禅，炯炯金鐙法座燃。慧鸟鸣来深树里，乱山飞入小窗前。云谿碧海摩晴日，露洗空天散晓烟。记得梦中参我佛，色空空色悟真诠。

### 答蕊仙六姊

巫峡行云梦已遥，不须禅棒与诗瓢。白云深处青山里，一个蒲团万虑消。

### 题达摩像

折苇江流疾似帆，九年枯坐向寒岩。静中悟得言诠妄，笑把如来《大藏》缄。

### 妙慧

妙慧，江宁人，张氏女，原名如玉，字楚屿。

### 饮雨花台赋落叶

登眺台千尺，论心酒一尊。青霜侵树杪，丹叶舞江村。逐浪同浮梗，随风欲断魂。荣枯何足叹，此日幸归根。

### 妙惠

妙惠，长洲人。范氏女。般若庵尼。有《昙花轩草》。

### 般若招提晓坐

夜雨洗山岩，朝来翠独湿。趺坐学观空，清风满香积。正因字本无，而我好翰墨。心即等死灰，未了人间孽。窗竹皆虚心，庭松多劲节。体此长青树，原不在虚实。何况钟鱼间，梵理更无得。坐久闻妙香，慈航如可接。

### 寂居

寂居，字悟源，太仓人，王氏女。

### 书怀柬紫蘩女史

花钿翠袖久薙除，经案绳床意自如。性懒已忘慵慢习，家贫犹惜旧藏书。谈空有弟穷禅理，适兴从亲学蠹鱼。更喜萧疏尘虑少，草衣木食足安居。

### 静诺

静诺，仁和人，林氏女，号自閒道人。雄圣庵尼。有《息肩庐诗草》。

#### 幽居静坐

幽居惟自適，一编聊自遣。白昼一何长，安不自黽勉。古人虽往矣，微旨亦须阐。空檐滴长漏，炉香生宝篆。每当兴会嘉，双手不释卷。嗟哉世俗子，不解亲坟典。

#### 岁暮作

时序自推迁，忽然惊岁暮。举目见寒鸦，悲鸣如欲诉。太阳惨不舒，同云四野布。朔风时北来，哀号满庭户。翘首望阳春，阳春不我顾。居诸如隙驹，剥啄有定数。况我世外人，浮云已如故。园有数株梅，结伴尽堪度。

#### 古梅歌

阆苑琼姿不记年，屈曲古榦如龙盘。大庾万枝只如此，回旋曲折空山里。吐萼枝枝色正妍，移来小艇泊流泉。斜枝倒侵冰魂化，狂呼游客添杯罍。我欲携筇过隔溪，竹林主人远相迓。莫谓韶光还久留，人生適意多偷暇。

#### 过永庆寺逢牡丹作

东风习习春将夏，宝马香车如放假。夹道松杉满径阴，黄鹂坐语春风下。偏反绰约逞娇颜，徘徊终日不知还。花王似殿东王令，好鸟枝头笳鼓竞。莫言花落不如人，人老能如花更春。惟有青山常对峙，年年花落路傍尘。小鸟欲答忽飞去，宛转如歌昔时句。但使衰年无病侵，岁岁花前常小憩。

#### 夏日晚晴

窗白雨将去，犹存一帐寒。神清无俗梦，心定不生澜。红湿知莲苦，声迟识漏残。画梁新燕小，窥栋语殷殷。

#### 舟泊姑苏

扁舟今夜泊，遥对阖闾城。霞落浦云晚，鸦眠山月明。片帆归路远，千里客心惊。鼓枻不成寐，萧萧何处声。

#### 河渚初睡

石枕藤床万虑忘，跼蹐不逐世间忙。风生蒲扇人情冷，竹映纱窗月影凉。随地可消清夜永，无心尝戴野荷香。门迎流水尘声远，槛外松涛入耳长。

#### 赠杨夫人

一种高风迥绝尘，何缘邂逅觉生春。青莲堪证无生法，紫诰仍辉现在身。性洁自甘

泉石操，谈玄喜与法王亲。金陵风物称殊绝，道左流连话转深。

#### 春宵即事

野藤花气暗随风，狼藉春光一半空。斜倚石栏频望处，满庭明月有无中。

#### 阅楞严经

青莲自是出淤泥，在处明心更不迷。寄语学人须著意，本来无染即菩提。

#### 咏秋兰

长林众草入秋荒，独有幽姿逗晚香。每向风前堪寄傲，几因霜后欲留芳。名流赏鉴还堪佩，空谷知音品自扬。一种孤怀千古在，湘江词赋奏清商。

#### 僧鉴

僧鉴，吴县寒山庵尼。

#### 秋海棠

红甲垂垂白露姿，薜萝墙下最堪宜。不教鹦鹉呼肥婢，肯与莲花作侍儿。几处闭门秋雨后，何人立月晚香时。愁肠欲断非关汝，续命无烦叶底丝。

#### 初夏

落尽红芳入夏初，槐阴绕屋竹扶疏。清风一室閒钟磬，疏雨幽窗自看书。

#### 静维

静维，华亭人，盛氏女，原名韞贞。有《寄笠遗稿》。

#### 秋宵对月

夜静天地凉，凭楼独凝眺。烟树色离离，云山望中杳。万籁寂无声，数萤流木杪。青镫照罗幕，残叶铺池沼。悲哉今古情，乾坤徒浩渺。忧怀自苍茫，至意漠难晓。姮娥知我愁，流影来相照。当持金石心，千秋同皎皎。

#### 题春草堂

谢公游眺地，春草已无根。夕巷牛羊下，空檐鸟雀喧。可怜盱盼尽，徒有简编存。泪洒西州路，何人酹一樽。

十载重游地，孤城带落晖。西园迷旧迹，北渚长新矶。玉树人俱尽，金庭事已非。



何须闻短笛，独立自沾衣。

#### 赠圣幢师

自是闺中秀，超然远物华。心能同水月，骨自带烟霞。翠长真如竹，黄开般若花。  
寄言刘铁磨，应识赵州茶。

#### 夜坐

残灯照帘幕，楼阁有馀情。落叶堆蛩砌，凉风吹雁声。暮蝉愁里听，河汉望中横。  
独坐悲秋夜，疏棂淡月莹。

#### 村居杂感

春山斜远郭，渌水满晴川。白鸟孤云外，青林返照边。风波何处少，耕凿此中偏。  
莫作途穷叹，聊同鹿豕全。

#### 碧海

碧海风涛静不飞，凌霄高阁敞云扉。拥书千卷无人到，翦烛三更有鹤归。汉殿香消  
青鸟去，缙山秋冷玉笙微。劫灰辨得馀悲怆，独向人间寄衲衣。

#### 传正

传正，仁和人，缪氏女。万善庵尼。

#### 辞世偈

五十馀年似梦中，今朝四大各西东。了明性海无生法，更有何言说苦空。

#### 智生

智生，仁和人，黄氏女，原名竣，同县陆钊聘室。

#### 祖母命题菊花

帘暮暗生香，奇葩胜艳妆。不随秋草萎，独立傲繁霜。

#### 春日风雨

何事催春去，残红逐雨飞。飘风无处所，来岁可能归。

#### 宫词

长信宫中侍宴来，玉颜偏映夜光杯。银筝弹罢《霓裳曲》，又报西宫侍女催。

#### 夏词

炎威天气日偏长，汗湿轻罗倚画窗。蜂蝶不知春已去，又衔花瓣到兰房。

#### 咏雪

霏霏玉屑点窗纱，碎碎琼珂响翠华。乍可庭前吟柳絮，不知何处认梅花。

#### 德日

德日，泰州人，蒋氏女，原名葵，字冰心，号普林。有《拂愁集》。

#### 咏新柳

嫩软新枝不受肥，小蛮醉舞比腰围。欲舒青眼情难寄，但说蛾眉事总非。纤巧莺梭轻拂缕，翩翩燕翦欲裁衣。随风婀娜春无限，销尽吟魂好句稀。

#### 暮春苦雨即事

年来惟有感伤多，九十春光总浪过。镜里容颜空自老，梦中诗句为谁哦。飞花满院销银蜡，细雨空帘锁黛蛾。可惜繁华零落尽，香残酒冷奈愁何。

#### 雨中新柳

深黄浅绿雨中新，才倚雕栏更损神。翠色最宜侵少妇，柔条未可赠离人。衣沾清泪时时湿，眉染浓烟故故颦。无力舞风飞更歇，由来腰细不胜春。

#### 梦醒闻雁却忆女弟

依稀莲步梦中来，忽听孤鸿意自哀。尔来失群予忆妹，烦君寄泪到妆台。

#### 新燕

穿径衔泥漾好春，翩翩斗舞羽毛新。暖风吹入昭阳殿，妒煞轻盈赵美人。

#### 雨窗有感

梨花零落事堪悲，诉与孤窗夜雨知。静坐几回怜命薄，颦蛾正是断肠时。

#### 茉莉

一笑风前尽吐香，摘来几朵倍芬芳。琼姿馥馥羞珠翠，留与婵娟助晚妆。

月下梅影

轻笼淡月异浓妆，欲赋惭无白雪香。却到夜深人静后，一枝移向碧纱窗。

闻邻女哭声

閒看征雁立花阴，处处西风落叶惊。我为相思肠欲断，不堪又听断肠声。

初秋

萧然一叶下梧桐，初觉凉生小阁风。暑气潜消人意爽，卧看新月到帘栊。

凉夜西风枕簟清，钟声送月傍柴荆。寒蛩也识秋光到，砌下窗前处处鸣。

轻烟冷露染衣寒，无数流萤绕画栏。睡起悄然时怅望，秋声一片在林端。

德月

德月，泰州人，原名蕙，字玉洁，号雪峦，葵女弟。

雨夜梦与冰心女兄话旧醒来拈韵

孤窗閒卧不胜愁，梦逐娇痴旧地游。绣阁牵衣欣聚首，妆台倚膝倩梳头。惊魂夜半萧疏雨，分袂更残寂寞楼。枕上伤心无数泪，晚来宁忍一舒眸。

送花女兄

遥想娉婷态，晓妆梳裹鲜。玉英三四朵，送缀绿云边。

秋夜闻蛩

蛩音唧唧最关情，无限秋光映画屏。银烛高烧更漏永，不堪听处总成吟。

香奁和姊氏韵

无聊月下独焚香，暑气微消渐觉凉。徙倚花前频怅望，何时重见玉人妆。

小院凉生落叶风，天街玉露湿花浓。怀君泪笔难题句，瘦减腰围总病中。

小阁閒凭远绪生，香茶独啜不胜清。遥思月下吹箫态，料对乘龙跨凤人。

梦里相逢泪似波，云烟共涤对君多。秋声惊起愁人恨，怅望遥天横玉河。

携愁带病强吟哦，自恨红颜薄命多。一夜诗成无数泪，从今休想对君歌。

多病伤神力不支，一弯新月照愁思。昨宵魂梦牵衫袖，拈韵依稀赋别诗。

贪看新月不成眠，仿佛清宵对玉娟。诗思君家推绝调，吟成白雪却非盐。

新诗赋就更添妆，散步回廊转画堂。多病慈亲欣执手，愁中对月且流觞。

凋零门户不成家，骨肉相看空自嗟。愁到夜深浑欲寐，杜鹃啼破绿窗纱。

镜中小影岂无双，琴鹤看来祇自芳。镇日陶情诗共酒，雀屏无意选东床。

悟情

悟情，字石莲，丹徒人，翁氏女。

感怀

清浄而今遍六根，焚香幸作佛前人。已知性海须登岸，且向恒河试问津。口藏谁传弥勒法，心灯自照女儿身。痴情一点消难尽，吟到诗篇忘苦辛。

苍茫回首万缘空，漫说平生塞与通。眼见公侯兴败易，命怜姊妹死生同。只留此日袈裟在，不见当年锦绣丛。坐彻蒲团波浪息，心缘稳渡片帆风。

宛仙

宛仙，石氏女。长洲洞庭东山尼。

庵中写怀

禅关昼掩绝尘踪，前有修篁后有松。野鹤去时人少伴，晓云起处壁添峰。当时自识尘缘浅，今日谁知道味浓。千里赤绳从此断，超然何用讲三从。

翁氏

翁氏，仁和尼，有《息肩庐诗草》。

松鼠

炯炯双眸狡，如梭绕树丫。长公曾有赋，贞女刺无牙。性癖犹耽果，情顽不息花。行藏那可问，穿穴是生涯。

绿牡丹

一枝娇艳殿春开，疑是芭蕉分影来。云鬓漫劳秦女挽，宫纱须趁曲江裁。轻盈自可藏幺凤，绰约偏宜映古槐。回首梁园他日事，不禁花下几徘徊。

智圆

智圆，字湛然，常熟人，殷氏女。

孙贞媛诗

月皎皎，风潇潇，贞魂跨鹤翔云霄。雾鬓烟鬟人不识，一炷栴檀默与招。旃檀香远飘如篆，环珮初过廿四桥。桥头有客迎仙驭，相对箕坛夜沈寥。灵符辄感蕙云女，不比人间花木妖。蕙云秀毓吴淞里，乌衣贵族珥金貂。父掌铨衡作卿贰，忠心贯日压班僚。明师动地烽烟起，鼙鼓喧阗至正朝。大厦倾颓燕雀尽，剩有孤雏逐絮飘。孤雏赖姬相奔窜，襁褓呱呱魄荡摇。避秦难觅桃源渡，且向珠湖拨短桡。漂母祠边侨寄稳，一枝栖息同鸕鹚。家乡尚隔长淮水，回首燕都路渐遥。世乱初平畴庇倚，羞涩空囊命不聊。饮蘂茹荼总酸楚，凄凉暮暮还朝朝。流光迅速惊驰驶，转眼盈盈羨阿娇。养就娇娆真可羨，花枝如靥柳如腰。更怜残喘溘然逝，空闺独守心忧焦。自分门庭久零落，春风无意歌《桃夭》。强暴欺凌畏多露，谁知恶客盗红绡。掠卖扬州守贞女，向诉无人怨未消。泪凝朱袖凭珊枕，镜掩青楼弃翠翘。自此繁华竹西路，歌吹从他意气骄。妾心好比琼花冷，誓死泉台志独超。往事沈沦四百载，精灵未散广陵潮。闻卿已证仙班久，琳宫翠水莹芳标。愿和湘女弹瑶瑟，不伴秦姬弄碧箫。临坛带泪叙畴昔，松柏宁随众卉彫。丈夫节概当礪落，烈行偏从巾幗昭。留得表贞诗百首，輶轩伫望采风谣。

吊彭娥

匹妇得成名，寒门志甚贞。乳雏怜燕羽，逐妇恶鸠声。智以穷愁短，身因激烈轻。寸肤如可鬻，泾渭不分明。

次韵题明妃图

遥辞汉殿泪痕稠，沙漠凄凄雁阵秋。到此画工忘故我，也惊愁绪锁眉头。

姚霓

姚霓，字静韶，吴江人。幼为尼，江氏女。

春夜

新篁风韵夜窗幽，好梦惊回惹旧愁。一瞬春光归去也，子规啼月下西楼。

明修

明修，字可尚，号东悟，常熟人，高氏女。维摩寺尼。有《鉴云留迹》。

合江

合江山色好，耐可雨连绵。欲觅峨眉路，须凭般若船。云峰呈晓景，仙树带秋烟。咫尺翘瞻处，将登第一天。

送亲礼师登戒

幻途无处不朝真，从此休言涉世尘。陟屺正堪慈月好，登堂又喜觉华新。三迁教子缘方得，六十耆英道正亲。此去报恩兼利众，坦然显现法王身。

示众

妄谈般若妄谈宗，误引群聋学我聋。夙契心源形实相，事随世理显虚空。人因有执机皆塞，物为无情道尽通。可是个中真的处，太阳西去水流东。

泊舟

渔火村镫两黯然，暮云空隙见长天，波平江面光微动，瑞靄轻摇不是烟。

心中

心中，濬县人。

和天台雅集韵

年来观道礼三宾，清梦神游法界频。今识仙源浑不远，传将铁笔尽钩银。

南池旌旆建高秋，又看移来豫北留。昨日大伾山下过，恩光先被鹳峰头。

玳筵珠履客争归，公暇朝衫换氅衣。从此安昌成朗苑，衙斋花轴又增辉。

家住桐庐水石寰，随亲游幕未南还。髫龄失怙伤孤露，十载跼踖落下山。

学和阳春逸兴遥，吟馀花雨霎风飘。瑶池未许莲池汇，何处慈航度法桥。

棠荫淇源故老知，王公路柳系人思。而今绣斧清霜肃，正是绳徽式穀时。

摩诘

摩诘，震泽人，任氏女。有《桐里诗草》。

经虎丘

鹿走苏台春寂寂，江花江草伤心碧。行人不见古今愁，指点青山王珣宅。

镜明

镜明，字定安，仁和人，陈氏女。孝义菴尼。

口占示徒

庭中卓刹竿，悬幡更悬鐙。鐙明大千界，幡引最上乘。门外河之水，照面复照心。真面何虞皱，道心须要深。

慧机

慧机，钱塘人，谭氏女。慈孝庵尼。

答觉罗赫舍里夫人

山云归自山，水云归自水。问云云无心，还问看云子。

## 【卷二百】

李性源

李性源，朝鲜人。

恭和御制赐朝鲜琉球安南诸国使臣诗

尧阶春叶报中甸，湛露恩深法宴频。薄海欢欣同玉帛，寰区庆祝竞神人。陪筵每感黄封遍，赐酝那安御手亲。五纪馨香臻八耋，南山北斗总归仁。

赵宗铉

赵宗铉，朝鲜人。

恭和御制赐朝鲜琉球安南诸国使臣诗

春回庆岁月中甸，玉帛来庭侍宴频。姬箴万年跻寿域，尧阶三祝效封人。身沾法酝叨恩旷，衣惹炉香仰圣亲。武帐嵩呼同内服，双擎云汉颂皇仁。

朴齐家

朴齐家，字修其，一字次修，号检书，朝鲜人。有《暂游集》、《贞蕤稿略》。

九层洞同京山李丈汉镇

红树塞天地，不知山更多。脱巾松下饮，抱膝水边歌。世狭容吾懒，官贫耐客过。犹能理诗律，学杜祖阴何。

白龙潭

百笏泓澄贮碧霞，鹰岩皴石一支斜。村容近接亭亭树，水次丛开冉冉花。细雨披蓑看更美，新泉灌稻事堪夸。但须耕具兼渔具，还有黎城合置家。

次李宜庵韵

心静还知丈室宽，酒酸犹博片时欢。十年人似齐门瑟，半世文多楚相冠。感此孤虫催岁暮，飘然旷野履霜寒。乡村寂寞眠常早，月压柴荆未出看。

丰田途中

入谷青丝马，春风时一鸣。山花樵更发，河柳卧还生。蔼蔼村边雨，迢迢原上耕。五云如可覩，鳧舄去朝京。

李黄中

李黄中，字公一，朝鲜人。有《甘山诗集》。

游宝盖山深原寺

净地来何晚，春风事几慵。落花深一寺，流水住孤松。岸断山光绿，墙回月色浓。天津桥上老，岂识此龙鍾。

柳得恭

柳得恭，字惠风，朝鲜人。有《歌商楼小稿》。

松泉杂诗

紫霞洞里草菲菲，不见宫姬并马蹄。为是辛王行乐地，至今犹有燕双飞。

荒凉二十八王陵，风雨年年暗漆镫。进凤山中红踯躅，春来犹自发层层。

洪敬谟

洪敬谟，朝鲜人。有《海岳诗选》。

三日浦



朝入蓬莱暮阊风，琼班旧侣已成翁。鸥如相待三秋后，鹤亦重来十载中。飘馭苍茫渚云白，兰舟摇漾夕阳红。纵教百日沿洄久，回棹还应首更东。

崔梦远

崔梦远，字松崖，朝鲜人。有《松崖诗草》。

与清湖共赋

过江鸿雁碧云秋，客思迢迢恋旧游。世远文章常欲哭，酒醒风雨易生愁。芦花白处怀印友，柳叶青时到此楼。共是穷途馀侠气，羞将斑鬓对清流。

李晷应

李晷应，字谦伯，号少闲居士，朝鲜人。有《少闲居士集》。

东郊晚眺

总是谿山不世情，禅心浑觉静中生。斜阳明媚川原迥，野色苍茫草树平。诗到深秋烟共澹，人来胜境月俱清。游筇从此寻真好，绕岸幽蹊一线横。

权敦仁

权敦仁，字彝斋，号瓜地老人，朝鲜人。有《彝斋诗集》。

访山寺

二载名蓝约，山秋石意斜。西风将远客，流水过田家。稻翠行随马，蔬香间带花。吟鞭閒不定，绕出赤城霞。

同镜师作

灌木鸣风绝涧隈，柴门逐水静风埃。茯苓已向山僧乞，芥菜多从春市来。

金正喜

金正喜，字元春，号秋史，又号阮堂，朝鲜人。

寄题程序伯画山楼图

几叠迂痴画里山，楼边腕底碧斓斑。烟云供养无理寿，青眼相看万里閒。

洪良浩

洪良浩，字汉师，朝鲜人。有《耳溪散稿》。

#### 岳州感古

吾祖分符地，今孙仗节来。阳春千室化，山浦百年哀。片石新华屋，寒花旧钓台。欲招遗老尽，孤月与徘徊。

#### 峡中即事

小舆云外出，天地此身高。古壁流蜂液，阴龕养石膏。村龙逢虎狎，山鼠见人逃。供眼多奇事，崎岖未觉劳。

#### 廿二日登金沙峰观海

醉倚金沙巔，西溟把盞前。日兼云共荡，天与海俱圆。若木知何树，青齐或见烟。心胸元自在，毛骨却翛然。

#### 望登莱

我国西环水，华人谓大瀛。鲁连夸一死，秦帝羨长生。三山非别界，千古冒虚名。痴梦真堪笑，题诗代史评。

#### 挂弓松

挂弓松，乃在咸州之本宫。云是圣祖手所植，尚馀三枝后庭中。亭亭偃盖荫十亩，上有光怪干碧穹。龙拏虎蹲势欲腾，柯如苍玉根如桐。雪峰山下驰马归，三尺乌号挂如虹。枝头袅袅上弦月，叶间瑟瑟带箭风。南征北伐倚神器，乌喙斲面无全瞳。孤矢方猗数十载，天地清夷日域东。威加宇内眷故乡，仙跸重来似旧丰。銮声兮嘒嘒，翠盖兮童童。清阴芳草宴父老，《大风》之歌何飒飒。祥云常绕万年枝，古榦扶疏立穹窿。往岁岛夷犯大邦，兴王旧壤烟尘濛。敢以斧斤入宫树，龙鳞一片鲜血红。忽然惊风掣地起，若有轰雷殷半空。群盗相顾尽兽骇，不觉叉手仍鞠躬。树木尚为神灵护，枝叶皆与造化通。从此骄虏折凶图，咸识圣人树立雄。苍髯屹然四百年，铁山扶桑相始终。呜呼！欲知当日栢沐功，须看金櫜绛纱笼，中有十三羽箭一角弓。

#### 登乐民楼

汉沛周岐尚有村，龙蟠虎踞势腾奔。山从白岳分千脉，水到沧溟会一门。骏马云屯同冀代，雄城棋布壮藩垣。如今万岁桥前路，惟有笙歌日夕喧。

#### 入关杂咏

桓公北伐至孤竹，武帝东巡礼岱宗。大帙神人谁复识，羽衣仙子竟难逢。游谈遂化燕齐俗，豪侠尚传王霸踪。况是边风好驰射，居民不复力耕农。

唐文皇帝昔东征，黄钺亲将天策兵。遂以至尊临绝塞，宁知万乘困孤城。玄龄垂死留书谏，仁贵捐生跃马迎。从古明王勤远略，不如高拱享昇平。

书生白首对青镫，卷里山河见未曾。秋水讵能窥海若，夏虫难与语寒冰。龙门笔壮汉司马，巴峡诗奇杜少陵。不出户庭知六合，圣人犹复泰山登。

#### 寄谢翰林院修撰戴公

生平慕古人，夙怀四方志。每恨东海偏，未睹中华懿。颠发已种种，偶充朝元使。眼看神州大，足践尧封地。侧闻有戴氏，赫舄声远暨。三苏可并驾，二陆方联辔。状元何英妙，哀然为国瑞。无路接光辉，愿言徒倾跂。有客颇倜傥，好文仍好义。拟上光范书，遂怀孔融刺。既覩君子仪，兼致主人意。一见即解榻，再见更倒屣。谈理如析毫，论文已日齐。上下扬千古，快若并刀利。虚往每实归，亦足窥一二。幸因蟠木容，得识瑚璉器。纵未登门屏，犹喜质文字。王程有常限，归期在造次。睠言怀伊人，宁无感气类。不意蓬莱客，殷勤致珍馈。瑶函动光彩，罗列文房四。摩挲手不停，个个香且膩。岂徒物为美，谅是贤者赐。况我老翰墨，真慙性所嗜。赋之由中心，受言藏弊笥。自顾疏且远，乃蒙不遐弃。无以答厚意，礼际良可愧。但愿崇明德，九仞加一篲。茫茫宇宙内，孰非男子事。惟能择路歧，然后造精粹。敢将一言赠，聊披片心示。精神贵相通，何间山川异。春风动江海，悠悠策征驂。愿凭东飞翼，毋慳尺素寄。

#### 望夫石歌

山头一片石，屹立青海傍。偃蹇不受秦王鞭，孤洁颇似贞女肠。行人借问贞女谁，许氏少女字孟姜。姜女少小何窈窕，嫁与东邻范家郎。郎年弱冠即从军，迢迢万里戍渔阳。青镜持赠别后面，纤腰未脱嫁时裳。少妇不解别离苦，娉婷十年守空床。金微草白风雪虐，玉窗花飞岁月忙。长城之役何太急，天子威令寒於霜。千杵不堪筋骨绝，一身谁洗刀箭疮。昨夜深闺梦郎至，颜色憔悴言未详。恹恹惊觉妾心动，仓卒清晨起严装，弱质不惮度关河，柔情那忍别爷娘。千古万辛到榆塞，郎君踪迹竟杳茫。始言某年石压死，或说何方战陈亡。城边积骸与城齐，子之丰兮何处僵。人情到此可奈何，惟有昂首呼穹苍。泪尽气竭声不续，彷徨更陟山之冈。朝朝暮暮望郎来，愁云霭海天长。齐城已崩哭杞梁，湘竹空斑泣娥皇。明月夜伴山鬼啼，沧波春与水禽翔。长留拳石水不啮，但闻骊山草已荒。不见东海又有隄上妻，千载芳魂永相望。

#### 发北巡向顺安

行鼓初鸣驿骑催，邮亭小雨净无埃。雁声远自云间落，秋气先从塞上来。村女田中方拾穗，农夫树下共衔杯。天时更觉重阳逼，山菊如期处处开。

#### 保和殿参宴见荷兰贡使亦与斯乃前牒所无也诗以识之

冀野星分近斗木勺，皇王定鼎自唐尧。长城万里连沧海，金阙九重抗碧霄。日下容光皆遍照，寰中寸地毕来朝。西溟又有荷兰国，六纪重来献璧瑶。

李光稷

李光稷，朝鲜人。

和陈云伯咏老松

有客挥毫赋老松，笔端但觉翠重重。踏馀偃蹇霜枝鹤，吟罢蹒跚雨叶龙。清韵已知擅朱夏，寒心应不畏玄冬。晚来东海风吹急，欲洗秦家曩日封。

权永佐

权永佐，字晶山，朝鲜人。

和印心老屋陶云汀赠诗

客星口点犯仙槎，习气全粗任笑哗。眼目井观居左海，人才霞蔚慕中华。字成瘦柏分题墨，芽展初旗试啜茶。喜得逢君天下老，柴桑氏族古名家。

洪羲锡

洪羲锡，字骆皋，朝鲜人。

和印心老屋陶云汀赠诗

燕天万里踵星槎，雅会今朝远俗哗。笔下传情移日色，眉间得气爱文华。室闻兰馥频斟酒，味合诗香细啜茶。奇绝兹游都可忘，羁愁摆脱胜还家。

洪羲瑾

洪羲瑾，字晚窝，朝鲜人。

和琉璃厂遇陶云汀有作

逢君不负远游槎，如水交情屏市哗。仪范出尘依玉树，文章超世赋皇华。中朝雅望方簪笔，半日清谈共品茶。诗道须知源有自，古来靖节最名家。

韩致应

韩致应，字莠山，朝鲜人。

和印心石屋陶云汀赠诗

玉河风雪泊星槎，闭却羁窗语寂哗。僻处外藩无面雅，喜闻内翰有声华。青揩两眼耽看稿，香沁双牙胜啜茶。靖节渊源传绝响，古来诗道数君家。

申在明

申在明，字纶斋，朝鲜人。

答陶云汀内翰赠诗

才非观国愧乘槎，客馆残书远市哗。嘉制忽欣观雅册，大方奚止仰文华。清高节缅霜前菊，爽朗香浮雪里茶。人在卷中思不见，玉河孤月照谁家。

韩永元

韩永元，字西园，朝鲜人。

寄和印心石屋之作

送春馀恋趁初晴，高阁微风瞰远城。叠架香尘生墨晕，曲栏晴昼落棋声。山中把酒参同社，江上谋田忆旧盟。芳夏小园多韵事，经衣尽日树间行。

韩永献

韩永献，字小湖，朝鲜人。

寄怀陶云汀内翰

不待招邀至，心交若有神。高歌将进酒，留醉未归人。落笔幽香远，登楼霁景新。桃花两三树，犹得驻芳春。

李晚用

李晚用，字石樵，朝鲜人。

寄怀陶云汀内翰

字诗还不记，閒境厌劳神。痕饮无如我，落花何与人。尽教风雨过，却照别离新。门外多芳草，经过犹是春。

南尚中

南尚中，字雨村，朝鲜人。

寄怀陶云汀内翰

屡被诸公赏，惭无诗入神。清风生钱席，好雨慰农人。地僻交游罕，时移客味新。

晚过桃李下，犹似领残春。

许栎

许栎，字淡岩，朝鲜人。

寄和印心石屋之作

昆山产宝玉，蕴藉金堂姿。光气那自掩，切琢当及时。不必待卞和，愚夫亦知奇。怀抱已倾倒，词翰何淋漓。虚往实而归，愿言长追随。无限尊中酒，旋愁别后思。但垂金玉音，鸿雁归未迟。

郑五锡

郑五锡，字山石，朝鲜人。

留别云汀

士生一天地，交契不封疆。心认挥毫正，辞薰煮茗香。相期崇德业，馀事露词章。云树分襟后，清标讵可忘。

洪显周

洪显周，字世叔，号约轩，朝鲜人。有《海居斋诗钞》。

题人扇头墨梅雀

读罢西湖处士诗，纸窗疏影两三枝。山禽梦著无人见，应是参横月堕时。

到杨花津敬次伯氏

风光流转共谁期，燕燕莺莺总旧知。杨子江头春欲尽，桃花水暖锦帆迟。

沙磔潭泛舟

溯去澄流卷去沙，桨声斜日动伊鸦。芒鞋北壁攀苔石，酒榼南江傍荻花。游子笙箫无定处，居人舴艋以为家。请君莫放今宵月，冉冉谁能驻岁华。

拈放翁韵与石见

兼旬病起始开扉，春色三分一半违。细草渐缘溪岸遍，新禽已过树梢飞。花风柳雨人空老，山月江云梦每归。何必区区齐物我，庄生犹是达生非。

呈石见邀和

晚节渐於尘事远，新诗自写仿《黄庭》。曾闻梦里收龙尾，复道人间落岁星。宦迹旧荒三径草，閒情今作一流萍。白头坐说先王日，相对吞声涕泪零。

#### 红处

红处分明绿处昏，朝来犹带雨馀痕。梦回流水桃花境，画在板桥杨柳村。写偈妙参松雪意，作诗香返玉溪魂。春游不倦登临费，一翠微连履道园。

酴醾欲醉海棠昏，争似佳人带睡痕。暖气多情烟外岫，夕阳生色雨馀村。夕吟芳树香销骨，苦忆名山碧沁魂。菰菜芹羹入新味，厨房供给足家园。

#### 金流洞

攀萝扞壁上山贪，时听云端落笑谈。天遣灵区超分外，人将流水比双南。凄风冷雨秋重九，瘦策宽鞋客两三。或恐新诗干造物，不教明月到禅庵。

#### 李尚迪

李尚迪，字惠吉，号藕船，朝鲜人。有《恩诵堂集》。

#### 次柏静涛正使清川江韵

东渡星槎赋海初，词源直溯木玄虚。行怜地古攀榆叶，却愧厨寒饷鲙鱼。野渡停骖春水冷，山楼珥节夕阳流。他时傥得黄公讯，为报相思满月如。

#### 癸卯正月七日燕馆得王子梅张仲远书追赋一律示仲远兼寄子梅

客中人日思冥冥，取次诗函眼忽青。细数旧游如断梦，几多知己又晨星。杂花三月江南路，名士千秋历下亭。自笑敝裘何所事，乘桴吾道在沧溟。

#### 还发闾延留赠白瞿山赵绛雪

归旌东指路无穷，鞞鞞遗墟落照红。山泽气蒸常作雨，铙笳声咽故多风。他时我恋空桑宿，今日谁推大树功。离思乡愁同错莫，戍楼西去月如弓。

#### 溟上杂诗

雨丝风片禁烟时，古柳神鸦叫水祠。莫问九梯宫旧事，玉鞭消息草离离。

#### 李尚健

李尚健，字天行，号以堂，朝鲜人，尚迪弟。

题程序伯画山楼图

幼與丘壑少文居，染翰沈吟晚眺餘。鎮日畫山山似畫，一帘空翠夕陽疏。

烟林供養足幽居，淡淡山容墨戲餘。畫里逃禪堪自適，何妨高士世情疏。

趙秉鉉

趙秉鉉，字羽堂，朝鮮人。

東林城呈靜濤天使

蘭舟初放綠波空，千里逢迎細雨中。四牡如飛春昼永，岸花汀草一番風。

徐相雨

徐相雨，字秋堂，朝鮮人。光緒十三年充貢使。

桃花洞寄懷日下諸友

我生九夷內，識字陋且疏。六十闌闕眼，三入醫無閭。吳蜀壯游者，或有羨慕余。人本箕疇旧，儀猶漢官餘。論交略名位，情真極吹噓。書林與畫圖，招邀恣意摅。恨不展歸限，一年燕邸居。晨興促膏秣，言旋敢徐徐。天末動別情，海外送征車。登高悵遠望，慨然念居諸。不才應使職，智慮誠拘虛。若我自為暇，行當賦《遂初》。擬訪仙人窟，復尋高士廬。塵霾阻幽興，岩壑氣不舒。獨坐老禪榻，百面咄咄書。山靈傥憐我，重許良會與。

李承五

李承五，字三隱，朝鮮人。光緒十三年充貢使。

松筠庵即席唱和詩

短屐沖泥雨後尋，松筠成蔭古庵深。千秋高節楊公在，輸與詩人贊誦音。

燕月遼雲奉使年，驪駒悵別又秋天。萍踪复合非無日，叵奈當時已惘然。

閔哲勛

閔哲勛，字聖若，朝鮮人。光緒十四年充貢使。

光緒戊子正月廿九日偕黃鹿泉農部膺楊惠咳大令壽彤徐仲阮駕部恣立訪

何桐云農部桂芳茶市之晚香齋同集者蕭襄廷學博長裕易■農比部炳奎郭杼田比部  
庆治龚省吾礼部镇湘张亶臣大令祖纶张憩云学博章峻童子何炜郭家冕谈燕甚乐皆有诗相赠



## 奉答二章

佳游茶市趁春光，翰墨因缘缔吉羊。身似登龙瑶席忝，心随归雁海天翔。剧谈尘柄霏琼屑，好句蝉联晕笔香。此会此生应可再，雍容风采几仙郎。

湖海文章会一堂，远人何幸挹馨香。郁金美酒醒仍醉，戛玉佳章短更长。藤带午阴方漾绿，柳迎春色渐舒黄。石缘应是三生订，蘅杜牵思未忍忘。

## 金绮秀

金绮秀，字仓山，朝鲜人。光绪十五年充贡使。有《放鹞散草》。

## 梅花明月送春史

黄昏剥啄客来初，一半青山是我居。抵死看梅情不俗，平生与酒契非疏。剧谈难了心中事，少坐强於别后书。明日送君西去路，亲朋其奈两忘鱼。

## 步云养方山厓石唱酬韵

落落亲朋一枕间，江湖鱼鸟更相关。已知身外有馀地，自在胸中无数山。吏部文章今属梦，承天明月孰同閒。沧浪髭发吾犹尔，只许浮云共往还。

## 李敦夏

李敦夏，字峒云，朝鲜人。光绪十六年充贡使。

## 上徐寿蘅侍郎

文昌临照众星回，大地英声贯耳雷。四水中央蓬岛屹，五云直北玉楼开。斐才稷下群英集。韵事山中宰相来。此在吾东犹盛举，况今奇躅住燕台。

## 李僖鲁

李僖鲁，字眉下，朝鲜人。光绪十六年充贡使。

## 题江亭雅集图

慈悲古刹翼然尊，奇石经幢泐尚存。东海飞鸿双爪迹，祇林新印碧苔痕。

## 曹寅承

曹寅承，字东谷，朝鲜人。光绪十七年充贡使。

## 月波楼题壁

洞仙关外路悠悠，疏树晴烟澹似秋。政喜江山浑入画，十年重上月波楼。

间道述怀寄黄鹿泉燕京

东人加额日詹清，经岁辽阳阻使旌。风劲沧溟鹏欲徙，天寒碣石雁无声。那将赵盖相望道，妄谓秦关未出兵。箕坦颍清何处是，伤心不复对残枰。

徐正淳

徐正淳，字褰斋，朝鲜人。光绪十七年充贡使。有《燕槎行卷》。

善竹桥

崧岳千峰夕照边，旧时宫阙总寒烟。至今一掬桥头血，生色高丽五百年。

辽野道中

巫闾天半势嵯峨，渤海东连万里波。卷里曾抛閒岁月，囊中始识大山河。尉迟孤塔斜阳远，秦帝长城落木多。惆怅古人今不见，西风回首一高歌。

宁远城祖大乐大寿敕建牌楼

石楼双峙尽环奇，赫阁元勋耀一时。争及野田衰草里，行人来访四同碑。

孤竹城谒夷齐庙

滦河流域绕空城，清节祠前万古情。多少世间轩冕想，於今回首一铢轻。

沙河驿遥同赵幹山侍郎寄赠韵

老去情怀远别难，殊方为客岁华阑。至今歌筑悲燕市，却喜衣冠睹汉官。王事敢言原隰苦，病躯偏觉雪霜寒。可怜此夜沙河月，清景应同万里看。

李永珪

李永珪，字春史，朝鲜人。光绪十七年充贡使。

黄农部见访赐诗病不能兴依韵和答

经年旅馆病河鱼，白露苍葭对月初。再咏《皇华》敢言劳，曾闻叔度众推誉。自同其气还同臭，未见斯人先见书。多谢高车来枉过，起余榻畔整冠裾。

郑景云

郑景云，字其山，朝鲜人。光绪十七年充贡使。

访黄农部不遇有作

旅馆沈吟久，閒探高士扉。园童迎客拜，庭鹤向空飞。采药知何处，停云尚不归。松间悵怅立，无语对斜晖。

李赞范

李赞范，字丹圃，朝鲜人。光绪十七年充贡使。

黄农部见示诗和韵

一曲《阳春白雪》高，远追《风》、《雅》注《诗》毛。駢征原隰三千里，世守骅骝奉节旄。

陶然饯别短长亭，吟册光生汗简青。千顷汪波医我俗，每谈高致忆趋庭。

李镐翼

李镐翼，字陶饮，朝鲜人。光绪十八年充贡使。

和黄农部尖叉韵

月影初圆露气纤，已看春令换冬严。良宵盞满羔儿酒，珍品盘登虎子盐。九陌红尘飞甬路，万家火树上衡檐。街童识得元宵趣，买取花灯挂指尖。

书断天涯数点鸦，嘉辰游赏绕香车。画桥明月侵罗袜，银烛微风翦彩花。填咽笙歌熙世象，庄严楼阁达官家。羈人愁绪权抛却，共把金尊赋八叉。

郑翰谟

郑翰谟，字观海，朝鲜人。光绪十八年充贡使。

和黄农部尖叉韵

悄悄羈怀烛影纤，更听诗令戒申严。春风已啜醲膏粥，冬雪初消著水盐。塞北征辔尘满袖，巷南门欂树捎檐。巴音愧和峨洋曲，虚把瑶琴弄玉尖。

凤闈日暮下啼鸦，译馆行人久驻车。深契待看香挹■，新诗留玩笔生花。沧洲经济应需世，工部苍茫岂问家。翘首仙庄还入望，停云远树忆镳叉。

李乾夏

李乾夏，字仁崖，朝鲜人。光绪十九年充贡使。

光绪癸巳春偕盛斋判书友松仆正暨砚农金事奉使年贡徐鞠人太史设饮於所

居北江旧庐在坐顾通政孟徐两侍御龙喜社主黄农部宾主九人越十数日农部集同志祖道竟日谈宴赋谢录别

藐余才不逮，重选膺使命。经岁恣游览，始识人文盛。群贤缔兰交，清宴遵觞令。雅度何汪洋，纵谈挥麈柄。龙社更寻诗，高评若冰镜。茶烟裊鬓丝，盆梅红相映。临歧多赠言，卷里富新咏。欲和郢中音，向君还请正。

李暉

李暉，字盛斋，朝鲜人。光绪十九年充贡使。

和仁崖中枢韵赋谢黄鹿泉农部

大地鍾英才，文章乃司命。蒐古涵万卷，驰骋鸣时盛。感君许结社，骚坛敬闻令。击钵撰奇句，颠倒造化柄。胜缘詎多得，素心照如镜。寻诗复作会，藻采恣辉映。愿言风谊高，式补《皇华》咏。将旋知几日，还问诗法正。

沈远翼

沈远翼，字友松，朝鲜人。光绪十九年充贡使。

和仁崖中枢韵赋谢黄鹿泉农部

出疆愜初志，风流敢自命。观乐驻行旌，云物此全盛。文从子长游，书爱率更令。时复忆沧洲，春宵望斗柄。何幸识群英，论才仰藻镜。投契依末光，心澈冰壶映。金台醉斜阳，慷慨发歌咏。临归共敦勩，春王奉周正。

崔性学

崔性学，字砚农，朝鲜人。

和仁崖中枢韵赋谢黄鹿泉农部

海隅有狂客，友朋为性命。廿年游玉京，折节慕名盛。若将声气求，黄鸟鸣春令。故文畴与论，彩笔助谈柄。学业犹未成，白发羞揽镜。诗画纷赓行，满船虹月映。望古一披襟，不徒恋觞咏。敢言吾道东，许心实持正。

叔鸿侍御见示癸巳元日八砖斋砖韵诗依韵答赠

钟鸣九陌散香烟，绣毂纵横月满天。甲第华灯连巷树，丁帘彩髻绕阶砖。歌随玉笛才春喉急，妆理琼花掠鬓偏。选胜不知乡国远，聊将尊酒贺新年。

春暖都门柳蘸烟，不禁归梦海东天。论交此日忘车笠，好古生平抚甃砖。笑我星轺谑俗远，谢君冰鉴爱才偏。謁来北学吾将老，强记风流似少年。

#### 赠志青侍御用前韵

清淡笔底落云烟，倾盖城南尺五天。敢道遗芬留桂苑，争瞻峻望在花砖。日斜瓿茗留香暖，春早盆梅得气偏。把酒重逢敦夙好，此诗应记各编年。

#### 赠鞠人太史叠前韵

五云深处焕祥烟，手造凤楼笔补天。气压揆文《长庆集》，名高开国未央砖。京华私觐承欢宴，王道怀柔化党偏。从此北江企山斗，诗盟东海乐尧年。

#### 留别龙社诸君叠前韵

客里光阴届禁烟，离尊相属杏花天。征尘欲拂新题扇，奇篆犹摹旧赠砖。千里订交能莫逆，几人谈道本无偏。燕南歌筑君休笑，祇恋斯游已廿年。

#### 李正鲁

李正鲁，字东溪，朝鲜人。光绪二十年充贡使。

#### 题献馆泳春集

竹翠花香境自偏，满堂俎豆祀先贤。更搜奇迹开吟馆，石墨淋漓抚汉墀。

酒星高处聚文星，名士论交眼共青。屈指平生无此会，风流岂独让兰亭。

感君磊落语情亲，翰墨煌煌不染尘。何幸良辰相践约，珠盘玉敦证前因。

#### 黄章渊

黄章渊，字晚堂，朝鲜人。光绪二十年充贡使。

#### 题献馆泳春集

春日城西馆，有期君子来。诗书留汉殿，剑筑上燕台。此地登高赋，何人专对才。空堂先哲在，多士扫青苔。

#### 李承汉

李承汉，字古农，朝鲜人。

赠杨惠暉大令叠原韵

莫把书生我，呼为画省郎。凤题君子室，乌爱丈人堂。磨杵工良苦，和盘调岂常。  
十旬于役久，柳色变青黄。

金永爵

金永爵，字德叟，朝鲜人。有《邵亭诗稿》。

纪晓岚紫石砚歌

十砚先生癖於砚，罢官归里瓶无粟。惟有诗束两牛腰，端坑奇石声相触。就中济阳  
井叔刊，日夕摩挲爱尤笃。篆籀苍劲铭其背，八角廉棱截紫玉。金樱手捧隃麋香，品月题花  
幽事足。淬妃欣说遇钜公，晓岚清雅不入俗。山斗声名遍华夷，徂夏我读《溱阳录》。西清  
常共补被携，小泓晴虹光怪数。松园前辈驾星槎，邂逅论交蒙赠辱。笔势矫矫传海邦，渴骥  
奔泉无足卷跼。春风吹落经畹斋，几案清哦佐醺醑。茧纸百幅白如银，宝物如今於我属。见  
此宛若对昔贤，净水莲房手自浴。留作吾家永宝用，岂数金线与蛾绿。六传百有九年间，鹄  
眼几点记往躅。为证邵亭文字祥，明窗续成《中林曲》。

暮春幽兰小集

岳下岚漪坐处深，韶光收纳养诗心。春阑已觉千花乱，院寂自闻一鸟吟。烟散茶炉  
鸣涧籁，云生画壁响山琴。寻芳近日奚囊富，惟许高朋独赏音。

渡江

翩翩冠盖入中原，翠幕江头饮别樽。衰草烧痕微辨路，寒林暮景远疑村。平沙列戍  
红兜出，老树祠神素楮翻。借问爰阳何处是，青烟一道隔山昏。

雨夜与李友石曹烟岩两侍郎沈苕石朴锦铃曹荷上三承宣赵兰西学士游挹清楼

老来颜发已全凋，犹喜风流未寂寥。山雨涤襟浑忘暑，江风拂袖欲生潮。壮游历历  
从头算，晓月依依举手招。一枕初回盟鹭梦，茶烟起处拾残樵。

南轩即目

庭树秋风高，槭槭起寒响。落叶恋旧枝，低回复欲上。

赵玉坡

赵玉坡，字荆峰，朝鲜人。

偕宋子材太守游望湖亭

青云联步上层楼，山色湖色一览收。风送千帆欣纵目，雪侵双鬓怕搔头。梅花对影君如鹤，萍水浮踪我亦鸥。胜地却惭尘俗客，输入题句姓名留。

申櫨

申櫨，字威堂，朝鲜人。官大将军。

申贞武公挽词

清白传家绝伎矜，建勋万卷老逾增。几尊风雨留宾酒，一穗湖山读史镫。

西南宦迹两依依，步武枢衡老不违。一言谬许平生志，万事空怀后死悲。

金宏集

金宏集，字道园，朝鲜人。

寄黄鹿泉

西江诗派远，健笔当汗竹。感昔阐幽光，琳琅不胜掬。共说龙喜社，风骚主盟独。开尊娱澹客，坐中列名宿。蒿目抚时艰，晋郑以我卜。寄托一何深，天道往必复。而我谢病久，执书愧未复。千秋有侨札，气义闻之熟。

姜玮

姜玮，字慈杞，朝鲜人。有《古欢堂集》。

金山寺和崔石樵上舍

试觅铜瓴第一泉，金焦宛在洞中天。谁携《贝叶》六千卷，独住精蓝五百年。孤磬寥寥云际落，华镫的的夜深悬。商量起灭人间相，多爇风炉一炷圆。

黄梅道中怀独悟上人

水木清华洞府明，坐怜衣袂白云生。傲傲过鹿如相唤，策策游鱼亦不惊。清绝湖山今夜梦，冷来风雨十年盟。云游妙伴栖何处，头白人间旧向平。

自日本东京拟回国至赤马关闻国中有变诣山寺恸哭遂为缙服有遐举之志

日边消息使人惊，遥倚西风涕泪倾。家室苍茫何足问，宫闱震荡若为情。匡时未任夷吾责，避世空怀仲子清。筇竹一枝芦一叶，栈云阁雨且孤征。

李根洙

李根洙，字桐人，朝鲜人。

题姜慈妃象

万二千峰佛顶人，七十二鸥堂中影。忽如枯木忽奔湍，山人定本定非定。镫前颧颊任模糊，砚背须眉不碍粗。耐想寻师千里外，海天一笠近髭苏。

金泽荣

金泽荣，字于霖，朝鲜人。有《沧江诗集》。

追感

半夜狂风海上来，玄冬霹雳汉城摧。朝衣鬼泣嵇山血，犀甲天慳范蠡才。炉底死灰心共冷，天涯芳草首难回。兰成识字知何用，空赋江南一段哀。

周晋琦约游狼山以脚弱不能应

万里江穷处，名山势特骄。天空僧影小，塔峻客魂摇。鬼误梅询足，虹无道士桥。望尘凝恨甚，况值月明宵。

何宗穆

何宗穆，安南人。

赠朝鲜使臣

周原万里共驰驱，才立谈閒志意殊。道理渊源攸一揆，衣冠礼乐却同符。畏天各谨侯朝度，任士同归王会图。流水高山琴载鼓，知音世有子期无。

阮公沆

阮公沆，安南人。

简朝鲜国使俞集一李世瑾

沧海扬尘几度三，炎邦自昔宅交南。六经以外无他道，一岁之中熟八蚕。万户鱼盐常给足，四时花木共敷覃。归来宣室如前席，似与观风助一谈。地各东南海际居，计程一万又零馀。威仪共秉周家礼，学问同遵孔氏书。好把文章通肯綮，休论温饱度居诸。使轺云返重相忆，在子安知不我如。

范谦益



范谦益，安南人。

谢两广总督孔公

皇天有意属斯文，汶泗鍾灵岳降神。数仞宫墙增粉■，一方屏翰试经纶。宪邦文武威怀书，专阃东西宠渥新。圣泽宏宣膏雨润，荣孚穀仰慰来宾。

旅币寻常效簿来，湛恩今仰体柔怀。观光辱荷金鞍赋，醉德均叨绮席陪。久沐周仁覃海峤，重欣夏贡达江淮。紫薇静觉无涯答，万寿惟赓南有台。

范立齐

范立齐，安南人。

秋郊杂咏

野外连衡宇，秋高见远山。斜阳明一半，烟树断中间。国破家何在，年深客未还。紫芝如可采，一为问商颜。

书怀

故国山河已大殊，故园桑菊半荒芜。茫茫天地为逋客，扰扰风尘自腐儒。病骨平分秋岭瘦，臣心仍伴月轮孤。有人劝我杯中趣，为问三闾肯醉无。

阮宏匡

阮宏匡，安南人。

恭和御制赐朝鲜琉球安南诸国使臣诗

筵开前节值新筍，春暖名园诏问频。恩侈帡幪高覆物，泽覃优渥广同人。怀侯柔远天生圣，饱德观光子慕亲。化外幸陪冠带会，期颐介寿拜皇仁。

宋名朗

宋名朗，安南人。

恭和御制赐朝鲜琉球安南诸国使臣诗

虞廷肆觐未盈旬，拜奉天恩灌沃频。不限阳春覃异域，式隆膏泽宠来人。沦肌浹髓知优渥，望日瞻云妥戴亲。分外帡幪何报答，愿将嵩寿祝皇仁。

黎梁慎

黎梁慎，安南人。

恭和御制赐朝鲜琉球安南诸国使臣诗

天眷皇王启寿旬，亿年圣泽祝声频。御园日暖常佳气，华宴春浓及远人。星度共旋依北极，威颜咫尺仰慈亲。观光幸缀明堂列，顶踵均沾雨露仁。

陈登大

陈登大，安南人。

恭和御制赐朝鲜琉球安南诸国使臣诗

虞阶何待舞经旬，玉帛初通雨露频。煦育肯分千里外，绥怀浑似一家人。幸陪周宴清光接，近挹尧樽咫尺亲。新宠归来分海国，共将华祝颂皇仁。

阮止信

阮止信，安南人。

恭和御制赐朝鲜琉球安南诸国使臣诗

华旦欣逢万寿旬，春卮虔祝叩筵频。象方玉帛联王会，鹿宴笙簧慰远人。望日有年陶煦暖，朝天何幸妥尊亲。南归愿即呈黄耆，早拜丹墀仰至仁。

阮促

阮促，安南人。

恭和御制赐朝鲜琉球安南诸国使臣诗

九十韶光甫二旬，灵园莺燕报春频。星驰轮辔趋行殿，云集衣冠拜圣人。仰见英君德得寿，可知天命敬惟亲。金章玉席洪恩浹，泸伞难酬顶踵仁。

次东山偶忆兰溪渔者

东鲁行车雨雪飞，偶怀閒客钓鱼矶。二伦情谊心相合，十载穷通命每违。不审役形当世事，何如拭目看时机。首阳今日无人问，也任夷齐采尽薇。

阮辉莹

阮辉莹，安南人。

涿州题壁

远捧芝纶万里来，烟云绕向马头开。客囊衣在缝仍密，带得平安两字回。

陈文火著

陈文火著，安南人。

答复天朝册使

玉堂纶綍属才华，天汉遥遥载泛槎。驿路九千初发轫，《葩诗三百》旧生涯。胸中吐出霞千朵，纸上凝成雪六花。除却盛唐元白外，骚坛几见自成家。

庄诵瑶章咀丽华，不妨世号阿瞞槎。古来先进开新进，谢道无涯役有涯。向阙多君头未雪，望尘使我眼生花。此身如作衡山雁，北往南翔总是家。

吴时仕

吴时仕，安南人。

游绿云洞

巘岈翠巘俯苍波，洞口潏洄拥荔萝。岩邃造工施凿巧，景幽渔父占閒多。古今历阅英雄几，倏忽其如混沌何。开辟不应危栈旷，故增一座石弥陀。

魏克循

魏克循，越南人。

灵江晚眺

迢递川原合，潮风大海通。沙分村径绿，波卷夕阳红。百战威犹在，千年俗已同。清高凭眺处，草木亦思巧。

晚度横山关

南北关河旧此分，几层树栅屯三军。金戈一自行天讨，石垒从教锁白云。雨过青山晴似拭，帆移碧海日初曛。陈黎土宇今为隘，万里秋风扫瘴氛。

马执宏

马执宏，字容斋，琉球人。

游善兴寺

寻幽古来寺，旭日照松门。石发翠逾顶，山丹红到根。偶闻清磬落，已远俗尘喧。何日逢支遁，无生细讨论。

蔡温

蔡温，字文若，琉球人。有《澹园集》。

吴我天底道中

林树冥濛隐碧天，穿行忽睹数家烟。藤萝拂袖露常湿，石径横云马不前。山远时添游客恨，潭深疑有毒龙眠。何年此地开幽境，断绝风尘学散仙。

千手院访赖全上人

僧寺从来爱碧山，上人独傍万家湾。松花落地茶方煮，竹径临江门不关。旷野晨钟千树秀，半窗夜月一心閒。应知传说蓬瀛处，只在风尘咫尺间。

郑永功

郑永功，琉球人。

恭和御制赐朝鲜琉球安南诸国使臣诗

御极垂衣正八旬，普天沐德献琛频。四夷骈贡蒙王化，五代同堂仰圣人。召入华筵龙液酒，飞登紫苑凤卮亲。天颜咫尺沾恩湛，永祝昇平万寿仁。

阮超叙

阮超叙，字松庵，琉球人。

送人之官外岛

六月南风欲送君，临歧人语那堪闻。扁舟明日千馀里，回首中山只白云。

郑孝德

郑孝德，字绍衣，琉球人。

秋日偕蔡汝显游悯忠寺

燕山九月秋，相约梵宫游。树密禅扉静，苔深曲径幽。香云笼古殿，花雨入经楼。上界西风峭，钟声傍晚愁。

郑孝思

郑孝思，字绍言，琉球人，孝德弟。

江楼晚望

欲舒惆怅独登楼，四面山川晚色幽。倦鸟冲烟投暮树，归舸带雾到前洲。云深远寺钟声起，风转层楼水气浮。俯仰骋怀情最好，渐看海角月华流。

梁学孔

梁学孔，字时亨，琉球人。

客中逢雨

细雨随风拂草堂，晚来弥觉一身凉。披襟不寝犹烹茗，怕益离愁梦故乡。

魏学源

魏学源，琉球人。

末石社坛

飞阁人间远，登临畅客心。不知山远近，祇见白云深。

送别

五月榴花满径芳，骊歌一曲断人肠。劝君莫忘殷勤意，明日悬帆即异乡。

蔡如茂

蔡如茂，琉球人。

夏日游护国寺

为有乘凉约，经过波上楼。山因邻碧海，夏亦觉清秋。天落花如雨，人看石点头。薰风宜少住，日暮尚迟留。

